

مكرر
كبيره الأستاذ
مكرر الجبل
مكرر الجبل التمسك
فتوح قنديل
المستشار

المفرونة

فتحي فضل

الغلاف من تصميم المؤلف

إهداء

إلى السيد

قاضى محكمة مصر القديمة الجزئية

الذى حكم فى هذه القضية بعد أن استمع إلى أطرافها فى صبر.. واستجاب
لنداء العقل والمنطق والعدل .. فاستشعر الحقيقة .. واستقر فى يقينه أننى
برئ .. رغم أن المستندات التى أمامه تديننى

فرايت أن من واجبى أن أحكى له القصة كاملة بتفاصيلها الدقيقة التى لم
يشملها ملف القضية .. وأن أهدى الكتاب إليه .. مع الشكر له .. والتحية
للقضاء المصرى

فتحى فضل

عندما يعجز القانون عن معاقبة الجانى .. يضطر
المجنس عليه الى اللجوء الى .. قانونه الخاص .
المؤلف

مقدمة

بطل هذه الرواية محتال.. إنه وسيم أو قبيح .. غنى أو فقير .. ذكى أو غبى .. حكيم أو عبيط.. واع أو مخبول .. حسب ماتقتضيه ظروف الخدعة.. يفتش بذكائه وأدواته وأعوانه عن ثغرة أو نقطة ضعف أو غفلة فى الضحية وينفذ منها .. وينفذ جريمته

وهذا الوحش الشرس أغلب ضحاياه من النساء

يلهو بأموالهن

وينهش أعراضهن

ويتغذى بلحمهن

وللأسف.. لم ينله القانون بعد .. وللاّن مازال يعيش حرا طليقا بيننا

وبطلتها إمرأة جميلة .. اسمها الحقيقى جميل ونادر وله معنى .. ورغم هذا كانت تطلب من الآخرين أن ينادونها (وسام) فقد كانت تؤمن أنها وسام على صدر أى رجل .. وتقول (الوسام شرف ورفعة ومجد وفخر.. ومن يحمله يتباهى به .. والكل يحلم به ويتمناه .. ومكانه دائما فوق الصدر)

هكذا كانت ترى نفسها من خلال مرآة غرورها وكبرياءها وتكبرها وتجبرها .. وهذا مفتاح شخصيتها .. وسر كل مشاكلها فى الحياة .. ونقطة ضعفها التى اصطادها منها المحتال .. والخط الدرامى الأساسى فى هذه الرواية

والتشهما .. عجوز .. تصابى و غفل عن أن (فى كل شئ.. يأتى الفشل عندما لاتفرق بين الخير والشر.. بين الفائدة والضرر.. والحب شئ ككل الأشياء.. عندما نتهالك عليه.. نهلك)

فى منتصف القصة.. قالت له (وسام) فى تحد وغضب .. (أنا ليستك العمة) وفوجئ
وذعر وقال لها .. (كفاية يابنت الناس .. كفاية كده .. وكل واحد يروح لحاله واحنا لسه على
البر .. مادام لبستينى العمة .. لو اتجوزنا ح تلبسينى طرطور ..) واقتربا

وعادت واعتذرت وسامحها .. ومن فرحته بعودتها قال لها (الآن أضع كل بيضى فى سلة
واحدة رهن إشارتك .. فما أجمل أن أرتكب هذا الخطأ من أجلك ياسيدتى)
وكانت عند وعدا .. لا ألبسته العمة ولا الطرطور .. ألبسته خازوقا .. فخسر كل البيض

وهكذا كان قدره .. عندما غفل عن الفرق بين الوسام والخازوق .. الوسام يأتى من
الأمام وفوق الصدر .. والخازوق يأتى من الخلف ومن تحت .. عاشق فاشل تهالك فهلك ..
ويدلا من الوسام أخذ خازوقا

الرواية كما حدثت بالضبط.. مضافا إليها أو محذوفا منها ما يتطلبه العمل الأدبى .. من
أسلوب وخيال وتركيز وتكثيف وإضاءة وتعظيم.. لإضافة العناصر الجمالية والدرامية والحبكة
الروائية وتحقيق العناصر الفنية والتقنية والإبداعية والبناء الدرامى للرواية .

عنيزوى القارون

إنس الآن المقدمة وابدأ قراءة الرواية .. ولا تمل الجزء الأول منها.. لأنه عاطفى
رومانسى حالم.. فهو (الفرشة) الفنية والتقنية لما بعده من أحداث .. وله مدلوله بعد ذلك
فى أحداث الرواية ..

كالسفينة .. فى بداية رحلتها فى عرض البحر .. الهدوء والدعة والاسترخاء الحالم ..
يخرج الركاب إلى سطحها .. ينعموا بجمال وسحر الطبيعة .. إلى أن يأتى ما فى الغيب
ويتغير الطقس.. فتتقلب الأمواج الوديعه المتتابة كاللحن الجميل إلى هدير هجومى مخيف
.. والنسيم العليل إلى زوايع مزمجرة وأعاصير خطيرة.. والليالى القمرية إلى ليال سوداء ..
وهواجس مفزعة وأحداث ومفاجآت دامية مفاجئة .. إلى أن تصل السفينة إلى شاطئ الأمان
.. فتحصى خسائرها .. أولا تتصل .

تفحص المكان فاستقرت عيناه عليها.. إنها أجمل الحاضرات وبجوارها كرسي خالي.. فاقنن أن القدر قد أهداه أفضل مكان فتوجه إليه وجلس.. أرسل لبعض المعارف ابتسامات.. ولماعادت عيونهم إلى المنصة رجع بالكرسي قليلاً ليتمكن من رؤيتها بحرية بحيث لا تراه.. وذهبت عيناه تقيس كل شيء فيها

طولها هو المناسب المستحب عند الرجال.. لا مكتنزة شرقية ولا تحيلة غربية.. بشرتها بيضاء.. ليس البياض الغريب الثلجي.. بل الشرقي الملون بلفحة الشمس.. ثوبها محتشم يغطي ذراعيها وصدرها.. البلوزة البرتقالي تبرز البرتقالتين المحبوستين على صدرها.. خصرها نحيل تنبعث بعده عجيزتها كبالونة مضغوطة تفيض عن مساحة الكرسي.. ساقاها مختلفيان.. فتمنى لو كان ثوبها قصيراً لتكتمل له الصورة

وبعد حساب عام سريع عاد إلى وجهها.. وجه تناغمت أجزاؤه.. لوحة رائعة انسجمت فيها الألوان.. شعر أسود فاحم غزير.. وحاجبان سوداوان دقيقان مرسومان بمهارة.. وعينان تلمعان بهريق يغطف الفؤاد.. وأنف دقيق رومانسي يرمز لمعاني الرفعة والكبرياء.. والفم شفتان يلتقيان فيحدثان تناغما ورسمًا جنسياً يسيل اللعاب.. وينفجران عن سن لؤلؤي.. وحياء ينبعث من كل صفحة وجهها

(بحق من شكلك بحساب.. وخلقتك جميلة فوق كل حساب.. وأتى بك في لحظة لم تكن في الحساب.. جمالك ظالم فابتسمي بحساب.. وحاذري.. فكل سن ستسقط من فمي المبهور سيحاسبك عليها الخالق يوم الحساب.. من فضلك ارفعي ذيل ثوبك قليلاً.. دعيني أقرأ باقي الحساب)

وظل شاردًا يتأملها ويناجيها.. إلى أن قامت الداعية بالتعارف وقدمت الموجودين.. فلما جاء دوره وسمع اسمه انتبه
- الأستاذ فهمي أبو الوفا.. رجل الأعمال والمؤلف الروائي.. وصاحب القضية السياسية الشهيرة التي كانت منذ شهور وما زالت حديث الناس
اتجهت الأنظار إليه.. وهي أيضاً.. واتسمت عيناه بالدهشة وشفهاها بابتسامة

- وأنا باقول شفت حضرتك فين.. دالوقت إفتكرت.. صورتك كانت في الجرايد
- هاها.. في صفحة الحوادث.. مع النشالين واللى قتل مراته واللى أكلت ذراع جوزها
اختفت ابتسامتها.. وبان عليها الحرج.. وأردفت
- آسفة.. ما اقصدش
- والا تقصدي.. ما أنا كنت معاشرهم في السجن

- مسكين !
(مسكين من يخطئ وينظر إلى عينيك .. عيون تقتل في عز الظهر دون أن تحاسب .. أنا قاتل
عيونك يااسمك إيه)
- أنا قريت إنك أخذت براءة ؟
- الحمد لله
- الله يجازيهم اللي ظلموك
(ظلمتني عيناك .. حساني أمامك .. نسياني الزمن .. لوتهما أخضر هادي .. اتساعهما يشرح الصدر ..
وبياضهما يبهج النفس .. ونظرتهما تهوس .. ولحظهما يلخبط الكيان .. جوهرتان في وجهك يا امرأة
فيهما آلاف المعاني .. عمري ما كتبت شعرا .. لكن أمام عينيك أنا شاعر موهوب تتسابق وتتقافز
في خاطري أرق الكلمات .. ويجيش وجداني بأجمل المعاني)
- حضرتك سرحت .. الظاهر إني حركت فيك ذكرى مؤلمة .. آسفة
- ياريت أقدر أقول لك أنا سرحت في إيه .. ومين اللي ظلمني
- قول .. مادام ده يريحك
- من غير زعل ؟
- طبعا ح ازعل مادام الحكاية مؤثرة
- أوعديني ماتزعليش
- مهما تأثرت مش ح يكون أكثر من لحظات .. لأن دي حكاية انتهت .. مجرد ماضي
- لأ مش ماضي .. أنا ح اتكلم عن الحاضر

ولمعت عيناها بانتباهة مفاجئة .. وترددت الكلمات على شفتيها .. وقالت
- أنا قصدي قضيتك
- ماهي قضيتي فعلا .. بس مش قضية الماضي .. قضية اللحظة اللي أنا فيها دالوقت قدامك
أرخت جفنيها فأخفت عينيها .. وزمت شفتيها .. وضغطت نواجزها فزاد جمالها .. وقالت لائمة
- بالسرعة دي عملت من قعدتك جنبى قضية !
- مش بسرعة .. دي قضية عمرها سنين
عادت تنظر إليه مندهشة
- قضية عمرها سنين .. بيني وبينك .. ؟
- صدقينى .. أنت كده على بعضك .. وفي حد ذاتك .. قضية
تراجعت بقلق .. وقالت بلوم
- الله يسامحك
- قضية متحركة .. قضية ماشية على رجلين .. قضية أنت فيها دائما الطرف الظالم .. وكل رجل
يشوفك في بيت أو شارع أو نادى أو ندوة .. طرف تانى مظلوم
نشطت حواسها وزاد التماح الدهشة في عينيها وقالت وهي تتفرسه

- فزورة دى .. والا بتلعب بالألفاظ علشان تشد انتباهى .. باين عليك دون جوان كبير.. بس مش شايف إنك كبرت على الحكاية دى شوية
- عجوز يعنى ؟
- يعنى
- ماهى دى القضية
ابتسمت .. وتنهدت فى صبر مفتعل وقالت
- قول ياسيدى .. وإن كنت خلاص عرفت اللي أنت ناوى تقوله
- ما أظنش
- ح تقول لى عينيكى حلوة.. وباحلم بك من زمان.. وأنت قضية الساعة.. ورغم كده أنا مضطرة اسمعك لأنك شدتنى فعلاً.. بس ما أقدرش أوعدك إنى ح اصدقك.. وقبل ما تتكلم توعدنى ألا تتجاوز حدود اللياقة
- انت ذكية
- الحكاية مش محتاجة ذكاء.. لأنى باسمع الكلام ده كل يوم
- رغم إنك حكمتى فى القضية قبل عرضها.. فأنا مصر أعرضها لأنها مش كده بالضبط استدارت إليه قليلاً وابتسمت وقالت
- ح تحول فيها شوية.. بدل ما تقول قضية الساعة .. ح تقول قضية امبارح والنهارده وبكرة .. ماهى الست الحلوة اتخلقت علشان كل رجل يقابلها يذاكر عليها شوية.. ماشى ح اسمعك.. ذاكر ياسيدى.. إن شاء الله وبدون مقاطعة.. ساقط ساقط *
وضحكا معاً.. وصرخ هاتف فى داخله
(يخرب بيتك.. عينيكى تهوس.. ح اتكلم إزاي ا)
- الساقط له ملحق
- مافيش ملحق.. طرد على طول من المدرسة.. لكن أنت عجوز على المدرسة .. لوسقطت نرجعك السجن تانى
(مسجون أنا فى جمال عينيكى.. أسير حلوة شقايفك.. أسير وراك ليوم القيامة)
- إيه.. ح تسرح تانى .. اتكلم
- أتكلم إزاي وعنيكى قدامى
- الله .. أول القصيدة كفر.. هات من الآخر يا روميو

وعادا للضحك معاً.. وزاد بينهما الانسجام.. وتاها دون أن يدريا عن باقى الجماعة.. ثم عادت لوجهه مسحة الجد.. فشاركته فيها وانتهت
- زمان وأنا صغير لما كنت أحتاج حاجة ألقبها فى الشارع.. فلوس.. قلم.. كورة.. وتكررت الظاهرة حتى وصلت إلى حد الإرادة (أريد فأجد).. طبعاً مش بالضبط وكل مرة.. لكن على أى حال اتكررت كثير.. ولما كبرت اختفت الظاهرة فسألت نفسى.. إيه الحكاية؟.. هى الصلة الروحانية اللي

كانت بينى وبين القدر اختفت ليه.. ثم اكتشفت السبب .. أيامها كان طولى متر. وكانت عيني قريبة من الأرض وتشوف البريزة وقلم الحبر.. ولما كبرت طولت وعيني بعدت عن الأرض.. يمكن باصاف البريزة لكن عيني ما بتشوفهاش.. الشئ الغريب.. وأنا جى النهارده افتكرت الظاهرة القديمة ورجعت لى طفولتى واتمنى.. وجيت الندوة تحت احتمال إنى (أتمنى فأجد) - براقو.. كده انتهيت من المقدمة.. وح تخش فى الموضوع.. ح تقول اتمنى أشوفك حصل

- أيوه كده.. اظهر وبان عليك الأمان

- والله حصل.. اتمنتك بالصوت والصورة

- ياسلام .. بالجيبه سودة والبلوزة برتقالى ؟

- بالضبط.. أصل أنا أحب قوى اللون البرتقالى

- والعيون خضر ؟

- لا الكذب خيبة

- اتمنتهم إيه.. سود ؟

- لا .. زيتونى

- براقو.. ماهى زيتونى دى تمشى على كل لون .. إن طلعت سود يبقى زيتون اسود.. وإن طلعت

خضر يبقى زيتون أخضر.. وإن طلعت عسلى برضه فيه زيتون عسلى.. لا شاطر

- إيه.. مش مصدقانى ؟

- ما اتمنتش كمان يكون اسمى صابرة وأمى صابرين وأبوى عبدالصبور ؟

- حقيقى اسمك صابرة ؟

- صابرة على كلامك

- بتتريقى ؟

- قضيتك قديمة يا أستاذ.. اشتكى منها كثير قبلك.. بس الشهادة لله أنت عرضتها بطريقة جديدة..

خلتنى أسمعك بانتباه.. زى النكتة .. مانصدقهاش لكن نضحك لها وتسعدنا.. اسمع لى أرجعك

تانى للسؤال اللى هريت منه.. مش شايف إنك كبير شوية على العواطف دى.. عمرك كام سنة ؟

- حلزى ؟

- لو سألتنى قبل ما تتكلم كنت جاوبتك بالضبط.. لحظة ماشفتك كنت عارفه سنك.. لكن طريقة

كلامك توهته منى

- مش مهم تعرفى بالضبط.. لكن على أى حال أكبر منك

- متهيا لى.. أكبر منك دى.. متواضعة شوية

- قصدك أكبر منك كثير ؟

- يعنى

- يعنى إيه ؟

- يعنى فاضل لك زلطة وتطلع بره

- مش بالضبط..فاضل لى شوية زلط .. ومش المهم كام .. المهم إزاي ألعب بهم
 - تدينى كام سنة؟
 - خمسة وعشرين
 - إنت كذاب أو منافق
 - ليه؟
 - أنا سننى سبعة وثلاثين
 - إذا كانت حدوتة واحدة حكيتها لك توهدت منك سننى .. عارزانى أعرف سنك بعد كل حواديتك
 - أنا حكيت لك حواديت ؟
 - شفايفك حدوتة .. وعيونك حدوتة.. وفستانك مليون حواديت
 - شيل عينك من على صدرى.. واحترم وعدك
 - آه يا وعدى
 - إنت تعبان .. أطلب لك دكتور
 - اطلبى لى الإسعاف.. أطلبى لى المطافى
 - ح أطلب لك البوليس
 - موافق.. مستعد أسجل الكلام ده فى محضر رسمى وأوقع عليه .. وبعتها اطلبى لى محامى
 - مش ملاحظ إن الندوة خلصت .. وأغلب الناس مشيت
 - أنا مش ملاحظ حاجة من ساعة ماشفتك .. هوكان فيه ناس .. هوكان فيه ندوة !

وانتبه لتحذيرها فاعتدل فى جلسته وأخفى كثيراً من هيامه ووجده .. وقال متأملاً
 - فيه إنسان .. رجل أو امرأة .. يفض يده من الحياة بدرى وهو فى سن الشباب ويعيشها متفرج ..
 ويخاف يحط صوابه فى شق تنزق أو يمدح للنار فتتحرق.. يخاف من لسعة الأيام.. وفيه إنسان
 عكسه.. يكافح ويغامر ويحط صوابه فى كل الشقوق ويفضل إنه يعيش الحياة إلى آخر أنفاس
 عمره.. وده راجع لعوامل كتير.. وراثية ومكتسبة وصحية ونفسية وثقافية.. ولذلك فالناس
 مختلفة.. وصوابك مش زى بعضها.. ماتت عجيب لما تقابلى رجل فى سننى احياناً يعيش طفولته
 ويعلم ويتمنى.. كلنا أطفال كبار

انتهت الندوة.. وانصرف الأغلبية وتحرك الباقيون فى مجموعات إلى كافتيريا النادي.. وحضرت
 صاحبة الندوة وصحبته إلى هناك.. فلحق بهما وتلكأ أمام منضدتهما فنادت الداعية.. فلم يتردد..
 ودار الحديث بين الثلاثة حول موضوع الندوة.. ثم انتقلت الداعية إلى منضدة أخرى.. فهى هنا
 مضيفة للجميع

(آه.. انتقلت من العام للخاص.. أصبحت معها وحدكما على منضدة منفردة.. برافو عليك يا ولد
 يا فهمى.. مازال فيك لسان.. مازال فيك حيوية وشباب.. بنت مثل لهطة القشقة.. موزة مقشرة..

يا جمال النبی.. قول شیء الله یفتح علیک.. فرصة العمر بین یدیک.. تحرك یا بنی آدم.. إعمل شیء..
أی شیء.. قبل أن تفاجأک وتغادرک هی الأخری)
- تسمعی أشرف لك الکف
- بتعرف؟

- یعنی
فردت کفها علی طرف المنضدة فمد یدہ.. فعادت بیدها ونظرت إلیه نظرة حلوة محلزة وقالت
- من بعيد.. من غیر لمس.. بعینک بس
هز رأسه موافقاً فعادت بکفها إلی طرف المنضدة
- نبدأ بالماضی والا الحاضر والا المستقبل
- الماضی طبعاً
وتأمل أناملها باشتیاق.. ویان علی وجهه أنه یرى فی کفها عجباً.. وقال
- فی الماضی.. کنتی صغيرة.. برعم أخضر
إبتسمت فی سخریة وقالت
- برافو.. ده أنت بتعرف صحیح.. إزای عرفت إنی زمان کنت صغيرة !
- وفی الحاضر أصبحت وردة ناضجة مفتحة شکلها یسعد العین ولونها یبهج النفس وریحتها تعطر
الفؤاد.. أصبحتی سيدة حلوة جمیلة
- کل ده فی کفی.. والا فی دماغک

واسترسل یهمس بما جادت به نفسه.. وجیشان فؤاده.. وما أوحى به روعة اللحظة.. فأسبلت جفنیها
ومالت بجذعها للأمام واسترخی صدرها علی حافة المنضدة وطأطأت رأسها وتهدجت أنفاسها..

وتوحدت مشاعرهما.. وسرى النسيم.. وزقزقت العصفیر فی اللیل.. أو خیل إلیهما ذلك.. وظلا
فی حوار وهمس.. لا تسمع آذانهما سوى همسهما.. ولا ترى عیونهما غیرهما.. إلی أن لحقت بهما
الداعیة فأفاقا.. وعادت لعیونهما الرؤیة ولآذانهم السمع.. وأدركا أن کل المناضد قد خلت.. ولم
یبق حولهما سوى الجرسونات
ودعتها صاحبة الندوة لتصحبها فی العودہ.. وودعته.. فدعا علی من كانت السبب.. هادمة اللذات
ومفرقة الجماعات

رجع بشعور غريب.. شعور رجل مفلس جداً لم ير المال من زمن.. وفجأة عثر على حقيبة بها مليون جنيه.. إن ما حدث شيء لا يحدث.. يتمنى فيجد.. يجد قلماً جائز.. لكن يجد امرأة (ماحصلتش) فشيء غير جائز

فضل المشى.. عبر الكوبرى كأنه يمشى بقدرة خارقة فوق الماء مباشرة.. تكاد فرحته ترفعه عن الأرض.. مشى بغطى واثقة.. واستنشق نسيم الليل بعمق وشهية كأنه يبغى أن يبتلع الهواء كله.. خطواته متحمسة نشطة يكاد يجرى.. لولا أنه كان حريصاً على ألا تنتهى مسافة الكوبرى حتى لا يفقد هذا الإحساس اللذيذ بمشاعره التى تفجرت.. واستشعرت الحب والخير والجمال.. وتمنى أن يرفعه النسيم العليل عن هذه الأرض إلى أعالي السحاب.. فقد زاد حجمه.. ولم تعد الأرض تسعه.. وأصبحت فرحته وسعاده أكبر من اتساعها

تمدد فى فراشه وعيناه مفتوحتان متجهتان إلى السقف محدقتان فى اللاشيء.. وتجمعت كل حواسه ومشاعره فى مظاهرة صاخبة.. وعاد يسترجع اللقاء من أوله.. يجمع ويضرب وي طرح ويقسم.. يحسب الكبيرة والصغيرة.. الإيماءة ومطة الشفاة والنظرة والابتسامة والغمزة والهمسة والاستحسان والاستنكار.. الحوار وما اعتراه من ارتباك أو تردد أو تأكيد.. وهاد يقيس جمالها المرئى منه والمستور.. فى الجسم والنفس والشخصية والعقل.. ويعطى لكل شيء درجة.. ويغالط لصالحها ويزيد الدرجات.. حتى طلع النهار

الصبح نقي.. قطرات الندى على زجاج النوافذ.. ورق الشجر زاد اخضراره.. ضوضاء الشارع همسات حالمة.. الأغاني لها معانى جديدة.. وهومسترخ زاهد عن مزاولته أى عمل.. كالمخدر.. كالحالم

الأيام التالية كانت مختلفة.. جافة موحشة صعبة.. وبدأت الرغبة فى اللقاء تأكله.. عجز عن لقاء الأصدقاء.. وعن القراءة.. فتح التلفزيون فرأى صورتها تملأ الشاشة.. وكل المذيوعات حملن ملامحها وحنة صوتها.. تذيع كل البرامج فى جميع القنوات.. واحتلت فى نفسه كل المكان والزمان.. فأخذ يتسلى ببعض الأسئلة يسألها لنفسه ويجيب عليها.. كيف سيلقاها.. وماذا سيقول وماذا ستقول.. اليوم الرابع اختلف.. حاول أن يعود لأحلام اليقظة ويتخيل لقاءات ومواقفاً ووقتها وحدثاً تشاركه فيه طعاماً أو قراءة أو سفراً.. ولكنه فشل

اليوم الخامس كان يستجدي صورتها فتستعصى عليه .. وأحياناً تأتي باهتة الملامح .. فاعتراه الهم وتسرب إليه بعض اليأس .. وأخذ يضحك من أحلامه .. أحلام الرجل الكبير الذي يحلم أحلام الشباب .. واتهم نفسه بالمراهقة .. ثم عزت عليه نفسه وأشفق عليها من الهوان فعاد يهون الأمر .. ويقنع نفسه أن ما حدث كان مجرد لحظات إنسانية عابرة لرجل تخطى الشباب التقى بشابة كبيرة كاملة النضج .. تضيف إليها تجربتها وثقافتها سنيناً فوق سنها .. لحظات كانت جميلة رائعة بين اثنين كبيرين .. لحظات أجرى فيها اختبار لأدواته التي كان يظن أنها قد صدأت فوجدها مازالت بخير وصالحة للعمل .. فتأكد أن العمر لا يحسب بالسنين ولكن بالشعور والإحساس

في اليوم السادس .. وقد اقترب اللقاء .. عادت أحلامه وانتعشت مبهجة .. وكلما مرت ساعة زاد حماسه .. اختار الملابس التي سيلبس بها باكراً وجهزها .. ورغم أن حلاقة ذقنه قد حان موعداً فضل تأخير حلاقتها للغد .. وأخذ يعيد المحاولة لقتل الوقت بالتليفزيون أو التليفون أو الكتاب أو تصفح البومات الصور ومراجعة الرسائل والأوراق القديمة

وجاء الليل .. جاء بالثانية ساعة .. وبالدقيقة يوم .. جاء بالقلق والأرق واللهفة والشوق كالمرض .. فتألم .. واشتد به الضيق .. فقام مذعوراً إلى جهاز التسجيل .. يبشع أشواقه ومشاعره ويشكو له حاله .. ويتعجل اللقاء ويبدأ قبل أن يبدأ

(بعد منتصف الليل أسجل لك هذه الرسالة .. وقبل أن تحكى عليها أرجو أن تسمعها أكثر من مرة كانت ليلة من أجمل الليالي .. ليلة بألف ليلة .. وصدقة من عزيز الصدف .. فرغم أن الندوة كانت بها سيدات أكبر وأصغر منك .. فأظنك بأمانة تشهدين معي أنك كنت أجملهن جميعاً .. صدقيني ليس هذا غزلاً .. إنه تقدير للحظة .. وأنا كأى رجل أرتبك أمام روعة وعظمة الجمال .. ولكن لأول مرة .. وبعد هذا العمر .. أجد نفسى خارجاً على القاعدة ولا أهاب الجمال .. وأتمرّد على القاعدة وأتخطى الصفوف لأجلس بجوارك .. وأرتجل الحوار من غير سابق معرفة .. بدون حذر أو قلق من خطأ أو حساب لرد فعلك .. وتكلمت وسمعتني فتشجعت .. وتكلمت وسمعتك فانبهرت .. تعالى أحكى لك انطباعى عن هذا اللقاء .. وكيف عشت تلك الليلة وما بعدها من أيام

بذكائك وأفكارك وحوارك وسؤالك وتلميحاتك .. برقتك وانوثتك وجمالك .. كنت الملكة التي لا يعلو عليها ملك .. كنت الملكة والملك معاً .. هل كنت كل المملكة .. وكنت أنا مبهوراً بك شكلاً وموضوعاً .. شكلاً عيني عليك وموضوعاً أذانى معك .. بعد ساعة وجدت نفسى كأنى أعرفك من سنين .. قادراً على أن أكلّمك وأسمعك بحرية .. وفتحت نفسى .. فتسللت من خلال أذنى وعيني وسافرت فى دمي واستقرت فى قلبى وعقلى واحتللتنى .. فهتفت من كل وجدانى .. يعيش المحتل الجميل .. يحيا الاستعمار اللذيذ

وأصبح كل همى ألا أغادر المكان وأنا بالنسبة لك مجرد زميل فى ندوة.. كنت محتاجا إلى أن أترك بصمة تميزنى عندك وتذكرك بى.. فادعيت قراءة الكف.. نظرت فى كفك.. وبنفس الرغبة والإرادة والتمنى وجدت.. وشاء القدر لى التوفيق فنجحت تنبؤاتى .. ولم تكن أكثر من شغافية .. أوحى بها روحانية اللحظة وحلاوة اللقاء

علاقة أكيدة بين جمال شكلك .. وبين كلامك وأسلوبك وسلوكك ومبادئك وقيمك وأفكارك وتطلعاتك .. شخصية قوية لبقة مثقفة نادرة مختلفة.. وكل أدواتك صح .. فرقة موسيقية فى أبهى زينة تعزف صح.. عبرت عنها عندما قلت (أنا متوافقة جداً مع نفسى.. أنا متفهمة للأنا) وفعلاً أنا على يقين أنك مدركة تماماً لأبعادك وقايسة نفسك صح .. وتتصرفين من خلال هذا القياس وفق خطة وجدول ومنهج وبرنامج صح

معقول ا.. معقول كل مارآه المبدعون.. من الشعراء والأدباء والرسامون والنحاتون والموسيقيون والفنانون فى كافة أنواع الفنون واستشعروه وشغفوا به فى كل النساء .. يتجمع فى امرأه واحدة ا.. معقول أن تتحول أحلام العقلاء والمتهوسين والمحرومين إلى واقع وتتركز كلها فى امرأة واحدة.. لقد فتشت فيك عن غلطة أو بعض غلطة فلم أجد

لا أنت صيفاً ولا شتاء ولا خريفاً ولا ربيعاً.. أنت فصلاً خامساً.. شاملاً كل الفصول الأربعة .. بالله عليك خبرينى.. كيف أتى أبوك أمك.. كيف حملت بك.. بماذا كانت تتغذى وهى حامل.. ماذا أرضعتك.. كيف تربيت وبلغت وتأنثت ونضجت وجلست على عرش الجمال فى أبهى صورة.. كيف سوت الأقدار نفسك وأنضجت رأسك وعقلك وقلبك وجدانك واكتملت لك الأدوات .. فخرج كل فعلك راشداً برؤية واختيار .. ونضجت كل مشاعرك ونضجت بالنبل والجمال والحق والعدل والخير والرحمة.. كل هذا فيك يا مليكتى يا جليسة العرش يا حاملمة التاج لدى كل الشعوب

فقدت وعيى أمامك وفقدت وعيى فى غيابك.. والآن أكاد أجن وأصابنى الهوس فهرت واحتमित فى أحلام اليقظة.. وفى الركن البعيد الهادئ .. وحول المنضدة الصغيرة ذات الغطاء الوردى وبيننا ضوء شمعة.. جلست أمامك .. ورفعت من الزهرية زهرة صغيرة وقبلتها وزرعتها فى مفرق نهديك.. أهديت الزهرة زهرة.. وتمشيننا معاً.. معذرة.. أنا لا أعرف ماذا كان الطعام.. كل ما أعياه أنى كنت أقتات الفتات التى تسقط من فمك.. وهكذا اختلط الواقع بالخيال.. وسعدت بالإحساس

شعر وهو يأخذ مكانه فى الندوة أن سبع سنين مرت منذ أن كان هنا .. وزفر بضيق.. تمنى لو أنها حضرت قبله ليختار مجلسه بجوارها.. فما أدراه أنها عندما تحضر ستجد كرسياً خالياً بجوارها.. وإن وجدت قد يمنعها حياؤها.. كان الأفضل أن يتأخر قليلاً حتى تحضر قبله فيعفيها من حرج الاختيار.. ولكنه طيب خاطره قائلاً.. (ومن أدراك أنك لو حضرت بعدها ستجد كرسياً خالياً بجوارها.. إن معجبها وعشاقها هنا حتماً كثيرون.. والخيرة فيما اختاره الله .. اصبر)

مرت نصف ساعة وعيناه على الباب .. (لماذا تأخرت.. وهل تأخرها عادة أم صدفة أم قصد.. قصدها تلاعبك.. وتناورك)

ومرت ساعة.. وتبدل حاله.. تملكه القلق عندما انتبه إلى احتمال عدم حضورها.. لقد وردت كل الاحتمالات بخاطره إلا هذا الاحتمال .. (هل أرادت بغيابها أن تقتل القصة فى مهدها.. أم أرادت مداعبة تنعشها.. واضح أنها ليست من النماذج السهلة التى تمر عليها الأحداث بدون مراجعة)

ظلت عيناه مسلطة على باب النادى .. يتوقع مع كل ظل يقترب أن تكون هى .. ومع كل وافدة ترتدى البرتقالى يقفز من فوق الكرسى

وفجأة.. وعيناه هناك على بعد عشرة أمتار عند الباب.. وجدها أمامه على بعد مترين.. فمن شدة التوتر والقلق لم تر عيناه سوى اللون البرتقالى.. لم يتوقع غيره.. كأنها لا تملك سوى ذلك الثوب .. لم يتوقع أن تأتى فى ثوب من الجيبير والدانتيل الأبيض.. طويل منقوش واسع الذيل كثوب الفرح.. فلم يدركها لحظة دخولها .. وتخطتها عيناه بحثاً عن اللون البرتقالى

وجدها أمامه فجأة فارتبك وتلخبط كيانه .. وفى لحظة الضعف هذه نسي رزائنه وسنه واندفع وسحب كرسياً ودعاها للجلوس.. ولكنها تخطته بابتسامة معتذرة واتجهت إلى رأس الندوة وهى تقول (ح اقع على المنصة علشان أقطع التورته)

عاد إلى الكرسى مهدوداً مكثوداً.. وسأل جاره فقال له أن اليوم عيد ميلادها.. فأدرك أن مافعله خطأ.. كيف غافلته مشاعره وأفلتت منه وكشفتها أمامها وأمام الآخرين

وقفت أمام المنضدة التى على المنصة وشرعت فى تقسيم التورته وتوزيعها على الأطباق بمساعدة الداعية وأخريات.. وتحركت معهن بين الصفوف للتوزيع.. تقدم لكل مدعو نصيبه وتخدم الجميع ..

فقال لنفسه يصبرها.. (اليوم عيد ميلادها.. يهنئونها وترحب بهم.. ليست راغبة الآن فى جلسة شاعرية
وحوار غرامى.. قد يسمح الوقت بعد ذلك.. أنت تسرعت)

وطال الوقت.. تحركت وتكلمت وجاملت.. وتعاملت مع الجميع إلا هو.. وذهبت عينها إلى كل مكان
إلا مكانه.. تدور بعينيها على الجميع تطمئن على رضاهم.. وعندما تصل عينها إليه تتخطاه
كأنهما على خصام.. شئ عجيب لم يأت له فسى حساب

ومرت ساعة.. وهى ذاهبة آية أمامه ولم تقع عينها عليه.. حتى عندما وقفت أمامه تناوله نصيبه
ورفع عينيه إليها فى استجداء واسترحام لم تنظر إليه.. فتملكه الإحباط.. وعفت نفسه عن تناول
التورتي.. وأعاد الطبق إلى المنضدة كالطفل الفاضب.. ولاحظ أنها لاحظت ورغم ذلك لم تبد
دهشة.. فزاد إحباطه.. وخاف على نفسه أن تتمزق فأخذ يهددها ويسترضيها ليدافع عن كيانه..
عن حريته.. عن حقه فى الحياة.. عن أنفاسه المضطربة التى يخشى أن تخرج ولا تعود.. حاول أن
يفلسف اللحظة ليحمى نفسه من نفسه

(رغم أنها تحتفى بنا فهى المحتفى بها.. هى عروس الحفل ومحط أنظار الجميع.. نظراتها تحت
المتابعة وتحركاتها محسوبة عليها توزعها على الجميع بالعدل مع ابتسامة مجاملة خالية من أى
معنى.. ولكن نظراتها لك قد تختلف.. وقد تفضحها.. لهذا فقد تركتك لتتنظر إليها لأنك لست
تحت المراقبة.. تركتك لتتأملها وتقيمها وتقديرها وتحسبها.. عرفت من قراءتك للكف أنك تلتقط
وتقيم وتضع الأبعاد.. فتعبدت أن تتركك مع نفسك لتستكمل حساباتك.. وهى تشعر بكل هذا دون
أن تنظر إليك.. المرأة لا تنظر حتى تنصرف الأنظار عنها فتتنظر.. وتفتش المكان وتبحث بلحظ خفى
عمن اهتموا بها ونظروا إليها.. فطالما هى مدركة أن العيون عليها تظل حابسة عينيها.. تنظر
باحساسها.. تنظر للرجال من ظلهم دون نظرة مباشرة.. وتظل عينها لا تسترد حريتها إلى أن تتحرر
من عيونهم.. إنها المرأة يارجل ياعجوز على حد قولها.. كيف لاتعرفها)

ومرت ثلاث ساعات وعيناه تناجيها

(التقيت بك الجمعة.. حلمت بك السبت والأحد.. ألفت لقاءات وحكايات وحوارات معك الإثنين
والثلاثاء.. وهربت منى ملامحك الأربعاء.. وعادت لى الخميس مع اقترب اللقاء.. واليوم
الجمعة.. وأنا أمامك وكأننا لم نلتق من قبل

اقتربى.. أريد أن أستذكر ملامحك فسوف أحاجها غداً.. أنت حقاً جميلة أم بهيأ لى.. أنت ناسية
ماكان بيننا أم بهيأ لى.. هل تشعرين بى وتعطينى الفرصة لأتشارك أم بهيأ لى.. هل تفاضيك مقصود
لتزيدى لهفتى أم بهيأ لى.. هل إهمالك مقصود لأصرف النظر عنك أم بهيأ لى

أهكذا يابنت الناس.. أهكذا تنتهى الندوة دون حوار أو نظرة واعدة أو متدلة أو رافضة أو مستنكرة أو حتى مستقبحة.. جلست أمامك ثلاث ساعات ولم تلمحني فى الصورة.. الله يسامحك على أيام الانتظار والعذاب)

وتهى الجميع للانصراف.. وتحسست أصابعه شريط التسجيل فى جيبه فتذكر.. وجن جنونه.. كيف سيعود به.. لاهد من وصوله إليها.. لن يغمض له جفن طوال الأسبوع إن لم يصلها.. وبدون ترو.. اندفع كالمجنون حتى لحق بها.. ودس جسده فى الزحام عند الباب واعترض طريقها.. فوقفت مندهشة مشدودة.. وتجمدت الحركة والمشاعر بينهما لحظة.. وأخرج الشريط وشهره فى وجهها فيما يشبه الغرض كأنه يشهر سلاحاً.. وقال بعصبية

- شريط السيمفونية اللى وعدتك بها

وفهمت أو لم تفهم.. مدت يدها وعيناها مسلطة عليه وأخذت الشريط.. فاستدار واختفى وهو يكاد يبول على نفسه.. ولكنه استراح

وعاد للبيت.. وهو لا يدري كيف عاد.. ودخل الحمام وتخلص من ملابسه كأن همومه قد علقت بها.. وفتح (الدش) وأغرق جسده ورأسه الملتهب بالماء البارد.. وعاد له ضعفه وشغوره بفارق السن فلام نفسه

(كل ما حدث فى اللقاء الأول دخل إليك وعاش فيك أنت.. لماذا تفترض أنه دخل إليها وعاش فيها.. أنت عدت بها إلى بيتك.. من أدراك أنها عادت بك إلى بيتها)

ونام بلا طعام واستطاع فعلاً أن ينام.. فالمنتظر المتلف المتوتر القلق يأرق.. أما المحيط المهزوم المحزون يستسلم وينام

ارتجل الأيام بلا ترتيب أو تنسيق .. اشتغل بعض الوقت وتشاغل بعضه .. وسأقر بعض الوقت وتشرد بعضه .. تذكر بعض الوقت وتناسى بعضه .. ولما ضاق وكره المكان والزمان فر إليها ..
احتمى بها منها .. لجأ إليها عبر جهاز التسجيل
(أنت فى نظرى بكل أبعادك .. طولك وعرضك ولونك ووزنك وشكلك .. أخلاقك وسلوكك ولباقتك وثقافتك وروحك وخفة ظلك .. أنت المرأة المثالية .. التى تشكلت فى وجدانى من احتياجاتى ورغباتى وقيمى وأفكارى ورؤيتى فى الحياة .. المرأة التى لو تعاملت معها لا تكسر بداخلى عناصرى ومكوناتى وأبعادى .. بل تدعمها وتنعمشها وتحمسها وتطلق عنانها فى التفاعل مع الحياة .. المرأة الراقدة بداخلى .. واختفت ملامحها مع طول الانتظار ومرور السنين .. نعم صادفتنى بعض ملامحها مع غيرك فى رحلة الحياة .. ولكن صدقتنى لم تصادفتنى كاملة متجانسة متألقة مع الصورة التى رسمتها فى خيالى إلا معك

وقت هذا التسجيل أنا فى حالة هيام .. دعينى أسمع لعواطفى المحبوسة أن تنطلق .. أريدك بكل أبعادك .. أريد أن نمشى معاً ما بقى لى من العمر .. نمشى معاً خطوة موحدة لفردين على رتم وإيقاع واحد .. جسدين لنفس واحدة .. أحلام وأمانى وتلوق للحياة واحد .. لا أقصد بذلك أن يمسح أحدا الآخر فيسيطر عليه .. بل أقصد أن يندمج الإثنين فى واحد أكبر من كل منهما .. أتمنى تكاملاً يزيد من قدرة كل منا على التفاعل والتعامل مع الحياة .. أتمنى كل هذا فى الصح .. بالدين والقيم والاحترام .. ولكن ليس من المناسب الآن التصريح المباشر فالصراحة المباشرة تنهى القضية قبل أوانها .. تنهى المشوار قبل أن نمشيه .. الصراحة المباشرة تقتل الأحلام
أتمنى أن أركب معك قطار الحياة لنقضى معاً ما بقى من العمر من خلال حلم يسمو فوق الواقع المرير الذى نعيشه .. نتجاوز كل تجرئى وتجربتك .. وكل ما فاتنى وفاتك .. قطاراً نصنع عجالاته ونتحكم فى اتجاهاته وسفرياته حسب أحلامنا .. أتمنى معك تجربة لم يسبقنا إليها غيرنا .. نرفض أشياءً كرهناها فى الناس .. نحقق أشياءً أحببناها فيهم .. قد لا تكون كل خطواتنا ناجحة دائماً .. ولا كل محاولتنا موفقه دائماً .. لكن يجب أن يكون كل فعلنا بحثاً عن الأفضل دائماً .. لو شرحت لك أحلامى بالتفصيل سأشعر أننى أشتري خاطرك ورضاك بالأمال والوعود .. وهذا مالا أرتضيه .. لا أريد أن تأتى عواطفك من خلال وعود .. ولا أن نبدأ بالنتائج والنهائيات .. حتى لا تتحول المشاعر إلى مصالح .. فسبق أن عاش كل منا تجربته وعانىنا من المصالح واختلاف القصد والهدف .. بعد ذلك تتشكل المصالح والأهداف .. فما أسخف الحياة لو تجردت من الأحلام .. لا بد فى الواقع نسبة من الحلم .. ولا بد فى الحلم نسبة من الواقع .. لذا لا أريد أن يخسر الواقع جماله ولا الحلم روحته لو شرحناهما وقنناهما وحولناهما إلى مشاريع ووعود وعقود .. كل منا استقبح فى تجربته وتجارب الآخرين أشياء .. وتعلمنا منها .. فتعالى نعيش القليل الآتى أفضل من الكثير الماضى .. الآن أضع كل بيضى فى سلة واحدة رهن إشارتك .. فما أجمل أن أرتكب هذا الخطأ من أجلك ياسيدتى

وصل بعد الموعد بقليل وهو خائف.. خائف أن يجدها ويتكرر موقفها وتجاهلها.. وخائف ألا يجدها فيعاني من الانتظار.. ووجدتها ولكن لم يجد كرسيها خاليا بجوارها فاتجه الى أقرب كرسي (نجحت في اللقاء الأول ورسبت في الثاني.. وهذا هو الملحق.. وليس بعد الملحق ملحق.. لابد أن أحاول .. إذا نجحت ارتحت.. وإذا فشلت ارتحت.. المهم ألا أترك نفسي للقلق والضيق.. لابد من خطوة للأمام أو للخلف.. أما خطوة محلك سر فلن أستطع تحملها في الأيام التالية .. لن أقدر على الصبر أسبوعاً ثالثاً.. لا لن أتحمل هذا العذاب .. إن لم يسمعني الظرف سأخلفه شكراً جزيلاً أيها الشاب.. تركت مكانك لتجلس بجوار زميلة في الصفوف الأمامية.. تخطيت ثلاثة صفوف تحت بصر الجميع وجريت وراء مبتفك.. واقتحمت فرصتك.. ولم تخف ولم تتردد ولم تضيق وقتك.. قم وخذ كرسيه فهو في الأصل كرسيك .. قم قبل أن يحتله معجب آخر فيأكلك الندم.. قم يا رجل.. الانتقال من كرسي إلى كرسي يكلفك كل هذا العرق والعناء.. لا تعمل حساباً لما قد يقوله الناس ولا ما قد تقوله هي.. حتى لو قالوا عبيط أو مجنون.. فلست أول عبيط ولا آخر مجنون.. ليت الشباب يعود يوماً لأشكو له ما فعل المشيب)

نظر إليها بنصف عينيه فارتاح لثوبها ولونه الهادي .. وارتاح لأن ذيل الثوب كان مرفوعاً عن الحذاء حوالى شبر فاستطاع أن يقيس محيط ساقها.. ولأن المرأة دائماً تراعى في اختيار ثيابها ما يستر عيوبها فقد تشكك في اللقاء السابق أنها ترتدى الملابس الطويلة ربما لتخفي نحافة ساقها.. فلما رأى الساق ملفوفة مشبعة طابت نفسه.. كأنه فعلاً قد امتلكها وأصبحت امرأته ولم تعد أمامه مشكلة سوى الساق.. أخذ يتلصص على ملامحها.. ويشرب بعد عطش ويتشرب بعد جفاف.. فاستقر في وجدانه أنها بكل المقاييس جميلة وتستحق ما عاناه طوال الأيام والليالي الهارحة

بالتفاتة منها بدت طبيعية التقت الوجوه فابتسمت.. فتشجع ونهض وجلس بجوارها

- مساء الخير

- مساء النور

- إزى الصحة

- الحمد لله

ثم اتجهت بوجهها للمنصة فلم يسمح الظرف بالكلام.. حتى انتهت الندوة.. وحضرت الداعية كالعادة وصحبتهما إلى الكافيتريا.. لم يتلصصاً أمامهما هذه المرة .. واعتبر الدعوة السابقة مفتوحة لكل مرة.. واقتحم الطريق إلى المنصة واستأذن وجلس .. وبلا مقدمات دعاهما إلى العشاء .. فنظرت الداعية إليها تستوضح رأيها فسكتت.. فنهض ليفسر سكوتها بالقبول ويحثهما على القيام .. فنهضتا.. واتجهوا إلى المطعم في آخر الكافيتريا

لم ترفض الدعوة.. ففلسف اللحظة وقال لنفسه.. (ليس من المعقول أن تقبل الدعوة من شخص تستسخره لأن في إمكانها وبكامل الحرية أن تعتذر.. فالمقبول هنا هو أنت لا الطعام.. وهذا معناه

أيضاً أنها قبلت التسجيل .. قبولها هو قبول لفزلك وعواطفك واستجابة لفرامك بدرجة أو بأخرى..
فكل بشهية واهناً وهنى نفسك.. وأول الفيث قطرة)

على المنضدة المربعة صاحبة الندوة على يساره وهى على يمينه..وتحدثوا واسترجعوا مادار فى
الندوة إلى أن حضر الطعام .. وجامل صاحبة الندوة بتقريب الملح ثم الماء ثم أطباق السلطة..حتى
يتسنى له تكرار ذلك مع صاحبة القصد والنية.. وانتبهتا إلى الطعام..وانتبه هوإلى وجهها..إلى أن
قامت الداعية إلى دورة المياه ففاجأها بالتسجيل..شهره فى وجهها وابتمسم.. فابتسمت

- سيمفونية لبيتوفن

- بيتوفن والا فهمى أبو الوفا ا

وضحكا..والتقطت التسجيل وعيناها على باب دورة المياه واخفته بسرعة فى حقيبتها..فابتلع ريقه

- كلفنى كثير

- كلفك كام ؟

- سبع أيام بلياليهم.. وشريطين اسبرين وخمسين فئجان قهوة.. واستهلاك كهربا... وكتاب تخلفت
عن قراءته.. وأصدقاء حرمت نفسى من لقياهم.. ودخل أسبوع أهملت فيه عملى

- الغاوى ينقط بطاقيته

- أنا غاوى والنهى .. ونقطت بطاقتى وبدلتى وجزمتى وحتى ملابسى الداخلية

- يعنى أنت دالوقت عريان ؟

- بلهوص

- عاوز كام؟

- عاوز رقم تليفونك

- يفتح الله سعرك عالى

- ده شريط مستورد

- التسجيل اللى عليه محلى

- ضيفى عليه ثمن الشريط الأولانى

- مش قبل ما اسمع الثانى.. يمكن أرجع فى البيعة كلها

- وإزاي أعرف اشتريتى والا بعتى ؟

- ح نتقابل الندوة الجاية .

- ما اقدرش أنتظر أسبوع

- إدينى رقم تليفونك.. وأنا أكلمك

لم ينم ليلته .. جسد ممدد .. رأس مسهد .. سكران نشوان بأحلام وأوهام وهيام
اليوم التالي لم يصله تليفون .. وظل ينتظر حتى انتصف الليل وفقد الأمل .. اليوم الثالث .. عواطفه
ولهفته يستفزانه .. وعقله ينصحه بالصبر .. وتغلب العقل وتذكر مقولة أمه (طولة البال تبلغ
الأمل) ..

اليوم الرابع دخل فى حسابات أخرى لم ترد له من قبل على خاطر وتساءل

(فرق السن عشرون عاما .. فهل هذا يسمح بعلاقة عاطفية حقيقية صادقة .. هل فى حياتها شخص
آخر ؟ .. وإن كان .. فما نوع هذه العلاقة وإلى أى مدى هى مرتبطة أو متورطة .. وهل تسمح هذه العلاقة
بفرصة لى .. وما هو النموذج الأمثل الذى يمكن أن تتقبله ويستجوبها وتتجاوب معه مشاعرها .. طولها
وعرضه ولونه وشكله وسنه وشخصيته ودخله ووضعها الاجتماعى والثقافى والأدبى .. عشرات العناصر
تشكل فى داخل كل منا صنماً نعبده .. ونبحث فى تحركاتنا اليومية الحياتية عن ملامحه وتتحكم
فى الاختيار

إنها امرأة جميلة .. وبالقطة كل يوم يصادفها من يستملحها ويستميلها ويرق معها ويغازلها أو يطلب
يدها .. حتماً تصادفها كل يوم محاولات ومناورات .. ما بين تلميح وتصريح والحاح ومطاردة .. فأى
هذه النماذج يمكن أن يستجوبها فتختاره

لقد كلمتها فى اللقاءين وفى التسجيلين كثيراً عن نفسها .. لم أكلمها عن نفسى .. إنها لا تعرف عنى
سوى التعريف البسيط الذى قدمتنى به صاحبة الندوة .. لا تعرف قيمي ومبادئى ودينى ورأى فى
الكون والحياة والناس .. مازلت كتاباً مغلقاً بالنسبة لها .. فكيف أحلم أن يكون لها رد فعل
بالاقتراب أو الابتعاد .. كل مالدبها منى ثلاث ساعات حوار وتسجيلان غزل ووجبة عشاء .. وهذا
لا يكفى .. إن الإنسان لا يبيع نفسه بوجبة وكلمتين .. وكما قالت هى .. (انا باحسبها صح)

ماذا أفعل .. هل أقدم لها بطاقتى وشهادة ميلادى ومؤهلأتى وعقد الإيجار وكشف العائلة وكشف
رصيدي فى البنك .. هل هذه الأشياء تمثلتنى .. هل تعبر عن هويتى وشخصيتى .. هذه الأوراق مجرد
أرقام فى حياتى .. أرقام لا تهز مشاعر .. أنا لحم ودم ومشاعر .. تربية وفكر وسلوك خبرة وثقافة
ورؤية .. يجب أن يتعرف كل منا على الآخر .. على الإنسان .. هذا ما يلزم للحكم الصحيح
إن حبى لها ليس مجرد كلمة ولا رغبة فى جنس ولا حب امتلاك .. حبى لها احتياج .. أشعر بدونها
أننى مقسوم نصفين .. نصفى أنا .. ونصفى هى .. نصفى هنا ونصفى هناك .. لكى أشعر أننى حى أكل
وأشرب وأرى وأفهم وأحس وأفرح وأضحك وأعامل الناس وأشتغل وأجتهد وأنجح صح .. لابد أن
يرجع لى نصفى .. لابد أن أعود واحد صحيح)

مع نهاية الأسبوع بلغ به القلق والتوتر والانفعال منتهاه.. وحاصرتة الرغبة والشوق من كل اتجاه.. (وعمل عجيب الفلاحة ونوم العازب وسلام لسيدك) أمام التليفون.. وبدلاً من أن يرن تركه يرن.. فأصابه اليأس والإحباط.. ووصلت حالته المعنوية إلى ما تحت الصفر

وقلبه القهر والغيظ إلى الضد.. فاتخذ قراراً بعدم حضور الندوة.. وأن ينسى الموضوع برمته.. ويرجع إلى حياته الأولى الرتيبة ويكتفى بما جرى وكان.. ويحمد الله الذي لا يحمد على مكروهه سواء..

ولكن قبل موعد الندوة نفذت مقاومته وتلاشت إرادته واشتعل.. فخشى أن يموت قراره فارتدى ملابس وتوجه إلى محطة السكة الحديد وهو مسلوب الإرادة.. كأن قوة مغناطيسية تسلطت عليه ونومته وقادته إلى هناك.. وركب القطار.. أى قطار.. دون أن يعرف وجهته.. ونزل في أول محطة.. وتسكع في البلدة بين المطعم والمقهى والحوانيت حتى هذه التعب.. فاتجه إلى الفندق

وعاد في اليوم التالي كمن أبطل التدخين ويقاوم.. مهلهلاً متراخياً.. أداؤه خائب.. وخطواته مهزولة.. ونظراته خابية.. ووجهه مكفهر مرهق.. ولكنه راض لأنه استطاع أن يقاوم الإدمان.. ويتغيب عن الندوة

- آلو.. مين يا افندم ؟
- الأستاذ بيتهوفن موجود ؟
- بيتهوفن مات
- تبق انت بيت القصيد
- عرفتى صوتى ؟
- عرفت صوتك من أغانيك
- أنا عمرى ماغنيت
- لكن أنا سمعتك بتغنى فى التسجيل.. الشهادة لله انت بتغنى كويس
- بيتهوفن كان موسيقار وعمره ما غنى
- تبقى عبده العامولى.. صالح عبدالحى
- حرام عليك أنا أصفر شوية
- تبقى عبدالوهاب
- كنت أتمنى تسمعنى فى التسجيل.. نغمة أمل وألم توصل لقلبك
- أنا ماياسمعش بقللى .. باسمع بعقلى
- العقل وحده لا يكفى .. فيه كلام لو وصل للعقل وحده يفقد معناه
- العقل بيحكم
- والقلب بيحس
- لكل فلسفته يا صاحبى
- وياترى .. إيه حكم عقلك
- مش قادر يحكم لعدم كفاية الأدلة
- عندك حق .. أنا مستعد أقدم أدلة جديدة .. التسجيل الثالث جاهز
- بعده .. هيئة المحكمة تصدر الحكم
- إن كان ظالم ح استأنف
- من حقتك .. ومن حق المحكمة ترفض الاستئناف
- ح اقدم استرحام واطلب الرأفة.. لأن المحكوم عليه مريض بداء الحب.. والمريض لا يعاقب
- الحب من الأمراض النفسية وعلاجه مستشفى الأمراض العقلية
- أنا راضى بحكم الله.. ومتعشم خير فى المحكمة .. إمتى أقدر أقدم تسجيل الأدلة
- دالوقت لو حببت
- حببت والله حببت
- هى: هى: .. طيب خد العنوان

وضع السماعة وكل خلجة وكل خلية فى جسمه ترقص.. وانتفض من مكانه ودخل الحمام وتخلص من غبار السفر.. وحلق ذقنه التى أهملها طوال الأسبوع.. وفتح الدولاب واختار واختار.. وانطلق إلى الطريق.. وتصدى بتهور لأول تاكسى

(كشف الهيئة نفدت منه والحمد لله.. والمفروض أنك الآن تحمل ملف به مسوغاتك.. وأنت ذاهب لتقديم أوراق اعتمادك.. فهل رتبت أوراقك.. واضح أنها امرأة ناضجة ذكية.. قبل أن تتكلم طلبت أن تسمعك.. إنها تتحسس الأرض قبل أن تضع قدمها.. فلتكن أنت أيضاً حذراً.. مطلوب يافتى يا همام.. شئ من اللباقة.. الكياسة.. السياسة.. الدبلوماسية.. يعنى باختصار المراوغة.. يعنى لا داع للصراحة.. اسمع نصيحتى.. غلف الحقيقة.. ضع الجواقة فى ورق سوليفان.. إوهها أنها تفاح.. ومرة بعد مرة عودها على الجواقة.. لا داع أن تعرف سنك من أول مرة حتى لا يفزعها الفرق.. مستقبلاً عندما تتعود على وجهك ستنسى الفرق.. وقتها عندما تصارحها بالحقيقة قد لا تصدقها أيضاً لا داع أن تعرف حقيقة مركزك المالى.. مرة كباب ومرة طعمية.. وبعد ذلك مرة كباب ومرتين طعمية.. إلى أن تتعود على الطعمية يا طعم

عرفت أنك رجل أعمال وهذا يكفى.. هناك رجل أعمال يتعامل فى ملايين وآخر انحدر حاله ويتعامل فى ملايين.. يعنى (خليك عايم).. لو مشيت فوق المياه تتبختر ستغرق.. وإن غطست تحت المياه ستغرق.. ومع الأيام ربما ينصلح حالك.. قد ترجع إلى ما كنت فيه أو بعضه.. لا تغلق الباب بينك وبينها.. إن أغلقتها سيخنقك.. وإن فتحت سيفضحك.. دعه موارد.. دعه يسترك لكن يسمح بالنسيم

أنتم مازلتم أغراب.. حقيقتك التى تخجل منها هى الآن حقيقتك وحدك.. لو عرفتها وهى مازالت على البر ربما تنفر منها وتهرب.. لكن بعد ما تصبحوا فى مركب واحدة.. بمشاعر وأهداف واحدة.. وقتها حقيقتك ستصبح حقيقتها.. وهى التى سوف تسترها.. دعها تعرف الإنسان وتحبه وتتعود عليه.. وقتها سوف تضحى بأى شئ لتحفظ به.. تحايل.. ودارى على شمعتك.. لا داع أن تعرضها لتهار شديد.. إلى أن تشعل شمعتها من نار شمعتك.. وقتها عندما تضاء حياتكما بشمعتين سيزيد النور)

فى عمارة كبيرة بوسط البلد وفى الدور العاشر.. شقة يحمل بابها لافتة باسم شركة للإنتاج الفنى.. ضغط الجرس.. بثوب أزرق يظهر بوضوح نضارة بشرتها.. وبابتسامة مرجية استقبلته.. تركت الباب مفتوحاً وقادته إلى حجرة فى مواجهة الباب.. وعلى مكتب كبير جلست وأشارت له على كرسى الضيف فى مواجهتها.. فجلس

- أهلا بك يا متهم

- أهلا بك يا حضرة القاضى

- فين الأدلة يا متهم ؟

- مسجلة على الشريط ده

- لكن المحكمة ماتقدرش تعتمد على التسجيل يمكن يكون حد ممليه لك.. عاوزين أدلة رسمية

- عندي أدلة غينية.. فى عيني اللي أجهدا السهد والسهر.. وقلبي اللي زادت دقاته عن معدلها الطبيعى

- تحشم فى حضرة المحكمة يا متهم

- وحشتيني

- أسكت .. لما استجوبك

- استجوبيني والنبي

- اسمك إيه ؟

- فهمى أبو الوفا

- تشرب إيه يا متهم ؟

- أشرب شاي.. قهوة.. سيرتو.. سم.. أشرب من كيعانى.. أشرب مقلب.. المهم الحكم يكون لصالحى

- اصبر يا متهم وبطل كلام .. وإلا أحطك فى القفص

- حطينى حتى فى نار جهنم .. أرحم من النار اللي أنا فيها

- يا رجل .. يا مطرب.. لكن الشهادة لله غناك حلو

- أنا مش عاوز شهادة فى صوتى.. أنا عاوز شهادة فى حظى

- اصبر شوية على حظك

- صبرت كثير يا حضرة القاضى

- باستعجالك ممكن تضيع فرصتك

- ح اسكت .. وح اربع إيدى كمان.. وإن جيتى أركع على ركبى وأحط وشى فى الحيط

- هئ هئ .. مش للدرجة دى

نهضت .. واختفت فى المطبخ دقائق.. وعادت حاملة صينية وضعتها على المكتب بينهما وعادت لكرسيها.. الصينية عليها أربعة أكواب من الحجم الكبير مملوءة بالماء.. اثنتان منداتان مما يدل على أن بهما ماء مثلج.. والأخرتان يتصاعد منهما بخار.. نظر إلى الصينية.. ثم نظر إليها متسائلاً.. فلم تعطه عينها جواباً

- تشرب مية أولاً ؟

- إذا سمحتى

حملت كوباً وقدمته له.. ورفعت الآخر وشربته.. وأعادا الكوبين إلى الصينية.. وحملت إحدى الكوبين المتصاعد منهما البخار ووضعتة أمامه وحملت الآخر ووضعتة أمامها.. وهو مازال متحيراً مستجباً أن يسألها

بعد ثوان رفعت الكوب إلى فمها وأخذت منه رشقة باستمتاع وهزت رأسها تلذذاً.. فقلدها ورشف فازدادت حيرته.. عادت فرفعت كوبها ورشفت وبان على وجهها الاستمتاع.. فرفع كويه وكرر وهو مندهش.. ولم يطلق صبراً.. وخرج عن تردهه .. وبصوت مخنوق مستنكر سألها

- مشروب إيه ده.. أنا عمرى ما شربته ا

- ميه سخنة

- ميه سخنة .. ؟
 - أبوه
 - مش فاهم .. هو أنا جى استحم !
 - مش ضرورى تفهم .. إشرب
 - بس أفهم
 - بعد ماتشرب
 - آسف مش ح أشرب .. أنا متظلم
 - اشرب وبعدين اتظلم
 - قبل ما أشرب أنا عاوز محامى
 بحركة سريعة دست يدها فى درج المكتب فظن أنها ستخرج مطواة ترغمه بها على الشرب .. ولكنها
 أخرجت علبة السجائر .. وقدمتها إليه فأوماً شاكرًا .. فأشعلت لنفسها سيجارة ونفخت الدخان فى
 وجهه .. وقالت
 - احك يامتهم
 - أحكى إيه ؟
 - حكايته من يوم ما اتولدت لغاية ماشرت المية السخنة
 - فهمى أبو الوفا .. مصرى .. من أب مصرى وأم مصرية .. جامعى .. تخطيت الخمسين .. من رجال
 الأعمال .. ومؤلف روائى .. لى أسرة صغيرة .. كل واحد من أفرادها انتهى مشواره معاه وراح لحاله
 ورجعت عازب زى ما بدأت .. ولى قضية سياسية اللى سمعتى عنها .. وصدر ضدى حكم بالسجن
 موقوف تنفيذه لأغراض سياسية .. يعنى حياتى على المعاش .. أو فى الإنعاش .. والأيام دى اكتشفت
 إنى موهوب فاشتغلت مطرب .. وسجلت ثلاث شرايط .. وكل جمهورى سيده واحدة .. بتستقنى المية
 سخنة من أولها
 - إحمد ربنا إنها مش مغلية
 ونظر إليها مأخوذاً .. فابتسمت
 - لأحدق .. إجابته كلها دبلوماسية .. قلت ولم تقل .. زى وزراء الخارجية لما يقولوا للصحفيين
 (بحسنا العلاقات الثنائية) تخطيت الخمسين .. أسرة ورجعت عازب .. قضية والحكم موقوف
 تنفيذه .. حتى اسمك ماقلتوش بالكامل
 - صدقيني مش حذاقة .. اختصار لكلام كثير محتاج شرح .. مش مهم دالوقت
 - إيه فى نظرك المهم دالوقت ؟
 - إنى أسمحك .. وأعرفك .. من يوم ما اتولدتى لغاية ماشرت المية السخنة
 - آه .. على طريقة إقلىمى إنت الأول .. مش باقول لك أنت حدى
 - إنت كده بتشتمينى
 - علشان بتستعمل ذكائك معاه
 - علشان عاوز اكسبك

- كده تخسرنى
- ظروفى تفصيلاً محرجة ممكن تطفشك .. إصرفى نظر عنها مؤقتاً لغاية ماتتعرفنى على الإنسان نفسه .. يمكن يكون شفيح عندك
وتوتر الموقف بينهما لحظات .. ثم قال بنبرة أسمى .. تمنى لو لم تظهر فى صوته
- قبرى منى وحاولى تقريبنى منك .. أنا فى ظروف فعلاً محتاج فيها مساعدتك ووقوفك جنبى ..
ومش مهم مين فينا اللى يقلع الأول .. المهم نقلع ونلتقى ونتلاحم ونعيش بأنفاس واحدة .. شهيقك
يبقى زفيرى وزفيرى يبقى شهيقك
- جدع .. آهى دى حلوة .. ونبنى عش فوق شجراية .. ماتكمل الأغنية
تألم لاستخفافها فنظر إليها فى ملام .. وعاد بوجهه للأرض وهمس كأنه يكلم نفسه
- هو ده حكمك على كلامى ؟
- ما انت عاوزنى اتكلم .. مع إن اتفاقنا فى التليفون إنى اسمعك .. إنت فى التسجيل أشطر من كده
- فى التسجيل باكون بعيد عنك .. ويكامل حريتى .. لكن فى وجودك لسه جمالك باهرنى وحارجنى

وجف ريقه فحرك لسانه فى فمه يستحلب اللعاب .. وبصوت مخنوق اعترف
- بعد تخرجى مارست عدة أعمال وجاهدت واجتهدت .. وكافأتنى الأيام على اجتهداى فحصلت من كل نواحي الحياة على نصيب .. فى المال والصحة والزوجة والولد والصديق .. وبطبيعتى البسيطة نسقت الخطوة ورشدت الفعل وجدولت الوقت .. وعشت .. ولكن لكل حصان كبرة .. اتهمت فى قضية سياسية ودخلت السجن .. وخرجت منه يامولاي كما خلقتنى .. فقدت مشروعى .. نفذ المال .. وتزوجت البنت وهاجر الولد ومرضت الزوجة وتخلى الصديق .. فلجأت للقراءة .. وأحياناً الكتابة .. فهى الشئ الوحيد المتاح بتكاليف قليلة .. ودفنت فيها همومى وأحزانى
وجامنى التليفون بالدعوة للندوة .. وكنت قبل دخولى السجن أرفض حضور الندوات لأن أغلبها يبدأ وينتهى بشرثرة لاتفيد .. والعزلة مع كتاب أفضل .. ولكن وعدت بالحضور تحت إلحاح الداعية وإلحاح فى نفسى .. فقد كنت فى أشد الحاجة لمكان أو ناس أو موقف يخرجنى من حبس الأيام الرتيبة .. وحضرت وأنا أتمنى أن أجد مناقشة مثمرة أو شخصية مرموقة فأخرج بفكرة أو معلومة أو حكمة أو صديق .. وقد أصادف سيده جميلة أو مثقفة ترطب جفاف الوقت والأيام .. وإن كان هذا احتمال نادر .. وندرته ليس فى المرأة نفسها .. فاحتمال وجودها فى ندوة أو أى مجتمع أصبح الآن أمراً طبيعياً .. لكن الندرة كانت فى النموذج الراقى فى خيالى عنها .. والذى تكون من ثقافتى وقيمى ومبادئى ورؤيتى وفلسفتى ومشاعرى واحتياجاتى وتذوقى للحياة .. واستمتاعى بالمرأة المغرمة المحبة العاشقة الحنون فى الأشعار وفى أغانى أم كلثوم .. وتحقق الحلم .. وكان النصيب وقابلتك
- إيه .. فلست ؟

ابتسم .. وقال كأنه يدفع عن نفسه تهمة .. ويسترضيها
- مش بالضبط .. إن دبلت الوردة ربحتها فيها .. أنا دالوقت باجمع اللى اتبعتر .. وألح فى اللى كان لى من ذمامات عند الناس .. وبالخبرة والصبر ح ارجع زى ماكنت .. وعمر الشقى بقى

ومضت لحظات صمت.. شردت عنه.. وشرد عنها مندهشا.. لأن في كل ما حكى لم يستوقفها سوى السؤال عن حالته المالية.. وطأطأ رأسه متحيراً في الأبعاد والمغزى الحقيقي لسؤالها

أشعلت سيجارة أخرى من الأولى.. ومدت يدها إلى جهاز التسجيل وثبتت الشريط فيه.. فانتفض واقفاً محرجاً.. واستأذنها في الانصراف

- أقعد لما تسمع أغانيك

- مافيش مطرب بيسمع نفسه.. اللي يهमे الجمهور يسمعه.. وأنت جمهوري

- بس الجمهور يفضل يشوف المطرب وهو يسمعه.. أقعد علشان أشوفك وأنا باسمك

- قصدك تشوفي الانطباع على وشي

- بالضبط كده.. ما انا قلت لك ممكن يكون حد ممليه لك.. مانت في تحقيق.. وتهمني

الحقيقة.. وتهمك البراءة

وأدارت جهاز التسجيل

(شغلتي النهار والليل.. أصبحتي زادي وزوادي وشمسي وقمرى.. سعدى وفرجى وألمى ودائى..

أمسى وغدى.. جاذبيتك عندما تتكلمى ويتحرك لسانك مع شفايفك مع بحة صوتك.. وعينيكي

تضيف الطعم.. فاسمعك وأتذوقك واشبع بالحس والإحساس.. وجمالك فى مشيتك وفى عينيك

وشفايفك وصدرك وخصرك.. وأشم على البعد رائحة ذكية جنسية أنثوية.. وأتشرك بكل حواسى..

وأحسب كل فعل أوحركة حتى لو كانت مجرد تنهيدة.. حتى السيجارة باعد كم مرة ترفعينها إلى

فمك.. نظرة عينيك تسحر.. تسحق.. بعينيكي تستطيعى تحريك الأشياء من أماكنها بقدرة

خارقة ليست فى البشر.. عندما تنظري لى تحركينى.. ترفعينى من فوق الكرسى

وتسقطينى.. وشفايفك جزء من أدوات الجنس.. جزء عار أمام الناس.. الشفايف عند غيرك تهتسم

وتغضب وتمنع وتمنع.. لكن شفايفك دسامة وطراوة ترغب وتحرض وتعد)

- ياه.. أنا عارفة إنى جميلة.. لكن أنت بتبالغ قوى.. فعلاً فى التسجيل واخذ حريتك أكثر

- أعلرنى.. أنا شايفك كده

- كتير قالوا لى.. بس ماحدش قال كل ده

- عرفتى كتير؟

- مافيش واحدة عرفت رجالة قدى.. عرفت عدد شعر رأسى

- بلاش تقولى لى كده.. بلاش تكسرى فرحتى.. إكذبى

- الكذب خيبة

- الكذب أحياناً نعمة.. يوم ما يدق قلبك وتخافى على شعور حبيبك ح تكذبى

- نرجع للتسجيل

(المرأة السهل بلا قيمة وأنت صعب.. وأنا أحب الصعب.. واستعمل كل أدواتى لأشعر بعد المحاولة بلذة الفوز.. كل الأشياء الضرورية للحياة مجاناً.. الهواء والماء والشمس.. وكذلك الحب.. حتى لا

يتحكم فيها البشر.. يمكننا أن نتدفأ بالشمس ونتنسم الهواء ونشرب الماء دون اعتراض من أحد..
كذلك يمكنني أن أحبك دون اعتراض من أحد.. حتى منك ..حتى لو كنتى صعب
يامنية القلب.. يا أخت النفس يا أم الفؤاد.. باحبك.. إن رفعت عيني إلى السماء سأحبك.. وإذا أنزلتهم
إلى الأرض سأحبك.. وإذا نظرت أمامي للناس سأحبك.. وإذا نظرت لنفسي سأحبك.. لكن لو نظرت
إليك فلا يكني أن احبك.. إذا لمحت قدمك باحبك.. وإذا فردت عيني على طولك باحبك.. وإذا
ارتعش الثوب على صدرك وأنت تضحكين باحبك.. وإذا ذقت شفايفك بنظرة باحبك.. وإذا عشت
فى عينيكي باحبك.. وإذا سمعتك باحبك.. وإذا فهمتك باحبك.. باحبك حب كبير.. باحبك وأنا
صاحي وباحبك وأنا نايم

- يا كذاب .. يا ألد كذاب .. بس انت رجل حلو.. حلو علشان كذاب .. نكمل
(وكتاب الله باحبك.. وأمة المسلمين باحبك.. وسيدنا محمد باحبك.. والأولياء الصالحين والحسين
والسيدة زينب باحبك.. والسيد البدوي وإبراهيم الدسوقي والمرسى أبو العباس وسيدى بشر باحبك
سأصرخ فى الشوارع والبيادين والنواذى والمساجد والكنائس باحبك.. ستقولين مجنون.. ما أنا جنونى
حب.. وحبى جنون.. ومصادمت اتجننت.. سأحمل (جرذل) بوية وأمشى اكتب على الحوائط.. على
الأتوبيسات.. على الأرض.. على الشجر.. باحبك.. أكيد زهقتى من كلمة باحبك.. أما أنا فلا.. لأنها
الخلاصة.. الكلمة الأم.. أرددها كما أردت أنفاسى.. هل يمل الإنسان ترديد أنفاسه

أبحث لمشاعرى عن كلمة أكبر من كلمة باحبك.. أريد أن اختلف وأسبق وأغلب كل من قالها لك..
مهما كان دورى فى طابور عشاقك أريد أن أكون أطول وصوتى أعلى لكى ترينى وتسمعينى.. تعالى
نمشى.. تعالى نسافر.. تعالى نفرح.. تعالى نبكى.. تعالى نزرع .. تعالى نقلع)
- هى هى .. حلوة تعالى نقلع دى.. أبوه كده يا أخى هات من الآخر

(تعالى ناكل.. تعالى نشرب.. تعالى نلعب.. تعالى نجرى.. تعالى نهرب.. أى شئ مجنون معك هو
عين العقل.. ما أنا باحبك.. فى رأسى أفكار أعتقد أنها بداية جنونى.. اتكلمت عن عينيكي وشفايفك
هل هما كل ما فيكى.. صدقيني أنا أراك من الخارج ومن الداخل.. ومن فوق ومن تحت)
- ياواد يا برم.. على كده أنا عريانة.. آمال كل اللى أنا لابساه ده إيه.. انت ح تشككنى فى نفسى ..
نهايته نكمل

(احتشبتوس ونفرتيتى ومارى كورى وكليوباترا وجان دارك وتاتشر وفرانسواز ساجان وفاتن حمامة
وأم كلثوم وأم فهمى أبو الوفا كلهن الماضى.. والحاضر انت.. والحضارة بكل روعتها وجمالها انت)
- أنا كل دول .. مش قادرة أصدقك .. نكمل
(سامحينى على سوء نيتى.. بالتسجيلات قصدت أشغل وقتك ووقتى.. وادخل بيتك بعد أنصاف
الليالى.. فى النهار تتذكريننى.. وفى الليل تحلمين بى.. وسأظل واقفا على باب جنتك ألح .. لأن
ليس أمامى بديل سوى النار.. ليس أمامى سوى الصبر.. فإن لم يكن من حقى أن أحج إليك.. فلا
أقل من أن أتجه إليك وأصلى.. وتسجيلاتى صلاة أتقرب بها إليك)

تنهدت تنهيدة درامية .. وهمست كأنها تكلم نفسها
- الشهادة لله نجحت فعلاً ودخلت بيتى .. وشغلتنى الليل والنهار

- صدقتينى؟

- كلامك حلو.. بس انت مزودها شوية.. يعنى مثلاً.. تسجيلاتك صلاة.. ماشى.. لكن بدمتلك دخول
رجل بيت امرأة حج ! ماقدرش افتح قلبى ولا بيتنى بالسرعة دى .. العقل أولاً .. وفيه حاجة اسمها
الأخلاق والحلال والدين

- مش قادر أفهمك ؟

- ولا أنا

- طيب على الأقل أعرفك؟

- إسأل أجوبك

- أولاً.. المكان اللى إحنا فيه؟

- زى مانت شايف.. شركة إنتاج فنى.. ومدير الشركة وكل موظفيها دالوقت فى اسكندرية بيشرفوا
على عرض مسرحية من إنتاج الشركة.. وأنا بس اللى موجودة.. أولاً لأنى بارفض السفر خارج القاهرة
وثانياً علشان استقبل وأرد على المكالمات التليفونية

- يعنى انت فى الشركة وحدك؟

- علشان كده تركت باب الشقة مفتوح .. الفراش روح .. وبواب العمارة والشقق المجاورة عارفين
إنى وحدى.. وماقدرش أقفل باب الشقة على عليك

- مانت قلتنى عجوز.. يعنى بعيد عن الشبهات

- العجوز بيتستر فى سنه.. وانت خير دليل .. عليك غزل ماقدرش عليه شاب.. يعنى أنت فى نظرى
شاب زائد خبرة.. يعنى يتخاف منك أكثر من الشاب

وبدأت وهى جالسة تمروح الكرسي يميناً ويساراً.. مركز الحركة فى الكرسي رولمان بلى.. ومركز
الحركة فى جسدها خصرها.. فأخذت الحركة ترعش الثوب على نهديها.. ورأسها مرفوع وعيناها
شاخصتان إلى السقف.. ودخان السيجارة يتصاعد فيخفى وجهها كأنه خلف غلالة من الحرير
الشفاف.. فهدت أمامه كالوهم.. وقالت

(كلامك شجعنى على الكلام.. وصراحتك وتعريتك لمشاعرك من غير حرج فتحت نفسى للروح..
وحاسة إنى مادمت ارتحت لكلامك معاى ح أرتاح لكلامى معاك.. وأنا فى الحقيقة اتصلت بك
لأنى كنت محتاجة لشخص اتكلم معاه.. وصدقنى.. اللى مستعدين يسمعونى كثير.. ورغم إنك
جديد فى حياتى فكرت فىك.. ماعرفش ليه !

ماعشتش طفولتى كفاية.. مش فاكدة فيها أحداث مبهجة أو مواقف مفرحة.. قالوا أنى كنت قبيحة
وأنا صغيرة.. وكنت تخينة ولى شنب وكانوا بينادونى (بسيونى).. وبسيونى هو بواب عمارتنا
الصعيدى المخشب اللى يقف على شنبه الصقر.. كنت أحب بابا أكثر من ماما عكس البنات.. كان
مدرس رسم.. رجل طيب ومثقف وفنان وشاعر ومتدين من أصل فلاح.. لكن ماما كانت تركية

معطرسه متعالية عنيدة خالية من العواطف.. ورغم إنها ماكملتش تعليمها كانت جبارة.. تعابر بابا دائماً بأنه فلاح وتقارن بين أصلها وأصله.. ومع إنى أصغراخوتى.. ماافتكرش أنها يوم باستنى.. أو وقفت جنبى فى مشكلة.. وكنت أخاف ألجأ لوالدى من خوفى منها.. وكنت بعيدة عن كل إخوانى حتى البنات.. لأنى لغاية سن عشر سنين كنت اتبول على نفسى وأنا نائمة.. وكانوا دايماً يقولوا لى (يا وحشة يا تخينة يا أم شنب يابسونى) ويخرجونى بموضوع البول قدام الضيوف.. وعشت فى بيتنا وحيدة وكل تصرفاتى وقراراتى صادرة من رأسى.. وأصبحت عنيفة عنيدة

وفى الجامعة نحف جسمى وظهرت انوثتى واختفى شنبى واحلوت.. فاهتمت بنفسى ويدروسى وكنت دائماً متفوقة.. وخاف منى الطلبة وماقيش أى طالب اتجرأ يلح لى بالحب.. فكنت أتحدى الجميع أولاد وبنات وأساتذة بالتفوق والتطوع بالخدمة فى كل الأنشطة والمجالات والعفلات والرحلات.. وبكده عوضت حرمانى من غزلهم وغرامهم باحترامهم لى وأعجابهم.. وتخرجت فى كلية التجارة وأنا مااعرفش الحب إلا بعينى.. الحب اللى كنت باشوفه بين زميلاتى وزملائى

ورحلت العيلة للقاهرة واستقرت فيها.. الشقة المجاورة لشقتنا كانت ملك ضابط فى الجيش.. مؤثثة تأثيث كامل.. وجاهزة فى انتظار العروسة.. وبسرعة تعرف الضابط على أسرتى.. وبسرعة طلبنى للزواج.. وبسرعة الكل رجب.. ضابط شاب وشقة جاهزة من الإبرة للتليفزيون.. وكان مثلى الأعلى وحلم حياتى (يوسف السباعى).. عشت مراهقتى وشبابى فى روايات.. وتخيلت نفسى دائماً البطلة اللى بيكتب عنها.. وجهزت نفسى لأكون زوجة لضابط أديب.. يملأ حياتى وبيت الزوجية بالثقافة والشعر والأدب والإبداع والرومانسية

ولماعرفت أن جارى إياه ضابط تحققت نص أحلامى.. ومع تلويح الأسرة لى بالشقة الجاهزة بكل شئ.. وسذاجة بنت اثنين وعشرين.. وماليش سوابق فى الحب.. نسيت النص الثانى من أحلامى.. خفت أطمع وانتظر النص الثانى لا أحصل (بلع الشام ولاعنب اليمين..) زى ما قالت أمى

ووافقت.. وصدقنى.. لغاية دالوقت.. ماأعرفش إزاي نسيت أحلامى ووافقت وتزوجت وحملت وانجبت بنت وولد.. وأنا مش طايفة هذا الرجل من أول ليلة إلى آخر يوم فى الخمس سنين اللى عشتها معاه.. رجل مش مناسب لى من كل الوجوه.. أنا جامعية وفوق كده مشقة وهو ثانوية عامة وبعض المعلومات العسكرية.. أنا ذكية وهو غبى.. أنا متفتحة وهو مقفول.. أنا من أسرة عريقة.. جد بابا عمدة وجد ماما باشا وهو أبوه بقال من أصل صعيدى وأمه فلاح

واختلفنا فى الليل والنهار على كل شئ.. كره ترتبى لبيتى وتربيتى لأولادى فكرهت طبعه وسلوكه كره طبيخى وقال لأمى (بتتك بتاكل كثير) فكرهت قرشه.. كره مناقشتى وحوارى فكرهت وقته.. كره جمالى ولبسى وزينتى فكرهت فراشه.. ولما نفذ صبرى كرهته

من غباءه بدل مايعرف عيوبه ويصلحها.. طلع فى دماغه إنى راكبنى عفريت.. ودار على الدجالين.. ورجع لى بحجاب وحطه تحت المخدة واحنا نايمين.. ويتفة فى ورقة.. دويها فى كوابية مية وطلب

منى اشربها .. شربتها وقرفت .. وكل صبح يدور فى الشقة بالبخور .. ويقول كلام مش مفهوم يقراه من ورقة كتبها له الدجال

وفى الآخر .. قال لى (تعالى معاى) .. سألته قال (ح نروح للشيخ) سألته ليه قال (الشيخ إكتشف إن عليكى عفريت بيحبك ويباعدك عنى) قلت له (ماعفريت إلا بنى آدم .. روح العب انت والشيخ بتاعك) قال (ده ح يريحك ويريحنى)

ورحت معاه .. الدجال .. طفا النور .. وقعد يهمس للبخور بكلام مش مفهوم .. والآخر قال لى .. (انت عليكى جن .. بيحبك ويبفسد العلاقة اللي بينك وبين جوزك) .. وطلب منى الف حوالين (منقد) البخور واقول للجن .. (السلام عليكم .. اطلب منك العفو والسماح .. تودعنى وتسببى اعيش لجوزى وأولادى) فسألت الدجال .. (الجن ده بيشتغل إيه) قال (ماعرفش .. ماقدرش أسأله سؤال زى ده ..) قلت له (وانا ماقدرش اطلب العفو والسماح من جن ماعرفش بيشتغل إيه .. جايز يطلع سباك والا حلاق ولا نجار) قال لى (وتفرق إيه ؟) قلت له (جد والدى كان عمدة وجد والدتى كان باشا وأنا برنس .. الجن اللي يركبنى لازم يكون ملك أو رئيس جمهورية .. مش أقل من كده)

الدجال نور النور .. ومط شفايفه .. وقال لجوزى .. (مراتك صعب ومقاوتها زعلت الجن .. وأخاف يؤذيها ويؤذيني) .. ورفض يكمل الإجراءات

ورجعنا البيت .. وبمجرد ما دخلنا الشقة .. دور فى التلطيش .. وهو بيصرخ ويقول لى (اشمعنى ملك أوريثس جمهورية .. مش ح تبطلى الفرور والكبرياء) .. واستحالت بيننا العشرة فطلبت الطلاق .. واشترط انه ياخذ الأولاد ليضغط على واتراجع .. ولكنى وافقت .. ومن باب العناد لحفظ كرامته اضطر يوافق .. فتم الطلاق

زى ما خرجت انت من السجن يامولاي كما خلقتنى .. خرجت أنا من سجن الزوجية .. تركت فيه قطعتين من لحم بطنى فى سن الطفولة .. دخلت منزل الزوجية فى الثوب الأبيض والطرحة والتاج بأنف مرفوع .. وعشت فيه محقرة مهانة مشتومة مضروبة .. وخرجت منه مهلهلة مكسورة النفس وضغط على أهلى علشان أرجع السجن فرفضت .. وضغط هو بأسلوب تانى .. رسائل وهدايا .. ومع إنه ماقدمش لى أى هدية طول حياتنا الزوجية .. بعث لى إسورة ذهب وأنا مطلقة .. فرفضتها ورفضته .. لأننى كنت على يقين أن الحنان والكرم مش من طبعه .. وإنه بيحاول يشترينى بإسورة .. إن كان أهلى قبل كده باعونى بشقة .. فأنا أصبحت حرة وأرفض أبيع نفسى بكنوز الدنيا كلها .

وباختصار .. ومن غير ما أحدد تواريخ .. خلال الخمس سنوات التى عشتها معاه ما بين الصلح والخصام توظف كل أختى بدول الخليج .. وتزوجوا وانجبوا .. ومات والدى .. وسافرت أُمى لتعيش مع اخواتى وتحديث الجميع .. وحفرت ودفنت الماضى وردمت واستقليت بمسكن متواضع .. وتأفف الأهل والجيران من استرجالى .. مجتمعنا الشرقى بيعتبر الست (معزة) .. يجب تكون داهماً تحت عصاية الراعى .. الأب وبعده الزوج .. فإذا تعذر وجودهم يبقى الأخ أو حتى الابن

وبذكائى وصبرى وإصرارى .. حكمت نفسى بنفسى .. وحصرت خطواتى بين العمل والبيت .. واحتشمت فى اللبس والسلوك .. ونظمت مواعيدى .. فتعود الناس على رتابتى .. والشئ المعتود لا يطرأ على

الذهن ولا يلفت النظر.. فلما أمنت الناس على قلقهم وشكوكهم انصرفوا عن مراقبتي وتركوني
لحالي.. أجتز آلامي وأعيش أيامي في صمت
وفي هدوء الليل وسكونه.. بعد مشاغل الحياة اليومية.. يضغط على الماضي الكئيب والحاضر
الخائب.. يهاجمني من خلف الشبابيك زئير الرياح ونباح الكلاب.. وترعبنى هواجس الوحدة.. وتدق
شبابيكي الأشباح والعفاريث.. فأخاف أنام.. واستمرسهيرانه مع السيجارة والقهوة والكتاب أو
الموسيقى.. لغاية ما اسمع أذان الفجر فأصلي واقعد أسبح لغاية ما اسمع بياعين اللبن والقول المدمس
والجرائد.. وزعيق بياح الهرسيم لما يعدى بحماره وينادي على اللي يبرهوا الأرانب.. فيرجع لصدري
الشعور بالأمان.. فاتممد وأنام في حضن النهار والضجة.. والرتم المتكرر لما كينة دق عجينة الطعمية
في المطعم المجاور.. وحركة الناس في الشارع.. وأصحي في الضحى وأروح لعملى مع الظهر

وضع المطلقة في بلدنا صعب.. تعمل ايه المطلقة اللي خدوا منها أولادها وماعادتش مسئولة عن
بيت أو زوج أو أولاد..! مهما فتحت راديو أو تليفزيون أو مجلة.. الإنسان محتاج أنيس.. وإذا زارت
المطلقة صديقة.. جوزها يفضل رايح جاي زى الكلب والزوجة تفضل قلقانة..
ودى مشكلة المطلقة الجميلة.. وأنا مش رجل اقدر اروح القهوة.. اكتشفت إن الندوات أفضل حل من
كافة الوجوه.. من ناحية أنا مش فى بيت حد.. وما فيش زوجة قلقانة من جمالى.. فى الندوة الرجل
اللى يكلمنى فى حدود الأدب أهلاً وسهلاً.. واللى يتجاوز أغير الكرسي.. ومن ناحية باسمع وأتثقف..
ومن ناحية مجتمع مناسب للبحث عن النصيب مرة ثانية.. وطريقة اختيار للطرفين مبنى على اختبار
وتعارف.. ويمكن أصادف حلمى القديم.. الزوج الأديب.. والست محتاجة الجواز والحلال مش
عيب.. وأنا أغلب أيام الأسبوع بأترودد على عدة ندوات.. ودى حكايتي لغاية ما شريت معاك المية
السخنة.. ايه رأيك !)

- أنا متعاطف معاك تماما.. وانت على حق كل الحق.. ولكن همسة فى ودك بعيد عن الحق والعدل
إنت مش شايقة إن الأولاد كانوا يستحقوا منك شئ من التنازل والتضحية؟

كانت الذكري قد احتوتها وسيطرت على مشاعرها فلمعت عينها بالدموع وتهدج صوتها وتوترت
ملاح وجها.. فقالت بانفعال.. وقد تعثرت الكلمات على لسانها
- تنازلت كثير.. وغمضت عيني عن عيوبه.. وسدبت وداني عن شتايمه.. كان تسامحى بيزود وقاحته
لأن أصله ضيع.. كان أيام الخطوبة يقول (التوكيل) وظنيت إنه توكيل سيارات مثلاً أو حاجة
مهمة.. وبعد الزواج اكتشفت إن أبوه بقال وعنده توكيل (ألبان).. وكانت له بنت أخت رقاصة فى
شارع الهرم.. كانت تتصل به فى الفجر علشان يرجعها من الكباريه بسيارته.. ويشيل لها الشنطة
اللى فيها بدلة الرقص والنقطة.. أبوه بياح لبن.. وبنت اخته رقاصه.. وأنا جدى باشا.. ماتركبش
- تركب علشان الأولاد تتربى فى حضن الأب والأم
زاد انفعالها وصرخت فى غضب

- ضربني
- يمكن ضربك لما تعاليت عليه .. حتى لو حبك عفريت .. عايزاه رئيس جمهورية
ضربت سطح المكتب بقسوة وصرخت
- أنا مانضريش .. أنا برنسس

- بس
نهضت فجأة .. كأن الذي أمامها مطلقها بكل ماضيه معها وبكل كراهية له وصرخت في وجهه ..
- مايسش.. أنا أولا وفوق كل شيء.. أنا حفرت ودفنته هو وأولاده ومعاهم قلبي وردمت ومشيت على
القبر وما بصتش وراي.. لازم تفهم إن الجواز مش أداة النوم بس.. الجواز أداة النوم للنوم والجنس
وأداة المعيشة للعشرة وتربية الأولاد وأداة الصالون للسهر والسمير والحوار.. والمطبخ للطعام ..
وجوازنا ماكنش ولا أداة من دول .. فض بكارتني ولكن ما فجرش أنوثتي.. وبقيت عذراء على حرمانتي
وأنا زوجته وأم أولاده .. دخل لحمه في لحمي.. لكن ما عرفش يدخل راسه في راسي.. يقتحم
جسمي كل ليلة .. من غير ما يحاول يقتحم راسي ولو مرة .. إستمعني من تحت وما فكرش يعاملني
من فوق .. المرأة زى الفرسة.. علشان الرجل يحكمها لازم أولا يتحكم في لجامها .. وان كان لجام
الفرسة جلد يكتف رقبته.. فلجام المرأة معاملة طيبة وكرم وعطف وحنان واحترام يكتف قلبها
وضميرها ..
الطبيعة ظلمتها .. هي اللي تتركب وتحمل وتولد وتربي وتعيش كل عمرها ملهوفة على أولادها ..
وتخدم الجميع.. والفرسة قبل ما تتركبها بنديها حقة سكر.

ورآها تنتفض وتكاد تمسك بخناق.. وشعر أنها في حالة من الغضب والهياج لا تسمح بمناقشة ..
فالتزم الصمت فترة.. وصبر حتى هدأت وعادت إلى الكرسي.. هز رأسه أسفا وتململ في جلسته .. ثم
شكرها على (المية السخنة) وهو يبتسم في جزع.. ومد يده مسلماً.. وخطف كفه بسرعة.. لأنه توهم
أنها قد تنخيله طليقها وتعصر كفه حتى يركع تحت قدميها.. ومشى أمامها وهو يتوقع أن تصفعه
على قفاه.. ولم ينتظر المصعد.. وبمشاعر مهتاجة نزل السلم مهزولاً مهزوماً.. وهو يخشى أن
ينكفي على وجهه.. وفي روعه أنه لو انكفأ ستلاحقه وتدفعه بشلوت .. يقلفه باقى السلم حتى
الشارع

لم يرتاح للزيارة.. ولم يرتاح لها.. وشعر بقلق.. وأنه مقبل على أيام ربما لا قبل له على احتمالها.. بداخله أكثر من سؤال وأشياء كثيرة مبهمة تدعوه لانتظار مجهول لابد أن يحدث.. فظلت عيناه على التليفون إلى أن رن

- لو كنت فى السجن ابعت لى عسكرى.. فى المستشفى ابعت تومرجى.. مسافر ابعت تلفراف.. لو كنت بتتقل اشرب من البحر
- شريت كتير.. أسبوع باشرب لما جتتى ملحت
- إيه اللى زنقك على المية المالحة.. ماتشرب مية حلوة
- حلاوتها زاعقة قوى .. قلبت معدتى
- خلاص.. اشرب من كيعانك.. عن إذنك
- اصبرى واسمعىنى .. عيب تشتمينى وتجرى
- إسمعىنى انت .. ساعة بالضبط وتكون عندى .. ومعاك تسجيل وسندويشات وبن وسجاير.. ورتب نفسك ح تقعد معاى طول اليوم.. عاوزة اتكلم معاك كتير

وابتسم .. وطارت من رأسه كل الأسئلة المطروحة.. وجلس إلى جهاز التسجيل (لحظة الحب الإنسان يتعامل بمشاعره.. وإن كان للعقل دور فهو دور منحاز للقلب.. يعنى الإنسان فى حالة الحب بدلاً من أن يكون له قلب وعقل.. يكون له قلبان.. أحبتك.. ومازلت أحبك.. وسأظل أحبك.. حبا كبيرا من قلبى وعقلى.. وفى حضورك وغيابك أقدر أحبك.. الفرق هو عذاب الغياب ولكن يظل الحب موجوداً.. قبلته أو رفضته موجوداً.. يا أخذ عمري يا أخذت عمره.. يا أنا مت ياالحب مات أصبحت بالنسبة لى أفيون.. أتعاطاك كل لقاء.. أدمنتك.. وأدرك أنى لو توقفت عن تعاطيك سوف اتعب تعب مدمر .. وستصبح أيامى أسود من الليل .. ولو استمررت سأسعد باللحظة على حساب الأيام .. على حساب باقى العمر.. فالأفيون.. يوهب الوقت السعيد ساعة ليسرق العمر كله.. أنت امرأه جميلة جذابة جاذبيتك أقوى من جاذبية الأرض.. جاذبية الأرض تسمح لى أن أمشى مرفوع القامة ولكن جاذبيتك طرحتنى أرضاً.. أنت قلعة وأنا ألف وأدور حولها .. أبحث عن باب ضعيف أو حجر مهدم أو شرح أدخل منه

تعالى نكسب الأيام.. تعالى نمشيها.. ونعد ساعاتها ودقاتها وثوانيتها.. لا تجعلى الأيام تمشى وانا وأنت محلك سر.. الحب نوع من المعاملة لأنه سلوك وممارسة بين اثنين.. الكلمة منك حبة صغيرة .. أضعها فى طبق كبير وأحاول أن أشبع وأضحك على نفسى وأسعد بالوهم

إعطينى مشوارى وعدى لى خطواتى.. لا تجعلى عمرى يمشى وأنا واقف.. دعينى أمشى معه وأعيش فيه.. إعطينى عمرى .. فانت ما تبقى منه.. أنت حبيبتى وعشيقتى وزوجتى.. بالحب أعشقتك .. وبالعشق اتزوجك

اسألنى مشاعرك.. إن كانت لغيرى خافى وابعدى.. وإن كانت لى تشجعى واقتربى.. كأتمس وأحرق قرد مربوط بسلسلة.. يرقصه صاحبه ويلوح له مهدداً بالعصا لكى يتسول به.. تسولت من الأيام وانتظرت كالمجنون.. وتعطلت كل حواسى وعجزت عن أى أداء.. إلى أن جاءنى تليفونك.. ورغم أنى أحاول شرح أزمى فأنا عاجز عن شرح فرحتى.. لبتك حريصة على كما انت حريصة على تسجيلاتى.. لأنها تسليك .. لقد أصبحت بالنسبة لك لب وسودانى.. ربما يوماً ما.. من أجل عينيك أفتح مقلة)

والباب مفتوح.. أكلنا السندويشات وشرنا القهوة وهما يسمعان التسجيل.. ولما سمعت (ربما يوماً ما من أجل عينيك أفتح مقلة) نظرت إليه ثم انفجرا ضاحكين.. ودار بينهما حواراً بدأ مرحاً وانتهى كئيباً

- إيه أجمل حاجة عجبتك فى..؟

- كل حاجة

- لا .. إيه أجمل حاجة على وجه التحديد؟

- ما أقدرش أحد

- يعنى لو خيرتك بحاجة واحدة .. تختار إيه؟

- ما أقدرش أختار لأنى ما شفتش كل حاجة

- تفكيرك راح بعيد.. بلاش تفكر فى اللى ما شفتوش علشان ماتتعبش.. لأن المسافة بين اللى

شفتته واللى ما شفتوش زى المسافة بين مصر وأمريكا.. المشوار طويل ولو حاولت مش ح توصل

- بلاش تحبطينى قبل ما أحاول.. فى إمكانك تقصرى المسافة

- إزاي؟

- تقربى منى

- قصرها أنت

- إزاي؟

- بلاش تركيب طيارات وتعدي محيطات.. خليهها رحلة فى الأحلام.. الأحلام بس هى اللى بتقصر

المسافات

- يرضيك أعيش جنبك فى الواقع.. وأحلم

- الحلم مجاناً.. على قد سنك وفلوسك

صدمه ردها.. فلزم الصمت.. وتوتر المناخ بينهما قليلاً.. وحضر شاعر شاب من زملاء الندوة وفرض

عليهما أشعاره.. ضاق به أول الأمر.. وبعد كم قصيدة أشفق عليه عندما أدرك أنه مجنون بها وأشعاره

عنها .. وبعد إنصرافه أعلنها باستنتاجاته .. وفاجأته بقولها

- فعلاً مجنون.. ده دبلوم تجارة وأنا بكالوريوس.. كان مفروض يحب على قده واحدة معاها إعدادية
- الحب ما يعرفش الشهادات
- أبوه نجار وأنا بنت بك
- الحب ما يعرفش الطبقية ولا الالاقاب.. ومادام ده رأيك ليه شجعتيه وجرجرتيه لغاية هنا
- عندي من ده كثير.. يستاهل.. اللي يحط نفسه فى النار لازم يتحرق
- حرام عليك .. ارحمى ضحاياك .. ده جى متشيك وشايل لك أشعاره
- كذاب.. أشعاره كان كاتبها فى واحدة تانية أعرفها.. قرأتها لى قبل ما اعرفه.. ولما شافنى أول مرة انههر.. وروحت معا.. وباحفر له وح ادفنه واردم وامشى على قبره.. وما أبصش وراى
- إيه بترضىنى.. بتفسح لى الطريق
- انت لسه رحلتك طويلة ما جاش دورك
- دورى معاك.. والا دورى فى الدفن
- أنت وحطك.. إذا اكتشفت انك كذاب.. ح تكون رحلتك للمقابر.. ح احفر وادفنك واردم وأمشى
على قبرك وما أبصش وراى
- كده .. والعيش والملح اللي لسه قدامنا
- ح اردو لك .. قرص أفرقها حسنة على روحك.. بالمناسبة تحب تطلع حسنة ؟
- مش فاهم ؟
- فيه واحدة غلبانة بترى أيتام بنجمع لها مبلغ .. تحب تساهم بكام
- انت ح تدفعى كام ؟
- مائه جنيه
وناولها مائة جنيه وهو يبتسم.. مؤجلاً حساب هذا الموقف وتقييمه إلى أن يخلو إلى نفسه
وأنقذه من ارتبأكه أمامها التليفون.. رفعت السماعة وهشت لسماع الصوت.. تسمع وتضحك..
وتتأرجع بالكرسى .. وعيناها شاخصة إلى السقف لمدة ساعة وكأنه غير موجود.. وضعت السماعة
وهي منتشية منتعشة مبتهجة
- تسمحي لى بسؤال ؟
- مش من حقل .. لكن ح اجاوبك.. ده المخرج بتاع المسرحية .. اللي مع الفرقة بتاع الشركة
- بيكلمك من اسكندرية ؟
- ولمدة ساعة .. شوف دفع كام علشان يسمع صوتى!
- هو التقدير عندك بالدفع ؟
- الفلوس بتقدر كل شئ
- إلا العواطف
- حتى العواطف
- هو كمان بيحبك ؟

- من أول ليلة شافنى روح معاه .. مانمش
- وأنت .. شعورك إيه ..؟
- لأ .. ده قدامه طاوور طويل
- أنا اتخنت .. ما تيجى نشرب حاجة ساقعة فى أى محل
- ميعاد العمل للساعة تسعة .. ويمكن اضطر أتأخر كمان شوية
- ليه؟
- منتظرة تليفون
- من اسكندريه برضه ؟
- لأ .. من طنطا
- هى الفرقة لها فرع فى طنطا ؟
- لأ .. ده من واحد محامى
- لك عنده قضية ؟
- لأ .. هو اللي له عندى قضية
- مش فاهم ؟
- قضية زى قضيتك .. بيعبنى .. كان صديق أخويا .. أرمل .. من أول يوم شافنى روح معاه
- وإيه المشكلة .. هو كمان معاه دبلوم تجارة ؟
- لأ .. ما طلبش يدى
- ليه مادام بيعبك ؟
- مكسوف
- يعنى لو خرج من كسوفه ح توافقى تتجوزيه ؟
- لما يخرج أفكر
- وان ماخرجش ؟
- أنا باسافر كل أسبوع خميس وجمعه .. أزور قرايى وأزوره .. علشان أنشط ذاكرته وأشجعه
- افترضنا إن ذاكرته مانشطتش وما تشجعتش
- أحفر وأدفنه واردم وأمشى على قبره وما ابصش وراى
- معاك تراخيص دفن جاهزة .. إنتى ترى .. كل دول حبوك .. المهم أنتى بتحبنى مين ..؟
- سايباهم يتعاركوا زى الديوك .. والدك اللي يغلب أجيب ديك تانى يغلبه علشان ما أقعش فى
- الحب .. الرجل الشرقى بيعتبر المرأة شئ للإستعمال .. زى سيارته .. نظارته .. ولعته .. جزمته ..
- يستغنى عنها ويستبدلها وقت ما يعجبه .. أنا برنيس .. أنا اللي استعمله .. الشبان أسيطر عليهم
- والكبار استفيد من خبرتهم
- كلمتينى عن كثير اهتموا بك .. وكل واحد تختمى كلامك عنه بجملة تقليدية (أنا متأكدة إنى
- يومها روح معاه) دايماً تروحي مع المعجبين .. لكن انت ما فيش حد شد انتباهك وروح معاك .. لأن
- فلسفة الحب عندك انك تشوفى الحب فى عيون الآخرين .. بلا أحساس أو أى مشاعر منك

- اللى قدرت تستغنى عن أولادها .. تقدر تستغنى عن أى رجل
- فلسفة الحب عندى.. أن يكون عندى أنا.. أشعر به أنا.. أتمتع به أنا.. أفرح به أنا.. أتألم منه
أنا.. وحب الطرف الثانى لى هو الضمان والأمان لحبى أنا.. إذا قابل حبى بالحب أفضل ما يقابله
بالنكران.. لكن الحب عندى فى الحاليتين.. إيه فائدة إننا نتحب من غير مانحب.. للأسف الحب
عندك معكوس .. صدقيني الحب فى حد ذاته متعة.. ونعمة
- اتنين بس بيروحوا معاً .. واحلم بهم كل ليلة
- اتنين مرة واحدة .. يا مفترية ؟
- ابنى وينتى
وتاهت فى أساها فأحنى رأسه معزياً

فى التاسعة دق جرس التليفون.. وتلحقت على السماعه.. وعاد لوجهها البشر والبهجة.. ولشفتيها
البسمة.. ولعيونها التالقة والالتماع.. وتهدج صدرها.. وتأرجع جزءها على الكرسي وهى تنصت
فقط.. ولا ترد إلا بكلمة (بعدين.. لا.. ربما.. أحاول.. يمكن.. يعنى..) بحيث لم يفهم شيئاً..
ولكنه يقين أنها تكلم رجلاً وأنها سعيدة بالحوار وسماع صوته

ولما طال الحديث سحب من سلة المهملات صفحة الجريدة القديمة التى أحضر فيها السندويشات..
وفرد طياتها وقال لنفسه هامساً (إنت رجل قديم.. لا يحق لك إلا الأخبار القديمة.. قالت لك اللى
يلعب بالنار تلسعه.. دى مش ناوية تلسعك بس.. دى ناوية تفرمك وتعمل منك كفتة وتشويك..
أنت مش حساس الوقت إن فيك سيخ داخل من فتحة الشرج وطالع من نافوخك.. وتحتك
ناراً)

وطالت المكالمه .. وطال انتظاره.. وفى نشوتها وهى تائهة عنه.. وعيناها للسقف وظهرها له.. ألقى
صفحة الجريدة.. وتسلسل على أطراف أصابعه.. ونزل السلم مسرعاً قبل أن تدركه

- يتهرب .. !
 - هربت لما ما عرفتتش أحل كلماتك المتقاطعة
 - مش فاهمة ؟
 - أيوه .. لأ .. جايز .. يعنى .. ربما .. أحياناً .. أفكر
 - هي .. هي .. انتى غيرتى يا حلوة ؟
 - لأ .. احترمت نفسى
 - طيب .. احترم نفسك .. وهات التسجيل وتعال
 - بس ح أمشى بدرى قبل الكلمات المتقاطعة
 - هي .. هي .. النهاردة ما فيش .. ح نتقدي فى باخرة على النيل .. وبعدها نحضر فى نفس الباخرة ندوة
 شعر .. ماتنساش التسجيل
 قام فوراً الى جهاز التسجيل وسجل لها

(حتى فى هذا العصر .. هناك رجال يعبدون النساء
 انت حبي .. انت عشقى
 انت دينى .. انت الحياة
 أنا مؤمن .. بالآخرة .. ولكنى مولع بالدنيا .
 ودينى دينتى .. ودينتى أنت
 وإن عصيت .. فالإله يغفر المعصية
 ولو أراد أن يعصمنى منها لفعل
 علينا أن نعيش .. وعليه الحساب
 فلا تقدرى غير ما قدر الإله
 قدمى دليلك .. قدمى قربانك
 امنحى وقامرى
 ميزينى على عشاقك .. فوزينى عليهم
 زغردى لفروسيتى .. وغنى لنارى
 دعينى أغلبك .. فأغلبهم
 ثم أغلبينى
 والله رب كل الناس .. حتى المقامرین الخسرانين
 دعينى أغلبك فتغلبى وسأوسى وشكى وقلقى
 ساعدينى لأشعر أن كل ذنبك أنا ..

فلا ألومك ولا أشك ولا أخاف.. هكذا تسعدينى وهكذا أسعدك
أما وأنا أصرخ من نارك.. فلا تنتظري منى أن أبتسم

كان يوماً جميلاً.. تغديا أسماكاً على النيل.. وسعدا بالشاي والقهوة والسجاير والحوار.. وفى المساء
انعقدت الندوة.. واختتمت بمطرب شاب.. كان طوال الوقت قبل الندوة يروح وييجى أمامهما متأبطاً
عوده يكاد يأكلها بعينيه.. اختار مكانه أمامها مباشرة وبدأ يغنى.. ويناجيها بعينيه.. ويضغط على
نهاية الكلمات.. ويضم عوده الى صدره كأنه يضمها.. يغنى ويهيك وهى سعيدة بالعاشقين معاً

بعد انصراف المطرب صارحها.. فاعترفت أنه.. من أول ليلة رآها منذ عامين وهو يكتب ويلحن ويغنى
لها.. ويعيش على الأمل.. وسألها سؤاله التقليدى.. فردت ردها التقليدى.. (المطرب أجره فى
مناسبة لكن لا تزوجه.. أنا بنت بك.. جد بابا عمدة وجد ماما باشا.. وأنا برنس)

غادرا الباهرة.. واشترى من الكافيتريا الملحقة على بابها كوبين من الجيلاتى.. وفضلاً أن يمشيا
بعض الوقت على الكورنيش فى ضوء القمر.. وتاه عنها فسألته
- سرحت فى إيه ؟

- ماشيين جنب بعض بناكل جيلاتى.. لو كنا بدرى.. وفى وسط البلد وحد يعرفنا شافنا.. ح يقول
اتقابلوا صدفة وعزمها على الجيلاتى.. لكن على الكورنيش وبعد نص الليل معناه إننا كنا مع بعض
فى مكان.. يعنى بيننا علاقة.. أنا فرحان بال لحظة دى.. ومن فرحتى سرحت أفكر وأقول لنفسى..
إن كانت عفوية تبقى رفعتى الحذر اللى بيننا.. وإن كنتى مدركاها وحاسباها يبقى فيه تقدم
- فكرك راح لبعيد.. ده تصرف عادى مش محتاج حساب.. ماهو أنا بعد ما باخرج من المكتب
بامشى أنا والفراش ناكل جيلاتى

وآلمه الرد.. واحتاجت عواطفه.. وفى غفلة منها القى كوب الجيلاتى خلفه.. وقال لها
- الله يسامحك.. كسرتى فرحتى.. لو قابلتك واحدة صاحبتك وقالت لك (أنا شفتك بالليل ومعاك
رجل بجلاية وطاقيه ويتاكلوا جيلاتى).. ح تقولى لها.. (فراش المكتب باشتري له جيلاتى
وأخليه يوصلنى).. شى يشرفه ويزيدك شرف.. لكن ما يشرفنيش أكون فراشك

ووصلا إلى مكان الركوب.. مد لها يده بالتسجيل.. وقال
- اللب.. والا تحبى ألفه لك فى قرطاس ؟
- هى.. هى.. هو فى قرطاس ؟
ابتسم فى مرارة.. وقال
- أنا

- آلو
 - بيتهوفن موجود ؟
 - آسفين.. المعلقة قفلت
 - ما اقدرش استغنى عنك.. اتعودت عليك.. عاوزاك معاى وجنبى فى كل مكان
 - آه.. الفراش بتاعك
 - لأ.. صديقى
 - قصدك أبوك.. صديقك ما يرضاش بكده.. أبوك هو اللى يسعده يكثر خطابك
 - أبوى وابنى.. ح تشوفهم النهاردة
 - فين إن شاء الله ؟
 - فى نقابة الصحفيين.. ح نتقضى هناك.. وبعدها نحضر الندوة
 - ومطرب العواطف ح يكون هناك
 - اصبر .. أنت رجل حلو قوى .. أنت عاجبنى.. بس أنا باسويك على نار هادية
 - بتسوينى علشان تعرفى تهضمينى
 - لحكم عجوز ما يتهمشم
 - عجوز تخطى السبعين.. استقبلها بفمه المبتسم وأسنانها المشرمة.. وعرفتتها ببعضها.. وأخذ يحكى قصة حياته وهى تهز رأسها اقتناعا بكلامه وتغافله وتغمز لفهمى بعينيها وشفتيها معلنة ضيقها ونفاذ صبرها.. ثم انضم إليهم شاب (حليوة).. ظل صامتا.. يأكلها بعينيها لمدة ساعة.. ثم دعاهم جميعا إلى الغداء .. وبكل صراحة ووقاحة اسرع واحتل الكرسي الذى بجوارها فابتسمت
 وبعد الغداء عاد العجوز الى قصة حياته.. وصبر فهمى حتى استفزه الصبر.. فنهض فجأة وأعلن انصرافه وأصر عليه وبان على وجهه الغضب.. فخافت وآثرت السلامة واستسمحت العجوز أن تسمع بقية تاريخ حياته فى جلسة أخرى.. ومدت يدها للشاب باستخفاف رغم ضيافته لهم وفى الطريق عرفتته.. أن هذا العجوز يحبها.. والشاب.. صحفى من خريجى الجامعة.. وكان خاطبا لزميلة لها فى الندوة.. وثار بينهما خلاف فتدخلت بينهما للصلح.. ولكن المحاولة انتهت بإصرار الخطيبين على فسخ الخطوبة.. وتعلق الفتى بها هى.. وختمت كلامها.. بترضية فهمى بأن العجوز فى حكم والدها.. والشاب أصغر منها.. ووعدته بدفتنها قريبا
 وعندما وصلا الى محطة الاقتراق.. وبكل كبرياء وأنفه أبلغته أنها تبرعت باسمه لعملية جراحية لامرأة فقيرة بمائة جنيه.. فناولها المبلغ وهو يبتسم وقفاه ملتهب يكاد يقرم خبزاً.. بل يكاد يحرق الخبز

وكأغلب الأيام.. تلهفت على التسجيل.. ثم فكت لفافات الطعام.. ثم الشاي والقهوة والسجائر.. ثم ما شاء به القدر من عشاقها الشبان.. استقبلتهم واحدا بعد الآخر.. حتى أقبل المساء وانقطعت زياراتهم فتفرغت له.. إلى أن جاءها تليفون طنطا فانشغلت به.. جسدها يتأرجع على الكرسي وعيناها للسما.. وبدأت (اللامات.. وجايز وممكن وربما ويعنى..) فجمع جرائد اليرم وهرب إلى حجرة أخرى بعد التليفون نادته .. والدم يكاد يقفز من وجنتيها.. وفي عينيها بريق والتماح وانتشاء

- مالك ؟

- أبدا.. هانت

- تقصد إيه يا حضرة الفيلسوف ؟.. مش فاهمة ؟

- الصيف خلص.. وكلها كام يوم والفرقة ترجع من اسكندرية .. والمولد ينفض وكل شئ يرجع لحاله.. وكل واحد فينا يرجع لدنياه

- أولا المولد مش ح ينفض.. لأن الفرقة راجعة من اسكندرية ومسافرة الكريت

- مين قال لك ؟

- صاحب الشركة.. ماهو .. ماهو

- ماهو إيه؟.. هو كمان معجب ا

- لأ.. مش معجب.. ده غرقان

- وعنده كام سنة بسلامته ؟

- أكبر من صاحبك الصحفي

- أكبر من صاحبك انت

- ماتفرقش.. ماهو من يوم ما عرف إنك الحارس الخصوصى بتاعى حاول يصاحبك علشان يقدر يعدى

- مش مكسوفة.. وأنت بتقولى إنى الحارس بتاعك ا

- صدقنى يا فهمى.. أنت الورقة الوحيدة النظيفة فى يدى.. الورقة الرابعة اللى بتحمينى من كل

الورق المزيف.. والناصحة تخلى الورقة الرابعة للأخر علشان تقش .. وكلهم بيتقربوا لك

- بيتقربوا لى علشان يوصلوا لك .. ماانا بقيت اللى اسمها إيه دى.. اللى بيقولوا عنها فى المثل..

(لا طالت ولا سلمت من النجاسة..) ويتضحكى على زى عوايدك.. بتصبرينى بالعيش الحاف

- اصبر وأنت تغمس وتلهط كمان.. فى يدك نعمة ما ترفسهاش

- أنت اللى فى يدك نعمة بتلعبى بها.. بتفرقى جمالك وتبعزقى عمرك.. جمال الست فى لحمها ..

ولحمها عمره قصير.. الحقى نفسك يا بنت الناس.. أنا طالب الحلال

- زى ما قلت لك.. أنت الورقة الرابعة.. أصبر لما أراجع الحساب واحسبها صح

- بس الحساب ما يفيديش بعد فوات الأوان.. يارب اتعلم منك الحساب.. أنا اللى محتاج أراجع.. قبل

ما تيجى لحظة أحتار .. الجمع والا الطرح.. الضرب والا القسمة.. وما اعرفش إيه اللى يحسم لى

الحساب..

- القسمة .. اصبر على قسمتك

- أنا محتار..لأننا فى الجنة ولا فى النار..لا أنا الأول وافرح ولا الأخير وأياس..أنا فى طابور ومش عارف ترتبى..ساعات أشعر إنى شئ كبير فى حياتك وأنت بتكاهى..وساعات أشعر إنى صغير جداً وأنا اللى باكاهى..إن ماكانش فيه أمل تقرى منى ابعدى واكسبى عمرك وسيبىنى أكسب عمري..وكل يوم عشاقك بيزيدوا.. وكل مازاد العدد تهت أنا فى زحامهم لا لاقىكى ولا لاقى نفسى..دوختينى ومسختينى..كرهتيني فى نفسى لانى أدمتلك..وعجزت عن كلمة لأ..تصالحينى بكلمة ونتقابل وأنا فرحان وأفارقك وأنا كفران..ترجعى بيتك تسهرى على تسجيلاتى تسمى شكوتى وتتمتى..وارجع بيتى أسهر أسجل واشتكى وأتوجع

- ياه ده أنت معبى..أوعذك..فى أقرب فرصة ح اغربلهم واصفيهم وأحسبها..بس أنهلك..حتى لو وافقت..أنا مهري غالى ماتقدرش عليه ولا على شروطى..يعنى بفرض إنى تنازلت عن فرق السن باعتبار إن ده الشرط الوحيد اللى إنت ماتقدرش تغيره .. إزاي أقدر أتنازل عن الشروط اللى إنت تقدر عليها..الشبكة والمهر والشقة التملك

- صحيح هى شروط غير متوفرة فى الوقت الحاضر..لكن بالوقت يمكن تدبيرها

- إنت لسه عندك وقت !! أما تدبرها قل لى

- ح تنتظرينى ؟

- مااقدرش أوعذك .. السوق كل يوم له حال .. اللى تشتريه النهارده تبيعه بكره .. واللى تبيعه النهارده تجرى وراه بكره .. انا ساعات باحبك .. وساعات باكرهك لأنك ماقابلتنيش اول حياتى .. ايامها كانت احلامى صغيرة

- شروطك صعبة قوى

- مش قلت لك أنا مهري غالى .. ماتقدرش عليه

- والحل ؟

- نصيحتى..كفاية عليك تحلم..الى ماتقدرش عليه احلمه..الحلم أسهل..وأرخص

- شكرا على النصيحة

وذكرته بالتبرع فتبرع.. وقال لنفسه..(لها حق تقول لك اصبر..مادام البنك مفتوح..ويتسحب على المكشوف)

دخل الشتاء .. وعادت الفرقة من الاسكندرية وسافرت إلى الكويت.. وبدأت تصفية الحساب.. كلما التقت بأحد عشاقها في ندوة أو نادى.. تنتظر حتى يغادرها وتخرج البلوك نوت والقلم وتحسبه.. هذا أبوه حلاق وهذا أمه غسالة.. وهذا أبوه تزوج على أمه .. وهذا فقير.. وهذا مجرد موظف.. وهذا شاعر عاطل .. وهذا من بولاق الدكرور.. وهذا لم يكمل تعليمه.. وهذا دبلوم تجارة.. وهذا شقيقه مسجون.. وهذا مطرب.. وهذا تخين.. وهذا أولاده في سنى .. وتعطيه درجة وتختتم كلامها.. (أنا والذى بك وابوه عمدة.. وأمى تركية وأبوها باشا.. وأنا برنيس..) ثم تضع علامة أكس على الصفحة بطولها وعرضها وتمط شفتيها.. وتتنظر إلى فهمى مجاملة وتقول (احفرى.. ادفنى .. اردمى.. امشى ماتبعيش وراكى ياهرنيس)

ولكن ظل البعبع الكبير.. ذلك المحامى القابع فى طنطا.. وإن لاحظ تطوراً فى الموضوع.. يتأخر عنها تليفونه فتطلبه فتجده.. وبعد المكالمات تسأل فهمى (مادام موجوداً لماذا لم يطلبنى ؟) فيرد بابتسامة مقهورة شامتة.. (سأليه) ثم بدأت تطلبه فلاتجده.. فتعاود طلبه.. ثم بدأت تهاجمه وتتكلم عن عيوبه وفهمى شامت صامت يسمع ولا يعلق.. وظل يرافقها فى الندوات وكل مكان.. وهو مجرد ذلك الشئ الذى (لا طال ولا سلم من النجاسة)

كانا فى قهوة الحسين الشهيرة.. الشاى الأخضر والشيشة.. وأخرجت علبة سجائرها متأففة من الناس والمكان على عكس ما توقع
- قرفانة ليه ؟

- قرفانة من الحارة اللي انت مقعدنى فيها على كرسى قديم وترابيزة حديد برخامة مشروخة وشاى مغلى وجرسون قذر.. وميت بياع وألف شحات
- ما هو ده الجديد.. السواح لما بيزهقوا من شيراتون وسميراميس والجارسون التنظيف.. بيزوروا القهوة دى

- علشان سواح.. مش ح يعيبهم يتفرجوا على عيوننا.. لكن أنا مصرية.. لما آجى الحى الشعبى ده.. وأقعد على القهوة الحقيقية دى.. يبقى عار.. أنا بنت بك أبوه عمدة.. وجد ماما باشا.. وأنا برنيس.. أنت جايبنى هنا علشان توفر

وافترقا وهما على منضدة واحدة.. هى مع علبة سجائرها.. تشعل واحدة من أخرى.. وهو مع الشيشة.. وكلما رفع عينيه وجد حالتها لا تسمح بحوار.. ومرت ساعة فنادى الجارسون.. فقالت بحدّة
- من فضلك أنا اللي ح ادفع الحساب
- اتفضللى

- ناولنى الفلوس من تحت الترابيزة

ناولها .. فقالت

- أصل أنا...

- عارف .. أبوك بيه وأبوه عملة وأمك تركية وأبوها باشا .. وانت برنسس .. وأنا أبويا حرامى ..

يبقى لازم أنت اللى تدفعى الحساب .. بس من جيبى

غادرا المقهى.. ووقفنا على الرصيف عند إشارة المرور ليعبرنا الشارع حين يتوقف سيل السيارات المندفع أمامهما فى سرعة الريح.. ولكنها فاجأته وعبرت والإشارة مازالت مفتوحة.. والسيارات مازالت مندفعة فى سباق رهيب.. وأصبحت فجأة فى نهر الشارع.. ورفعت ذراعها لأعلى بالإشارة التى يؤديها جندى المرور أمام السيارات بالتوقف.. وجهها متجههم وذراعها مشدود كإشارة هتلر الشهيرة.. وصرخت إطارات السيارات فى أصوات متلاحقة عند احتكاكها بأسفلت الشارع وهى تتوقف.. وكادت تصطدم ببعضها.. وارتبكت الحركة.. وصرخ البعض فيها يتهمها بالتهور والجنون.. ولكنها لم تبال .. وعبرت .. ويعد أن انتهت الأزمة لحق بها

- مش معقول تجازفى بالشكل ده .. دقيقة ماتفرقش

- مش الدقيقة اللى ح تفرق

- مش فاهم ؟

- اللى تفرق الكرامة .. أنا وسام .. أنا البرنسس .. أنا ما انتظرش السيارات .. هى اللى تنتظر

- سبحان الله .. يا خسارة .. الحلو ما يكملش

ركبها سيارة أجرة وتوجهها إلى الشيراتون.. وجلسا فى الكافيتريا.. وانتصب عودها وتألقت عينها وعادت الراحة إلى وجنتيها.. ورفعت ذراعها بالسيجارة إلى فمها بغرور وكبرياء.. ثم عادت به.. ونشرت رماد السجارة على صدره عامدة.. وابتسمت وقالت عاتبة

- هنا مكانى.. أنا وسام.. أنا البرنسس.. أولاد الباشوات بيقتعدوا هنا

فقال لها بسخرية المهزوم المأزوم

- آه.. ما هو الجارسونات بيقرزوهم.. اللى أبوه مش باشا ما يقعدش

- من غير فرز.. سيماهم على وجوههم

- قصدك سيماهم فى جيوبهم.. نص اللى قاعدين دول حرامية ونصابين.. ومادام بيدفع بقشيش لازم

الجارسون يقول له يا باشا حتى لو كان شافه امبارح بينشل فى أتوبيس

- ما أنت ما تعرفش قيمة الحاجات دى .. لأن أبوك لا مؤاخذه.. كان أفندى

- آه.. ده أنت فتحتى لى صفحة الحساب.. احسبى.. وقبل ما تصلبى على الصفحة وتقولى.. (احفرى

ادفنى اردمى.. امشى يا برنسس وماتبعيش وراك).. أرجوك قولى لى أنا جيت كام.. علشان أعرف

مجموعى يدخلنى الجامعة والا لأ.. أصل أنا عاوز أطلع دكتور

- بتتريق .. لسه بدرى على حسابك
- آه .. وراك حساب أهم
- قصدك إيه؟
- قصدى حساب اللى بيتهرب من تليفونك.. أنا فاهمك.. لا القهوة ريحتك ولا شيراتون ح يريحك ..
اللى يريحك طنطا
مس الجرح فاضطرب وجهها واحتاجت مشاعرها وزمت شفتيها فى غضب وقالت من بين ضروسها
- ابن الكلب.. هو فاكرنى إيه.. كورة فى رجله
- منتقم جبار.. بيسلط أبدان على أبدان.. سلطك على تخلصى ذنوبى.. وسلطه عليك يخلص ذنوبك
- شمتان ؟
- ما انكرش
- أنت علو
- وانت حبيبة
- أنت وحش
- وأنتى حلوة
- بتلاعبنى ؟
- باسليكى.. انتى كورته.. وأنا كورتك.. كل ما يشوتك تشوتينى.. أنا كورتك الطيبة اللى
بتحبك.. تلعبى بها زى ما تحبى.. تشوتها تنرد لك علشان تشوتها تانى وتالت.. بس يمكن
تشوتها مره تروح ما ترجعش
- أنت قلقان ليه.. أنت فى شارع وهو فى شارع تانى.. يعنى هو له ملعبه وأنت لك ملعبك .. وأنا
على ناصية الشارعين .. محتارة
- أنا ماباعرفش اللعب.. أنا جيت لك جد وطلبت الحلل
- وأنا أعطيتك الصداقة .. وأصبحت صديقى الوحيد كل الوقت.. وقدام كل الناس.. وقلت لك أصبر
- أنا لا حبيبك ولا صديقك.. ولا حتى أبوكى ولا أخوكى.. أنت مسختينى
- أنت رجل طيب.. خسارة أفرط فيك.. شايلاك لوقت عوزة
- احتياطى يعنى.. سيبينى أمشى وأنا فى نظرك الرجل الطيب.. بدل ما تيجى لحظة أضعف وأحاول
أغلط معاكى وأخسرك.. أنا مش ضامن نفسى
- لكن أنا ضامناك.. خليك جنبى أنا محتاجة لك.. وإن أخطأت تبقى غلطتى ومسئوليتى.. ومش
ح الوم إلا نفسى
- أنا مش رجل ضعيف.. لا فى بيتى ولا فى عملى ولا مجتمعى.. ولو كنت ضعيف كنت استغللت
وعدك ده وتعهدك ومديت إيدى عليك.. إلا لو كانت العفة واحترامى لنفسى واحترامى لك فى نظرك
ضعف.. أنا من قوتى.. قدرت أضعف نفسى علشان ما استقواش عليكى.. ضعفى قدامك قوة وقدرة
من رجل ينفرد لساعات طويلة فى شقة خالية بامرأة جميلة
- كل ده فى صفحتك .. وعلشان كده باحترمك وبأحبك.. ومتمسكة بك.. تحت أى مسمى.. أبوى.
أخوى. صديقى.. حبيبى .. زوجى.. اختار اللى يعجبك

- العبرة مش فى المسمى.. العبرة فى الفعل ورد الفعل.. العلاقة مشاعر وسلوك وعهد ووعد وعقد

بين طرفين

- اعقدها زى مايرضيك.. وفى الوقت المناسب لما أصفى كل حساباتى.. ح احط بصمتى

- عقد إذعان من طرف واحد.. يبصمه الطرف الضعيف.. مانت صفيتى حساباتك.. وصفح على ثلاثة.. أنا مش منهم.. محامى طنطا والمطرب اللى وعدك يبيع الأرض اللى ورثها.. والمخرج اللى سافر مع الفرقة ووعدك يرجع بمهرك دولارات.. خلينا يا بنت الناس نفترق وأنت فى نظرى وسام.. وسام تمنيته على صدرى فى الوقت اللى أنت بتجربيه على ثلاث صدور غيرى.. خلينا نفترق وأنت حبيبتى.. وأنت رزقى المقسوم لغيرى.. وأنت وطنى اللى أنا منفى منه

- يا سيدى اعتبرنا افترقنا مادام ده يريحك.. بس أنا فى مفترق طرق.. ومحتاجة لك جنبى.. فىن شهامتك.. فىن رجولتك

- ماشى.. أنت النهاردة قلتى فى معرض كلامك (باحبك).. اعتبرنى ماسمعتهاش.. أنا عارف أنها فلتة لسان مش ح احاسبك عليها.. وقلتى (بخيل).. وعلشان أثبت لك إنى ما قصدت من قهوة الحسين غير التغيير.. الفرق اللى وفرته أهه

وأخرج ورقة من فئة المشرون جنبها ومزقها أمامها.. وألقى بالقصاصات فى طفاية السجائر.. وناولها ورقة أخرى من تحت المنضدة لتحاسب الجارسون.. ثم ناولها خمسة ورقات جزية.. أو ما تصر على تسميته تبرعاً.. وغادرا الشيراتون.

انتهى الشتاء .. وانتهى عام .. وانتهى عشاقها .. حررت ورقة حساب لكل عاشق وصلبت عليها
ومزقتها .. ولم يبق فى ذمتها سوى ورقتين .. فهى والمحامى

واليوم الخميس .. سافرت إلى طنطا لتحفل بعيد ميلادها مع المحامى .. وسافر فهى متشرداً فى
شوارع القاهرة طوال الليل .. واستبدت به كالعادة القيرة وعار الصبر .. وتملكه الغضب .. وقرر أن
يحرك المياه الراكدة .. ويسجل لها أشد رسائله ويعجل بالحساب .. ولم يكن أمامه سبيل ليحمى
نفسه من الانهيار سوى ذلك .. لا بد أن يقطع العرق ويسيح دمه)

(غداً ستحتفل بعيد ميلادها فى الندوة .. سأشتري لها تورتة وأقدم لها هدية وأمشى .. مجنون أنا ..
سأحتفل بعيد ميلاد امرأة كانت بالأمس تحتفل به مع رجل آخر فى بلدة أخرى .. وربما فى أحضانها ..
نخوة وشجاعة ورجولة أو خيبة ما عادت تفرق ..)

وعاد إلى البيت مع الفجر .. يجر أذيال الهزيمة .. ويكتب لها رسالة الوداع
(أنت قلعة حصينة .. حولها سياج من حذر وشك وحساب عسير لكل من يقترب منك ولو بحسن نية ..
هناك من يحاول أن يقفز أسوارك .. ومن يبحث عن ثغرة فى جدارك .. نماذج من العشاق تنهاوى تحت
قدميك .. وانت لا تحبين الإنسان .. فقط تحبين الحب الذى يحبه لك .. الشخصية الراضية دائماً
فيك .. تكونت من والدك الذى كان يختلف معك .. وأخواتك الذين كانوا يهزمون .. بك وطيقتك الذى
كان يستسخر أفعالك .. والنماذج الفشاشة التى صادفتك بعد الطلاق .. والعشاق الشعراء الذين
أسمعوك غزلاً سبق أن أسمعوه لغيرك

مادمت تخافين من الرجال لماذا تقرينهم منك .. ثم تحفرى وتدغنى وتردمنى .. ولكن حاذرى .. عندما
يشيخ لحم المرأة ينتهى عمرها الافتراضى وتصبح كالألة الموجودة شكلاً وحجماً ولكن بدون استعمال
وقتها إذا نظرت خلفك لن تجدى سوى طريق خال موحش .. ليس به سوى شواهد قبور شهدائك

أنا مهزوم وسأنسحب ولن أخرج من انسحابى .. أنا حارسك وسميرك وأنيسك وصديقتك التى
تشكين لها همك وتبوحين لها بأسرارك .. وفى الندوات الصراف الذى يناولك من تحت المنضدة
لتفدق بكرمك على معجبيك .. وسلفة للزميل المحتاج .. ويقشيش للجارسون .. والتبرع
الوهمى .. وفى الليل أنا قرطاس لب .. تسهرى على تسجيلاتى

وفى النهاية .. أبوك بيه وجدك باشا .. وأنا لا مؤاخذه أبوى أفندى .. وتهملينى عندما يرن تليفون
طنطا .. فى القاهرة معشوقة وفى طنطا عاشقة .. وأنا سندوتش بين الاثنين .. عاشق مسكين يلعب

مباراة صعبة على سنه فى المسافة بين القاهرة وطنطا.. يلعب بالنار.. نار تلسع حتى لو لم تقصدي..
لأن النار عندما تحرق لا تقصد

صبرت على الصداقة مرغماً.. وعندما يرن تليفون الحبيب تكون قدماى على السلم.. لحظة شجن..
أنساها طوال النهار وأنا معك.. وتؤلمنى حين تحين.. تتلهفين على صوته عبر الأميال.. واتلهف على
صوتك عبر نصف متر.. لأننا الزوج ولا الصديق ولا الحبيب.. أنا مسخ.. أنا خطاف يخطف من كل
هؤلاء.. أنا قرد.. قرد يلعب نوم العازب وسلام لسيدك وعجيين الفلاحة.. اعجن الوهم كما يعجنه
القرود

رضيت الهوان وأنت تستعرضين عشاقك أمامى.. وعندما انتهى الطابور أصبحت أنا الذى بينك
وبين المحامى.. تجرجريننى.. تسحبيننى بحبل.. مرخى أحياناً ومشدود أحياناً.. فى لحظة أسعد
بقيدى.. وفى لحظة يفقدنى صوابى.. ولكن الرجل الطيب صبر على أمل أن تخففى قيدك ولا
تخنقينه.. ولكن للأسف.. حز الحبل على رقبتى يحز فى نفسى

أنت تجرى ناحية طنطا وأنا أجرى خلفك.. وكلانا على نفس السرعة.. وفى آخر الطريق هو ينتظرك..
وستصلين إليه قبل أن أصل إليك.. يعنى مستحيل أن ألحق بك.. هذا حظه.. هذا رزقه.. وصل إليه
وهو واقف مكانه محلك سر.. الأفضل أن أرجع من منتصف الطريق بدلا من أن أستمّر ثم أرجعه كله

وقلت لك من كثرة إيمانى بك ويأسى (ربما أكفر بك).. قلت.. (لما تكفر بى أكفر شوية شوية..
ماتخليهاش مفاجأة) يعنى لا يهملك أن أكفر.. كل ما يهملك ألا تتعبين من المفاجأة

أنا ماشى يا وسام.. ماشى يابرنسس.. ماشى من غير رجعة.. أفضل أن نفترق قبل أن تهتز صورتك
فى عيني.. أفضل أن أراك جميلة وأنت بعيد عن أن أراك قبيحة وأنت بجانبى.. وذكرى جميلة أفضل
من حاضر قبيح

الأغاني بدأت توصل لى معنى الفراق.. وحرصت على أن أسمع قبل أن أنام قصيدة الأطلال وحلمت
أنى ماشى فى جنازتى.. وحامل نعشى وذهب لأدفن جثتى.. ولما أفقت فهمت أن هذا معناه أنى حى
ميت وأن الحى متعب وهو يحمل الميت.. يحمل حبه وهمه وحظه.. يحملهم فى نعش ليدفنهم
وآخر كلماتى إليك.. مادام الاقتراب يجمعنا على الدموع.. تعال نفترق ونبتسم.. وصافى الحساب..
باحبك.. يا أعز امرأة فى الوجود.. باحبك.. يا أجمل حدث فى كل عمرى باحبك.. والله العظيم
باحبك.. وداعا

كل عشاقها المهزومين.. بروح رياضية تجمعوا وجمعوا واشتركوا في تورته عيد ميلادها التي على المنصة.. وضع فهمي التورته التي أحضرها بجوار الأخرى .. وعاد إلى مكانه وكرسيها بجواره خالي.. وتذكر حفل العام الماضي وماعانه

وانتظر.. وطال الانتظار.. وحضرت مع الداعية ومعهما شخص ثالث.. وأرسلت التحية للجميع بذراعيها وابتسامة غامضة.. وإن بان على وجهها الارتباك والحرج.. وانتهالت عليها التهاني.. وتعليقات الزملاء وقبيلات الزميلات

جلست بجوار الداعية على المنصة.. ترتدى ثوباً جديداً لم يره من قبل.. مع أنه يحفظ كل ثيابها.. يبدو أنها اشترته خصيصاً لهذه المناسبة.. وجلس الرجل الغريب بينهما.. وقامت أخريات بتقطيع التورته

(مباها لتجاهلني .. مع أن الكل يعرف الآن علاقتنا.. هل تستحضر الذكريات وتكرر ما حدث في العام الماضي.. على بالصبر حتى لا أقع في سوء التقدير الذي وقعت فيه العام الماضي.. ولكن من هذا (البقف) الذي فرض نفسه على المنصة.. هل هو زوج الداعية؟..)

وانشغل الجميع في الحلوى.. وانشغل هو بالمنصة وأصنامها الثلاثة.. وتحسس الرسالة في جيبه متحفزاً.. وفجأة قامت الداعية.. وأسكتت الجميع بإشارة عريضة بذراعيها وابتسمت وقالت

- بالنيابة عن الزميلة الاستاذة وسام.. أقدم لكم الشكر على التورته والهدايا.. واخص بالشكر الزميل الأستاذ فهمي أبو الوفا على التورته.. وبالنيابة عنكم.. أقول لها كل سنة وأنت طيبة وباسمكم باقول لها مبروك الخطوبة.. واسمحوا لي أن أقدم لكم عريس عروستنا الجميلة.. الأستاذة.....

وصفق الجميع إلا هو.. ذهل.. وعجز عن أي حركة.. وتعطلت كل حواسه كأنه قد شل.. وتمنى أن يفقد السمع والبصر وأن تنشق الأرض وتبتلعها.. وشعر أن الدنيا كلها تتحداه.. الأرض والسماء والليل والقمر والنجوم.. حتى الهواء يرفض أن يصل إلى رثتيه أقنع نفسه أن لا وقت لتقدير الموقف وحساباته.. وكل ما يلزم الآن.. أن يسترد أنفاسه.. وتنتظم دقات قلبه ويتوازن.. وابتسم.. ويصفق مثلهم

(هذا هو غريمك اللدود.. جاء من طنطا ليهاجمك في عقر دارك.. ردت على الرسالة قبل أن تتسلمها وضربت ضربتها.. فتحت لك الصفحة وحسبت واعطتك صفراً.. أما أنت فحسبتها خطأ.. ظننت أنك ستتعشى بها ولكنها عجلت وتغدت بك

ولكن لا.. إن كان جدك باشا.. أنا أيضاً باشا.. سأتحمل الصدمة كالباشا.. وأتحنين الفرصة وأمشى
وأنا باشا .. وعندما ابتعد سوف أصرخ على راحتى .. المهم أن أهرب وأنا ابتسم.. أهرب وأنا
باشا)

وعافت نفسه الجاتوه كما حدث فى العام الماضى.. وخوفاً أن يعود بالطبق الكرتون ملآن فيفتضح
أمره .. أسقطه تحت الكرسي.. ومضت لحظات كأنه يجلس فوق فحم مشتعل.. ترشقه العيون
المندهشة والحاقدة والمتشفية من كل الاتجاهات

وانتهز فرصة ذهاب البعض إلى دورة المياه لفسل أيديهم.. وأندس بينهم.. ومن هناك تسلل إلى
الشارع.. وفى الطريق أخرج الرسالة ومزقها.. ونثر القصاصات فى الفضاء.. كأنه ينثر كل الأيام
المتبقية من عمره.. وضحك بصوت مرتفع ساخراً من نفسه .. حتى التفت المارة إليه وظنوه
مجنوناً.. وظل يضحك ويضحك.. لأنه عجز عن البكاء

كان أول العلاجات المطروحة هو الاعتماد عن المكان والزمان والناس.. عاد إلى بيته وجهاز حقيقته.. وبعد ساعات قليلة غادر القاهرة وفى المتنfy عالجم نفسه أياماً بالمغيبات.. حتى استرد جأشه.. وانتظم نبضه وطوح نفسه.. واستعاد قدرته على التفكير.. فلام نفسه.. لأنه لو كان فى كامل وعيه ما غادر الحفل وكشف نفسه.. (أعطيت فرصة للشامتين الذين كلت لهم أن يكيلوا لى.. وكدت لهم أن يكيلوا لى.. ولا بد من إصلاح الأمر.. لا بد من سد الشفرة وترقيع الفتق.. لا بد من حضورى الندوة القادمة لتخرس الألسنة.. التى علقت وخمنت وأشاعت.. فلن يخرسهم سوى وجودى)

وفى منفاه .. شغل عقله بالبحث عن وسيلة لمواجهة وعلاج الموقف.. إلى أن اهتدى.. فاشتري ورقاً وقلما وجلس على المقهى يكتب لها رسالة

(آسف.. لم أستطع الحصول على مجموع.. اعطيتينى صفراً ووضعتينى فى طابور المرفوضين.. حفرت ودفنتينى وردمت ومشيت على جثتى وأنا حى.. لعبتك المفضلة.. لعبتك التى أتقنتها.. ترحبى بأى غرام لكى تأسرى شخصاً تشقى له الأرض وتدفينيه.. كالسفاح.. أول مرة يقتل لسبب.. بعد ذلك يقتل بدون سبب.. يقتل حباً للقتل.. وعندما يصبح كل هدفه الدم يصير سفاحاً.. عشرات دفنتهم بدون دمة وفاء.. الذى يموت له كلب يحزن عليه.. والتى تموت لها قطرة تبنى عليها

المحامي هو الوحيد الذى لم تقدرى على دفنه.. لأنه مختلف عنهم وعنى.. لأنه لم يعرض نفسه لسلأحك.. لم يضع نفسه تحت كراياك.. لم يشتهيك.. ولم تسحره عيونك.. وتركك تلهشين أمام التليفون طوال الأسبوع وتلهشين إلى طنطا كل خميس.. وأنا بخيبتى ظلت أمامك اصبروا تمنى وأشتهى.. وأخيراً عاقبتينى على صبرى.. عاقبتينى لأننى كنت طوع يدك.. لم أحيرك ولم أخلف لك موعداً ولا وعداً

شرخت القلب الذى تحملك وأحبك.. وذبحت الضمير الذى احترمك وصانك .. والكرايا الذى استعملته لكى تضربينى.. استعملته لكى أحملك منى

أنا لست ضعيفاً.. أنما كنت أضعف نفسى لكى لا أستقوى عليك.. عمري ما فوزت نفسى عليك.. دائماً كنت أضعك بجانبى.. أو أضع نفسى بجانبك.. وأفضل أن تسبقينى بخطوة.. ولا أرفض أن تكونى المحور وأنا ألف وأدور حولك.. وفى عز فرحتى طعنيتينى.. وفرضت على المفاجأة أمام الناس لكى أكنم صرختى.. وحرقتينى بخوراً تبخرتنى به لرجل آخر

سأثبت لك أن امرأة أخرى أجمل منك اشترتني.. أنت حب بدون ممارسة وهي ممارسة بدون حب.. مارست وستمارسى معه الحب .. وليس أمامى إلا أن أمارسك مع أخرى.. سأكتب عليها اسمك.. وأمارس فيك معها ما لم أحاول أن أمارسه معك.. وسأخذ بثأرى وأنتقم من أيام الصبر

وسأقدم لك الدليل فى الندوة.. فى الوقت الذى ستمارسين فيه قراءة رسالتى هذه.. سأكون أنا مع امرأة أخرى فى ممارسة أخرى.. لقد أخطأت فى حقى.. وبدلاً من أن أمد يدي عليك سأمدّها على غيرك انتقاماً منك.. بدلاً من أن أرد ظلمك لك سأرده فى غيرك قلت لك الفراق سلام والسلام أفضل.. قلت (مانعرفشى إيه بكرة.. خليك جنبى) ثم غافلتينى وذبحتينى

هذه الرسالة آخر ما بينى وبينك.. سأختفى من حياتك إلى الأبد.. أعرف أنتى عندما سأعطيك ظهري ستدمع عينى.. وستصبح الدنيا ظلام.. ولكنه ظلام أفضله على نور أراك فيه مع رجل آخر.. وداعاً)

اكتملت الخطة فى رأسه فعاد من سفره.. واتصل بسيدة من الأسرة.. أشهر صفاتها الجمال.. زادتة بالأناقة ورشاقة الخطوة وحلاوة الابتسام.. قصدها فى خدمة.. أن تذهب معه لشراء هدية لزميلة بحجة أنه لا يعرف كيف يختار هدية لسيدة.. والتقى.. ونزلاً أمام النادى فدهشت.. فهمس لها.. (عندى الآن ندوة.. سندخل معاً واستأذن ونصرف إلى مشوارنا..) قالت (انتظر).. قال (ادخلى معى.. فأنت حجتى فى الانصراف)

ودخلا إلى الندوة.. وهولمس مرفقها بأطراف أصابعه ليوحى للجميع بأن بينه وبينها علاقة عاطفية.. ولم تحرجه واستسلمت وإن لم تفهم.. وألقى التحية على الجميع وجلسا.. وفتش عن وسام فوجدها.. وبجوارها الكرسي الخالى الذى كان دائماً محجوزاً له.. ولكنه الآن محجوز لمرسها.. فوجد عيناها خارجتان عن مآقيهما فى دهشة مذهورة.. فاستراح

بعد قليل أشار للسيدة فنهضت.. وأمسك مرفقها متعمداً ومربها أمام وسام وتوجها إلى البوفيه.. والتفت خلفه فجاءه فوجدها قد أدارت وجهها نحوهما بحيث أصبح وجهها فى ظهرها.. فزاد ارتياحه وفى البوفيه شرباً مرطباً على عجلة.. ثم نادى الجارسون وأعطاه مطروفاً به الرسالة.. وأفهمه أن يتحين فرصة مغادرتها الندوة إلى دورة المياه لتدخن سيجارة كماداتها.. ويعطيها المطروف

تجول مع قريبته فى وسط البلد ثم عاد إلى البيت .. فتح الباب فناداه جرس التليفون

- آلو

- آلو فى عينك .. إيه اللي هبته ده ا

.....

- جايها من أنهى كباريه ا

.....

- عيب يا رجل يا كبير يا محترم .. المسخرة اللي عملتها

.....

- رد

- البداية ما تشجعتش على الرد

- طبعاً ح ترد تقول إيه .. بعد ماهزأت نفسك وهزأتنى وهرزأت الندوة كلها .. ساعتين باطلبك ما

بتردش على التليفون ليه .. قد كده مشغول بالخنفسة اللي معاك

- أنا لسه راجع

- رجعت المية من حلقك .. أطردها وتعال حالا .. حالا .. حالا .. بعد نص ساعة تكون عندى فى

المكتب .. أحسن وشرف جدى .. إن ماجيت ح تلاكينى عندك وح اطردها بنفسى .. وأفرج عليك اللي

يسوى واللى ميسواش .. فاهم

- بهدوء .. دى مش طريقة تفاهم

وصرخت عالياً .. كأنها تستغيث بالجيران

- انزل حالا .. وإن كنت قانع علشانها البس حالا .. حالا .. أو حتى تعالى عريان .. إن زدت عن نص

ساعة ح آجى لك ومعاه بوليس النجدة

- هى حصلت ا

وزاد صراخها واختلط بنشيج ونحيب .. فلم يستطع تفسير كلماتها

- أنا مجنونة .. نص ساعة قلت لك .. وإلا ح آجى أولع فى الشقة .. وأحرقها وأحرقك

- طيب .. نتفاهم

وابتعد صوتها .. فانتبه إلى أنها تركت السماعة ودارت فى الشقة تصرخ وتولول .. ثم عادت

- قلت لك حالا .. وإلا ح ارتكب جريمة

- هدى نفسك .. نص ساعة وأكون عندك

وفعللاً لم يتأخر .. ضغط الجرس فانفتح الباب قبل أن يبعد يده .. ودخل فوجدها حافية وشعرها

مهوش .. وعيونها مفزوعة دامعة .. وفتحة صدر الثوب مشقوقة حتى بطنها .. ظهر منها قميصها

الشفاف الوردى وشف عن سوتيانها الأحمر

رفعت عينيهما إلى وجهه باستغراب كأنها تراه لأول مرة.. وفجأة.. أُلقت بظهرها على الحائط الذي خلفها.. وغطت وجهها بكففيها.. وأجهشت بالبكاء

انتظر بجوارها ساكناً لدقائق.. خائفاً من رد فعلها لأى تصرف منه.. ثم ضم فتحتى الثوب على بطنها.. وريت كتفها.. وقادها إلى الكرسي فاستسلمت.. وانتظر دقائق ثم قال فى همس خوفاً أن يثير غضبها

- ح استأذنىك خمس دقائق

وقالت بنفس الهدوء.. ومازال وجهها فى كففيها -

- رايح فين؟

- ح اشترى إبره وخط.. تصلحى فستانك

- مش مهم

- ح تروحي إزاي؟

- مش ح أروح.. ح أبات هنا

- طيب.. اشترى حاجة ساقعة.. تروقى دمك

- أنا ماأكلتش من امبارح

واطمأن لتجاوبها فى الرد.. فقال

- أنزل أجيب عشا ؟

- وهات سجائر.. وهات هباب من اللى بيشرهوه الرجالة

- مش فاهم ؟

- عاوزه أشرب سم... عاوزه أتوه.. وأنساك وأنسى نفسى وأهلى والناس.. والدنيا كلها.. هات

قزازه زى اللى اشتريتها للجربوعة بتاعتك

- أنت عارفة.. أنا ماهاش ريش

- أكيد هى بتشرب.. المتشردة رد السجن.. أكيد كانت زميلتك فى السجن

- فى السجن ما بيعطوش الستات مع الرجالة.. وإلا كان كل الرجالة إتمنوا يخشوا السجن

وافللت منها ضحكة أضحكته.. فقام إليها وقبل رأسها وريت ظهرها.. وقال

- دقائق وراجع

ونظرت إليه مستريبة.. فقبل كفها.. وكرر

- راجع

عاد فوجدتها مازالت كماهى بالثوب المشقوق مهوشة الشعر حافية.. حملت عنه اللقافة وأشارت إليه فتبعها إلى حجرة أخرى فى آخر الشقة.. على بابها لافتة نحاسية مكتوب عليها (المدير العام) فتحت ودخلت فدخل خلفها.. أضاعت النور فاسفر عن مكتب كبير وأثاث فاخر وديكورات رائعة وسجادة كبيرة قيمة ونجفة ثمينة

جلسا متقابلين على الكرسيين الجلديين اللذين أمام المكتب.. وفرشا الطعام على المنضدة الصغيرة
التي بينهما.. ثم أشعلت سيجارة ووضعت ساقا على ساق.. فرأى لأول مرة أصابع قدميها وأظافرها
الملونة

- إيه عاجباك ضوافرى ؟

- يعنى

- بدمتك مش أجمل من وش الجريانة بتاعتك ؟

-

- طردتها.. والا متلقة فى البيت منتظرة رجوعك.. على فكرة انت مش راجع.. ح تبات معاى هنا

ونظر إليها عاتبا.. بما يعنى الرفض.. فقامت بعصبية ودارت حول المكتب وفتحت الدرج.. وأخرجت
طنجة كبيرة.. أمسكتها بكلتا يديها على طريقة رعاة البقر فى السينما الأمريكية.. ووجهتها إلى
رأسه عبر المكتب.. ونظرت إليه بتحد.. وزمت شفتيها.. ثم قالت بغضب

- أى مقاومة أو رفض ح أفرغ المسدس ده فى وشك.. أنا مجنونة.. إتجننت من ساعة مادخلت الندوة
وهى معاك.. ح اقتلك واعمل لها تليفون تيجى تستلم جثتك

قال.. يلين ويرطب المناخ بينهما

- مش ح اصعب عليكى!

- إذا صعبت على .. بعد ما اقتلك ح اقتلها.. واقتل نفسى

- هأها .. ملبحة يعنى.. حطى الطنبجة فى الدرج.. واخز عين الشيطان واقعدى نتفاهم.. فعلا أنت

محتاجة تشربى وتنسى

أعادت الطنبجة وأغلقت الدرج وهى ساهمة.. وقالت كأنها تكلم نفسها

- ياريت أقدر أنسى

- اصبرى .. ح انسيكى أهلك

- أهلى نسيتهم علشانك سنة.. عاوزه أنساك

- ما أنا أهلك يا عبيطة

عادت إلى كرسيها.. وعادت رأسها لكفيها.. وعادت للبكاء.. وبعد نهضة بسيطة.. مسحت عينيها
بظهر كفها.. وأشعلت سيجارة.. ورفعت الزجاجاة وأفرغت فى الكوب حتى امتلأ.. همت أن ترفعه
إلى فمها.. فلحق بها وأمسكه فى يدها

- إيه ده يا مجنونة !

- سيبنى انساك

- كده يبقى باسيبك تنتحري.. ماتشربيش على لحم بطنك.. كللى خفيف ويعدين اشربى.. ومش كل
ده.. شوية شوية.. وعلشان خاطر ح اشرب معاكى

ومضت ساعة..أكلًا وشربا وهدأت أعصابها..فتركت كرسيها وجاءت فجلست معه على كرسى واحد.. بحيث احتواهما بصعوبة
- هيه.. عرفتها فين وإزاي وإمتى.. وإيه مدى العلاقة اللي بينكم.. وسحبت منك كام لغاية دالوقت ؟
طوق خصرها وهو متأكد أنها لن ترفض..فقد أصبح واضحاً أن المناخ بينهما يسمح.. وقال
- تحقيق؟
- طبعاً

إنت امرأة جميلة.. قابلتك.. اتعلقت بك من أول نظرة على طريقة الحب زمان.. ويوم ما أخذت رقم تليفونك شعرت إنى أخذت كلمة السر لباب الجنة.. وهبتك وقتى..وعمرى.. ونفسى.. وجاملتك بكلمتى وهديتى وقرشى..وقدمت حبى رفضت.. وطلبت حبك رفضت..كل اللى قلتيه إصبر.. وصبرت.. تحفرى وتدفننى وتردمنى وتمشى على القبور.. وكل ما تدفننى واحد ويخف الزحام حوالىكى استبشر..وأقول زادت فرصتى..ولما خلت الساحة من المنافسين ظنيت إنى على وشك أحقق حلمى.. ما انتبهت إن الدور على.. وحددتى التوقيت بعقريّة.. يوم عيد ميلادك يكون يوم وفاتى.. وحضر المقتول بنفسه للقاتل شايل تورتة وهدية.. وحفرتى ودفنتى وردمتى ومشيتى على قبرى.. وفترتى على روحى تورتتى

- انت كنت عارف إنى باحب سامى
- انتى قلتى هو فى شارع وأنا فى شارع تانى..وأنت على ناصية الشارعين فى مفترق طرق ومحتارة ولما قلت لك أكثر من مرة سيبينى أمشى رفضتى..وصممتى إنى أفضل جنبك..وقلتى أنا محتاجة لك .. اصبر
- وأخيرا اخترت

- أنا ما فرضتش نفسى عليكى..مهما كانت مشاعرى وحبى لك..كنت دايماً مستعد آجى على نفسى وابعد علشان خاطرك..يبقى كان لازم تمهدى..تعرفينى..تستأذنينى..تقولى لى عن إذنك ح ادبلك.. لكن تدبحينى غدر .. لا .. أرفض .. أنا مش خروف.. الخروف بس هو اللى بيندبح من غير إذن.. كان لازم تستأذنى..تقولى لى المثل الشهير.. (سيب النعجة يا خروف) وتسمى وتنطقى الشهادة.. لكن تدبحينى من غير ما تسمى يبقى دبح حرام.. دبح غير شرعى.. دبح غير محترم لأنك دبحتينى بطقوس أقل من طقوس دبح الخروف

هى بردت وهو سخن..علا صوته وزاد انفعاله..فقامت من جواره إلى الزجاجاة فأفرغت كأساً وعادت به.. وفاجأته.. بدلاً من أن تجلس بجواره جلست على ساقيه.. وشربت من الكأس رشقة ثم وجهته إلى فمه وسقته.. ثم أعادت الكأس الى المنضدة وسقته من كأسها.. من شفتيها

ومضى الوقت .. وفعلت الخمر فعلها.. وانتشت الرؤوس.. فعادت تسقيه من شفتيها.. وصدرها.. وانتشت بالخمر فأمسكت بطرفى الثوب المشقوق على صدرها وشقته حتى بطنها وسقته

ومضى الوقت.. ولعبت الخمر برأسه فعابثها.. ولعبت برأسها فخلعت ثوبها.. ولعبت بمفاتيح المسجل فانطلقت تطوف الحجرة وترقص.. بقميصها الوردى وهو يشف عن قطعتيها الداخليتين الحمراءوتين

ومضى الوقت.. ولعب الشيطان بها.. فارتمت على الأرض واستدعته بذراعيها.. ولعب الشيطان به فارتدى عليها وطوقها بذراعيه.. وعراها وعرى نفسه وأخذها فى حضنه.. وأدخل لحمه فى لحمها.. وتوحدت مشاعرهما.. ووصلا للندوة.. فلم يعد يعرف إن كان ما يسمعه نبضات قلبه أم نبضات قلبها.. إنسان واحد بقلب واحد فى ذكر وأنثى.. ووصلا الى قمة النشوة ولحظة التوحد.. وأفرغا شحنتيهما.. وارتاحا.. واسترخيا.. ولعبت عيونهما بالبهجة والرضا والشبع

وفى قمة فرحته بعدما بلل بطنها.. ومازالت سكينه فى أحشائها.. شهرت سكينها وردت اللحظة الجميلة بطعنة مسمومة.. نظرت إليه بكل تيقظ ووعى وقالت بتحد - أنا والا هى؟

- هى مين؟

- المقشقة اللي فى البيت

- اللي فى البيت ست محترمة.. كبيرة مريضة.. حاجه بيت الله

- ما اقصدهاش.. أقصد الثانية الصايعة الخدمة

- عيب.. أنا ما اعرفش خدامين

- الطيور على أشكالها تقع

- أنت كده بتشتمينى

- ما انت شتمتى قدام الندوة كلها

- كنت بادافع عن كرامتى.. بعد ما اخرجتيني بعريسك قدام الندوة كلها

لطمت خدها فى ندم وقالت

- ابن الكلب وعدنى يكتب الشقة باسمى ورجع فى كلامه.. ويفرض على شروط.. رفضت شروطه ورفضته.. ورجعت لك

ابتسم فى مرارة.. وقال بتهكم

- لأ.. تفرق

- مشى فاهمة؟

وفضل ألا تفهم.. فغير الموضوع

- أنا مندهش.. انت بتغيرى؟

- أنا باغير على وسام.. باغير على البرنس.. شىء كان ملكى ما احبش حد ياخذه منى.. أنا غيرانه على نفسى مش عليك

- احترت.. مش قادر أفهمك

- أحسن.. والأفضل ماتحاولش.. لأن عمرك ماح تقدر تدخل جواى.. بينى وبين كل الناس باب من فولا.. اللي يحاول يدخل منه يتكهرب.. طليقى نفسه حاول ماقدرش

- لكن أنا ح اقدر

- كذاب .. أنت شهدت بنفسك على نفسك .. لك سنة جنبي ولسه قايل مش قادر أفهمك .. قبل
ما تحاول تفهمنى حاول تفهم نفسك
- أنا مش فاهم نفسى؟
- طبعاً .. أنا لى سنة ملبسك العمة .. وقافلة بها عينيك وودائك .. ولا أنت دارى
ولسعتك الكلمة .. وأفاق وانتبه .. ففض الاشتباك .. اشتباك الحوار والجسد .. وعاد إلى الكرسي ..
وأشعل سيجارة وهو عار .. كأن سيخاً محمياً فى النار دخل إلى يافوخه فأوقظ كل حواسه .. ونظر
إليها فوجدتها قد غفت .. أو فقدت الوعي .. ظل فترة يتأملها مندهشاً وكلمتها تتضخم وتتضخم
وتدق رأسه .. فسحب البلوك نوت والقلم من فوق المكتب .. وأخذ يكتب وهو ينظر إلى جسدها
الممدد .. ويتأمل أعضائها ويعود إلى وجهها ويدقق فى ملامحها وهو مندهش .. كأنه يراها لأول مرة
ويذاكرها لآخر مرة

(لماذا دائماً تقبحين اللحظة الجميلة .. لماذا تحبين اللون الأحمر .. وبدلاً من أن تحبينه فى ثوب أو
وردة أو مصباح صغير منور بين اثنين عاشقين .. تفضلينه دماً

فى اللحظة التى بللت فيها بطنك برسالة حبى .. ومازال رسولى فى أحشائك .. شهرتى سكينك ..
ورددت على اللحظة الجميلة بطعنة مسمومة .. ليتك طعنيتنى وأنا بعيد .. لكن للأسف طعنيتنى فى
لحظة التوحد التى شعرت فيها أنك جزء منى .. (كلمتك) أنستنى كل الكلام الذى كان بيننا منذ أن
عرفتك .. (كلمتك) سممت أحشائى .. شرختنى .. بعثرتنى

لبستينى العمة .. وأسقطتها على عيني .. وعندك القدرة أن تجعلينى لأدرك أنها عمة .. لقد كسبت
جولة عندما قلت لى (باحبك) لكن للأسف خسرت المباراة كلها عندما قلت .. (لبستك العمة)

آسف .. العمة لا .. أنا باعتذر عن لبس العمة .. لأنى لم ألبسها من قبل .. ويوم أن استسلم وألبسها
ستكون من عدو .. لكن أبدأ لن ألبسها من حبيب .. أنا الرجل الكبير الخبرة المحنك المشفق
لبستينى عمة .. الحمد لله أننا لم نتزوج .. ربما بعد الزواج كنت لبستينى طرطور

رضيت أن أكون الرجل الثانى عندما كنت أنا فى شارع وهو فى شارع آخر وأنت على الناصية فى
مفترق طرق .. وانتظرت على أمل .. لكن بعد ما اخترتيه ورفضك ورجعت أصبحت تفرق .. أنا لست
حصاناً فى رقعة شطرنج فى إمكانك أن تحركيه للأمام وبقما تجددين فى ذلك مصلحتك .. وتعيدينه
للخلف عندما تجددين فى ذلك مصلحتك
وغرتى .. رغم أنى لست الرجل الذى تفارين عليه .. ولكن لأنى أفلت من كبرياك ورفضت أن
أستعذب عذابك .. ولم أصبر حتى تحفرى وتدقنى وتردمنى وتمشى على قبرى .. وضحيث الليلة
بشرفك لكى ترضى غرورك وكبرياك وتهزمنى امرأة أخرى توهمتها

أنت امرأة مغرورة متكبرة متعجرفة متفطرسة شرسة متعالية على الناس..حتى على أهلك..
لا أبوك بيه ولا جدك عمدة ولا باشا..أبوك مدرس رسم..وأماك ست بيت بدون تعليم..وكل عائلتك من
عامة الناس..وتعليمك عادى شعبى .. لا أنت خريجة السربون ولا ليثربول.. جامعة مصرية شعبية
مجانية.. وثقافتك من الكلمات المتقاطعة وترديد بلاقهم كالبيغاء
نصفك امرأة نرجسية مادية..ونصفك بيسيونى..البواب المخشب الرافع شاربه فى كبرياء فى وجه
أسياده غير منتبه أنه مجرد بواب..وعقدك من أبوك الذى قال لأماك وإخواتك (ياأنا ياهى فى البيت)
وقال لك وهو على فراش الموت (ح تنعمى قوى يابنتى فى حياتك) وزوجك الذى عجز عن التفاهم
معك فطردك بقميص النوم

قلت..لو فكرت اتزوجك أول شروطى شقة تملك..رغم إن لا أنت ولا أهلك يقطنون فى شقة تملك..
سوف أهرب وأفلت بجلدى..سأفلت بالباقى من عمرى.. واضح أن طريقنا ليس واحداً..لست أنا
الزوج الذى تريدينه..أنا الرجل الذى رضى بالمر والمر لم يرض به..الرجل الذى غفل عن سنه وأراد
أن يعود طفلاً لتعود له الظاهرة ويتمنى فيجد.. ولكنه للأسف لم يجد

ونصيحته الأخيرة لك.. (المرأة التى لا تتيح رجلاً يتبعها كل الرجال..) ليتك تهدأين من جديد ..
تهدأين بتوبة..وأخر كلماتى لك ..سامحتك وأتمنى لك التوفيق)

ومع طلوع النهار.. وطلوع روحه ..انتهى من الرسالة .. وهى مازالت عارية ممددة أمامه .. غافلة ..
فطوى الرسالة ورشقها بين فخذيه .. وارتنى ملابسه .. وغادر الشقة

وفى الصباح .. رن جرس التليفون

.... -

- آلو ...

- إيه اللى انت كتبت ده ا

- الحقيقة اللى قلتى إنى قعدت جنبك سنة.. ومافهمتاهش

- سكرت معاك علشان أسعدك.. وتنسى اللى فات معاى

- سكرتى علشان تسعدى نفسك.. وتنسى اللى فات معاه

- رجعت لك

- علشان رفضك

- رجعت علشان باحبك

- رجعتى علشان بتحبنى نفسك.. وقلتيها (باحبك علشان بتحبنى لأنى باحب نفسى أكثر)

- علشان باحبك إديتك نفسى

- علشان ترضى كبرياك وغرورك وتنتصرى على إمراه توهمتيها

- فرطت لك فى شرفى

- فرطتى فى اللى فاض من شرفك معاه
- أخذت بالحرام
- طلبت الحلال رفضتى
- مستعدة ألبس دبلتك
- وأنا مش مستعد ألبس عمتك
- ظلمتنى.. ومسامحك
- ظلمتنى كتير.. سامحينى مرة
- إنت مفترى
- وأنت خائنة
- باحبك .. يا اهيل
- بعد فوات الأوان
- صدقنى .. الرجل انت يا بلاش .. واول واحد اتجوزه برضاي انت .. انت اول رجل يعرفنى على
نفسى .. أروح لمين بعدك
- أنا شايف لك عريس لقطه .. تتوافر فيه كل الشروط اللى بتحبيبها .. الشباب والجمال والمال..
أفضل منى ومن المحامى.. ومن كل اللى عشقوكى
- بتتريق !
- لأ.. باتكلم جد
- مين هو؟
- يا وسام.. اسمعنى.. وافتحى قلبك وعقلك.. حيرتك سببها حرصك على كيد طليقتك .. وورغبتك
فى الانتصار عليه .. عاوزه العريس شاب وجميل ومن عيلة كبيرة ومركزه مرموق وغنى.. وشبكة
ومهر وشقة تمليك علشان تكيدى طليقتك .. مع إن المطلقة عموما.. واللى فى سنك خصوصا
مفروض تتواضع فى شروطها شوية.. صدقينى.. وياقولها لك من كل قلبى .. أفضل عريس
يناسبك.. هو طليقتك.. لأن عنده اللى مش عندنا كلنا.. عنده أولادك .. أنصحك ترجعى له
- دة آخر ما عندك
- وآخر ما بيننا

سافرت للمحامى .. وتنازلت عن شروطها .. سحب ورقة وقلماً .. وجلس يسمعها بهرود ويرسم عصفورة.. ولما انتهت من كلامها.. طير الورقة فى الهواء وابتسم فى سخرية واستهزاء وقال (العصفورة طارت) .. فطار صوابها .. وحملت حقيبتها وخرجت تجر جر خيبتها

وركبت أتوبيس القاهرة.. جاءت جلستها مبكرة فى أول كرسى .. وشردت تتذكر تاريخها كله.. وتذكرت والدها عندما وقال لها (ح تتعبى يا بنتى فى حياتك) .. تذكرت أولادها .. وطلقها .. وكل الرجال الذين عشقوها .. إلى أن وصلت بها الذكريات إلى المحامى .. وفهمى .. وتنهدت وهمست (اتخليت عن كل الرجال .. وفى النهاية الاتنين اتخلوا عنى)

- نعم .. حضرتك بتكلمينى؟

إلتفتت إليه .. شاب كان قد جلس بجوارها ولم تنتبه

- آسفة .. باكلم نفسى

- خير ؟

- مشكلة

- الدنيا كلها ما تستاهلش

أخرج علبه سجائره المستورده .. وفتحها وقدمها إليها .. ورغم أن علبتها فى حقيبتها .. مدت يدها وأخذت .. لأنها أدركت أنه يمهد لحوار .. وكانت فى أشد الحاجة لشخص يخرجها من هواجسها .. ويخفف عنها التوتر مسافة الطريق

تكلم عن الحياة والناس والحظ .. واستمعت إليه لتبتعد عن أحزانها .. فشدها حديثه ومس نفسها .. واستمر يلاحقها بالسجائر ويتكلم .. ثم عرفها بنفسه (علاء سامى صادق .. مهندس كمبيوتر .. من طنطا .. من أسرة عريقة معروفة .. يتيم الأبوين .. تعلم فى أمريكا وقيم فيها منذ خمسة عشر عاماً مديراً لشركة أمريكية .. وكون ثروة أربعة ملايين دولار .. مرض بالقلب من سنوات فعجز عن معايشرة زوجته .. وأجرى فحوصاً طبية فتقرر له إجراء عملية .. وخاف أن يموت أثناء العملية فجاء إلى مصر مع زوجته وبنته ليزور أهله .. ولكن زوجته رفضت العودة معه واحتمت بأهلها ومعها طفلتهما .. وتصدى له أهلها .. وهو الآن عائد إلى القاهرة ليسافر بعد أيام إلى أمريكا لإجراء العملية .. واضطر إلى ركوب الأتوبيس لأن الأطباء منعه من قيادة السيارة)

كانت ملابسه والخاتم والساعة الذهبية توحى بصدقه .. فتح الحقيبة السمسونايت .. وأخرج الباسبور وتذكرة الطائرة والتقرير الطبى لحالته وقدمهم لها فاطلعت عليهم .. وعندما أعادهم لمحت (بكارى) من الأوراق المالية .. حوالى عشرة آلاف جنيه

تعاطفت مع حالته..وهمست فى سرها..(الى يشوف بلاوى الناس تهون عليه بلواه).. وسألها
فعرفته بنفسها .. وفوجئت به يلتفت إليها أكثر ويتفحصها بإمعان..ويهتف مندهشا
- وسام هانم.. بنت رفعت بك
- أيوه
- واخواتك.. فاروق بيه وفؤاد بيه وفريدة هانم وفريال هانم
- أيوه
- يامحسن الصدف.. والدك كان أستاذى .. واخواتك أصحابى.. وأنا متربى فى بيتكم .. مش
فاكرانى ؟
- لامواخذة
- ده انتم أسياد البلد.. وبين عائلتى وعائلتك نسب
- أهلاً بك
- رب صدقة خير من ألف ميعاد.. أشكرك يارب..ألف حمد وشكر لك..اسمعى لى أعرض عليك
مشكلتى..نسايبى ناس جبارين..منعونى أشوف بنتى..وح اسافر وأنا قلقان عليها .. ومادام طلعنا
قرايب طالب منك خدمة
- أنا تحت أمرك
- ح اكتب لك عنوانى فى أمريكا وعنوان زوجتى فى طنطا .. تعملى زيارة لبنتى وتبعنى لى رسالة
تطمئنى عليها .. ومستعد لكل التكاليف
- أنا مقدرة ظروفك ..بس عندى مشاغل فى القاهرة.. ومش ح اقدر أرجع طنطا قبل كام شهر ..
لكن عندى حل تانى
- ياريت ؟
- لى صديقة أخصائية اجتماعية فى النادي.. ممكن تقدم لك الخدمة دى.... تزورنى فى مكتبى
وأعرفك عليها

خفف عليها مسافة الطريق..وعادت إلى بيتها وهى تقول (سبحان الله..شاب وسيم وأربعة ملايين
دولار وترفض الرجوع إليه..والله لو عظم فى قفة ما تركته .. مجنونة)

فى اليوم التالى..وهى فى مكتبها دخل الفراش وقال لها..(ضيف ياأستاذة وسام).. رفعت رأسها
فوجدته واقفاً ويداه فى جانيبيه فى أدب وحياء .. اعتذر عن تسرعه فى الحضور وعلل ذلك بقله
الوقت الباقى على سفره .. رحبت به وسألته (قهوتك إيه).. فاعتذر بأدب .. وقال أنه ممنوع من
كافة المشروبات بأمر الأطباء لحين إجراء العملية.. واستسمح الفراش فى كوب ماء

فتح الحقيبة ومازالت مملوءة بالأوراق المالية..وأخرج زجاجة صغيرة أفرغ منها حبة قذى بها إلى
فمه وناوله الفراش الكوب.. وكرر من زجاجة ثانية وثالثة ورابعة..وهى تتابعه فى دهشة..فقال (هذا

هو العلاج الذى تقرر لى تحضيراً للعملية) وعندما أعاد الكوب فارغاً للفراش.. دس فيه ورقة مالية من فئة العشرة جنيهاً وشكره.. فأخذها الرجل مندهشاً

تكلم عن أسرته العريقة.. ودراسته فى أمريكا.. وكفاحه وثروته فى بنوكها.. تكلم بالحكمة.. والحديث الشريف.. وقال الله وقال الرسول.. ووجدت حديثه ممتعاً

وجاء المساء كثيباً.. بعد أن خلى وقتها من زيارة فهمى ومن تليفون طنطا.. فارتاحت لوجوده.. أرسل الفراش لشراء علبه سجائر.. فأخذها وترك له الباقي.. تفحص الفراش الجنيهاً المتبقية فى كفه مندهشاً.. وخرج ليقبض بجوار الباب تحت الأمر والطلب - قاصدك فى خدمة ثانية .. ياريت توافقى -
- أأمر

- غريب فى القاهرة.. والليل طويل.. ياريت تهونى على الوقت.. وتوافقى بعد ميعاد عمك .. تقبلى دعوتى على العشاء وكأنه يتكلم نيابة عنها .. فهمى أيضاً تبحث عن يهون عليها الوقت.. فوافقت

وفى كازينو على النيل.. وعلى الأضواء المتلألئة فوق صفحة الماء.. ابتعدا قليلاً عن مشاكلهما وهمومهما وتكلمتا فى العموميات.. وحلى بينهما الحديث.. واقتربت المشاعر.. عاملها برقة وأدب وبدا (جنتل مان) وابن ناس .. ودفع الحساب مائتى جنيه وترك للجرسونات خمسين جنيهًا وعلى باب الكازينو اعترضت طريقهما متسولة عجوز.. فمد يده فى جيبه وأخرجها بورقة مالية ناولها لها.. فالتفتت وسام إليه مذعورة تنبهه أن الورقة فئة المائة جنيه .. فرد باستهانة - الفلوس كثير.. ويمكن أسافر وأموت.. كده على الأقل بأسجل بها حسنات ودعته وعادت إلى البيت وهى مشدودة إليه

وفى اليوم التالى.. وبمجرد وصولها إلى العمل حضر.. ولم يكن حضوره مفاجأة.. كان مناخ لقاء الأمس والعشاء فى ضوء القمر يسمع بذلك .. بل فى الحقيقة كانت تمناه .. وقف بأدبه .. وقال بنبرة رقيقة

- غريب قاصد دياركم يا أهل الكرم -
- مرحباً

جلس.. وأتى له الفراش بكوب الماء.. وتناول الدواء.. ودس له فى الكوب الورقة المالية فانخلعت عليها عين الرجل وخرج يلهج بالدعاء وزاد التعارف وطال بينهما الحوار.. بالدخول فى تفاصيل لم يذكرها فى اللقاءين السابقين.. وأسمعها بعض النكات وضحكا .. واستهلكا عدداً من علب السجائر - طالب منك خدمة

- أأمر

- تغادري عملك بدرى شوية

- ليه

- عندي موضوع.. عاوز آخذ رأيك فيه

- ما تقول .. قدامنا وقت كفاية

- لا .. ده ما يتحكيش إلا على النيل .. وفى ضوء القمر.. ورينا يشهد عليه

- ونعم بالله.. تانى .. مش كفاية عليك مصاريف امبارح.. خبطتين فى الرأس توجع

- ياريت كل الخبط من ده.. الفلوس كثير والحمد لله

وعلى نفس المنضدة.. جلسا جلسة الأمس

- آدينا ياسيدى بقينا فى ضوء القمر.. والشاهد علينا رينا

- وحق جلال الله .. وهو شاهد على كل كلمة ح اقولها لك .. قبل ما اقابلك .. كان كل تفكيرى فى

الماضى ويانس من المستقبل .. تعالى يابنت الناس أحط حظى على حظك .. وورقى على ورقك ..

ونلعب بورقة جديدة .. يمكن تكسب

- مش فاهمة ؟

- تنجوز وتسافرى معاى .. وتقفى جنبى وأنا باعمل العملية .. إذا رينا كتب لى السلامة رجعت

زوجة مليونير وصاحبة فضل وكل عمرى وثروتى لك .. وإن مت رجعت أرملة مليونيرة .. وإن حبيتى

مممكن نعيش فى أمريكا .. وقبل مانسافر..ح افتح لك حساب فى البنك باسمك واحط لك مهر

وشبككتك وشقتك وعفشك .. قلت إيه؟

هل كانت تنتظر وتتوقع ذلك .. هل كانت تتمناه .. لا تعرف.. كل الذى تعرفه أنها لم تدهش..

وقالت بهدوء وكيانها مضطرب

- بفرض إنى وافقت.. هل ده ممكن .. مافيش وقت

- بكرة نكتب الكتاب..وبعده أقدم قسيمة الجواز وأضيفك على الباسبور واحجز لك .. ونسافر

- معقول بالسرعة دى ا

- بيقولوا أمريكا بلد السرعة..لكن مصر أسرع بس بالقرش..ساعتين استخرج لك الباسبور..بس

توافقى

- والمعازيم .. والدعاوى والفرح.. مش معقول .. مافيش وقت

- ما فيش معازيم ولا دعاوى ولا فرح .. افهمينى .. لو أى مخلوق شم خبر وعرف.. نسايبى ح

يضربوك بالنار ولو فى المطار .. دول متوقعين موتى فى العملية والثروة كلها تكون لبنتهم .. أنا

وأنت واتنين شهود غرباء.. نكتب بكرة ونسافر بعده .. إن رجعت معاك أقدر أحميك.. وإن رجعت

وحدك تحميك ثروتك

- أهلى كلهم فى الخارج.. لازم أبلغهم

- أبدأ مش لازم
- ما أقدرش أتجوز بدون علمهم
- ياستى لما نرجع نبقي نتجوز تانى
- هي: هي: .. إزاي ؟
- أطلبك من أهلك .. ونعمل فرح .. ونتفق مع مأذون نفهمه الحقيقة .. ويحضر ويعمل تمثيلية
- ممكن ؟
- فى أمريكا مش ممكن .. فى مصر كل شئ ممكن بس بالقرش

وضحكا .. ودس بين شفتيها سيجارة .. وأخرى بين شفتيه .. وأخرج الولاة الذهب وأشعلهما ..
ثم استبدل السيجارتين .. فابتسمت
- وبتلك .. مش كنت عاوزنى أزورها واكتب لك
- ما قلت لك .. نسيت الماضى وبافكر فى المستقبل .. موافقة ..؟
- ما أقدرش أوافق بالسرعة دى .. لازم أقعد مع نفسى وافكر
- بكره الصبح ح أحط باسمك ربع مليون جنيه فى البنك .. صدقيني دول كل الفكة اللي باقية معاى
بعد اللي تبرعت به فى مصر للمدارس والمساجد والجمعيات الخيرية .. لأن رصيدي فى أمريكا
- انتظر لما تسمع ردى
- ح اعطهم علشان اكسب وقت .. وإذا رفضت ح اسافر وتبقى تصرفى منهم على بنتى .. وإذا مت
حلال عليك
- رتنا يرجعك بالسلامة
- يرجعنى .. والا يرجعنا ؟
- الصبح أرد عليك

أخرج علبة صغيرة من القطيفة الحمراء .. ففتحها والتقط خاتماً من الذهب والماس .. والتقط
أصبعها .. وهم أن يثبت الخاتم فيه .. فسحبت يدها
- آسفة .. ما أقدرش
- ليه ؟
- يمكن ما وافقش
- لو ما وافقتيش اعتبريه هدية
- آسفة
- إبقى رجعيه
- خلينى براحتى

وضع العلبة فوق المنضدة وهو حزين .. وطلب العشاء .. ودفع ببذخ .. وأجزل العطاء للجارسونات ..
فغيروا لهما زهرية الورد والطفاية أكثر من مرة .. وأضاءوا المنضدة بالشموع .. وبعد العشاء ..
التقط العلبة وقربها من وجهها .. وقال

- هيه .. ح تقبليها
- اصبر
بطول ذراعه قذف بها فى النيل .. ففزعت .. وصرخت
- إيه ده يامجنون
رد فى هدوء .. ويأس
- ملعون أبو المال اللي ما يسعد صاحبه .. ياريتنى فقير

كانت تعود كل يوم مع معجبيها إلى بيوتهم.. وتعود وحدها إلى بيتها وتنام ملء جفونها.. لأول مرة
فى حياتها تعود ومعها رجل .. ويحتل طول الليل فراشها ورأسها .. ويمنعها من النوم والقراءة
والموسيقى.. ومن أى شئ إلا التفكير فيه.. وقضت الليل فى حلم يقظة من أحلام المرافقة لم تحلمه
وهى صغيرة

فى اليوم التالى دخلت المكتب.. فوجدته ينتظرها.. ابتلع الحبات.. ودس للفراش الورقة المالية ..
ثم قدم لها اتصال البنك وقال
- حظيت باسمك المبلغ .. وفيت بوعدى .. أوفى بوعدك
- موافقة
- وانتفض واقفاً ..
- مهروك.. يللا بينا مافيش وقت
- على فين ..؟
- على المأذون

رجعا بعد المأذون إلى شقته.. طاف بها الحجرات الثلاث ثم استقر بها فى حجرة النوم.. وأبدى
رغبته.. فحاولت أن تمنعه حرصاً على صحته.. ونصحته بتأجيل ذلك إلى ما بعد إجراء العملية..
فتوسل وقال لها .. (ماتكسريش فرحتى.. سيبينى أفرح)..... وفرحا

فى اليوم التالى خرج وعاد.. وقال لها.. أن الوقت لم يكف لإنهاء الإجراءات فى إدارة الجوازات فاضطر إلى تأجيل السفر وسيذهب إلى السفارة الأمريكية لتأجيل ميعاد العملية.. ثم ابتسم وأردف (خلينا نتمتع كام يوم .. ماحدش ضامن عمره)

وانقضى أسبوع .. أكلا وشربا وتنزها.. أسبوع غسل بحق .. رجل رقيق ولذيذ.. ولما سألته.. (لكن انت فى الناحية الجنسية قوى وطبيعى) قال (البركة فيك.. يمكن شفيت على إيديك) .. ولكن .. لاستخرج لها جوازاً ولا حجز للسفر.. وكلما سألته عن السفر والعملية.. تهرب وفتح موضوعا آخر

وانتهز فرصة بعد لقاء بينهما بعد منتصف الليل .. ومازالت فى نشوة وسكرة شهر العسل .. ونشوة ما بعد اللقاء .. فى الفراش.. سايحة ونايحة وغارقة فى العسل .. فأبدى ضيقا وتأففا .. فقلقت وسألته .. فقال وهو يعبت بشعرها

- أصل حصل موقف خبيته عنك علشان ما ضايقكيش فى شهر العسل

فانتبهت .. وهبت جالسة وهى مازالت عارية .. والحت عليه أن تعرف

- مش قلت لك كل شئ فى مصر ممكن .. بس بالقرش.. إجراءات السفرح تتأخر شوية لأننى مادفعتش الرشوة

- ليه مادفعتش

- مانا حولت كل رصيدى فى البنك باسمك

- طيب ليه ماسحبتش منه قبل التحويل المبلغ اللى يكفيننا لغاية مانسافر

- كان ربع مليون بالتمام .. ماحبتش أجره .. علشان أفرحك

- بسيطة .. نروح بكره .. واسحب لك المبلغ المطلوب

- أتشائم

- بسيطة .. اسحب لك من رصيدى .. انا معاى خمس آلاف جنيه .. يلزمنا كام لغاية مانسافر

- للأسف المبلغ كله

- من عينى .. الصبح نروح نسحبه .. بس انا زعلاته منك يا حبيبى

- ليه يا حبيبتى .. ؟

- تحط باسمى ربع مليون.. وتنكسف تطلب منى خمس آلاف .. هو انا غريبة عنك!

- ماتزعليش .. حقك على .. طبعى كده .. احب أدى ماأخذش

وفى الصباح توجهوا إلى البنك فسحبت رصيدها وسلمته له

ومر أسبوع آخر.. كل يوم تتلهف على رجوعه لتسأله عن موعد السفر.. فيسوف

ويراوغ.. ويعد ولا يف

وفى ليلة أخرى .. بعد لقاء آخر بعد منتصف الليل .. عبثت هى بشعره .. وسألته فى دلال .. وكان

ينتظر سؤالها كل ليلة ويتريص لها بالإجابة

- بصراحة .. السفارة طالبة شيك بعشرة آلاف جنيه
- ليه ؟
- تأمين العملية
- انت مش قلت انك دفعت تكاليف العملية ؟
- التكاليف بيعت بها شيك للمستشفى وانا فى أمريكا .. لكن ماكنتش اعرف إن المريض لما يسافر يدفع تأمين .. إذا عاش يسترده من السفارة .. وإذا مات .. يبقى مصاريف شحن الجثة
- ياساتر يارب..بعد الشر عنك يا حبيبى .. مافيش مفر.. لازم نروح نسحب المبلغ من رصيدى
- ارجوكى .. سبق قلت لك ح اتشانم
- بسيطة أبيع لك كل صيغتى
- ماتكملش عشر آلاف جنيه .. وح تخسرى فيها كتير
- قبلته .. وهمست فى أذنه بغندرة ودلع وتباهى
- ولا يهمك .. كلام فى شرك .. انا جوزى مليونير وكريم ماتهموش الفلوس .. وأنا رصيدى فى البنك ربع مليون جنيه
- أنا عندي حل تانى
- قول يا حبيبى
- صاحبك اللى كلمتيني عنه .. المؤلف اللى كان غرقان فى حبك
- ماله
- استلقى منه المبلغ
- انتهت لكلامه.. راعترها القلق وسألته باهتمام
- انت بتجسنى .. والا بتتكلم جد
- جد طبعاً
- مش معقول .. نستلف واحنا معانا ..!
- لما نرجع ح نسدد له
- لزومها إيه اللفة دى .. انت فيه حاجة مخبيها عنى .. فهمنى!
- ح أفهمك بعدين
- لآ.. دالوقت .. عاوزه اعرف ليه نستلف واحنا معانا .. وليه عاوز ترجعنى للماضى تانى !
- بالعكس .. أنا عاوز اقطع على الماضى خط الرجعة .. أصلى باغير عليكى يا حبيبتى
- أفاقت من سكرة اللقاء وجلست متربعة عارية ومازال ممددا عارياً
- حيرتنى .. إيه دخل موضوع التأمين .. بالماضى والغيرة .. فهمنى !
- لما تستلقى منه وماترديش تفسد العلاقة بينكم واطمنن إنكم مش ح ترجعوا لبعض تانى
- واستفزها رده .. وبان الضيق على وجهها .. وقالت بانفعال
- أولاً ده ماضى واندفن .. وانا دالوقت مراتك .. إزاي تحوجنى لأى رجل غيرك .. إزاي استلف من رجل غريب وانا ست متجوزة .. عاوزه يشمت .. بقى علشان غيران وعاوز تطمئن إنى مش ح أرجع له .. تورطنى معاه .. مش يمكن اطلب منه فيطلب منى.. وبدل ماتبعدنا عن بعض تقرينا
- انا ضامن اخلاقك .. ومتأكد انك تقدرى تاخدى منه .. من غير ماياخذ منك

- لما انت متأكد .. ليه بتعرضنا لتجربة فاشلة مش مضمونة
 - ليه مش مضمونة
 - لأن الرجل ده مفلس
 - مادام بيعحبك ح يتصرف .. علشان يعمل قدامك عتتر
 وزاد اتفعالها .. وعلا صوتها بحده .. ويان عليها الغضب
 - آسفة .. انا أخلاقي ماتسمحش إننى اعرض نفسى لتجربة زى دى .. أوطى مناخيرى لرجل تغليت
 عنه .. أخلاقي ماتسمحش اظلم رجل مرتين .. مره بعته ومره أوطه يستلف علشانى .. ومااردش
 فيتخط فى مشكلة .. وكمان أخلاقي ماتسمحش إننى استغله .. دى تبقى فلوس حرام
 - ياستى .. بعد ماناخذ منه المبلغ ح نتبرع به للجهات الخيرية .. وانا ح استلف التأمين من واحد
 صاحبه .. ولما نرجع بعد العملية نرده له .. وان انا مارجعتش أبقي رديه من رصيدك
 هبت واقفة .. وقفزت من الفراش مذعورة .. ووقفت أمامه وباعدت بين ساقبها .. ووضعت كفيها
 فى خاصرتها وهى عارية .. وقالت بغضب شديد
 - أفهم .. لازم أفهم .. انت بتلف وتدور على إيه .. بتدخل موضوع فى موضوع فى موضوع ليه ا
 إنت عاوز إيه .. وناوى على إيه بالضبط ا
 - انت فهمتينى غلط .. أو جازى أنا ماعرفتش أفهمك .. هدى نفسك .. وتعالى ننام .. ونبقى نتكلم
 بعدين .. فى وقت تكون اعصابك مرتاحة .. آسف يا حبيبتي

وحدثت أشياء كثيرة انتهت لها .. لكن لم تجد لها تفسيراً .. ظهره وصدره وذراعيه فيها آثار جروح
 كثيرة تلفت النظر .. واضح أنها طعنات سكين
 طرق الباب ففتح وخرج إلى السلم .. ووارى الباب وتهاشم مع امرأة عجوز .. ولمحتها وتذكرت ..
 وبعد انصرافها سألته
 - مين دى ؟
 - واحده غلبانة طالبة حسنة
 - لكن أنا شايفها بتهمس لك ؟
 - بتدعى لى
 - دى الشحاتة اللى إديتها المائة جنيه على باب الكازينو
 - كل الستات العجائز شبه بعض
 - لكن أنا متأكدة
 - جازى .. إيه المانع أنها تشحت هنا وهناك
 - صدفة غريبة ا
 - ماتاخدش فى بالك .. الدنيا صغيرة
 قال لها مرة أنه يعرف فى السحر .. ويسخر الجن لقضاء كل طلباته .. ويؤذى أى إنسان يسلطه
 عليه .. ولكى يؤكد لها .. أخذها ووقف أمام عداد النور .. وفرد كفه أمام العداد وصرخ فيه وأمره أن
 يتوقف .. فتوقف القرص فعلاً عن الدوران .. وأبعد كفه وأمره أن يدور فتحرك .. وفهمت الخدعة ..

الخاتم الذى فى إصبعه ممغنط... عندما يقرب كفه للعداء يتوقف القرص وعندما يبعده يتحرك... وشرحتها له فضحك وادعى أنه كان يهز... مع أن كلامه فى البداية كان جادا

أشخاص غريبة تدق الجرس فيخرج لهم... وتسمع حوارا وشجارا على السلم... ويرجع فتسأله فيراوغ أوراقه وكل مستندات فى دلفة دولاب مغلقة والمفتاح دائما فى جيبه حتى وهو نائم نزل مرة ورجع وبوجهه كدمات... وسألته فقال أنه وقع على الأرض فى الطريق... لكن إصاباته تدل على أنها لكدمات

قدم لها عقداً ابتدائياً عن بيع سيارة وطلب منها أن توقع مكان البائع... وسألته فقال أنها سيارته... وسألته لماذا لا يوقع هو فقال (البركة فيك... مانت دالوقت الكل فى الكل... وكل تصرفاتى ح تباشرها... وح اعمل لك توكيل... مش أحسن ما أوظف سكرتيرة وتغيرى)... واكتشفت أنه يخطئ فى الإملاء... ويكتب السين صاذا... ولم تنبهه إلى ذلك... وزادت شكوكها وبدأت تقلق... وحتى لا يكتشف شكها وقلقها وقعت

قالت له (نفسى فى محشى ورق عنب)... أحضره وطبخته... وعند الأكل وضع واحدة فى فمها... ثم كرر... سايرته وحاولت وضع واحدة فى فمه فرفض... وعاد يضع لها فى فمها دون أن يأكل... وأخذ ينظر إليها كأنه ينتظر شيئا... إلى أن اطمأن فأكل... وفهمت... وأرادت أن تتأكد فطلبت منه فى اليوم التالى ملوخية... وعند الأكل لم يستطع أن يتناولها فى فمها... فتلكأ وأخذ يأكل مخلات وخبز... فتأكد ظنها... وسألته وهى مازالت محتفظة بابتسامتها

- إنت بتشك فى ؟

- اللى اتلسع من الشورية يتنفخ فى الزبادى... واحدة قبلك حاولت تسمى

- لكن أنا زوجتك

- كانت زوجتى

- إحنا لسه فى شهر العسل

- كنا فى شهر العسل

- لكن أنا ماخرجتش وحدى أبدا... معاى جوه وبره... ح اجيب لك السم منين ؟

- الاحتياط واجب... واحدة ثانية ماكانتش بتخرج... فتحت علبة السلمون وسابتها مكشوفة يومين...

والسلمون بعد يومين يصبح مسمم... أجبرتها تأكل منه علشان اتأكد من خيانتها... أكلته وتقيأت ونقلتها للمستشفى... وواحدة ادعت المرض وطلبت منى ترمومتر... واكتشفت أنها كانت ناوية تكسره وتفرغ الزئبق اللى فيه فى ودنى وأنا نايم وتقتلنى

وتيقنت أنها تزوجت مريضا نفسياً أو مجرماً... واستيقظت تماماً من سكرة الزواج وأمنت على كلامه وقالت له... وهى فى حقيقة مشاعرها تقول ذلك لنفسها (عندك حق... فعلاً الاحتياط واجب)... وتربصت له... وامتنعت عن سؤاله ومثلت السذاجة... وفى ليلة شاركته بعد العشاء فى زجاجة الخمر التى يسهر

عليها كل ليلة قبل أن يدخل حجرة النوم..شاركته بكأس أو كأسين..وشجعتته على أن يشرب أكثر..
وألحت عليه وسقته بيدها..وبعد أن سكر واحمرت عيناه وسال لعابه..انتقلت إلى جواره في تودد..
وسألته وهي تداعب صدره

- بتحبنى ؟

- من كل قلبى

- مش أنا مراتك؟

- على سنه الله ورسوله

- والسبت ستر وغطا على جوزها ؟

- انت رأيك إيه ؟

- أنا رأى إن الجواز قسمة ونصيب.. وكله بإذن الله.. ومادام اتجوزنا أنا مقتنعة بك حتى لو كان
لك عيوب مخبئها عنى.. مادام دى إرادة رينا.. وأنا مراتك وسترك وغطاك
وفكر قليلاً .. وسألها

- بتحبنى ؟

- جداً .. وإلا ما كنتش اتجوزتك

- يعنى لو عرفت عيوبى ح تسامحبنى ؟

- من كل قلبى .. أوعدك

- براقو .. كده قصرت على المسافة وجبت من الآخر

واعترف اعترافاً ملهلاً.. فأخفت ذهولها عنه.. وحافظت على ابتسامتها.. وأخذت تشجعه على البوح
.. وكلما اعترف زادت خمره وأحشاؤها تتمزق مع كل اعتراف.. وظلت تشجعه حتى سكر تماماً وباح
بكل شئ

اعترف أنه من أسرة فقيرة .. أبوه عامل.. ماتت أمه فى صباه فتزوج أبوه .. واضطهدته زوجة أبيه
وأوغلت صدر أبيه بشكايات كاذبة فقسى عليه كثيراً .. وفصله من المدرسة وأرسله ليعمل صبياً فى
مطعم وأجره طعامه .. ولكن زوجة أبيه لم تكتفى .. وظلت تلفق له التهم حتى ضربه أبوه وطرده ..
فلم يجد سوى المطعم يبيت فيه.. وكان قد وصل إلى الساعة عشر

وفى ليلة..فرد فرشته على الأرض وهم أن يفلق الباب على نفسه لينام..ففوجئ بصاحب المطعم يعود
ومعه زجاجة خمر.. ودعاه.. وكانت المرة الأولى التى يلقى فيها طعام الخمر.. وظل صاحب المطعم
يسقيه حتى سكر .. فأغلق باب المحل واعتدى على شرفه

وفى الصباح أدرك ما حدث .. وحضر صاحب المطعم وظل طوال اليوم يلاطفه ويداعبه.. فكنظم غيظه
وادعى الاستسلام .. وبعد انتهاء مواعيد العمل تكرر الأمر.. ذهب صاحب المطعم وعاد بالزجاجة
وأغلق الباب .. وأخذ يناوله كأساً بعد كأس .. فأخذ يسايره ويغافله ويسكب الخمر تحت المنضدة ..
وظل يقطا متربصاً حتى سكر صاحب المطعم .. فغافله من ظهره وطعنه بسكين

وانتهى حقه وغله وغيظه وأفاق على فعلته وظل لساعة يفكر كيف يتخلص من جريمته.. وفى النهاية قطع القتل إلى اجزاء.. وأدار الموتور وأخذ يلقى بجزء بعد جزء فى حجر دق الطعمية.. وظل لساعات ومع آذان الفجر كان القتل قد أصبح بشعره ولحمه وعظامه.. عصيرا لزجا كعصير الفراولة.. ثم أخذ يفرف منه (بكوز) ويفرغ فى البالوعة.. حتى اختفى القتل تماما مادة سائلة فى المجارى.. فقام وغسل الحجر وطهر الأرض بالفنيك.. ثم فتح الباب ودفن الزجاجة وملابس القتل فى (خراطة) ومع تباشير الصباح.. وبداية خروج الناس إلى أعمالهم.. أدار الموتور مرة أخرى لدق عجينة الطعمية كما يفعل كل يوم ووضع الفهم المشتعل فى المجرمة ووضع فوقه البخور وطاف به فى المحل.. رافعا عقيرته كالعادة بالصلاة على النبي.. وبعد اختفاء صاحب المطعم.. حررت زوجته محضرا.. ودارت أياها على المستشفيات للبحث عنه.. ثم عجزت عن إدارة المطعم فأغلقت

رغم انزعاجها الشديد واضطرابها.. ودقات قلبها المسموعة استطاعت أن تخفى مشاعرها.. وشجعت على الحكى.. وادعت انبهارها واعجابها بمغامراته.. وزادته خمرًا.. فتلذذ بالحكى واستمر الاستمرار فى استعراض تاريخه.. وتخلّى عن الحذر وأخذ ينش فى ذاكرته ويحكى جرائمه كما لم يحك من قبل لأى شخص

قال أنه تشرد مرة أخرى حتى بلغ سن التجنيد فاستخرج شهادة الإعفاء باعتباره وحيد أبيه.. وتكفل أحد السماسرة بسفره إلى دولة عربية.. فعمل (ملاحظ عمال) مع مقاول مصرى جشع.. ظل يحبس أجره ويعطيه مايكفى طعامه بالكاد.. وحاول الرجوع إلى مصر ولكن المقاول حجز جواز سفره ليجبره على السخرة

وفى يوم.. ذهب إلى موقع العمل مبكرا فوجد المقاول قد حضر قبل كل العمال كعادته ولأن اليوم كان أول الشهر كانت معه الحقيبة مكتظة بأجور العمال.. وتناقش معه واحتد عليه ليعطيه أجره المتأخر.. ولكن المقاول رفض.. فاشتبك بالأيدى.. ثم تصارعا على الأرض.. وتمكن هو بشبابه أن يتغلب على المقاول وضربه بعجرفسكتت حركته.. وأفاق من غضبه وتلفت حوله.. يبحث عن حل.. فانتبه إلى الحقيبة.. فتحتها فوجدها مكتظة بالأوراق المالية وجوازات السفر ومنها جواز سفره.. فسحل المقاول وهو مغمى عليه.. وقلد به فى حوض خرسانة مازال الأسمنت المفروش فيه عجينة طرية.. ففاصت الجثة والرجل مازال حيا.. فنزل إليه وداسه بقدميه حتى دفنه تماما.. واستولى على الحقيبة وهرب.. ثم عاد إلى الموقع بعد حضور أغلب العمال.. ولما تنبه العمال الى اختفاء المقاول وأبلغوا الشرطة.. كان الأسمنت قد جف وتحجر فعجزت تحريات الشرطة عن العثور على المقاول

وعندما هدأت الأمور.. عاد إلى مصر.. وظل يتسكع فى الكباريهات حتى نفذت نقوده وضاق به الحال.. فسرق سيارة وفكها.. وأخذ يبيع أجزائها جزءا بعد جزء فى وكالة البلىح.. ولكنه وقع هذه المرة.. وحكم عليه بالسجن ثلاث سنوات.. وفى السجن تعلم السرقة والنصب والاحتيال.. وخرج فعمل مع العصاة التى قابلها فى السجن.. ثم اشتغل لحسابه.. وراجت أحواله المالية

مع الفجر كان قد سكر تماما واشتعلت الخمر في رأسه وسخن يافوخه.. فأخذ يحكي بتباهي عن مفامراته مع النساء.. وظلت تستمع إليه وهي في غاية الذهول ولكن تدعى الرضا بالقسمة والنصيب.. وتشجعه وتصفق لمغامراته.. ثم سألته كأنها تتلذذ بالمزيد - اتناشر جوازة في عشر سنين .. يعنى الجوازة ما بتكملش سنة - تقريباً

- يعنى أنا الزوجة رقم تلتناشر

- زى شادية

- الله يفتح عليك.. وإيه هى الطريقة اللي بتقول إنك اتجوزتهم واتجوزتني بها ؟

فأخذ يحكي بتباهي السكران ليدلل على ذكائه ما خنق أنفاسها.. وكاد يوقف نبضات قلبها.. (عرفتك من ثلاثة أشهر.. أيامها كنت مطلق نمرة اتناشر وبابحث عن صيدة جديدة.. شفتك أول مرة مع رجل أكبر منك.. وصلك للأوتوبيس ومشى.. وركبت في دماغى فركبت معاك.. ونزلتى مشيت وراك.. كان المكوجى اللي جنب بيتك سهران وانت مسيتى عليه ودخلتى.. كبست عليه وطلعت له كرنيه شرطة كنت سارقه من عربية ضابط واحتفظت به ونفعنى في زنقات كتير.. وقلت له إنى من المباحث ومكلف بمراقبة الست اللي مرت عليك ذالوقت وطالب معلومات.. سألته عن اسمك واسم اخواتك وبلدك وعملك ومواعيدك.. فحكى لى كل اللي يعرفه.. بعدها تابعتك.. في النادي والندوة ونقابة الصحفيين.. ومع الرجل الكبير في كل مكان.. وسفرك طنطا كل يوم خميس ورجوعك في آخر أتوبيس

- كمان رحت وراى طنطا ا.. يعنى ماكانتش صدفة ؟

- خطة .. وكفاح ثلاث شهور

- يعنى ماكانتش راجع من أمريكا ؟

- ولا عمرى شفتها

- والمرض ؟

- آديكى شفتى .. صحتى زى الهمب

- والباسبور وتذكرة الطائرة والتقرير الطبى ووصل البنك ؟

- كلها مزورة.. عدة الشغل

- والثروة ؟

- يامولاي كما خلقتنى

- والبعزة اللي أنت عايش فيها ؟

- من فلوسك .. آخر قرش اشتريت به القزازه دى

- وعقد جوازنا كمان مزور ؟

- لأ..

- هاته أتاكد

وقام يترنح وفتح دلفة الدولاب المغلقة دائما .. وأحضر الحقيبة السمسونات .. تفحصت (بكأوى) الأوراق المالية .. فوجدتها قصاصات ورق أبيض كل باكو مستور بورقتين مائيتين من فئة العشرة جنيهاً من الجهتين .. ومحزومة بشرط عليه شعار البنك .. وإجمالى ما معه لا يتعدى مائتى جنيه .. ووجدت علبتين صغيرتين من القטיפه الحمراء .. متطابقتين فى الشكل واللون .. فتحت الأولى ووجدتها فارغة .. وفتحت الثانية فوجدت الخاتم الذى ألقاه فى الماء .. وأدركت .. وقالت له وهى تدعى الانتباهار

- بتستبدل العلبة .. صح ؟

- صح

ثم التقطت بطاقته وتصفحها وهى تتوجع .. (خيشة مخلوف القرش .. المهنة سائق)

- اسمك فى الباسبور علاء سامى صادق .. البطاقة كمان مزورة .. ؟

- لأ .. البطاقة سليمة .. علشان باحتاجها فى المواقف الرسمية .. لكن الباسبور عدة الشغل ..

وتذكرت .. وانتبهت .. وأدركت .. فجئن جنونها وصرخت

- انت اتجوزتني بالباسبور .. يعنى بالاسم المزور

وافرجت عن كل مخزون مشاعرها .. فأخذت تصرخ وتلطم وتقفز فى الهواء .. وتمزق جلبابها ..

(ياخيبتك يا وسام .. يامرات السواق .. ده انت رقصتى على السلم .. يا حرم سيادة اللواء .. بقيتى حرم

الأسطى خيشة مخلوف القرش)

وسقطت على الأرض .. وفقدت الوعي .. وراحت فى غيبوبة

أفاقت على نور الصباح فى الشباك .. فتحت عينيها فوجدته جالساً بجانبها فى الفراش .. لطم خدها

برقة وابتسم وسقط بوجهه فقبل خدها وهمس .. (الفطار جاهز) وقاما إليه .. كانت جائعة .. ومدركة

أن الامتناع عن الطعام لن يصلح ما فسد .. فأكلت وشربت الشاي وأشعلت سيجارة .. وهو بجوارها

يفعل مثلها وهو صامت .. فقط يراقبها وينتظر

- انت فاكركلته إمبراح وأنت سكران

- طبعاً فاكرك .. ومين قال لك إني كنت سكران

- كده تبقى قصرت على المشوار .. شوف يا أسطى .. النهارده تطلقنى .. وكل واحد يروح لحاله ..

ورينا عليه العرض والجزاء وهو المحاسب

- اطمنى .. صحيح أنا طلعت الباسبور للمأذون .. لكن كنت عنده قبلها بيوم وشاف البطاقة .. وعقد

الجواز صحيح .. وبالاسم الحقيقى اللى فى البطاقة

وقدم لها عقد الزواج فقرأته .. وتأكدت أنه صحيح .. وقذفت به فى وجهه وقالت

- برضه تطلقنى

- آه .. بس مش قبل مانتحاسب

- على إيه ؟

- على اللى صرفته عليك

- مش ح اكتر معاك فى الكلام .. عاوز كام

- الذهب اللى معاكى كله

- موافقة.. ويتم الطلاق النهارده
- هاتى الذهب ونطلع على المأذون
- لا.. نطلع على المأذون أولاً
- ماضمنش
- أنا ست شريفة وأنت نصاب
- ماتفرقش .. ما انت كمان نصابة.. وافقت تتجوزى ميت علشان تورثيه
- والحل ؟
- ارمى بياضك يا شابة
- المأذون فين؟
- مافيش مأذون الصبح .. تتغدى ونروح له بعد العصر
- ح ترجع فى كلامك
- صدقبنى
- مضطرة أصدقك

خرج واشترى طعاماً وزجاجة خمر وعاد.. وأكل وشرب وهى تنتظر.. وقام يترنح وشدها من ذراعها فتخلصت منه.. فدفعها بكلتا يديه إلى حجره النوم
- أنا محرمة عليك من امبارح.. من ساعة ما اعترفت
- انت لسه مراتى
- مش بالعافية
- براحتك .. مافيش طلاق
وانطلق إلى الباب وفتحه وخرج .. وهى لا تصدق وتتمنى أن يكون كل ما هى فيه منذ التقت بهذا الرجل .. مجرد كاهوس
وسهرت فى الشباك وعيناها على الشارع رغم الظلام حتى عاد ومعه أربعة رجال.. ففتح ودخل فتوارت فى الحجرة كآى زوجة حتى تتدارك الأمر.. تحلقوا حول المنضدة فى الصالة.. وفض أحدهم لفافة وفرش ما بها من طعام.. وفض آخر لفافة وأخرج منها زجاجتى خمر.. وذهب هو إلى المطبخ وعاد بخمسة أكواب وزعها أمامهم.. وأخرج آخر كوتشينة ووزع عليهم الورق.. وتطوع آخر بحشو السجائر بالحشيش
ومضى الوقت وهى تنتظر.. وانتصف الليل وزاد.. وتمايلت الرؤوس سكرى.. وتعباً جو الصالة بدخان السجائر والمخدرات.. ومازالت رأسها عاصية ترفض الاستسلام للنوم.. وتعبت قدمها من اللف فى الحجرة فطرقت الباب من الداخل فجاء إليها.. وهمسست له بمذلة.. فأشار بإصبعه فى تحد وهو يترنح وقال.. (فى الأرض) وأمسكت ذراعه وتوسلت.. فخطف ذراعه منها وخرج ثم عاد وقذف فى صدرها حلة طعام فارغة.. قضت فيها حاجتها.. وشاركتها الحجرة حتى الفجر.. وهى تبكى
انصرفت الشلة ودخل إليها.. وأراد أن يتمدد وينام.. ولكنها منعتة.. ودفعته إلى الصالة بعيداً عن الفراش

- ح تطلقنى إمتى ؟

- لما تسمعنى

- حاضر .. ح اسمعك

- اللى شفتيهم دول رجالتى .. واحنا ماشيين اليومين دول فى سكة بتجيب دهب .. وعلشان السكة دى تسلك لازم لنا شريكة .. وأنت ست لبقه وتعرفى تتكلمى ومعارفك ناس كبيرة وديانين .. ويلزمنا شريكة من نوعك .. تكون أبركاتو .. وتعرف تقول

- مش فاهمة ؟

- الشلة بتاخذ لفة فى وسط البلد .. ندخل الأوتيلات والكازينوهات .. ونفحص اللى قاعدين وبالخبرة نعرف الحالات اللى مش شرعية .. نعرفها من القعدة المرتبكة فى مكان مستور .. زوجة خاينة مع تلميذ جارها .. بنت ليل مع معلم غنى .. ونركز على الحالة ونتابعها ليل ونهار .. نمشى ورا العشيق مرة وورا العشيقة مرة .. ونغافلهم وهم فى لحظة انسجام وواحد من العصاة يلقط لهم صورة على إنه مصور عاوز ياكل عيش .. إن وافقوا يوعدهم بتسليم الصور بكرة .. وإن رفضوا يدعى إن اللقطة أمريكانى .. يعنى بالفلاش من غير فيلم .. وهنا الشريكة المطلوبة يبدأ دورها .. تتصل بالست بالتليفون أو بزيارة .. وتوريها الصور اللى لقطناها لها فى حالة تلبس .. وتهدها .. إما تشتري نفسها وتدفع وإما نبليغ اللى يهمهم الأمر .. الزوج المخدوع أو الزوجة المخدوعة .. ونأخذ من كل برغوت على قد دمه .. ويكده نريح ونعمل ثواب وننظف المجتمع من العلاقات الفاسدة

- يعنى لص

- لص شريف

- وأنا اللصة الشريفة .. حرم اللص الشريف

- مظلوط .. ح تلبسى أساور ذهب

- ح البس أساور حديد .. شوف يابن الناس .. انت نصاب انت حر .. والدنيا واسعة تساعك وتساعنى .. وحسابك مع الحكومة ومع الله .. لكن انا ما نفعكش .. اختيارك المرة دى جه غلط .. أنا ست خاينة بتاعة ثقافة وكتب .. دنيا تانية انت ما تعرفهاش .. أنا لو شاركتك أضرك وأضيعك .. ح اتقفش وانضرب واعترف .. شوف لك واحدة من توبك .. واعتقنى لوجه الله

ومر أسبوع .. بنام طول النهار .. وتدور فى الشقة تكلم نفسها .. ويستيقظ مع العصر ويرتدى ملابسه ويخرج .. ويعود فى المساء مع العصاة .. ويفرشوا (القعدة) والأكل والخمر والحشيش والقمار .. وتطرق الباب من الداخل فينهض ويللم بعض الطعام ويقف على باب الحجرة ويرميه لها على الأرض بقرف فتجمعه كالكلبة وتأكله وتبكي .. وتحتاج الحمام فتطرق الباب فيقذف الحلة فى صدرها .. وتخشى أن تنام لو جاها النوم .. تخاف أن يسكر ويفقد وعيه .. فيقوم أحد أفراد العصاة وهو سكران ويهاجمها .. ومع بشاير الصباح ينصرفون .. ويدخل ويرتمى على السرير .. فتخرج تفتش لفافات الورق وتخطف من القطة بواقي الطعام الذى تركوه .. وتنام فى الصالة على الأرض

ضمرت .. واسود جلدھا .. إمساك ومغص دائم .. والدموع لاتنقطع من عينيھا .. وفهمت قصده .. يقصد أن يذلھا .. (يدلھا) لتضعف وتوافق

وشعرت بذنبها وتذكرت فهمي.. انها على يقين انه الرجل الوحيد الذي أحبها من كل قلبه.. وتمناها
فى الصبح وفى الحلال.. وتمنت أن يسامحها.. لكى يسامحها الله ويفك كرتها
صحى وارتنى ملاسـه .. وقبل أن يخرج سحبتـه من يده إلى المنضدة وجلسا.. وتجاوزا
- ربحنى إلهى يستر ولا ياك

- انت مش وش نعمة

- الله ألفنى عن نعمتك

- اسمعنى كويس.. أنا عارف إنك بنت ناس وشريفة.. وأنا ما طلبتش منك غير العمل الشريف

- بتسمى البلطجة والنصب عمل شريف

- يا ستى أنا باختيار الناس الوحشين.. الست اللى بتخون جوزها.. والرجل اللى بيخون مراته..

وأعاقبهم علشان يتوبوا.. بافرض عليهم غرامة زى الحكومة ما بتعمل.. مش المحكمة بتحكم على

المجرم بالغرامة والحبس.. أنا بقى أرحم من الحكومة والقانون.. باحكم بالغرامة بس

- ما شاء الله .. عملت نفسك حكومة ومحكمة وقانون !

- راسك ناشفة

- طلقنى

وتركها وخرج.. وتكرر ما يحدث كل مساء

وفاجأها فى ليلة بعد انصراف الشلة قبل أن ينام.. أخذ كفها وألبسها الخاتم.. فتركت له إصبعها

لكى تعرف نيته .. قال

- دى البداية.. ح املا كل صوابك وذراعك وصدرك حتى رجليكى.. ح اجيب لك خلخال ذهب

- مقابل؟

- توافقى

- ولا مال الدنيا كلها يخلينى أمشى فى سكة غلط

- ده آخر كلام عندك ؟

- طلقنى

خلع الخاتم بعنف حتى كاد يخلع معه إصبعها .. وصق فى وجهها.. وأرتمى على الفراش .. ونامت

كالعادة فى الصالة على الأرض

استيقظت فوجدت نفسها مقيدة .. مربوطة الذراعين والساقين .. واستطاعت أن تجلس بصعوبة ..

وخرج إليها .. وأدركت أنه لم ينم

- قلتى إليه فى الاتفاق

- احنا ما اتفقناش ومش ح نتفق .. طلقنى

- أنا صبرت عليكى كفاية .. وانت اللى جيتتى على روحك

رفع ذراعه وهوى على صدغها بكفه .. فنظرت إليه بغيظ وتحد وصرخت فيه

- أنا عمر ما حد ضرىنى

فرقع ذراعه وهوى على صدغها بلطمة أخرى أشد .. فشعرت أن الموقف أكبر من أن تتحدا .. فنكتست

رأسها مستسلمة مرعوبة .. مندهشة .. فلم تكن تظن أن الأمر يمكن أن يصل إلى حد الضرب

ودخل حجرة وعاد وفى يده كبرياج .. وقف أمامها وباعد بين ساقيه .. ورفع ذراعه بالكبرياج إلى أعلى

وهى جالسة .. ساقاها ممددتان مقيدتان ويداها مقيدتان على بطنها .. فبالت على روحها .. وهوى

بالكبرياج على ظهرها فصرخت .. ورفعته وهوى به مرة أخرى فتبرزت .. ورفعته وهوى مرة ثالثة .. فلم

تدرى بنفسها

منع المصاصة من الحضور .. وتفرغ لها .. تنام على الأرض ساقاها ممددتان مربوطتان .. ويداها

مقيدتان على صدرها .. تجلس على بركة من بولها وبراؤها الذى تعفن تحتها وفى جلبابها .. يكلم

فمها .. ويقف أمامها ويباعد بين ساقيه .. ويرفع ذراعه بالكبرياج فتبول .. ويهوى به على صدرها

فتتبرز .. ثلاثة أيام يلقى بالفوطة فى وجهها فتتعلقفها بيديها المقيدتين .. ويأمرها فتسد بها

فمها .. وتنتظر لسعة الكبرياج .. بعيون زائفة مرعوبة وجسد يتنفض .. ويجلس أمامها على الكرسي

يضرب كفه بالكبرياج فى غيظ .. ويسألها

- هيه .. وافقتى ..؟

- طريقك غير طريقى .. بينى وبينك بحر .. محيط .. أنت على شط وأنا على شط .. اللى يحاول فينا

يقرب من الثانى ح يفرق .. ويمكن يفرقه معاه .. سيبنى أروح لحالى والله يسامحك

فى اليوم الرابع .. أتى بحبل طويل .. ربطه فى ساقها فوق القدمين علاوة على الرباط الأول ...

وصعد فوق المنضدة وأدخل طرف الحبل فى الحلقة التى تعلق بها النجفة .. وشد الحبل .. فارتفعت

ساقاها عن الأرض .. وشد فارتفع ظهرها .. وشد فتعلقت فى الهواء ورأسها لأسفل كالذبيحة عند

الجزار .. وتحملت آلام لا وصف لها .. ورغم هذا بقيت على إصرارها ورفضها .. وتمثل لها بلال مؤذن

الرسول .. وتعذيب الكفار له وصبره على الهلاء .. على ألا يعود إلى الشرك بالله .. وتمنت لحظتها

الموت .. وقالت (يا ربى .. إن كان قدرى أن أموت هكذا فعجل .. خفف والطف فى قضائك) .. ثم

ذهبت فى غيبوبة

أفاقت وهي كما هي..مربوطة معلقة..فتحت عينها فوجدته أمامها على كرسية.. ويده زجاجة الخمر.. وقال

- هيه وافقتي...؟

وحركت رأسها يميناً ويساراً بالرفض..فهب من فوق كرسية فجأة .. وصرخ
- انت فاكرة إني مش ح أقدر عليكى.. ساعة واحدة وأكون عندك ومعاي لك مفاجأة ح تفرحك لأنك بتحبيبها.. بتحبيبها جداً .. ونفسك تشوفيها..ح اعلقها بدالك تريحك شوية ..ح اعمل بينكم نوبتجية .. اعلقها وأنت تضربها.. وأعلقك وهي تضربك .. عارفة هي مين .. بنتك

وبغير إرادتها صدر منها ربح بصوت مسموع مفاجئ كأنه صوت صفارة إنذار.. وتلاشت مقاومتها .. وصرخت .. لأ .. لأ .. لأ.. أنا موافقة

فك طرف الحبل من عقده في أكره الباب وأرخاه.. فتدلى جسدها وتمدد على الأرض..فك قيودها فخرجت عن النهوض..حملها إلى الفراش وألقى في حجرها ببعض الطعام .. فأشارت له على الزجاجة فتناولها لها..فتجرعت ما بقي فيها .. ثم تمددت ونامت

صحت تائهة عن الدنيا.. والدنيا تائهة عنها .. لا تدرك إن كان الوقت صباحاً أم مساء .. تربعت في الفراش .. وأدركت أنها نامت نوماً عميقاً طويلاً..جاء وجلس بجوارها على طرف الفراش في حنان كاذب وسألها

- خلاص اتفقنا ؟

- عمرنا ما ح نتفق

- العملية دي ويس .. لا قبلها ولا بعدها.. علشان أعوض اللي صرفته عليك

- ماأنت أخذت خمسة آلاف جنيه

- مش كفاية ..أنا صرفت كتير..مصاريف الرجالة اللي تحرت عنك ثلاث شهور.. بذل خطروبدل انتقال وبدل طبيعة عمل وبدل سفر واوفر تايم ..كلها كانت على حسابي.. ومادام مش ناوية تتعاوني معانا تبقى على حسابك.. ولازم تعوضيني.. والمفروض أطلع من الجوزة دي بقرشين لغاية مارينا يعوضني عنها بجوزة تانية .. مادام إنت مش وشي نعمة

- خد كل مصاغي

- مش كفاية.. وياست العملية دي خفيفة وسهلة ح تتعلمي فيها

- انت ناوي تعلمني .. هي مرة واحدة ويس

- ماشي

- والطلاق ..؟

- إذا طارعتيني وساعدتيني بإخلاص .. مكافأتك الطلاق .. بس يا حلوة فايتك شيء مهم

- إيه هو؟

- قبل ما أطلقك لازم أتجوزك

- يانهارك اسود .. هو إحنا ما اتجوزناش
- اتجوزنا فى السر
- يبقى نطلق فى السر
- صدقيني أنا قلبى عليكى .. الأول نعلن جوازنا ونعمل حفلة صغيرة .. ندعى بعض قرايبك ومعارفك وتأخذ شوية صور تبهتهم لأهلك .. ويعدين أطلقك
- أنا موافقة بشرط الطلاق يتم تانى يوم
- مش حلو علشانك .. الناس ح تتكلم
- المهم إعلان الجواز .. الطلاق ممكن يتم فى السر
- يبقى إيدك على إيدى يا عروسة علشان نجيب الشبكة والمهر ومصاريف الفرح
- بلاش تحلم .. كفاية نجيب مصاريف الطلاق
- يعنى موافقة ؟
- بشروطى .. العملية الأولى والأخيرة .. وتانى يوم احتفال على الضيق .. وتالت يوم الطلاق فى السر
- وسألته متشككة .. هل هو صادق فى وعده بالطلاق .. أم أن هدفه من إعلان الزواج توريطها أكثر .. فأقسم لها برأس أبيه .. فصدقته .. فلم يكن أمامها حل آخر غير أن تصدقه
- عاد بعد منتصف الليل .. ومعه أفراد العصابة التى يطلق عليها (الشلة) .. رأته من النافذة فتبينت أن عددهم زاد هذه الليلة .. وصل إلى اثني عشر
- تحلقوا حول المنضدة .. وفتحوا لفافات المزة والكباب وأفرغوها فى الأطباق وسحبوا زجاجات الويسكى من العلب .. واستمر تفريغ الويسكى فى الأكواب .. وتفريغ السجائر وحشوها بالمخدرات .. وتوزيع أوراق الكوتشينة ساعتين .. وسخت الرؤوس واحمرت العيون وسال اللعاب وتبادلوا القفشات والنكات الاباحية وعلا صراخهم وضجيجهم .. وخطرت فكرة لأحدهم فطرحها عليهم فهللوا لها .. فقام بعدها خيشة ودخل إليها الحجرة وخلع جلبابه وأمرها أن تخلع جلبابها وترتدى فستانا .. ولما سأله
- الساعة اتنين .. ح نروح فين ؟
- قال بلسان معوج من أثر السكر والتخدير
- ح تخرجي تتعرفي على الشلة
- مالوش لزوم .. شئ ما يشرقتيش
- ح تشتغلي معاهم إزاي من غير ماتت تعرفي عليهم
- هو انا ح اشتغل معاهم .. والا معاك ؟
- معانا كلنا
- مستحيل أنضم لعصابة .. إنت جوزي ولو انضبطت ح اقول هددنى وأجبرنى .. لكن أشتغل مع العصابة مستحيل

- ورحمة أمي إن ماسمعتي الكلام.. لأخليهم يتعرفوا عليكى وانت عريانة ملط متعلقة فى النجفة .. وأخليهم يطفوا السجائر فى لحملك وضغط فكيه .. وصرخ فيها (إلبسى) وتخلت نفسها عارية معلقة فوق مائدة يتحلق حولها اثنا عشر رجلا مخمورين مخدرين .. فتملكها الرعب وجرت إلى الدولاب

ارتدى بدلة كاملة وببيون وعلى رأسه قبعة وارتدت ثوبا جديدا طويلا كان قد اشتراه لها فى (أسبوع العسل) وخرجا.. واستقبلتهما العصابة المتجمهرة أمام باب الحجرة بالطبل والزغاريد.. أحدهم يدق على صينية الشاي.. وآخر يدق على زجاجة الويسكى بمبسم السجائر.. وثالث يدق بمبسم الشيشة على جسمها الزجاجى.. ورابع يعزف بملقتين.. وخامس يصفر بفمه.. والباقي يصفقون ومن حجرة إلى حجرة .. إلى الصالة وحول منضدة القمار.. زفوها على أغنيات الأفراح .. (اتمخطرى يا حلوة يا زينة ياوردة من جوه جنينه.. ومبروك عليكى عريسك الخفة يا عروسة يا زائنه الزفة) هو يمشى بكبرياء وثقة مرفوع الرأس.. وهى متأبطة ذراعه كما أمرها .. تمشى منكسة الرأس مهمومة كالمنومة .. وكلما تعثرت فى نكستها ومحنتها وخجلها وكادت تقع .. تشبث بذراعه .. ولسان حالها يقول (أرحم من التعليق فى النجفة) ثم أجلسها.. ومرت العصابة أمامها واحدا بعد الآخر .. يضعون لها (النقطة) فى حجرها .. حتى امتلأ بمئات الجنيهات .. ثم أشار لها .. فرفعت ذيل الثوب من الأمام قليلا .. وللمت فيه الأوراق المالية .. وولت هاربة إلى الحجرة .. وبمجرد أن أغلقت الباب .. تركت ذيل الثوب لتتناثر الأوراق على الأرض .. وجلست على طرف الفراش ووضعت كفيها على وجهها واجهشت بالبكاء التفت حوله العصابة وصبوا فوق رأسه زجاجة ويسكى بين التهليل والتكبير و(عين الحسود فيها عود للى مايصلى على النبي يا عريسنا يا أبهة)

وانصرفت العصابة ودخل إليها يترنح مبتلا بالويسكى .. وداس على الأوراق المالية وهو لا يدرى .. وخلع ملابسه وألقاها على الأرض .. وصعد إليها فى الفراش .. وكانت جالسة القرفصاء فوق السرير مسندة ظهرها للحائط.. ورأسها بين ركبتيها.. فجرها من قدمها ليكمل مراسم الزفاف .. فاستسلمت وما زالت الدموع فى عينيها ومرت أيام.. وأصبحت تستقبلهم واحدا بعد الآخر كل مساء فى حضوره أو حتى قبل عودته.. كل من يدخل يناولها مايحمله من طعام أو فاكهة أو خمر.. وبعضهم يجاملها شخصيا.. كل على قدر سعته.. بداية من كيس لب.. إلى زجاجة برفان أو نظارة شمس أو ساعة.. وكلها مسروقات أثناء تجوالهم فى المحلات .. وتروح وتجي بينهم وبين المطبخ بجلباب البيت وتجهز المنضدة بالأدوات والأطباق والأمكواب وتفسل الشيشة وتضع الفحم على النار.. ولسان حالها يقول فى تهكم (فى يوم رفضتى تخدمى ضابط واحد.. النهارده بتخدمى أربعين حرامى.. حسبتيها غلط.. والحساب فرق كثير يا برنس)

ضموها إلى منضدة القمار .. وبإيعاز منه .. جاملوها بالهدايا وتهاوتوا معها فى اللعب لتريح ..
وتفادر المنضدة آخر الليل وصدرها معباً بالأوراق المالية .. لاستمالتها وتأليف قلبها وتطويرها
وإعدادها للعمل .. وحتى لا تتركب رأسها وتهرب وتلجأ للشرطة

تدخل إلى حجرتها كل ليلة وتفرغ مافى صدرها من الأوراق المالية وتسويها وتضمها على بعضها
وتعد الإيراد .. ثم تنظر إليه فى دهشة وتسال نفسها فى تعجب (الحرام يأتى بهذا كله) .. حكمتك
يارب) وتظل تصبر نفسها فى انتظار ماسوف تسفر عنه نية وتفكير هذا المحتال الشرس
الخطير .. آلمة فى الله وفى صبرها أن تستطيع فى النهاية الإفلات من هذا الكمين المحكم .. وأن
تنخطى أزماتها ومحتتها .. دون أن تتعرض سمعتها للتشويه .. أو يتعرض أولادها لأذى

وبالمعاشرة عرفتهم بأسمائهم .. وطباعهم .. وتخصصاتهم .. بعضهم يمارس جرائمه منفردا .. لأن
جريمته لا تحتاج إلا لفرد واحد .. أما الجرائم التى تحتاج إلى أكثر من شخص .. فتشكل لها
مجموعات عمل .. وعرفت أن زوجها هو الزعيم .. وأن خيشة هذا (داهية مسيحة) فرغم جهله
لا يستهان به

أربعة منهم .. يشكلون لجنة تموين أو لجنة صحية .. أو لجنة ترخيصات .. يرتدون الملابس
المناسبة لكل لجنة .. وينتقلون من حى لآخر .. ويدهمون المحلات .. يتقدمهم خيشة بعظمة
وكبرياء .. يقف فى وسط المحل ويدها فى خاصرته .. وعيناها تجوب المكان متفحصة بقرف وتأفف
وتصيد .. غير مبال بصاحب المحل أو عماله الملتفين حوله .. وينطلق الثلاثة الآخرون فى المحل .. بحثا
وتفتيشا .. عن مواد تموينية غير مسعرة أو أطعمة فاسدة أو لحوم مذبوحة خارج السلخانة .. أو
رخص غير مجددة .. وعندما يظهر الخوف والقلق والوجوم على صاحب المحل .. يخرج هذا الرئيس
المزعوم من المحل نافرا غاضبا فيهرج صاحب المحل خلفه .. مسترضيا متوسلا .. فيرفع أنه عاليا
بالرفض ويأمر أحد موظفيه الذى يحمل دفترًا بتحرير محضر بالمخالفة .. ويظل صاحب المحل
يتوسل للأربعة الواحد بعد الآخر .. فيهمس له أحدهم بالنصيحة والحل .. فيطوى لفافة من الأوراق
المالية ويدسها فى يده .. فيذهب هذا الموظف إلى رئيسه راجيا وواعدا بأن هذا الخطأ سوف يصحح
خلال أيام .. ويرجوه العفو عن الرجل المسكين .. ويتنازل الرئيس عن تحرير المحضر .. وينصرف
وخلفه أتباعه .. على دعوات صاحب المحل لهم بالستر والصحة

مجموعة أخرى .. من خمسة أفراد .. يرتدى ثلاثة منهم ملابس عمال البناء الصعايدة .. يتدسون
متفرقين فى زحام الباحثين عن العمل أمام السفارات العربية .. ويسألون بلهفة عن الحاج فلان
السمسار .. وبالطبع يكون الرد على السؤال أنهم لا يعرفونه .. فيرد السائل بأنه السمسار الوحيد الثقة
الذى يطمثون على أموالهم معه .. حتى يشاع فى كل المتزاحمين أن هذا السمسار هو الأفضل ..
وتسرى إليهم العدوى ويسألون عنه بدورهم

وفجأة يظهر رابع العصاة.. فى شكل سمسار مهندم الملابس ميسور الحال يمسك سبحة ويحلى كل أصابعه بخواتم ذهبية فيندفع إليه الثلاثة.. وبالعدوى أيضا يندفع إليه بعضهم بعض راغبي السفر ويعرض أفراد العصاة على السمسار تكاليف السفر.. فيتأبى ويهرب منهم فيطاردون.. ويقلدهم السلج.. ويعيدا يلحقون به وقد تبعهم نفر كثير.. ويلحون عليه ويستحلفونه بالرسول والكعبة التى زارها سبع مرات.. فيلين ويقودهم إلى خيشة.. فى هيئة شيخ بالملابس العربية.. اللحية والجلباب الأبيض والمنديل الأحمر والعقال على رأسه والنعال الجلد فى قدميه جالسا على المقعد الخلفى فى سيارة مرسيدس بها سائق.. يدخل السمسار برأسه من شباك السيارة.. ويتوسل إلى الشيخ أن يضم هؤلاء العمال (الغلابة) إلى كشف التأشيرات الذى معه.. والكل ملتف حول السيارة يتابع من نوافذها إلحاح السمسار بقلب خافق.. ويتمنى له التوفيق.. ويلين الشيخ ويشير بيده موافقا.. فيعود السمسار إلى المتجمهرين.. فيتزاحمون حوله.. ويتسابقون على دفع مصاريف السفر وثمان التأشيرة.. ثم يجمعهم فى الظل ويرصهم على الرصيف.. لحين أن يدخل هو مع الشيخ إلى السفارة لإنهاء الإجراءات

ويركب السمسار مع الشيخ السيارة التى يقودها سادس العصاة.. ويختفون.. ثم يتسلل الثلاثة الأوائل من وسط المتجمهرين ويلحقون بهم.. ويصبرون أياما حتى تهدأ الواقعة.. ويعاودون الكرة أمام سفارة أخرى.. وفى السهرة يعودون بالحصيلة.. والنوادر التى حدثت أثناء التنفيذ.. عن الصعبدى الذى باع مصاغ زوجته أو أثاث بيته للحصول على عقد العمل.. وكيف أتقن السمسار والشيخ دورهما

أحدهم اطلقوا عليه (رفاعى) لأن تخصصه رفاعى.. أى صائد الثعابين.. فهو يتنكر فى ملابس شيخ) بجملة وعمامة.. ويخفى فى ملابسه ثعابين.. ويدخل محلا.. ويطلق ثعبانا أو أكثر فيشير الذعر والفرع.. ويهرع العملاء والعاملون ويتسابقون فى الهروب.. وهنا يصرخ مبسلا محوقلا ويطمئنهم أنه (رفاعى) وسوف يتطوع باصطياد الثعابين بقدرة وهبها له الله وشفاعته مولانا وسيدنا الإمام الرفاعى

ويخلو له المحل.. بعد أن هرب العملاء وانكمش العاملون على رصيف المحل.. ويظل يدور ويلف فى المحل بحثا عن الثعابين مرددا آيات من القرآن الكريم وهو فى الحقيقة يبحث عن خزينة المحل أو درج النقود.. وما خف حمله وغلا ثمنه.. فقبطانه الواسع بجيوبه الكبيرة كفيلا باخفاء الكثير.. ثم يخرج إليهم وهو يجفف عرقه ويلوح لهم بالثعبان.. فيعودوا إلى المحل ومازالوا متوجسين.. وقبل أن تستقر نفوسهم وتهدأ.. وينتهيوا إلى ماسرق.. يكون قد أصبح (فص ملح وذاب)

محتمل آخر خطته أن يرتدى ملابس مجند بالجيش.. يركب القطار.. أى قطار.. ويبحث عن المجندين العائدين من أجازاتهم إلى المعسكر.. يختار المجند الجديد.. يعرفه من ملابسه الجديدة ويجلس بجواره.. يبدأ بأى حوار.. ثم يقدم إليه التحية سيجارة بعد سيجارة.. ويتم التعارف.. ويحكى ليغرى الضحية على الحكى بالعدوى.. ويستمع إلى المجند فى انتباه.. فيعرف بلده وأهله وأمه وأباه وأخوته وزوجته إن كان متزوجا ثم يقدم إليه ورقة وقلما ويدعى أنه أمى.. ويستسمحه أن يكتب له رسالة لزوجته أو أبيه.. يرجوهم تسليم مبلغ كذا لحامله.. ويودعه ثم يسافر فى اليوم

التالى إلى بلدة المجند وهو يرتدى ملابس المجندين.. ويتقى بأهله ويدعى أنه زميل.. ويقدم إليهم المعلومات والأمارات التى تدل على صدقه.. ويخبرهم أن ابنهم حبس بعد عودته الى العسكر نتيجة عجز فى عهده.. وأنه يطلب مبلغ كذا لتسوية العجز.. ويقدم إليهم الرسالة

وفى إحدى سهراتهم ترحموا على زميل لهم.. توفاه الله منذ عام ودعوا له بالجنة.. وتحاكوا بأمجاده.. كان يستأجر شقة مفروشة ويستأجر سيارة فاخرة ويدخل محلا كبيرا.. ويشترى أثاثا بالقسط.. وبمجرد وصول الأثاث إلى الشقة يبيعه.. ويختفى وكل هذا ببطاقة مزورة

وفى ليلة تطوع أحدهم.. وحكى لها عن واقعة كان بطلها زعيمهم الملهم زوجها الهمام.. من باب (مسح الجوخ) ليشرکه فى أول عملية.. لأن له مدة جالس على (دكة الاحتياطى) ورغم أنه يحصل على نصيب من عائد جرائم زملائه الذين فى الملعب.. إلا أنه يرى أن (اليد البطالة نجسة) واستمع إليه.. واستمع إليه الزعيم أيضا وهو منتشى بالخمر والمخدرات والغرور وتاريخه العظيم

(دأب على زيارة محل خردوات وسجائر فى ميدان نشط له عملاء كثيرون.. يدخل كل يوم.. ويتناول صاحب المحل ورقة مالية من فئة العشرة جنيهات جديدة ويطلب علبة سجائر.. حتى حفظه صاحب المحل.. فكان يجهز له العلبة والباقي بمجرد أن يلصحه وهو يعبر عرض الشارع.. وظل الرجل فى دهشته.. إلى أن تشجع يوما وسأله.. لماذا دائما عشرة جنيهات جديدة.. ألا تحمل فكة أبدا؟) فمال عليه حتى تقاربت رأساهما.. وهمس له متسائلا

- ملاحظتش حاجة؟

- حاجة زى إيه؟

- ماحاولتش تبص فى الورقة اللى بتاخذها منى كل يوم؟

- بصيت

- ليه؟

- ماتزعلش منى.. فى الأول لما اتركرت أنا شكيت.. لكن لما حطيتها فى البنك وقبلوها.. أنبت

نفسى على سوء ظنى

- يعنى الورقة سليمة؟

- بالتأكيد يابيه

- لأ.. هى فعلا مزورة

- معقول!

- مزورة بس مش فى مصر.. فى أمريكا.. تزوير دقيق جدا.. يخيل على الجن الأزرق

- سبحانك يارب!

- أنا مستعد أبيع لك منها.. أنا باشتريها بأربعة جنيه.. ومستعد أبيع لك بخمسة

- أعوذ بالله من الشيطان الرجيم

- إنت مش جريتها مع الزباين وقبلوها .. والبنك قبلها

- أيوه

- خايف من إيه ..

ومال عليه أكثر .. ودس شفتيه فى أذنه .. ثم دار بينهما حوار انتهى باتفاق .. وفى اليوم التالى زاره .. وناولته لفافة بها مائة ورقة فئة العشرة جنيهات وتناول لفافة بها خمسمائة جنيه .. وغاب ثلاثة أيام وزاره وتبادلا اللقافات

ثم تعمد أن يغيب عنه أسبوعان .. وذهب فوجد الرجل فى انتظاره على أحر من الجمر .. متلهفاً على زيارته .. وعاتبه على طول الغياب .. فمط شفتيه فى استياء وأفهمه أن المستول الكبير الذى يستورد هذه العملة من الخارج امتنع عن بيع القطاعى .. ولا يبيع إلا جملة .. الدفعة لاتقل عن خمسين ألف جنيه .. وفكر الرجل قليلا متحيرا .. ثم هز رأسه موافقا .. وقال له بحماس (إمهلى يومين لأدبر المبلغ) وعاده بعد يومين .. فوجده جاهزا .. فاتفقا على خطة التنفيذ .. وفى اليوم التالى سافرا معا إلى الاسكندرية .. وفى كازينو على الشاطئ كان ينتظرهما العضر الثانى فى العصابة باعتباره المستورد .. وتكلم بلهجة الأجنبية كلمة عربى وكلمة انجليزى .. واستلم حقيبة بها خمسة وعشرون ألفا .. وسلم أخرى بها خمسون ألفا

واعتذر الزعيم عن العوده معه بحجة ارتباطه ببعض الأعمال فى الأسكندرية .. وسافر المشتري وحده فى أول قطار عائدا إلى القاهرة .. وجلس فى ديوان الدرجة الأولى .. ووضع الحقيبة على الرف فوق رأسه كما نصحه .. وسرعان ما احتل الديوان ثلاثة مسافرون آخرون وقبل أن يصل القطار إلى دمنهور .. دخل الديوان فجأة الأعضاء الثلاثة الباقون فى الخطة .. أحدهم فى زى ضابط شرطة .. والآخران فى زى الجنود .. وقف الضابط فى وسط الديوان ورفع عينيه إلى الحقيبة وسأل الجالسين من منهم صاحب الحقيبة .. فانكمش المشتري وتجمد فى مكانه ولم ينطق .. وأعاد الضابط السؤال فى تحرش بالركاب فلم ينطق أحد .. فحمل الحقيبة وخرج وتبعه الجنديان وهكذا عادت الخمسون ألف جنيه غير المزيفة .. والتى كان قد اقترضها الزعيم من محل صائغ يشتري منه المصوغات المسروقة .. عادت للزعيم .. ثم للصائغ .. وفازت العصابة بخمسة وعشرين ألفا

سمعت ماحكاه الزميل عن الزعيم الملهم .. فمطت شفتيها فى تهكم وكراهية وكانت قد تجرأت بعد أن عاشرتهم وأصبحت واحدة منهم .. وزال عنها الرعب - كل حيلكم دى قديمة .. اتنشرت فى الجرايد واتعملت أفلام .. فىن الجديد اللى عمله زعيمكم الملهم!

بان الفضب على الزعيم .. بعد أن مسخت فرحته .. فرد مدافعا عن نفسه

-الجديد .. إن كل يوم يظهر شخص جديد ساذج أهبل .. والهبل كثير .. ورغم إن الناس شافت الحيل دى فى المحاكم والأفلام .. الطمع بيخليها تنسى وتخدع نفسها - الناس هى اللى يتخدع نفسها !

- ايوه..زيك كده..انت اللى خدعتى نفسك بالطمع..لما صدقتى كل اللى قلت لك..الطمع خلاكى
تصدقينى..كنت طمعانة تورثى ملايين..ورغم إنى كنت قدامك سليم باتكلم وأكل واشرب وماشى
على رجلى .. خدعت نفسك وصدقتى إنى مريض وكلها أيام واموت وتصبحى مليونيرة

كل يوم يتأكد لها أن الخلاص من يد هذا المجرم المتوحش أمر ليس بالسهل .. وكلما تذكرت
تهديده لها بخطط أولادها غاصت فى صبرها

وفى ليلة..بعد انصراف العصابة..التي لم تستقر على عدد ثابت..وجوه مواظبة يوميا..ووجوه تأتى
من حين إلى حين.. ووجوه تأتى وتختفى..قال لها أنه سيختبرها غدا فى تجربة بسيطة..فلم تنم
ليلتها..وفى الصباح أمرها أن تخلع كل مصاغها..قرطها وعقدها وأساورها وساعتها..ثم أمرها أن
توقع على شيك لحامله قيمته مائة ألف جنيه..ثم قال لها بهدوء ناصحا ..(أى محاولة غدر منك
سيدفع ثمنها أولادك) وارتيدي ملابسهما وخرجا..وفى كازينو عام جلسا وطلبا مشروبا.. وشرب كونه
ودفع الحساب وأفهمها أنه بعد نصف ساعة ستحضر سيدة..وتعطيها لفافة وتنصرف.. وبعد
انصراف السيدة عليها أن تعود باللفافة فورا إلى المنزل
وانزعجت.. وسألته محتجة

- مخدرات !

- لأ..

- لو قطعتنى حئت .. مش ممكن أشيل مخدرات

- قلت لك لأ

- فيها إيه اللفة !

- ابقى افتحيها وشوفيها

- قبل ما استلمها لازم أعرف فيها إيه .. لازم تقول لى دالوقت

- مصوغات

تركها وانصرف..وبعد نصف ساعة حضرت فعلا سيدة..جلست مرتبكة..وأعطتها اللفافة .. وقالت
لها جملة واحدة .. (قولى له .. كفايه كده ويسببني فى حالى .. إلهى يخرى بيته)

وبعد انصراف المرأة بخمس دقائق غادرت الكازينو.. ولمحت أحد أفراد العصابة يراقبها .. وعادت
إلى البيت فوجدته فى انتظارها .. أعطته اللفافة وفضها.. وأخرج منها المصاغ .. واختار خاتما ..
وأمسك أصبعها ودسه فيه .. فقالت

- إيه حكاية الست دى .. عاوزة أفهم

- بعدين

- لأ دالوقت

- الست دى معانا

- فى العصابة ؟

- أبوه
- مش فاهمة .. إزاي معاكم وإزاي بتشتكى منك
- كنا بتختبرك .. ونجحتي والحمد لله
- فين مصاغى
- بعدين
- كده أنا وفيت بوعدى .. ح تطلقنى إمتى
- إنت عملتى حاجة ا ده انت يادوب شريتى حاجة ساقعة على النيل
- عاوز منى إيه تانى ؟
- تشاركى فى عملية .. تعرقى .. تجيبى اللى صرفته عليكى بعرق جبينك
- ساعة ماناولتنى اللفة .. إنتهى لى إن كل الناس شايفانى .. حتى اللى على البر التانى .. وإنتهى
- لى إن بعد ثوان ح يدخل البوليس ويضبطنى متلبسة
- متلبسة بإيه .. هو إنت عملت حاجة ا .. الذهب ده بتاعى
- كفاية أعصابى اللى تلفت
- بكرو .. تتعودى
- هى لسه فيها بكرة .. يا خراب بيتك .. يا ضياع مستقبلك .. يا آخرتك السوده ياوسام
- ضحك عاليًا .. وأخذها فى حضنه كأياهما الأولى .. ودس فى إصبعها خاتماً آخر .. وعلى منضدة
- القمار .. حكى لها عن محل كوافير يكاد أن يكون بنك رهونات .. يحتفظ بكمية كبيرة من المصاغ
- الذهب .. لأنه يقرض عميلاته بضمان مصاغهن .. وشرح لها الخطة .. وأيضاً لم تتم ليلتها .. وفى الصباح
- خرجت معه سيرا .. ثم أشار لها على شاب يقف بجوار الرصيف ومعه دراجة ثم أشار إلى المحل
- فدخلت .. وكان المحل مزدحم .. فجلست تنتظر دورها .. ثم قامت بعد دقائق واستأذنت فى استعمال
- التليفون .. والتقطت مفاتيح المحل من فوق المكتب .. ثم استأذنت لقضاء مصلحة سريعة إلى أن يحل
- دورها .. وخرجت وسلمت المفاتيح لعضو العصاة الذى إنطلق بالدراجة إلى محل مفاتيح وصنع نسخة
- أخرى منها .. ثم عاد لها فعادت إلى المحل .. وأعادت المفاتيح إلى مكانها .. وجلست تنتظر دورها ..
- قصت شعرها ثم عادت .. وفى فجر نفس الليلة سرق المحل .. وفى مساء اليوم التالى .. جلست
- العصاة لتوزيع الأنصبة .. وكان نصيبها عقداً وحلقاً وثلاثة خواتم
- وبعد أيام .. توجهت مع عضو آخر إلى محل بقالة .. دخلا كل على حده كأن أحدهما لا يعرف الآخر ..
- وطلبت أصنافاً من البقالة .. فتحرك البائع وأتى بالمطلوب .. ووضعه فوق الحاجز الرخامى الممتد فى
- مدخل المحل فاصلاً العملاء عن رفوف البضاعة .. ثم عاد ليأتى بصنف آخر .. وغافل عضو العصاة
- البائع وضرب بيده مشترواتها .. فوقع كيس المكرونة وتناثرت حباته فى أرض المحل داخل الحاجز
- الرخامى .. فأنزعج البائع .. واعتذر لها .. ظناً منه أنه السبب لأنه لم يضع الكيس فوق (البنك) بطريقة
- صحيحة .. وانحنى على الأرض يجمع المكرونة .. وهنا تطوع الزبون المنتظر واندفع بشهامة إلى داخل
- المحل متطوعاً أن يساعد البائع فى جمع ماتبعثر .. وانحنى معه يجمع حبات المكرونة .. وغافله وهو

منحنى .. وفتح الدرج بهدوء... وجمع مابه من أوراق مالية ودسها فى جيبه بسرعة البرق واعاد اغلاق الدرج.. ثم خرج من الحاجز.. فشكره البائع .. واستمر فى جمع ماتبعثر.. فغافله واختفى.
لف لها البائع بضاعتها كلها فى كيس كبير.. وأخذ منها الثمن وفتح الدرج فلم يجد شيئا .. نظر إليها منزعجا وسألها (فين الزبون اللى كان هنا؟) فأشارت إلى مدخل حارة فى الرصيف المقابل.. فانطلق فى أثره.. ففادرت هى المحل
وفى البيت أقسمت برأس أبيها أن هذه آخر مرة .. وقالت له (لو أن البائع فطن إلى أنى مع اللص الهارب لأطبق فى خنأقي.. ولأصبحت الآن فى قسم الشرطة).. فقام إليها ويكل برود أخذها فى حضنه وأسكتها بوعود كاذبة

على المنضدة.. شرح يشرح لها الخطة.. فهبت واقفة.. وضربت المنضدة بيدها فى تحد.. وقالت مستحيل.. وهرعت إلى الحجرة فتبعها.. وطيب خاطرها.. ووعدها أن تكون هذه آخر مرة.. وطمانها أنه بنفسه سيصحبها فى هذه (العملية) ولولا ثقته فى ضمان نجاحها.. ماجازف بنفسه.. فعادت معه إلى المنضدة تستمع إلى شرحه

خرج .. وعاد يقود تاكسى.. فنزلت إليه.. مرتدية جلبابا عربيا صدره مزخرف بنقوش مذهبة.. وجلست فى المقعد الخلفى.. وقاد السيارة ببطء.. وأشار له رجل فلم يتوقف.. وأشار له آخر فلم يلب وأشارت له أسرة بأكملها فتجاوزها.. وظل يقود على مهل من شارع إلى شارع حوالى نصف ساعة إلى أن أشارت له سيدة فى شارع رمسيس فى طريقها إلى مصر الجديدة.. فتوقف.. فتحت الباب الخلفى وجلست بجوارها.. وهنا بدأت هى تتنهد بصوت عال.. وتهتف من حين لآخر (يارب) حتى انتهت إليها الراكبة.. وهو متابعا لهما فى المرآة.. وهنا التفت إلى الراكبة وقال لها بلهجة (أوسطى سائق)
- لو سمحتى ياهانم.. شوفى لك حل مع الست دى.. مدوخانى لها ساعتين.. كل ماتقول لى على شارع ونوصل ترجع تقول لى على شارع تانى.. لاهى عارفة هى رايحة فىن.. ولا أنا عارف إيه آخرتها

وهنا.. وحسب الخطة.. صرخت فيه بلهجة عربية حفظها لها بالأمس
- انتم كده يامصاروة.. كلكم غشاشين خاينين
وفجأة .. داس الفرامل وتوقف وصرخ فيها محتدا
- غشاشين فى إيه يا حاجة .. أخذنا منك حاجة.. ملعون أبو الساعة النحس اللى قابلتك فيها ..
إنزلى وخلي نهارك يفوت.. ومش عاوز منك أجرة التوصيلة
وتدخلت الراكبة
- خليك صبور يا أوسطى.. دى مهما كان واحدة ست وباين عليها مش مصرية.. خلىنا نعرف إيه حكايته

أخذت تتعمد اللهجة العربية.. وتحكى قصتها.. قالت للراكبة (أنها من الخليج.. تزوجت مدرسا مصريا كان يعمل فى بلدها.. وبعد انتهاء مدة إعارته عادت معه إلى مصر.. فأساء معاملتها .. وظل

يضر بها بدون سبب.. فهرت.. وليس معها مال تشتري به تذكرة الطائرة .. كل ماتملكه مصاغها ..
وتريد أن تبعه بأى ثمن)
أخذت الراكبة تتفحص قرطها وعقدها وأساورها الكثيرة .. وواتتها فكرة .. فسألتها
- دول كلهم ذهب ؟
- ذهب يا أختى
- عاوزه تبيعهم بكام ؟
- يكفينى ثمن الطيارة يا أختى .. والباقى حلال عليكى ومسامحاكى
وهنا تدخل هو مرة أخرى .. نظر للراكبة وقال لها ناصحا
- إن كان لك رغبة تشتري .. فكى زنقتها وخلصيها وخلصينى .. خديها عند واحد صايغ تعرفيه
وتشقى فيه وخليه يقدر لك تمنهم
- قالت الراكبة بلهفة
- طيب يا أوسطى خليك معانا شوية .. وأنا ح أكرمك
- رقبتي ياهانم .. بس زى ماقلت لسيادتك .. لازم صايغ يكون معرفة .. أنا صحيح رجل على قد
حالى ياهانم .. لكن أفهم فى الأصول
- طيب ارجع بينا يا أوسطى على الصاغة .. الصايغ يتاع العيلة هناك
أخرجت وسام من حقيبتها منديلا حريريا أحمر .. وخلعت كل المصاغ وصرت فيه .. وظل فى يدها
إلى أن توقف التاكسى أمام محل الصائغ .. فناولته للراكبة فنزلت به .. ودعتها فرفضت فاتجهت
وحدها ودخلت المحل .. وظلا يتابعانها من نافذة التاكسى إلى أن قام الصائغ بالفحص والوزن
والحساب .. ثم عادت .. وأعادت لها المنديل .. وقالت بتمثيل ساذج
- ماجابوش غير خمس آلاف جنيه
فانزعجت .. وخبطت صدرها .. وهتفت
- بالله عليك يا أختى .. آه ياربى
التفت هو إلى الخلف .. وغمز للراكبة .. ثم قال لوسام
- يا حاجة الذهب فى مصر أرخص من الخليج .. المهم إنهم جابوا ثمن التذكرة وزيادة .. المهم إنك
تتفدى بجلدك وتسافرى .. وملعون أبو الفلوس
هزت لهما رأسها فى استسلام .. ففرحت الراكبة .. وتوجهت بهما إلى بيتها فى مصر الجديدة
وطوال الطريق .. ظل السائق يواسيها .. ويدعو الله أن يعوض عليها .. وينصحها بطلب الطلاق من هذا
الزوج المقتري .. ويغمز للراكبة فتتنظر إليه بارتياح وامتنان .. وتضع له إصبعها على عينيها بمعنى
أنها (سوف ترد له الجميل)

أشارت الراكبة إلى بيتها فتوقف .. ودعتها فرفضت .. فاستأذنتها .. وعندما اختفت فى مدخل العمارة
أخرج هو منديلا مشابها ونفس اللون صر به نفس العدد والأصناف من المصوغات القشرة .. واستبدلا
المنديلين .. وقال وهو يخفى المنديل الذى به الذهب الحقيقي فى درج تابلوه السيارة
- بنت الكلب النصابة .. جيه تضحك علينا .. ذهب بعشرة آلاف جنيه تقول ماجابوش غير خمسة ..
وغايته ح تتمطع وتحط إيدها فى خمسين جنيه وتديهم لى

فمطت شفتيها فى تهكم ومرارة .. وقالت له

- هى اللى نصابة ..!

قال يسترضيها

- نصيبك ألف جنيه

- نصيبى الحقيقى إنك تعتقنى

ورأياها تخرج من باب العمارة .. فهمس لها محلدرا

- مش وقته

ومن شباك السيارة .. تناولت المنديل وفردت طياته وتفحصت المصوغات واطمأنت وناولتها

الخمسة آلاف جنيه .. داعية لها أن تعود إلى بلدها سالمة

فى البيت.. تجرأت وأمسكت بتلابيبه.. واطبقت فى خناقه.. وانشبت أطرافها فى رقبته وصدره..
وهددته بأنها ستصرخ وتلم عليه الناس .. ولن يخيفها أن يصل الأمر إلى البوليس.. ولن تبالي إن
قبض عليها.. وسوف تعترف بما ارتكبت.. وحتما سيقبض عليه هو الآخر ولن يتمكن من تنفيذ
تهديده بخطف أبنيتها .. وقالت له بتحد.. أنها لم تعد وسام الهانم المشقة بنت الأكابر .. (بتاعة
زمان) وإنها الآن مجرمة مثله

ورغم هذه الوقفة الجريئة.. كانت مضطربة وأطرافها ترتعش.. خوفا من رد فعله .. ولكنه بدهائه
عالجها بالحكمة والحلم.. وقادها إلى طرف الفراش .. واحتواها فى حضنه .. وأخذ يقسم لها بأغلظ
الإيمانات.. ويشرف أمه التى لم يقسم بها أبدا كذبا فاستمعت إليه

- صدقنى دى آخر مرة .. وبعدها ح انفذ اللى سبق اتفقنا عليه .. حفلة الجواز والطلاق

- مش قادرة أصدقك

- صدقنى .. وتأكدى إن دى فعلا ح تكون آخر مرة .. مش علشان سواد عيونك .. لكن علشان
سواد عيونى أنا .. إنت فعلا ماتتفعيش فى شغلنا .. انت خايبة ولخمة.. ومش وش نعمة .. لو
ضغطت عليكى أكثر من كده يمكن تغلطى وتودينا فى داهية .. شغلتنا دى عاوزة ناس تحبها ..

ناس جريئة وقلبها حديد

- أخيرا اقتنعت؟

- اقتنعت

- مين عالم يمكن تيجى الطوبة فى المعطوبة .. تيجى الطوبة قبل التوبة.. ماانا عارفة حظى

- حظك خير إن شاء الله .. ماتخافيش.. العملية دى ح أكون أنا معاكى فيها .. واللى ح ننصب
عليه.. انت كمان عارفاه.. رجل طيب سهل لاييهش ولا بينش

- أنا أعرفه ؟

- أيوه

- مين هو ؟

- صاحبك
- صاحبي مين ؟
- المؤلف
- يانهارك إسود.. ده أنا باترعب وأنا بانصب على ناس لأعرفهم ولا يعرفوني.. عاوزنى أنصب على واحد أعرفه ويعرفنى.. يعنى أنصب عليه الساعة خمسة يبلغ عنى الساعة ستة.. أكون محبوسة الساعة سبعة.. الله يفتح عليك.. ويتقول لى اطمئننى.. لأ.. ده انت كده مش ناوى تهتقنى.. ده انت ناوى تتخلص منى .. تفسحنى يعنى.. زى مابيقولوا بتوع السيما
- انت مش بتقولى إنه خدعك وخانك مع واحدة تانية.. إخدعيه زى ماخدعك .. وخونيه زى ماخانك
- مستحيل
- مستحيل ليه .. انت لسه بتحبيه ؟
- لا .. خايقة
- ماتخافيش .. مش ح يبلغ عنك .. لأنه بيعحبك
- شوف لك حد غيره
- إن كنتى عاوزاها الأخيرة .. يبقى مافيش غيره.. ح يكون معاكى سهل .. مادام بيعحبك
- تركها وخرج وعاد مع الغروب.. فوجدها جالسة.. وأمامها على المنضدة زجاجة ويسكى وكوب وبعض (المزة).. نظر إليها نظرة متفرسة فأدرك أن القلعة على وشك التسليم والاستسلام.. جركرسيا وجلس بجوارها .. ورفع الكوب الذى أمامها وشربه.. فصبت لنفسها كأسا آخر فشربه أيضا.. فافلتت منها ابتسامة فابتسم واقترب منها بكروسيه والتصق بها.. وطوق ظهرها وأخذ يشرح لها الخطة.. ووضع فى فمها قطعة كافيار فأخذت تمضغها وتمضغ كلامه.. وتهز رأسها بالموافقة .. ومن يأسها وعجزها لسان حالها يقول (الإثنين ارتكبوا ذنوب فى حقى.. أخليهم يضربوا فى بعض .. وياريت المحامى الكلب كان تالتهم .. المهم أنفذ أنا بجلدى)

تشبث فهمي بالفضب.. وتشبث الفضب به.. ورفع عنقه عاليا بالرفض. وتعالى على أى هاجس يأتيه بالتسامح.. ونعم فى الأيام الأولى بقدرته على الرفض ولكن مرت أيام وتلاشى غضبه.. ووهنت عزيمته.. وظل يعاني الليل والنهار.. عاجزا عن مزاوله حياته الطبيعية.. كمريض طال به المرض يتأرجح بين اليأس والأمل

ومرت الأيام.. وهو ينتظر.. هل ينتظر مبادرة منها ليرفض مرة أخرى كحقة تقوى مناعته.. أم ليهرع إليها جاثياً تحت قدميها.. لا يعرف

ومرت الأسابيع.. وجاءه تليفونها بجفاء وبالأمر (احضر حالا إلى طنطا.. واحضر معك المأذون.. ولا تنس بطاقتك لتوقع على عقد زواجى كشاهد) وفاجأه الخبر وعاش فى دهشته وغرابته.. (أنا.. أنا شاهد على عقد زواجها.. ولماذا المأذون من القاهرة.. هل خلت طنطا من مأذون.. أم ليكون من طرفى فأدفع له الأتعاب والرسوم.. هى هى.. لم تتغير.. هى تتزوج وأنا أدفع.. مصرة على أن تؤذبنى حتى فى فرحتها.. تكسر أنفى.. عجزت عن أن ترغمنى على التوقيع على العقد فى خانة الزوج.. فأصرت أن أوقع عليه ولو فى خانة الشاهد.. مصرة على نفس الأسلوب.. نفس النهج.. فلسفة العمة) ورغم حزنه وقهره.. أخذ المأذون وسافر.. وكان الفرح فى حديقة منزل المحامى.. كانت جالسة بجواره فى الكوشة بالشوب الأبيض والطرحة فبدت بالفعل برنسية.. وأمام الجميع وعلى الأغايد سألها المأذون.. (من وكيلك يا عروسة؟) وبكل كبرياء وثقة وهى على كرسيها الكبير فوق المنصة.. أشارت إليه فى مقاعد المدعوين بتحد وقوة كما تأمر الملكة أحد رعاياها.. وخضع لأمر مولاته ووضع يده فى يد العريس وغطى المأذون كفيهما بالمنديل.. وسقطت العمة على عينييه وأذنه فأخفت عنه الأصوات والناس

صحا من نومهم مفزوعاً من هذا الكابوس الرهيب على دموج حقيقية فى عينييه

وفى ليلة أخرى.. حلم أنه حصان يجرى ويلهث.. وهى مربوطة على ظهره.. ويلاحقهما رجل شرس بكرهاج.. يضربها تارة ويضربه تارة أخرى.. حتى سال الدم منه ومنها.. وسقطت من على ظهر الحصان.. ولكنها كانت مربوطة فتدلت تحت بطنه.. وظل الحصان يجرى هرباً من ضرب الكرياج وهى مدلاة تحت بطنه تنن وتصرخ.. والرجل يعاود ضربهما ويضحك

وظل يحلم بها.. تطارده فى اليقظة والنم.. إلى أن رن جرس التليفون - آلو.. -

- إزيك يا فهمى -

- مين يا افندم
- ياه .. نسيت صوتي.. واحدة كنت تعرفها زمان.. من شهرين
- أهلاً ياوسام.. آسف كنت نايم و صحيت على جرس التليفون
- محتاجة أشوفك ضرورى
... ..
- انت لسه غضبان؟
- لا.. أنا كمان محتاج أشوفك.. لكن صديقتى مصلحتنا الفراق.. خلينا كبار وعاقلين ونعرف
مصلحتنا كويس
- أنا ما اقصدش رجوعنا.. أنا محتاجة لك فى مشكلة.. وبعدها كل واحد يروح لحاله.. ماتبخلش على
بشهامتك.. لولا ثقتى فيك ماكنت اتصلت.. احنا افترقنا لكن بيننا كل خير.. ورينا يعلم ما فى
القلوب
والتقيا فى ركنهما المعهود.. ولكن كما يلتقى الغرباء.. لم تخلع نظارتها الشمسية وساعة يدها
وتضعهما فى الحقيبة.. وتخرج منها المنديل والولاعة وعلبة السجائر.. كما كانت تفعل.. بل بقيت
كماهى محتضنة الحقيبة عاقلة كفيها فوقها.. وبلا مقدمات ولا تحايا.. تطلع إليها مستفسراً.. فقالت
- محتاجة منك ضرورى خمستاشر ألف جنيه
- ليه ؟
- ما اقدرش أقول لك
- يا وسام .. أنا عارف حياتك كلها.. واعرف إنها خالية من المشاريع.. ما اقدرش أصدق إنك فجأة
مقبلة على مشروع.. وأعرف إن خطواتك محسوبة.. ما اقدرش أصدق إنك متورطة فى المبلغ.. وما
اقدرش أقول إن حياتك وخطواتك اتغيرت فى شهرين.
- صدقتى .. انا متورطة فى المبلغ .. بس ما اقدرش اقول لك
- آه .. مادام ما تقدرش تقولى .. تبقى جوازة جديدة.. كده فسرتهى حلمى .. انا حلمت إنك اتجوزتى
وانا اللي دفعت للمأذون
- أبدا.. فكرك راح بعيد
- هى فزورة .. خليكى صريحة.. واعترفى إنها حيلة منك للرجوع
- برضه فكرك راح بعيد
- تبقى بتطلبى مؤخر صداك
- أنا اتجوزتك من غير ما اطلب مهر.. يبقى إزاي ح اطلب مؤخر.. ا
- احنا ما اتجوزناش
- أنا قبل ما أدى لك نفسى قررت اتجوزك
- الزواج عقد بين طرفين.. إن كانت النية انعقدت من طرفك فما انعقدت من طرفى
- أنا اتجوزتك فى الحلال لأنى نويت.. وأنت كنت بتحبينى .. والحب فى حد ذاته نية
- لا .. كانت لحظة تورط بين اثنين سكرانيين من غير نية

- سلفنى المبلغ من ورا قلبك .. وح ارده لك لما اخواتى يرجعوا من بره فى أجازة الصيف
- آسف.. لا مؤاخذه أنا قلبى وجيبى .. بيفتحوا بمفتاح واحد
وانتهت المقابلة وعيونها دامعة.. بدون سلام باليد أو حتى باللسان

بعد مغادرتها شغله عن مراجعة حوارهما شئ آخر.. فقد لاحظ أنها عندما حضرت.. حضر بعدها
بدقيقة شاب وجلس على أقرب منضدة فى مواجهتها.. وأثناء حوارهما لاحظ أنها كررت النظر لهذا
الشاب مرات.. ولاحظ أيضا أن طرف ثوبها كان شالحا من جهة الشاب ومتدليا من ناحيته هو..
وساقبها عاريتين أمام الشاب ومستورتين عنه.. على غير عادتها عندما كانت تخفى ساقبها بين
ساقيه .. وبعد مغادرتها بدقيقة غادر الشاب المكان .. ولم يصل إلى فهم شئ .. فمط شفتيه وهش
عن نفسه الظنون

وفى اليوم التالى رن جرس التليفون
- إن كنت مصمم تعرف السبب .. مستعدة أقوله لك
- قولى

- حتى لو ما كنتش مصدق إنى عقدت النية على الجواز منك قبل الليلة الأخيرة.. فلازم تصدق إنى
عقدت النية بعد الذى حصل.. وكنت عارفة إن الذى مانع جوازنا الشقة التمليك اللى طلبتها منك..
وأنا لقيت شقة لقطه.. إشتراها رجل بعشرين ألف جنيه.. وقفلها وسافر السعودية.. ورجع بعد
خمستاشر سنه يزور أهله وقرر يبيعها.. ولأنه رجل متدين وحج بيت الله سبع مرات ويعرف رنا وكون
ثروة وشيع .. مش طالب غير الذى دفعه فيها.. مع إنها تساوى النهارده حوالى سبعين ألف جنيه..
ولقيت إن الشقة دى هى الحل الفورى لمشكلتنا.. ومن لهفتى وخوفى لتضيع منى مضيت معاها عقد
ابتدائى.. ودفعت له الخمسة آلاف اللى كانت معاى فى البنك.. وحررت على نفسى شيك بخمستاشر
ألف.. يستحق الدفع بعد أسبوع.. وكتبت لاختواتى.. ولغاية دالوقت ماحدش رد.. والأسبوع انتهى
والرجل مسافر بكره وحاجز تذكرة الطائرة.. إذا دفعت له المبلغ ح يسجل لى العقد .. وإذا
مادفعتش مصمم مايردش لى المقدم .. وبينى وبينك الشقة لقطه وح تحل مشكلتنا
- ده إذا كان بيننا مشكلة

- أنا أخذتها علشاننا
- لو كان علشاننا كنت شاورتينى.. ماهو ده كمان عقد يلزمه طرفين .. انت اتصرفتى وحدك علشان
الشقة تكون لك وحدك.. وبعدين تختارى العريس.. أنا أو غيرى.. وأنا مش ناوى اتجوزك.. تبقى
دى مشكلتك وحدك

- اعتبرها مشكلتى وحدى .. أنا متورطة ومحتاجه شهامتك
- انت عارفة إن المبلغ ده مش عندى.. ولو كان عندى كنت حليت به مشكلتى معاك من زمان.. كل
اللى أملكه وفاء للعيش والملح.. إنى أقف جنبك معنوباً لغاية ماتحلى المشكلة وكل واحد يروح
لحال

- إزاي ؟
- قابلينى به أتاهاهم معاه.. إما يسافر ويصبر عليك ..أو يرجع لك الخمسة آلاف جنيه
- الشقة لقطة.. خسارة
- مانت بتخسرى دايماً.. علشان بتطلبى اللى ماتقديش عليه
- إنت شمتان .. مش وقته
- أنا مش شمتان .. أنا حزين علشانك
- أشاوره وأرد عليك

اتصلت فى اليوم التالى.. وحددت الموعد والمكان.. والتقيا .. وتوجها إليه.. وفى الطريق قالت له
جملة واحدة (أنا عرفتة إنك خالى)

كان خيشة ينتظرهما فى الشرفة.. وصعدا فاستقبلهما على الباب بترحاب مبالغ فيه.. وكان ملتجئاً
ويلف رأسه وكتفيه بشال حرير أبيض ويرتدى جلباباً حريراً أبيضاً يكاد يكون شفافاً.. وفى قدميه
نعال من السيور الجلد
بدأ فعرفه بنفسه (خيشة مخلوف القرش.. من عائلة القرش العريقة فى بورسعيد وأسمونى خيشة لأن
أمى رحمة الله عليها لم يكن يعيش لها صبيان.. مهندس كمبيوتر.. درست فى أمريكا.. وأدير شبكة
الكمبيوتر فى شركة بتروك بالعودية.. رجعت لمصر فى زيارة سريعة بعد غياب خمسة عشر عاماً)

ثم قدم فهمى نفسه.. ثم أشار إليها وقال له (نحن ناس طبيين.. وبننت أختى سيدة محترمة مكافعة..
موظفة وتعطى دروس للأطفال.. وجمعت الخمسة آلاف من عرقها وكدها وكفاحها.. وأن الله أراد أن
يكافئها فأهداها هذه الشقة الرائعة بثمان زهيد على يد رجل فاضل مثلك.. لقد سخر الله لخدمتها
فلا تتردد.. وكل المطلوب منك هو شئ من الشقة والصبر والتيسير.. إلى أن يرسل لها إختوتها باقى
المبلغ)

استمع خيشة إليه بانتباه وابتسام .. ثم التفت إليها وقال بنبرة عتاب
- شايقة خالك.. آهى دى الرجالة والا بلاش.. سامعة الكلام اللى زى العسل.. لو كنتى جيتى لى
خالك من الأول.. كانت المشكلة انحلت من أول لحظة
ثم التفت إلى فهمى وقال
- بنت اختك يا أستاذ تعبتنى جدا.. خلفت الاتفاق.. وبدل ما تستسمحنى وترجئنى أهانتنى وشتمتنى
ولولا إنها واحدة ست كنت اتصرفت معاها تصرف تانى.. أنا اتعلمت فى أمريكا.. عاشرت الخواجات
واتعودت على الكلمة الواحدة.. وعشت خمستاشر سنة فى السعودية جنب الرسول.. وده اللى خلانى
أبيع شقة تساوى النهاردة ثمانين ألف بعشرين ألف.. اللى دفعتهم فيها وما أقبلش أى زيادة.. لكن
للأسف رجعت لقيت المصريين اتعودوا على الكذب والخداع والغش وفساد الذمة.. أنا بافكر أسافر
مالرجعش تانى

وفوجئ فهمى بها تقف متخشبة.. وتصرخ فى خيشة
- عنك مارجعت.. انت اللى كذاب وغشاش
فنظر خيشة إليها لاثما.. وقال وهو حزين
- الله يسامحك.. أخذت منك خمسة آلاف ومعاكى وصل.. وعقد الشقة فى جيبك.. غشيتك فى إيه ؟
- ماغشيتش .. لكن بتشتهم المصريين وأنا منهم
نظر خيشة إلى فهمى متعجباً وقال
- أستغفر الله .. سامع يا أستاذ بنت أختك .. يرضيك كده
هدأ فهمى خاطره وقال لها بعنف .. بعشم الخال
- عيب كده يا وسام.. الرجل اتصرف معاكى بكل نبل وشهامة ويستحق منك الشكر.. وعلى الأقل
احترمى خالك
فسكتت .. ثم اعتذرت لخيشة بأنها عصبية لأن ظروف حياتها صعبة.. فقبل اعتذارها ودعا لها
بالهداية .. وعادوا للحوار

وقام خيشة إلى منضدة جانبية وعاد بالحقيبة السمسوننايت.. فتحتها وأخرج الباسبور وتذكرة الطائرة
وأطلع فهمى عليهما.. ثم أعادهما فوق عدة (بكاوى) من أوراق البنكنوت.. حوالى عشرة آلاف جنيه..
فأشار فهمى إلى النقود وهو يبتسم فى رجاء
- مادام ربنا كرمك كده.. إكرم الست دى وخليها عليك شوية
قبل خيشة كفه وجها وظهر.. وقال
- الحمد لله.. والشكر لله على نعمته.. اللهم اكفنا شر المال.. واهدنا إلى ما فيه صلاحنا يارب
العالمين.. أنا تحت أمرك .. علشان خاطرک اللى تفرضه على ح اقبله.. انت رجل ذوق
- أنا طمعان فى كرمك
- وأنا طمعان فى كرم الله.. وتحت أمرك .. أنت رجل شهيم.. وعلشان كده أنا كمان ح أكون معاك
شهم.. أنت عندك سجل تجارى وبطاقة ضريبية طبعاً ؟
- طبعاً

- خلاص محلولة.. أنا أقطع الشيك اللى عليها وأخذ عليك شيك بنفس المبلغ.. وبكرة الصبح أروح
أسجل لها قبل سفرى.. وعلى أقل من مهلك.. والشيك ح اسبيه عند أخويا .. كل ماتسدد مبلغ
يسجله قدامك على ظهر الشيك.. وبعد السداد يرده لك.. وعلشان ذوقك ح ادى لك مهلة سنتين ..
وانت وبت اختك أحرار.. انتم أهل .. إن هى سدوت تبقى الشقة لها.. وإن عجزت رد لها الخمسة
آلاف جنيه وحلال عليك الشقة.. مطلوب منى حاجة أكثر من كده !

وكانت مفاجأة.. وارتبك فهمى.. وتلثم.. ونظر إليها مستنجداً.. لم يكن فى حسابه التوقيع على
شيك (وما ينوب المخلص إلا تقطيع هدومه)
- بس أنا ماعتدش رصيد

- ما يهمش.. ما انا ح اصبر عليك سنتين.. وهى ح تسدد لك

- بس .. بس

وقف خيشة غاضبا .. وقال

- بس إيه يا استاذ.. إذا كنت انت متردد ومش ضامن بنت اختك.. عاوزنى أنا أضمنها

عاد فهمى يتلعثم.. ويفرك كفه.. ويستنجد بها.. للبحث عن حجة يعنى بها نفسه من التوقيع..

فهزت رأسها بالموافقة وعيونها ترجوه.. فوافق

ولم يمهل خيشة.. ففتح الحقيبة ورد لها شيكها.. ثم أخرج دفتر الشيكات وتاوله القلم فحرر له شيكاً
بخمسة عشر ألف جنيه.. طوى خيشة الشيك ووضعه فى جيب الصدر فشف عنه.. ثم ابتسم وقال
باستظراف

- مبسوطه ياستى.. خالك حلها فى غمضة عين.. ما يجيبها إلا رجالها.. صافى يا لبن

واتجه إلى ثلاجة فى آخر الصالة التى يجلسون فيها.. على بعد ثلاثة أمتار فقط منهم.. فتحتها

وأخرج ثلاث زجاجات مياه غازية وعاد إليهما

رفع فهمى الزجاجاة إلى فمه.. ورفع خيشة الشيك من جيب صدره وتفحصه ثم مزقه ببساطة.. وطوح
بقصاصاته من الشباك المفتوح.. فنظر فهمى إليه مستفسراً.. فقال

- حرر لى غيره بدون تاريخ

واحترق فهمى ورفض.. ففتح خيشة الحقيبة وأخرج منها مفتاحاً صغيراً قدمه إليها.. وقال وهو آسف
حزين

- رحمتك يارب .. واستغفرك وأتوب اليك .. وأعوذ بك من الشيطان الرجيم .. اللهم اهدنا إلى
ما فيه عافوك ورضاك.. خدى ياستى مفتاح الشقة ومش عاوز شيك.. عيشى فيها ولما أرجع بعد كام
سنة تكونى جهزتى فلوسك

وجزع فهمى.. وأخرج كرمه.. ونظرت هى إلى فهمى مستعطفة.. فأخذ منه الدفتر والقلم وحرر له شيكاً
بدون تاريخ.. وهو تائه.. غارق فى لحظة لا يدري أبعادها ولا منتهاها

وعاد خيشة بيتسم.. وقال

- أنا صالحتها بالكازوزة.. أصلحك انت المرة دى

وتوجه إلى الثلاجة مرة أخرى.. فتحتها ثوان وعاد يطبق به عنب ودعاهما.. رفع فهمى حبة عنب إلى

فمه .. ورفع خيشة الشيك من صدر الجلباب ومزقه هذه المرة دون أن يتفحصه.. وقذف بالقصاصات
من الشباك واتجه إلى المتزدة وفتح الحقيبة وعاد يحمل خمسة (بواكى).. قذف بها فى حجرها..

وقال بهدوء وورع

- يا الله.. يا مالك الملك.. اللهم اهدى قلوبنا وبصر عقولنا وارشدنا إلى ما فيه رضاك يارب العالمين..

وصلى وسلم على أشرف المرسلين.. محمد ابن عبد الله خاتم النبيين .. ياست وسام.. مفتاح الشقة

معاكى.. وعقد البيع معاكى.. وفلوسك معاكى.. ويكره الصبح ح اسجل لك وأسافر .. لأن كلام خالك خوفنى من غضب الله.. وقال إنك بتكافى وتجاهدى علشان تعيشى بالحلال.. وأكد انت محتاجة المبلغ علشان تجهزى به الشقة .. كده ابقى صالحتكم تمام.. مش عاوز أسافر وأرجع لسيدنا الرسول وفيه واحد من الستين مليون مصرى زعلان منى

هتف فهمى من كل أعماقه.. بحماس
- روح ياشيخ.. الله يكرم أصلك ويرجعك لنا بالسلامة
التفت خيشة إلى فهمى قبل أن يكمل دعاءه .. وقال
- حرر لى شيك بالعشرين ألف
فلم يتردد.. وحسن خطه ووقع بوضوح .. وهو يلهج بالشكر والدعاء لهذا الرجل الذى جاد به الزمن فى غير عصره.. وهب واقفا واندفع اليه وعانقه بحرارة.. وقال له
- ياخيشة بيه.. الرجالة مش أسماء .. الرجالة معادن .. وانت معدنك طيب.. انت رجل من ذهب

ونزلا.. وفهمى يكاد يطير من الفرحه والسعادة .. ونسى عذابه خلال شهرى الفراق.. لقد تحققت فى لحظة كل أحلامه المدفونة التى ظن أنها قد ماتت.. الشقة والعروسة.. وهز رأسه متأملا ثم ابتسم وقال لها

- رجل طيب.. بتاع ريتا.. صدق إنى خالك
فلم ترد.. ومشيا مسافة الشارع متجاورين صامتين.. وعلى الناصية قالت له بجفاء ودون أن تنظر إليه

- ح ارد لك الشيك لما اخواتى يبعثوا لى الفلوس.. سلام عليكم
تسمر فى مكانه مندهشا .. ورد
- وعليكم السلام

فى الطريق لطشه الهواء فأفاق على جملتها الأخيرة .. وهاجمته الهواجس والوساوس .. وعندما وصل إلى البيت قال لنفسه .. (امرأة وحيدة .. استنجدت بك فقمى بالواجب .. لا تبتغى إلا وجه الله .. فلا تندم على خير فعلته .. اليوم الجمعة .. اذهب إليها غداً وخذ منها شيك بنفس المبلغ من باب الاحتياط .. وكن رجلاً ودعها تختار شريك حياتها .. ولا تجعل معروفك طوقاً فى رقبتها)

يوم السبت توجه إلى المكتب لم يجدها .. وقال له الفراش أنها تركت العمل منذ شهرين

وقف فى ميدان التحرير لا يعرف كيف يتصرف .. لم يسبق له أن زارها فى بيتها .. فقد حذرته من جيرانها .. كما أنه لا يريد أن يسبب لها أى حرج .. فتوجه إلى منزل صديقتها صاحبة الندوة .. فقالت له - فرحها الليلة فى الباقرة يوم سعيد على نيل الجيزة .. ويكره ح تسافر أمريكا مع عريسها - يانهار أسود .. ما قاتلش - ولا قالت لنا إلا النهارده الصبح .. بلغت الخبر والدعوة لأصدقائها بالتليفون والمفروض تفرح لها .. رتروح تبارك لها .. وكل شئ قسمة ونصيب

وتاه فى حوار مع نفسه .. تانى مرة تفاجئنى بعريس وتضرب ضريتها .. ياترى رجعت للمحامى والا عريس تانى .. ضحكت على وقالت لى اشتريت الشقة علشانك .. ومادامت ح تسافر إزاي ح تسدد ثمنها

وأسرع إلى بيتها .. وطرق الباب .. وأطلت جارة وسألته وسألها .. فأفهمته أنها ذهبت للكوافير .. وستخرج منه إلى منزل العريس ثم إلى الحفل .. وأنها قد تركت لها رقم التليفون للضرورة .. فأخذه منها

ومن تليفون فى الشارع إتصل
- من فضلك عاوز أكلم مدام وسام
- مين حضرتك ؟
- زميل فى العمل .. عاوز أبارك لها
- طيب ماتفضل تبارك لها فى الفرح
- آسف ظروفى ماتسمحش .. مين حضرتك ؟
- أنا العريس
- مبروك يا سيدى .. العروسة عندك ؟
- أيوه .. دقيقه واحدة

- آلو
 - قبل ما تفتحى صفحة جديدة .. إقفلى الصفحة القديمة
 - مافيش بينى وبينك حاجة.. خليك رجل وعيب تتكلم فى اللي فات
 - بينى وبينك شيك .. حدى مكان وميعاد دالوقت.. وقابلينى بعد ساعة بالضبط.. وقعى لى على
 شيك بعشرين ألف فى الشارع .. وروحي لحالك
 - الفرح إتأجل لبكره.. ح اقبالك بكرة الصبح الساعة عشرة عند نفس الناصية اللى اتقابلنا عندها
 - موافق .. بس خللى بالك .. لو ماجيتيش.. ح آجى لك وح اطريق الفرح عليكى وعلى العريس..
 وح اخليها ليلة سوده وح اببتك فى المستشفى وأبات فى القسم
 - مفهوم .. خليك عاقل .. وح اريحك

دار فى القاهرة كالمجنون.. لا يستقر له مقام.. ينتقل من مقهى لآخر.. وجاء الليل وهو عاجز عن
 العودة إلى بيته.. وجرجرته قدماء إلى (يوم سعيد) من باب الفضول.. كازينو على شاطئ النيل
 وسفينة فى الماء.. رصت المناضد على سطح السفينة متلاصقة لتكون مائدة.. عرضها متران وطولها
 عدة أمتار.. التف حولها المدعوون.. وعلى رأس المائدة جلست عروس بثوب الفرح الأبيض والتاج..
 ويجوارها عريسها.. فى بذلة بيضاء وبيبيون أحمر
 واقترب.. ظنا منه أن هذا فرح آخر.. وفوجئ فتسمر فى مكانه.. العروسة هى والعريس خيشة وقد حلق
 ذقنه وصفر عن سنه عشر سنوات..

وانتبها لحضوره فنهض خيشة وأخذ بيدها فنهضت معه وتركها المنضدة واتجها إليه.. واحتويانه من
 يمين ويسار.. ومشى ثلاثتهم فى صمت وغادروا سطح السفينة إلى ركن بعيد فى نهاية الكازينو
 وجلسوا
 حلق فيهما ليستكمل دهشته .. وصبرا عليه حتى استوعب المفاجأة.. ثم قال خيشة
 - ح افهمك
 رد وريقه جاف.. ولسانه متخشب.. كمن رشق بسهم مسمم
 - بعدين ح افهم وحدى وعلى مهلى.. المهم دالوقت تخلصونى.. تردوا لى الشيك
 - الشيك فى البيت.. تعال بكره خده.. ودالوقت تمشى من غير شوشرة.. إذا تصرفت أى تصرف
 معرج.. ح اقدم الشيك للنيابة.. فاهم

وفكر لحظات ثم هز رأسه بالموافقة.. موافقة المغلوب على أمره .. ويمتتهى الكراهية والحرارة..
 والتهكم.. نظر إليها.. وقال
 - الفرح إتأجل لبكرة.. هه.. بتضحكى على لغاية ما تسافرى
 وكور فمه.. واندفع برأسه.. وبصق على وجهها.. فلم تهتز.. وتجمدت.. ثم نهضت فى صمت ورأسها
 مرفوع حتى لا يلحظ أحد.. فنهض خيشة ولحق بها

لا يخفى حاله حتى على عابر سبيل.. ولا يعرف ما يريد أو ينتوى.. ولا يستطيع تفسير رأى شئ مما حدث .. فقط ينتظر ويستعمل الوقت

ودخل خماره شعبية فى العتبة لم يدخلها من سنوات طويلة .. كان يلجأ إليها فى الأزمات وهو فى الدرجات الأولى من سلم كفاحه الطويل.. منور واسع لعمارة كبيرة مستقوف بألواح من الزجاج السميكة.. ضجيج وزحام.. مناوئد متقاربة.. دخان السجائر يشكل سحابة كثيفة فوق الرؤوس.. باعة ومتسولون وجارسون ذاهبة آية كزبانية جهنم.. اختار منضدة فى زاوية تسمح بمشاهدة كل المكان عليها مفرش من القطن الرخيص .. وحضر الجارسون وعرف المطلوب.. ذهب ثم عاد به.. صب كأسا فى جوفه.. ثم أخرى .. فثالثة.. وتذكر حلمه عندما حضر فريحها فى طنطا وهمس لنفسه متعجبا (الحلم تحقق)

وشعر بشئ يتحرك تحت قدميه فمال برأسه فوجد تحت المنضدة قطة تطلب.. فالتقى لها بعض قطع الجنبرى .. واستطعمت الطعام فعادت تتمسح فى قدمه وتطلب.. وكان فى حاجة إلى أنيس فزادها .. وأنست إليه فقفزت إلى المنضدة .. وتناولت قطع الجنبرى من يده .. ثم تمددت بين الزجاجاة والكأس .. واستكانت لمداعبات أصابعه .. وأغمضت عينيها فى استرخاء

أفرغ الكأس الرابعة فى جوفه.. وأحس بالحرارة تنتشر فى جسده.. والدماء الساخنة تملأ أطرافه.. وحدقتى عينييه تتسمان.. ولسانه يتخشب.. ورأسه تستطيل وترتفع.. ربت رأس القطة فرفعت جفنيها .. وتابهت لسانه المضطرب وهو يهذى بكلمات تخرج محملة بالرداذا ورائحة الخمر

- لا مؤاخلة ياهرنسس.. يابنت رفعت بك.. ياسليلة العمدة والباشا.. كنت ح اغلط واسامح.. والبس العمة وأفضل تانى.. الحمد لله.. كفاية سنة ضياع.. ده يومى الضايح بسنة من عمرك.. لا مؤاخلة ياهرنسس.. لسانى طول عليكى.. أصل أنا سكران.. الواد الخواجة غشنى.. حط لى بدل الويسكى (سبرتو) .. معلهش.. إن (سبرتو نلتو) .. هع

دخلت البار عجوز شمطاء تحمل أوراق يانصيب

- البريمو .. اللى فاضلة يا صاحب الحظ ياموعدو .. ألف جنيه .. ألف جنيه يابيه؟
- اسمعى يابت .. سيبك من الألف جنيه .. معاكى ورقة تكسب قلب؟ .. لا مؤاخلة
- لا مؤاخلة على إيه يابيه ؟
- علشان قلت لك يابت .. وانتى قرشانة .. وأولاد أولادك أكبر من جدى
- هى هى .. يدى لك طول العمر يابيه .. ويفتحها فى وشك .. وينور لك سكتك
- ياه .. كل ده علشان ورقة بربع جنيه ا

- مكسبى فيها شلن وحياتك
- يعنى بشلن يدينى طول العمر ويفتحها فى وشى وينور سكتى .. أوكازيون يابنت تحتمس
- هى: هى .. دمك خفيف يابيه
- ده مش دمي يابنت .. ده دم الشلن .. اللى زيك ممكن تحبني بجنيه .. وتموت فى دهاديبى بخمسة جنيه وتنتحر علشانى بعشرة جنيه .. ياما رخصتم يانسوان
- هى: هى .. بتقول إيه يابيه ؟
- لامؤاخدة .. يامرضعة (سنفرو)
- مين (سى نفرو) ده يابيه
- سنفرو .. زى ماتقولى .. سى على .. سى ابراهيم .. سى خيشة .. حاجة زى كده فى التاريخ
- هى: هى .. دمك خفيف يابيه
- ماسمناها .. جددى .. اسمعى .. انت تعرفى داروين ؟
- لأ .. مين سى داروين ده يابيه
- مش ممكن .. امال جاب الكلام ده منين
- هى: هى .. دمك خفيف يابيه
- ماقلنا جددى .. خدى الربع جنيه ومش عاوز الورقة وغورى من وشى .. داهية فى دمك

رفع الزجاجه وصب فى الكأس .. ورغم أن هذه الحركة فى عرف السكارى ألد من السكر نفسه فإنه لم يتمتع بها .. لأن ماسح أحذية ظل يفرق بالفرشاة على خشب الصندوق منها فلما فرغ من الكأس نظر إليه شذرا وصاح بغضب

- بتلمع زى المراية .. يبقى قصدك إيه .. توسخها والا تلمع الشراب !

وانصرف الرجل فرقع الكأس فى وجه القطة وقال

- فى صحتك يابرنسس
- أفرغه فى جوفه .. وانكمش وجهه .. وتقلصت عضلاته .. وقال
- الله يخرب بيتك ياخواجه .. حرقت قلبى .. إلهى يحرق قلبك .. لكن انت مايتشرش من المدعوق
- ده .. مش معقول تغش نفسك .. اسمع .. إلهى يحرق قلبك وتحب وسام .. أهى تمام زى المدعوق
- ده .. صنف مغشوش .. يلطش ويدوخ .. لكن مايسكرش .. مايسعدش

وقف أمامه عملاق صعيدى يحمل فى يسراه حقيبة ضخمة وعلى ظهره صرة كبيرة ينوء بحملها حمار .. مد يده بقلم حبر .. وقال

- قلم امريكانى .. باركر .. يكتب الحظ السعيد ويحسبها وهى طيارة .. جنيه واحد
- ماحسبناها طلعت غلط .. كل واحد بيكتب حظه ياغيبى
- ماهر يابيه .. علشان تكتب حظك .. يلزمك قلم

- طيب يا حذق .. لما يكون الحظ زفت .. حذر فلتر نكتبه يا به ؟
- ما اعرفش يا به
- غلب حمارك ؟
- غلب يا به
- بواحدة .. تحبها وما تحبكش يا به
- منكم نستفيد يا به
- طبعاً تستفيد .. تبيع لى قلم بلاستيك .. وتقول لى باركر
- وشنبى باركر .. يا به
- خلى شنبك بعيد عن الموضوع .. باختصار برىع جنيه
- ماشى .. ح ندقق مع حضرتك علشان خمسة وسبعين قرش
- يا ابن الناصحة .. ده انا قلت مش ح توافق .. ده انت غلبت خيشة
- وأعطاه الريع جنيه .. ورمى القلم للقطعة
- المقرمش
- السمين
- العصافير
- هع .. عصافيرك صغيرة جدا .. شايف العصافير اللى جنب ودانى
- لأ يا به
- ماهى طارت يا اهل
- صورة يا به
- منجه فونس
- اسكت يا مصوراتى .. اتكلم يا ابتاع المنجة .. هيه .. إيه دفاعك ؟
- معايا منجة فونس وأدى العينة
- اسكت يا ابتاع المنجة .. اتكلم يا مصوراتى .. هيه .. إيه دفاعك .. تعرف تصورنى زعلان ؟
- ربنا مايحب زعل يا به
- هع .. خللى الفرح يأكلك عيش .. الحزن يا اهل يعلمك ويريك
- وجلس تحت قدميه عجوز فى ثياب سودا .. فردت المنديل .. وفرشت الرمل .. ونثرت الودع .. وقالت
- صلى على النهى يادى الجدع
- أجدع من أبوكى .. بس أصل على مين فيهم .. دول كثير
- الحاضر والا المستقبل
- أنا فى غنى عن المستقبل السعيد إذا كان ح يخرج من بين إيديكى ورجليكى يا حرايه .. إيه
- رأبك ياام الهنا .. أنا عاوز اطلع دكتور .. هع

استرسلت تحكى له ماكان وما سوف يكون..وهو لاه عنها..يحاور رسام الكاريكاتير..ثم رمى لها جنيتها

ومر بائع سجائر وبائع سودانى وعشرة شحاذين .. وتشققت فرقة أكروبات .. ثم وقف أمامه رجل فى حجم الفيل..جلباب أبيض ولاسة بيضاء .. وأسنان ذهبية وكفان مصبوغان بالحناء .. وأصابع مزدهمة بخواتم ذهبية وفضية .. وقطعة من اللادن تحت ضروسه .. مال عليه وهمس

- احنا بتتوح الهوى
- عندك إيه ..؟
- كل طلباتك .. فيه حنة أرمنى وحنة شامى .. وحنة سودانى
- لأ بتاعة السودان دى .. عاوزة الشتاء
ونقل الرجل قطعة اللادن تحت فكه الآخر .. وهمس

- وعندنا من الإنتاج المحلى..حنة فلاحى..وحنة صعيدى .. وحنة بنت ذوات .. جدھا كان باشا
- باشا ايه ده... من بتتوح السیما والا باشا من طنطا.. بنت الباشا دى اسمها إيه ؟
- اسمها شاهیناز
- لأ..أنا عاوز واحدة بنت باشا .. بس لازم يكون اسمها وسام .. هع

وحضر مطرب كفيف يضم عوده تحت إبطه..فساعده وأجلسه وريت كتفه..فغنى (ح اسيبك للزمن .. لاعتاب ولا شجن) فضغط الغناء على الجرح.. فبكى

وصفق الجرسونات بانتهاء مواعيد العمل ..فحاسب الجارسون وجمع حاجياته الشخصية..الولاعة .. علبة السجائر..المنديل ..سلسلة المفاتيح ..وداعب القطة وقال لها وهو يترنح

- كل شئ فى الدنيا بالفلوس .. إلا المدعوق اللى اسمه الحب .. ماتعرفيش وصفة تخليها تحبنى

وخرج .. وتسكع فى الشوارع..ولم يعد باب مفتوح مستعد لاستقباله سوى باب بيته وباب المسجد.. فدخل وصلى الفجر وهو مخمور مقهور..صلى وبكى .. وشعر أنه قريب من الله.. وأن الله معه.. فهدأت نفسه بعض الشئ .. وحمد الله الذى لا يحمد على مكروه سواه

بعد ذلك أتجه إلى المقهى ليكون أول زبون..ومع نشاط الحركة فى الشارع توجه إلى هناك

فتح له خيشة هجوم .. لأنه لم يتوقع حضوره فى هذا الوقت المبكر.. وكان أول ما قال

- إيه.. فاكرنى ح اطفش.. أنا مستنيك

رد فهمى يجاريه فى الحديث .. حتى يدخل إليه من مدخل سهل

- خير ؟

رد بانفعال

- علشان المصيبة اللى وقعتنى فيها

- مصيبة إيه ؟

- انت وهى غشتونى يا أستاذ

- مش فاهم ؟

قال كلمة كلمة .. كأنه يملأ عليه نصا

- عرفتونى إنك خالها .. وإنها ست مكافحة وشريفة .. قلت أنا سب ناس طيبين .. بعد ما مشيت من

عندى رحت خطبتها .. ونزلنا اشترينا الشبكة والبدلة وفسطان الفرح .. واتفقنا مع يوم سعيد على

الحفلة .. ودعينا الناس بالتليفون .. ما انت عارف إنى مسافر .. وحاجز الطائرة ومستعجل .. قلت اكتب

واسافر وتحصلنى هى بعد كام يوم

- معقول كل ده تم امبارح بعد الظهر

- كان فيه كلام .. لكن أنا ما فكرتش بجد إلا بعد زيارتك .. وهى قالت لى إنها بلفتك وإنك موافق

وح تحضر الفرح

- ماشى .. ح أوافكك .. إيه اللى حصل بعد كده

رفع خيشة صوته فجأة .. وقال بغضب

- حصل إنكم غشتونى .. أنت طلعت عشيقها .. وهى مرة شرموطة .. واللى كشفكم زيارتك فى الفرح ..

بعد ما مشيت انت .. أنا اعتذرت للمعازيم وللمأذون .. وجبتها هنا وضغطت عليها .. فاعترفت إنك

عشيقها .. ولك سنة بتطاردها من مكان لمكان .. وهاجمتها فى المكتب وانت سكران واغتصبها

- هى قالت لك كده !

- قالت لى وسجلت أقوالها على شريط .. وقالت للبوليس وسجلت أقوالها فى محضر .. ما انت

ضيعت عليها الجواز وتفت فى وشها قدام المعازيم

وقام خيشة إلى جهاز التسجيل .. وأدار المفتاح فانطلق صوتها .. يحكى كل ما حدث بينهما فى

الليلة المشثومة .. ولم يمالك فهمى نفسه .. وترنح .. وتبعثر .. تنثر فى الفراغ

تركه خيشة يستمع للتسجيل ودخل حجرة وعاد .. وفى يده سكين طويل (سنجة) مما يستعملها

المجرمون .. أوقف المسجل وشهرها فى وجهه وقال بهدوء .. وكأنه يكلم صديقا

- أنت رجل وسخ..وهى مرة وسخة..وضحكتم على رجل شريف.. وقبل ما أسافر وأزور قبر الرسول لازم اطهر البلد من أمثالكم
 - هدى نفسك وفهمنى .. وأنا مستعد أراضيك
 - تتجوزها .. الحفرة اللى حفرتها لى لازم أوقعكم فيها
 - والمحضر ؟
 - أخليها تتنازل عنه
 - والشيك ؟
 - أردده لك.. هدية جوازك يا عريس
 - ما اقدرش اتجوزها..أنا زوجتى ست كبيرة ومريضة ..لو عرفت ح تموت .. يبقى حضرتك ح تصلح خطأ بخطأ
 - إتجوزها عرفى.. ومش ضرورى مراتك تعرف
 - حكاية جوازى دى سببها لنا بعد ما تسافر .. تكون النفوس هديت
 - لازم قدام عينى .. ما اقدرش أشوف وضع خطأ واسكت .. الساكت عن الحق شيطان أخرس
 - يا استاذ خيشة ما يصحش .. ده أنا فى سن والدك.. أو على الأقل فى سن أخوك الكبير.. تجوزنى غصب عنى ؟
 - ده شرط علشان أرد لك الشيك
 - وفكر قليلا .. ثم قال وهو فى قمة الإحباط
 - الأمر لله .. أنا تحت أمرك
 - وصفق خيشة كف يسراه بسطح السكين وهو ينظر إليه باهتسامة مستفزة صفراء تقطر حقداً.. ونادى بصوت عال
 - تعالى يا عروسة.. أقعدى جنب عريسك
 - وانفتح باب.. وخرجت مطأطئة الرأس.. بجلباب بيتى وشعر مهوش وقدمين عاريين.. وأشار لها بالسكين فجلست بجواره.. وأشار لها بالسكين مرة أخرى فالتصقت به..حرك سن السكين أمام أنفيهما بثقة وخيلاء.. وقال هازناً
 - مهروك يا عروسة عريس الغفلة.. مهروك يا عريس عروستك الشرموطه
 - رأى فهمى .. ضعفها وذلها واستسلامها وهو يعرف تكبرها وتجبرها فتملكه الرعب.. وأصبح عاجزاً تماماً عن التفكير وتقدير الموقف.. وكل همه ينصب على مشكلة الشيك
 - موافقة يا عروسة على الجواز العرفى
 - هزت رأسها بالموافقة وهى مغمضة العينين
 - ح تكتبوا عقد جواز عرفى وتوقعوا عليه انتم الاثنين.. من ثلاث صور.. صورته لك وصورة لها .. وصورة لى

- وترد لى الشيك...؟
- كده تبقى رديت حق الله .. لكن تأخذ الشيك لما ترد لى حقى
- مش فاهم ؟
- الفرح كلفنى عشرة آلاف جنيه
- اكتب لك شيك
- هاها.. لا يا حلق.. ماعدتش أكل من الكلام ده .. حقى يرجع لى نقداً
- إدينى فرصة
- ح تكتب العقد العرفى دالوقت.. ولما تجهز المبلغ تدفعه وتستلم الشيك وعروستك.. وعليهم بوسة
- أنا موافق على شروطك.. ماعدا شرط.. أرجوك تعفينى منه.. ح اجهز المبلغ ويتم كل شئ فى لحظة
واحدة.. ادفع المبلغ وأوقع العقد واستلم الشيك

وفكر خيشة قليلاً.. ثم تفحصه كأنه يحاول أن يستشف إن كان صادقاً أم لا.. ثم قال
- علشان أضمن انك مش ح تهرب من جريمتك فى حق الست دى.. اكتب لها شيك بالشبكة والمهر
والعفش.. والشقة ياسيدى هدية منى.. رغم إنى ح ارد لك الشيك ح اسببها لكم سنتين تتجوزوا فيها
وتستروا فضيحتكم.. ولما أرجع.. إن قدرتم تسددوا ثمنها اسجل لكم عقد البيع.. وإن عجزتم
اعتبروا السنتين ضيافة من غير ايجار.. هدية منى .. المهم أسافر.. وأنا مستريح الضمير ورب
العالمين راضى عنى
وقدم لفهمى دفتر الشيكات والقلم .. وأمره بتحرير شيك باسمها قيمته أربعون ألف جنيه .. فنظر
إليها فهمى.. فهزت رأسها راجية.. فحرر الشيك.. أخذ خيشة الشيك وابتسم فى وجهيهما وقال
- دالوقت مفروض ننسى المشاكل.. وناكل مع بعض عيش وملح يرجع على اللى يخون الاتفاق..
ونحتفل بجوازكم السعيد

دخل إلى الحجرة التى خرجت منها وعادا وقد ارتديا ملابس الخروج.. فاندش فهمى.. (لماذا هى هنا
وبملابس البيت.. وفى هذا الوقت المبكر.. واضح انها باتت هنا.. وإذا كان قد رفضها كزوجة.. كيف
خلعا وارتديا ملابسهما معاً فى حجرة واحدة ووقت واحد..) ولم يفهم .. ولم يصل إلى استنتاج ..

ونزل ثلاثتهم .. مشيا فى الشارع متجاورين كأنهما زوجان .. ومشى فهمى خلفهما كالخادم..
يتعجب للأيام.. (كيف يتورط فى الزواج من امرأة رفضته ورفضها.. يتزوجها غصبا عنه وعنها..
كيف يتزوجها وقد بات واضحاً أن بينها وبين هذا الرجل علاقة بأى شكل من الأشكال.. وهل هذا
الوضع يرضى به الله.. ويرضى به هذا الرجل المتعصب للدين الذى يتشدق فى كل كلامه .. يقال الله
وقال الرسول .. يمشى مع العروسة كأنها له.. والعريس خلفهما يجتر عاره وآلامه)

ودخلا إلى محل كهابجى فاخر.. ودخل فهمى خلفهما.. واحتلا منضدة على كرسيين متقابلين.. وجلس
هو على كرسي على طرف المائدة.. بجوار خيشة وليس بجوارها.. فهذا كفريب متطفل على علاقة بين
اثنين

وحضر الجارسون فسألها خيشة..فقال (اللى تطلبه) وسأل فهمى فرقع كفه يغطى به صدغه المتورم ولثته الملتصبة وضرسه الذى ينبج بألم شديد منذ الأمس.. واعتذر بأنه لا يستطيع تحريك فكّه.. وطلب لبن زيادى

وجاء الطعام..والتهما الكباب بشهية..وفهمى يدس المعلقة فى علبه اللبن ويدسها بين شفطيه ويزدردا بصعوبة..ويزدرد معها آلامه وقهره..وتابع طريقة تناولهما الطعام فلاحظ مدى الألفة بينهما .. فهمى تأكل بلا حرج .. ويذاها تلتقيان بيدي خيشة فى طبق السلطة كأى زوجين بينهما عشرة عمر..وانتهيا من الطعام..وانحنى أمامهم الجارسون فأشار له خيشة إلى فهمى.. فدفع الحساب.. وقبل أن ينهضوا..التفت خيشة إلى فهمى فجأة وأمسك كفه..وسأله

- الخاتم ده فضة؟

- لأ .. بلاتين

- والفص

- الماظ

- ما يخسرش .. هاته.. هدية افتكرك بها بعد ما أسافر.. وهات الساعة دى كمان.. آهى حاجة تخفف ديتك وذنوبك

خلعها وسلمها له .. وهو عاجز عن قراءة الموقف وحساباته .. وكل ما ترسب فى ذهنه..أن هذا الرجل متدين متعصب للحق والشرف.. يحاول بهذا الزواج أن يرد لها شرفها المسلوب فى الليلة المشنومة وشرفه المسلوب ليلة فرحه.. وأنه قطعاً من الجماعات الإسلامية المتشددة .. رغم أنه أزال لحيته

مر يومان .. وفهمى مشرد.. يطرق الأبواب لجمع المبلغ.. إلى أن فوجئ بخيشة واقفا أمامه فى مكتبه .. فتسمر فى مكانه

- إيه مش ح تقول لى اتفضل

تحرر فهمى من المفاجأة .. وحاول أن يرد الدعابة بمثلها

- لما تقول لى سلام عليكم

- سلام عليكم ياسيدى

- سلام ورحمة الله

- مالك اتخشبت كده لما شفتنى ..زى ماتكون شفت عفريت

- شفت النبى

- جاهز؟

- لسه شوية

- معاك كام؟

- ألفين .. ح يكونوا جاهزين النهاردة الساعة ستة

- والباقى؟

- ح ابيع شوية أجهزة كهربائية بأى ثمن.. وأكون جاهز بعد يومين
- إيه هي الأجهزة دى
- كمبيوتر .. وآلة تصوير مستندات .. وآلة كتابة .. وفاكس
- ماقدرش انتظر أكثر من كده.. أنا أجلت سفرى مرتين
- أرجوك
- أنا ح احل لك المشكلة
- أنا فى عرضك
- هات ورقة.. واكتب لى الأصناف دى وثمنها .. وإذا كانت تغطى المبلغ أخدها منك بدل الفلوس ..
- أحضر فهمى ورقة وكتب .. وامام كل جهاز سعره .. انقض عليها خيشة .. وقرأها .. ثم طواها
- ووضعها فى جيبه .. وقال
- النهاردة الساعة ستة تقابلنى فى جروبي عدلى.. آخذ منك الألفين.. وبكرة فى الشقة تيجى ومعاك
- الأجهزة .. آخذها.. وتوقع العقد العرفى.. وتستلم الشيك
- أنا تحت أمرك .. بس لى طلب صغير جدا .. لكن بالنسبة لى مهم جدا جدا
- إيه هو ؟
- إنت عارف إنها سبق رفضتنى واتخطبت لمحامى طنطا .. ولما رجعت رفضتها
- عارف
- انا يااستاذ خيشة رجل كبير.. ومركزى كبير.. يرضيك اتجوز واحدة سبق رفضتنى وسبق
- رفضتها.. تجوزنا غصب عنها وعنى .. وبعد مانت تسافر هى تعايرنى وتقول لى.. انت اتجوزتنى
- غصب عنى وغصب عنك .. اتجوزتنى بالأمر.. يرضيك يااستاذ خيشة تهين والدك أو أخوك الكبير
- الإهانة دى .. وانت رجل ابن بلد وجدع وجى من عند الرسول
- لأ مايرضينيش .. وإيه المطلوب منى .. ماهى الجوازة دى لازم تتم
- حاضر.. لازم تتم.. بس المثل الفلاحى بيقول .. (إن جاءك الغصب اعمله جوده)
- مش فاهم
- كل المطلوب منك .. تسمح لأخوك الكبير بخمس دقائق معاها على انفراد
- ليه .. علشان تعصياها
- ماقدرش.. مانت حاكمنى.. وروحى فى إيدك.. علشان أسألها سؤال واحد(انت موافقة تتجوزينى)
- وليه ماتسألهاش قدامى
- قدامك .. غصب عنها ح توافق
- وفى غيابى برضه غصب عنها ح توافق
- أنا متأكد من كده.. بس الفرق .. إن بعد سفرك ماقدرش تدعى إنها وافقت تحت ضغط منك ..
- لأنها وافقت وانت مش موجود وكانت بكامل حريتها
- ودى تفرق فى إيه ؟
- تفرق كثير يااستاذ خيشة.. تفرق كثير ياأخويا يا حبيبى .. تفرق كثير فى عشرتى معاها بعد
- سفرك .. إكرم أخوك الكبير الله يكرمك .. تسافر لبلد النبى الحبيب وتعود لنا بالسلامة .. يومها

وانت راجع ح استقبلك أنا وهى وتنزل ضيف علينا .. مانت صاحب الفضل اللى جمعنا وصحح الخطأ واصلح مافسد .. الله يكرم اصلك توافق على الطلب الإنسانى البسيط ده

إبتسم خيشة فى خيلاء .. وسعد بهذا الإلحاح والرجاء والإلتماس وبلغظ (استاذ) .. وهز رأسه فى لحظة غرور موافقا على تدبير ذلك اللقاء .. على أن يكون تحت بصره من بعيد .. ووعد أنه فى موعد جروبى فى السادسة سوف يحضرها معه .. ويرسلها له لتستلم المبلغ .. وسوف ينتظر على الباب خمسة دقائق .. ثم يلحق بهما .. ليبارك الزواج

قال فهمى لنفسه .. (كده اتحلت .. وبعد مايسافر أطلقها .. والمبلغ الضائع عقاب من الله .. وعلى حد قوله .. تخفيف ذنوب) .. وغادر غرفة مكتبه مهرولا ليحضر مشروبا لخيشة تأكيدا للاتفاق .. وعاد فوجده قد جلس على مكتبه .. فوضع أمامه المشروب ووقف أمامه مستسلما مبتسما .. فتح خيشة الدرج الأول وعثت بمحتوياته .. والتقط ظرفا .. وفتح فوجد به ألف جنيه فطواه ودسه فى جيبه .. وفتح درج آخر فوجد علبة مستطيلة من القטיפه .. وفتحها فوجد بها ساعة جديدة لم تستعمل فاغلقها ودسها فى جيب آخر .. وفتح درجا ثالثا وأخرج كاميرا ونظر إلى فهمى وأمره أن يحضر له كيسا كبيرا من البلاستيك .. فغاب عنه وعاد بالكيس قدس خيشة فيه الكاميرا .. ومد يده إلى ساعة الحائط المعلقة فوق المكتب ورفعها عن مسماها ودسها فى الكيس .. ثم شد سلك التليفون فانتزعه ودس الآلة فى الكيس .. ورفع يده بالتحية باصبع واحد فوق يافوخه وهتف (سلام) .. وخرج .. وفهمى مستسلما مبتسما رادا التحية بأفضل منها

انفراجة شيطانية ضئيلة بدرت لفهمى .. وبدأت كضوء ضئيل شحيح فى هذا الظلام .. خمس دقائق منحة من الله .. قد يكون فيها الشفاء .. إنه فى يقينه لم يستسلم تماما لكل ماوعده به .. ويشعر أنه أجاد التسول والتوسل لخيشة .. بحيث خدعه فى استسلامه .. فابطل مفعول شكه وحذره .. فوافق على هذا اللقاء .. وتوسم فهمى فى هذا اللقاء القصير جدا .. أن يكشف ولو بعض الغموض الكثيف الذى يعيشه منذ عرف خيشة

ذهب فى الموعد .. ومرت دقائق وعيناه فى اتجاه الباب .. جاءت ووقفت أمامه .. مضطربة وعيناه زائفتان .. ثم جلست وأطرافها ترتعد .. وقالت فوراً وبصوت هامس مضطرب - أرجوك يا فهمى تثق فى .. ما فى وقت أحكى لك .. صدقنى مؤقتا .. إن كل اللى عرفته من بعد ما كنا مع بعض فى المكتب ما حصلش .. والحقيقة غير كده .. وماتسألش .. فكر بسرعة فى طريقة تهربنى من هنا .. وخلصى بالك .. هو منتظر على الباب اللى فى شارع عدلى .. واللى قاعد هناك ده بقميص أخضر تبعه ويبراقبنا .. إذا فكرت أخرج من باب شارع ثروت ح يخرج ورأى ويمسكنى .. فكر أرجوك إزاي نهرب .. قال لى هاتى منه الفلوس .. ولو تأخرتى عن خمس دقائق ح احصلك .. أرجوك فكر بسرعة

وفكر بسرعة.. وبنفس الهمس ويهدوء شديد متوتر.. قال
- سببي شنطتك وقومي روي الحمام وارجعي .. علشان نشوف الرجل ده ح يتصرف إزاي.. واديني
فرصة أفكر
تركت حقيبتها ونهضت وغادرت الصالة واتجهت إلى الحمام فى آخر الحديقة.. وفى منتصف المسافة
تطلع الرجل إلى الحقيبة بقلق.. ثم قام وأطل عليها من الزجاج المطل على الحديقة.. وتابعها حتى
دخلت دورة المياه.. وانتظر حتى خرجت فى طريق العودة.. فعاد إلى منضدته
وعادت وجلست فقال لها

- افتحى شنطتك قدامه.. وخدى المنديل وعلبة المكياج وارجعي الحمام تانى.. المرة دى ح يفتكر
إنك نسيته حاجة وح يطمئن.. واطلعى من الحمام بعد دخولك بدقيقة واحدة قبل مايفكر يقلق عليكى
واهربى من باب شارع ثروت بسرعة.. وبمجرد خروجك أدخلى أول باب يقابلك على يمينك.. واركبى
الأسانسير أو اطلعى السلم.. وادخلى عيادة دكتور أو مكتب محامى.. أو أى شركة واسألنى عن أى
حاجة .. وبعدى انتظرينى فى أى مكان مستور داخل العمارة.. وعينك على الباب.. وماتخرجيش
لغاية ماأجى لك .
- والشنطة ؟

- سيببها من باب التمويه.. إذا شك فى تأخيرك ح يقوم وراكى للحمام.. آخذ أنا الشنطة واحصلك..
وإذا خرج وراكى .. أكيد ح يجرى فى الشارع علشان يحصلك.. وأجى لك العمارة ونتصرف.. المهم
نهرب منه قبل ماتفوت الخمس دقائق وخيشة يقلق ويرجع لنا من باب شارع عدلى

مرت امام الرجل .. فى يدها المنديل وعلبة المكياج متعمدة أن يراها.. فظل يراقبها حتى اختفت
فى دورة المياه فعاد إلى المنضدة وتطلع إلى حقيبتها يطمئن بها نفسه.. أخفى فهمى وجهه فى
المنديل حتى لا يرى الرجل عينيه.. ونصف نظرة تابعها وهو فى غاية التوتر.. حتى خرجت ..
وسارت بجوار حائط الحديقة .. إلى أن خرجت من باب شارع ثروت.. فاسترد انفاسه

ومضت دقائق .. ثم استراب الرجل فى غيابها فذهب مذعوراً إلى دورة المياه وخرج من دورة المياه
يجرى إلى الشارع.. فحمل فهمى الحقيبة وهرب دون أن يدفع الحساب .. وأمام باب العمارة أشار
لتاكسى فتوقف .. وأشار لها فأتت مسرعة.. وألقت بنفسها داخل التاكسى فى فزع.. كأنها تلقى
بجوال.. فألقى بنفسه إلى جوارها.. وصرخ فى السائق أن ينطلق بسرعة

سبحان مغير الأحوال من حال إلى حال .. إلى جلسة فى كازينو على النيل .. لكن ليس كاثنين عاشقين .. بل كاثنين هارين .. لا من شخص واحد .. ولكن من دولة بأكملها .. كاسيرى حرب أفلتا من المعتقل بأعجوبة ومعجزة

أخرجت عليه سجنائها وولاعتها ومنديلها كعادتها القديمة .. وحررت شعرها من عقاله .. واسترخت على الكرسي .. وشاى وسيجارة .. ثم قهوة وسيجارة من سيجارة .. ثم تماكنت نفسها وحكت - بعد الليلة اللى كافأتك فيها على صبرك .. ووافقت اتجوزك .. وشربنا واتمتعنا .. ونمت وصحيت لقيت رسالتك فى لحمى .. هزتنى المفاجأة .. وتلفت أعصابى .. واتجمعت كل هموم الدنيا على رأسى .. القديم والجديد .. وقلت أعمل معاك محاولة وأشرح لك .. قفلت قلبك وضميرك وقفلت التليفون فى وشى .. كرامتى وكبريائى متعونى استسلم للهزيمة وقررت أرد عليك فى الحال وفى أسرع وقت .. سافرت للمحامى وتنازلت عن شروطى .. وكان قدامه ورقة وقلم قعديسمعنى ويرسم عصفورة .. وبعد ماخلصت كلامى .. طير الورقة من الشباك وابتسم فى تشفى وقال لى (العصفورة طارت) .. وأخذت شتطنى ومشيت .. وركبت الأوتوبيس وأنا عميانة مش شايقة تحت رجلى .. وحكت له قصتها مع خيشة كاملة بالتفصيل .. ثم قالت

- طلب رقمك وناولتنى السماعة .. ورفع هو السماعة الثانية يتابع المكالمة .. وسمعت صوتك بعد شهرين عشتهم فى نار جهنم .. عيني دمعت .. فلكمنى فى صدرى .. وبعد المكالمة لكمنى تانى .. وضربنى بالشلوت .. لأنه كان قال لى أدلك فى التليفون وأقول لك (يا فوفو) لكن ما قدرتش لأن الموقف اللى بيتنا ماكانش يسمح .. بعدها انت عارف اللى حصل .. كلمتك .. واتقابلنا ومضيت الشيكات وحضرت الفرح وتفتيت على وشى .. انا مامسحتش تفتك .. أولا لأنى أستحقها .. وثانيا لأنى حسيت إنها رسالة حب موجهة منك لى .. حسيت منها إنى لسه فى حياتك وإنى فى محتنى دى ماليش فى الدنيا غيرك .. حافظت على تفتك وفرحت بها .. تمام زى ماتكون من أب لبنته اللى أخطأت وبعاقبها وهو بيحبها وهى بتحبه .. لأنك لما وقفت جنبى ومضيت الشيك تأكدت إن إنت إنت .. وح تفضل إنت .. الدنيا بتغير أخلاقها معاى .. وانت باقى على أخلاقك .. ورجعت من الفرح متغاطة منه .. ومسكت فى خنقه وقلت له (كفاية كده .. طلقنى ورد لى مصاغى وكفاية اللى أخذته منى) قال (مش قبل ماتكلمى الخطه) .. وشغل جهاز التسجيل وأجبرنى اسجل الكلام اللى انت سمعته .. تأكدت إنه مش ناوى يعتقنى .. ح يورطنى فى جرايم جديدة .. وبعد كده لما فرض علينا الجواز العرفى .. واشترط يكون من ثلاث صور ويحتفظ هو بصورة .. تأكدت إنه ناوى يورطنى فى جريمة الجواز من رجلين فى وقت واحد .. علشان كل ما يهددنى اطاعه .. وقتها من شدة الرعب والفرع اتولدت فى شجاعة .. الظاهر إن شدة الخوف ممكن تولد شجاعة .. ماخفتش من تهديده بخطف أولادى .. وقلت ياروح مابعدك روح .. وأولادى لهم رب .. وقررت الهرب (

وانكفأت فجأة .. تخفى وجهها فوق سطح المنضدة .. واجهشت بالبكاء .. فصر عليها لحظات حتى أفرغت شحنتها فى الدموع .. وريت كتفها وقال

- ياوسام..النصاب ده كان بالنسبة لك عقاب من الله..وصدقيني.. انا مش شمتان فيكى ولكن دى الحقيقة والدرس اللى لازم تتعلميه..كفاية دموع..طبعا أنت لسة تعبانة وماتقدريش ترجعى شقتك
- مستحيل .. ده بيتقى آخر يوم فى عمري .. أبقي رحت للموت برجلي
- مافيش غير أوتيل .. ترتاحى .. وبكره نفكر على مهلتنا .. واللى فيه الخير يقدمه ربنا
- ياريت يكون مكان يجمعنا طول الليل .. عاوزة اتكلم معاك للصبح
- أنت مرهقة ومحتاجه تنامى
- حتى لو نمت .. نفسى أنام ورأسى على رجلك .. وكل ماصحى أبوس رجلك وأنام تانى
- ياه .. ده احنا اتغيرنا قوى ا
- ياريت تنسى كل اللى فات وتصدقنى..أنا اتولدت من جديد على إيديك ساعة ماقابلتك النهارده
.. وانا دالوقت إنسانة جديدة .. بطباع جديدة .. مالهش ماضى.. وكل عمري ساعة

صديق قديم لفهمى..أديب فى الظل..يقرأ ويكتب..يدفع فى القراءة ولا يقبض من الكتابة ولكنه مستمر..وراض من الحياة بالهامش.. يقطن فوق سطح إحدى العمارات الكبيرة العتيقة فى حجرة كانت فيما مضى تسمى (حجرة الفسيل) مشاعاً لكل سكان العمارة..ومع أزمة المساكن عرضها المالك للإيجار فاستأجرها..وأنشأ حولها سياجاً..ولضيق ذات اليد بناه بالصفيح ومخلفات الخشب والكرتون والأقفاص الجريد..فاضفى على شكلها رومانسية عتيقة فهدت كهف الإنسان الأول..يزوره فيها كثير من الأصدقاء الكتاب والفنانين..منهم من بزغ نجمه وارتفع فتعطف عن زيارته..ومن لايزال يشده الحنين إلى هذا الكهف الذى كثيراً ما جاءه الوحى والإلهام فيه..يجع إليه كلما ألحت عليه ذكرى بداياته الأولى..وصادف فهمى عنده كثيراً من كبار الكتاب والفنانين..نزلوا من سياراتهم المرسيديس وصعدوا إلى السطح..يفرش لهم الحصى فيفرشون عليها الطعام والشراب والمسكر الذى أحضروه معهم..ويسهرن ويسمرون كأنهم فى الفيشاوى أو أحياء القاهرة القديمة..رغم أن العمارة فى وسط القاهرة..ذهبا إليه..وصعدا إلى السطح..وطرق باب العشة التى تهتز ويرتج بابها الركيك عند طرق الأصابع..سحبه إلى طرف السطح وحكى له ملخصاً سريعاً بأنهما لاجشان إليه..فاران من كل مباهج القاهرة .. ورجاه أن يرحل ويبحث له عن مأوى آخر لدى أى صديق..لمدة أسبوع حتى يتدبر أمرهما..فقبل الأمر بالرحب والسعة بحكم حجم العشم بينهما..وارتدى ثيابه بسرعة وأخذ بعض الكتب وودعهما ونزل

طافت حول كوخ العم سام كما يطلقون عليه فى الحكايات القديمة..ثم دخلت وكأنها تدخل سراى جدتها الباشا..وأول ما فعلته..استدارت وعانقت فهمى.. وظلت فى صدره لا تبرحه كأنها التصقت به وأصبح لحمها جزءاً من لحمه

الحجرة صغيرة سقفها واطى بها شباك واحد صغير بحرى يطل على السطح..بها كنية ودولاب ومنضدة عليها موقد غاز..وحلثان وبضعة أطباق وأكواب..طافت بها مبهورة كأنها تشاهد (أنتيكة)..فتحت دلفة الدولاب فوجدت ملابسها فاغلقتها فى استحياء... وفتحت دلفة الكنية فوجدتها مكتظة بالكتب فزاد انشراحها..وعادت تعانقه

- إيه رأيك؟

- دى الجنة مادام معاك.. يا روبنسون كروزو

فتح الدولاب وقلب فى ملابس صديقه.. وأخرج جلبابين.. ناولها أحدهما.. وخلع القميص وارتدى الجلباب وبدأ يسقط البنطلون.. واستدار ففوجئ بها عارية تماماً كما ولدتها أمها.. بلا رافع لصدرها أو ساتر لعورتها.. وتملكه الرعب.. وانطلقت منه صيحة فزع.. كل جسدها.. ظهرها وصدرها وبطنها وفخذها.. مسطرة بالطول والعرض بجروح متورمة حمراء.. جروح بعضها قديم أسود وبعضها متقبح وبه صديد.. نسى جسدها العارى.. الذى عاش بجواره عاماً يشتهي.. ووقف يتفحص جروحها.. فى دهشة وانزعاج.. فقالت بثقة ولامبالاة

- أنت جوزى.. طلقتنى ولكن أنا ما قبلتش طلاقك ولسه مراتك.. تنزل تجيب ميكروكروم وقطن.. وعشاء وفاكهة وسجاير وخمرة

ونظر إليها بقلق فقالت بنفس الهدوء والثقة

- ما تعارضنيش.. أى رفض منك ولو كان على شئ تافه.. ممكن يقتلنى

فهرز رأسه بالموافقة.. ونزل يكلم نفسه.. فكل ما قالته وحكته لم يصدقه إلا فى هذه اللحظة.. ونسى كل سيئاتها وغفر لها وقرر أن يكون عوضاً ونصيراً.. بل وخادماً لها فى هذه المحنة.. واتصل بزوجته عرفها أنه على سفر عاجل مفاجئ.. وعليها أن تستدعى بنتها لتبيت معها.. أو تذهب هى إليها

ع وضد جراحها.. وأكل.. وشرب.. وسكرا.. ووجد فى الدولاب راديو ترانزستور صغيراً وكوتشينة فلما واستمع.. كانت الأغنية (رجعت لك) .. قامت فجلست فى حجره.. وقبلته.. م لعبت الخمر برأها أكثر فتمددت بجواره وألقت برأسها فوق ساقه.. فمد يده يعبث بشعرها كما تفعل الأم مع أطفالها.. فقالت

- فهدى

- نعم

- نفس أوشو، أولادى

- بإذن اله

- ماتسيش شعر لغاية ما انام.. وإن نمت ما تصحينيش حتى لو فضلت نائمة أسبوع

شعره.. ويده فى شعرها.. يراجع ويتذكر أفعالها.. كبيراً لها.. وازدراءها للأحياء الشعبية.. ويتأمل أسرارها.. حتى جاء النوم فقفها وهو جالس ورأسها فى حجره.. كأم ساهرة باهتمام المريضة.. حتى تسرب إليه نور الصباح من النافذة المصنيرة فاستيقظ.. وجد نفسه مازال جالساً ورأسها فى حجره.. وقد كمشت ساقها داخل الجلباب.. ولقت ذراعها حول ظهره.. شعرت بحركته فاستيقظت.. نمت وقبلته.. نزل فاحضر فطائر وشايًا وسكراً.. جهز الشاي وعاد إلى جوارها.. فابتسمت وقالت كنت بافطر وأنا متعلقة فى النجفة

- مش وقته.. مش عاوزينتكلم فى أى حاجة كام يوم.. لما جراحك تخف.. أفضل علاج لك الوقت.. إنك تنسى

على ضوء النهار اكتشف أن في آخر السطح عشة مشابهة يسكنها البواب.. وبين العشتين دورة مياه لم ينتبه إليها من قبل.. فهو لم يزر صديقه إلا ليلاً.. ذهبت واغتسلت.. وعادت فخلعت الجلباب.. ودار حولها بالميكروكروم والقطن.. تلذذت بحركة يده وتلذذ بلمسها.. وسيطر عليهما شعور جنسي مشترك.. ثم ذهبت فغسلت قميصها المبقع بالدم.. وعندما عادت جهزت الكروتشينة فعاد إليها بالقهوة.. ودخا من سيجارة واحدة رغم وجود سجائر وفي الظهر تغديا وناما.. وترك لها الكنبه ونام على الأرض.. لأنها ضيقة لا تسمحهما معاً.. وجراحها لا تتحمل أن يلتصق بها.. وفي المساء نزل وعاد بالعشاء والسجائر والخمر.. وسهرا وسكرا.. وحاولت فتح الموضوع فمنعها عن الكلام.. ومالت رأسها على كتفه ثم صدره ثم استقرت في حجره.. إلى أن غفت

في اليوم الثالث.. صادفت زوجة البواب في دورة المياه.. وعادت مذعورة - قابلت في الحمام واحدة ست اظن انها مرات البواب.. بصت لي بقلق سألتنى عن صاحب الشقة.. ورفعت حاجبها وقالت (هو اتجوز والا إيه) ماردتش عليها ورجعت جرى - مش ح يسيبوننا في حالنا.. دول ناس بلدى وحكاية الشرف عندهم صعب.. ولازم نتغدى بهم قبل ما يتعشوا بنا - إزاي؟

- نهاجمهم في عقر دارهم قبل ما يهاجمونا.. الهجوم خير وسيلة للدفاع.. تزوربها وتتعرفى عليها وتقولى لها الحقيقة - يا نهار اسود.. إزاي؟ - انت من طنطا ومتجوزة في مصر.. وجوزك طلع نصاب.. وتعمرى لها جسمك.. ح تصدقالما تشوف جروحك - وانت؟

- أنا أخوك.. طلبتينى جت لك.. ومضطرين نقعد كام يوم في مصر علشان محضر الضرب واكشف الطبى ورفع قضية الطلاق

وذهبت متحمسة.. وانتظر النتيجة بقلق.. وعادت أكثر حماساً - أول ما حكيت لها ماكانتش مصدقة.. ولما شافت جسمى صدقت ورجعت بى.. وقال لي انت وأخوكى في عينينا.. وإن ماشالتكوش الأرض نشيلكم فوق رؤوسنا.. وحلفتني.. طبية قوى عمرها خدمة أو أى شئ من لوازم البيت.. وعرضت على تبعت لنا غداً فمكروها.. حوالى خمسين سنة.. عايشه مع جوزها بواب العمارة.. لها بنت متجوزة ولا في الجيش.. الحمد لله المشكلة اتحلّت

اليوم الرابع.. بدأت الحياة تأخذ مساراً طبيعياً.. العالج بعض جراحها أصبح جسمها مرناً قابلاً للحركة والانثناء.. واستعادت خطواتها مشيتها الطبيعية الطعام والشراب والكروتشينة والترانزستور والجرائد وكتب الصديق.. والخمر ليلاً.. والإصرار على أن تنام ورأسها على ساقيه وأصابعه في شعرها إلى أن تغفو.. فحدها على الكنبه وينزل إلى

الأرض.. وزاد من راحتها علاقة طيبة مع أسرة البواب.. أهدتهما زوجته الست بدفعة طبق (بصارة) ومرة أخرى طبق (كشري).. ودعتهما إلى الشاي في عشتها.. فتعرف على زوجها عم بدوى .. عجوز تخطى السبعين

بعد أسبوع سمحا للمشكلة أن تفرض نفسها عليهما .. فجلسا يتدبران الأمر.. وبعض الأمور كانت مبهمة في رأسه فأخذ يستوضحها.. فقالت

- لا ده مش شيك واحد

- اتنين .. شيكى وشيكك

- لا ثلاثة .. غير شيكى

- ما هوقطع الأولانى والثانى

- لا.. ده كان مجهز شيكات فاضية في الشلاجة.. يفتح ويستبدله.. واللى كان بيقلعه قدامك ويرميه من الشباك شيك فاضى غير اللى انت كتبتة

كان عقرباً لدغه أو سكيناً يقر بطنه أو سيخاً من الحديد المحمى في النار غرز في يافوخه.. كانت مفاجأة قفز لها عالياً.. ثم سقط كجوال ألقى به من سطح عمارة فسقط على الأرض وتبعثرت محتوياته.. تركته يستوعب المفاجأة أسفة خجلى.. تخشى أن تتكلم فيشور في وجهها

- منك لله.. كان في إمكانك توفرى علينا كل ده وتحلرني لما قابلتيني على ناصية الشارع

همست وهي مكسورة الخاطر وغارقة في خجلها

- بعد العذاب اللى شفته ما كنتش قادرة أرفض له أمر.. أمرنى أسجل اعتراف بعلاقتى بك وبغيرك

وفرض على أعترف أنهم ناموا معاى.. ويعلم الله ما مسنى غير طليقتى وهو وأنت.. وقبل ما أنزل

علشان أقابلك مضانى على شيك بمائة ألف جنيه.. وجردتى من كل الذهب.. وفهمنى إنه ح يكون

ورأى ويراقبني.. وأمرنى ما افتحش بقى أبداً بأى حال من الأحوال .. وأمشى جنبك بدون كلام..

وهددنى بعلاقة لو شاف شفايفى بتتحرك ولو مجرد حركة .. يادوب اقول لك (قول إنك خالى) وكان

بيراقبنا يوم ما تقابلنا أول مرة بعد الفراق .. وكان قاعد على الترابيزة اللى قدامى مباشرة .. ويوم

ما انتظرتك على ناصية الشارع كان مراقبنا بنظارة معظم من لحظة ما التقينا لغاية ما وصلنا له ..

وفي المنتين كان واحد من أحواله بيتألمنا

- بعد ما طلعتنا وقعدنا فتح الشلاجة مرتين.. اللى استبدل فيهم الشيكات .. كان ظهري لنا وكان في إمكانك تغمزى لى

- ما كنتش أقدر.. ده كان موصينى .. إن وقت المناقشة معاة أتحداه واشتمه.. علشان انت

ما تشكش في علاقتى به.. وعلشان تحاول تفض الاشتباك وتتدخل بيتنا بالصلح.. فيورطك في

الحل.. يأخذ منك شيك وكأنه بيجاملك.. ما انت خالى

- ضيعتيني

- هددنى.. يشوه وشى بمية نار لو فشلت الخطة وانت نزلت من غير ما توقع الشيكات.. ده غير

اللى ح يعمله في أولادى.. رجل تعليمه بسيط ولكن ذكاء خارق.. للأسف بيستغله في الشر.. لو

استغله في عمل شريف أكيد كان ح ينجح رغم جهله

- وحكاية التسجيل.. اللي شرحنى فيه حكايتنا واللييلة إياها.. وختمتنيه بأنيك قدمتي بلاغ ضدني للنيابة واتهمتني إنني اغتصبتك
- كله بالأمر.. وأمره كبرياج.. لسعة الكبرياج تخلى الأسد لبوة.. واللبوة قطة.. وأنا كنت ديبعة متعلقة بانضرب بالكبرياج ورافضة.. لكن لما وصل تفكيره لبتني.. ماقدترتش أحبك ولا أحب نفسي أكثر من بنتي.. ولولا إنني نفذت أوامره بالحرف ونجعت خطته.. ماكانش وثق في وكلفني آجي لك جردى.. ولولا إنه كان عاوز يورطني في جريمة العقد العرفي.. ماكنتش اتجرات وهرت معاك
- مش ثقة فيكي.. ده خاف يقابلني ويستلم مني المبلغ يكون الهوليس عامل له كمين.. لكن لو الكمين جه فيكي واعترفتي إن هو اللي محرضك.. ح يطعن باني مسلطك لأنني عشيقك.. وعنده التسجيل بصوتك

- وعنده تسجيل بصوتك.. لأننا بعد مارجعنا من الفرح.. كان متوقع تزورنا الصبح بدرى.. فسهر طول الليل.. وجهاز التسجيل في أودة النوم وسجل لي اعترافي باللييلة إياها.. وبعدين مد سلك تحت السجادة لغاية الصالة وثبت السماعة تحت الترابيزة.. ولما جيت وسمعت تسجيل من الجهاز الثاني اللي كان في الصالة.. وانت ارتبكت واعترفت.. ناداني.. ساعة ما قال لي تعالى يا عروسة اقعدى جنب عريسك.. وأمرنا نلحق في بعض علشان نكون قرب السماعة.. وكان موصيني.. لما يناديني قبل ما أخرج من الأودة.. اشغل التسجيل

- راسمها ولاعبها كويس.. وكان بيساومني على شيك واحد.. وبعد ما يقبض يساومني على الشيك الثاني.. والثالث والرابع.. يعني كان ناوي يعيش باقي عمره على حسابي الله يسامحك.. هولا عيني وغليني لأنه جريها مع غيري كثير.. وأنت لاعبتني لعبتك المفضلة.. حفرتي.. ودفنتي.. بس المرة دي فرقت معاكى شوية.. قبل ما تردمي جت رجلك وسقطتي معاي في الحفرة.. واتردمنا احنا الاثنين.. إحنا ده الوقت اثنين أحياء في قبر واحد.. وهو في الأمان.. ومعاها شيكات وتسجيلات.. زى ما حملت تمام.. أنا حصان وانت مربوطة على ظهري وهو بيطاردنا ويضرنا بالكبرياج

وضحك ضحكة عالية.. ضحكة لاتمخ للضحك بضحة.. خليط من السخريه والسخط والقهر والمرارة والدهشة.. وظل يضحك وكأنه يبكي.. فقامت من جواره.. ومشت كالمنومة.. وخرجت إلى السطح حافية القدمين.. فظن أنها غضبت من ضحكه فاشفق عليها وقام خلفها.. فوجدتها هناك في آخر السطح عند السور.. وقدصعدت بساق.. وهمت أن ترفع الساق الأخرى لتصبح كلها في الشارع.. فاندفع إليها صارخا.. وغرس كل أصابعه في شعرها.. وقبض على ساقها الباقية في السطح.. وسحبها حتى تملكها.. وحملها إلى الحجرة

خرجت الست بديعة من عشتها على صرخته وشاهدت ما حدث فأنت خلفهما.. ودخلت بلا استئذان وأخذتها في صدرها.. وأخذت تهددها وتمسح رأسها وتهمس في أذنها بآيات من القرآن.. حتى هدأت رجفتها واستكانت.. ثم نامت

ومرت أيام.. كانا في العشة يلعبان الورق.. والترانزيستور يرسل لهما تلفراف (غلبت أصالح في روحى علشان ما ترضى عليك.. وانسى سهادى ونوحى ولوعتى بين أيديك) وانتهى الدور بفوزها
- مش أنا اللي غلبتك.. انت اللي غلبتني.. بأخلاقك وشهامتك وحنانك.. بتحبني؟

- الله أعلم
- أكيد بعد اللى حصل رخصت عندك.. انا مش طمعانة فى حبك لأننى مااستحقوش.. أنا طمعانة
تسامحنى
- انت غالية قوى
- غالية.. تمنى تسعين ألف جنيه.. قيمة الشيكات.. ما أنا الشاهدة الوحيدة على براءتك
- يعنى مستعدة تشهدى ؟

- بكل عمرى
واستمر الحوار بينهما.. ثم تركا الورق وذهبت إلى عشة البواب .. وعادت ترتدى عباءة سوداء فوق
ثوبها.. وطرحه تحجبت بها.. ووضعت فوقها النظارة فلم يعرفها.. ونزلا.. وتوجها إلى مديرية
الأمن.. واستقبلهما مسئول كبير تعرف فهمى عليه منذ سنوات فى مجال الأدب.. استمع لهما .. ثم
ضرب المكتب بقبضته فى انفعال.. والتفت إلى فهمى وقال
-أغلب كلامها كذب..هى شريكته.. غواها واقتنعها ووعداها بالذهب..ولما تورطت خافت..
وجاءت لك واعتسرفت) ..واحنا مضطرين نقبض عليها
ارتعد فهمى..وانهمرت عيناه بالدموع دفعة واحدة..كالمطر عندما يسقط فجأة والجو صحو.. وقامت
هى بتشنك وعصبية.. وأعطتهما ظهرها.. وخلعت العباءة.. وفتحت سوستة القستان وجلبت طرفيه
إلى صدرها فتعري ظهرها.. ورأى المسئول آثار التعذيب فتخشب لثوان.. وثبت لسانه فى حلقه
وفتح فمه وعينه مندهشا.. ثم استدارت وشلحت الثوب عن نصف فخذيها بلا حياة .. ورأى التسليخات
فاهتزت وجناته .. ورجاها أن تغطى جسمها وتجلس.. ونظر إلى فهمى ورأى دموعه فطأطأ رأسه
وهمس معتذرا لهما .. وسأل كل منهما عن منطقة سكنه ورفع سماعة التليفون واتصل بقسمى
الشرطة..ثم طلب منهما أن يتوجه كل منهما إلى القسم التابع لسكنه فتحرر هى محضراً مستقلاً
تحكى فيه كل ما حدث.. ويحرر هو محضراً ضدها وضد زوجها.. ونصحهما ألا يذكران فى
المحضرين سابق العلاقة بينهما.. مجرد تعارف عن طريق ندوة.. فشكراه وانصرفا

انتظرها على باب القسم..ودخلت فاستقبلها المأمور حسب التوصية..واستدعى الضابط النوبتجى
فأوصاه..وتبعته إلى مكتبه فحكى وحرر لها المحضر..ولكنه نصحها ألا تذكر وقائع النصب تفصيلا
والا سيكون مضطراً بحكم الإجراءات القانونية إلى القبض عليها..فقط تتهمه بتحريرها على
النصب والاحتيال..دون ذكر واقعة معينة
خرجت ومعها جندى..وتوجه ثلاثتهم إلى المستشفى لتوقيع الكشف الطبى واثبات إصابات
التعذيب..وفى الطريق هزت رأسها ومطت شفتيها عجباً.. وقالت
- الدنيا مش عاوزه تسيبنى فى حالى..رينا وهبنى الجمال وعذبنى به..الضابط العيل اللى من
دور أولادى..طلب منى ثمن النصيحة.. طلب يقابلنى
وتوقع عليها الكشف الطبى..واستلمه الجندى وانصرف.. فتوجها إلى القسم التابع لسكنه..واستقبله
المأمور..وفعل كما فعل زميله..استدعى الضابط النوبتجى وأوصاه فصحبه إلى مكتبه وحرر له
المحضر..وعاد إليها فسألته

- عملت إيه ؟
- تمام زى ما حصل معاكى
- إيه .. الضابط نصحك .. وطلب منك ثمن النصيحة
- للأسف لأ .. أنا مندهش .. دولة واحدة وشرطة واحدة وقانون واحد ومع ذلك الاجراءات تختلف .. عزت على نفسى لما ما طلبش يقابلنى .. وقلت معلش .. مش مذاكر كويس زى الضابط بتاعك
- لأ الاتنين مذاكرين .. بس الفرق .. إن انا جميلة وانت وحش
- وضحكا .. وتأبطت ذراعه .. فقال لها
- وأنت باللبس ده .. ح يفتكرونا من الجماعات الاسلامية .. ماينفعناش هيلتون ولا سميراميس .. علينا بالحسين
- وتوجهها إلى هناك .. وتفديا .. ثم جلسا فى المقهى .. وبدأت سعيدة .. فتذكر جلستهما السابقة وتعاليتها وأزدهائها للمكان .. ثم تجولا واشترى لها ولهدية بخورا ولبانا .. وعادا مع المساء فوجدا عم بدوى وبدية قد فرشا الحصيرة فى السطح فى انتظارهما .. واستقبلتهما بدية على رأس السلم بفرحة وقالت أنها قلقت أن يكون الزوج قد صادفهما .. ودعتهما إلى الحصيرة وقالت .. (أنا ثلجت لكم بطيخ .. والحاج مجهز لك الشيشة) .. وتكلموا كثيرا .. وضحكوا كثيرا .. وبعد انتصاف الليل والبدر يضى كل السطح دخل كل إلى عشته .. وفى الطريق إلى العشة قالت
- روينسون كروزو وحرمة .. آدم وحواء فى أيامهما الأولى على الأرض .. نعمة دمها علينا يارب

توجهها إلى مديرية الأمن.. فاستقبلهما المسئول الكبير بحفاوة.. ورحب بها كثيراً.. وعرفهما أنه طلب من قسمي الشرطة سرعة القبض عليه وأحالته إلى النيابة .. ووعدهما بالتحري عن سوابقه والضغط عليه لاسترداد الشيكات وأرغامه على الطلاق والتعهد بعدم التعرض لهما شكرا وغادراه فرحين.. واتجهوا إلى السوق فاشترى بعض لوازم البيت.. وعادا كزوجين سعيدين.. ضد لها الجراح.. وتغديا وناما.. وفي المساء دعتهما الست بديعة إلى لقاء العصيرة

في مساء اليوم التالي تخفت في المعابة والطرحة وتوجهها إلى المحامي.. لم يخرجها من عنده مستبشرين كما خرجا من المديرية.. لأنه قال أن (القاعدة العامة أن (الشيك حجة نفسه) بصرف النظر عن أسبابه.. فالقاضي لا ينتبه للموضوع ولا تهمة الأسباب ولا يلقى إلا إذا طعن فيه بالتزوير وأثبت الطب الشرعي ذلك.. أو حرر تحت ضغط وإكراه.. أو كان وليد عملية نصب واحتيال.. وكل هذا إثباته صعب.. بالنسبة لشيكها ممكن.. باعتبارها زوجة تحت الضغط والإكراه.. أما بالنسبة له فالأمر يختلف.. كيف يمكن إثبات أن الشيك كان وليد عملية نصب واحتيال)

وقال له فهمي (أنها مستعدة أن تشهد أنها كانت شريكته في الجريمة.. ألا يكفي أن يعترف أحد الجانبيين على نفسه وعلى شريكه.. لاسيما أن هذا الشريك زوجها وأقرب إليها منه) فقال المحامي (أن خيصة سيكذب ذلك.. ويقدم التسجيلات التي تثبت العلاقة المشينة بينهما.. صحيح أن التسجيلات لا يؤخذ بها أمام القضاء كدليل.. ولكنها ستكون قرينة يستشف منها القاضي التواطؤ بينهما ضد خيصة.. لاسيما أن الشيكات صحيحة بخطهما وتوقيعهما

وطلب من كل منهما توكيلاً مسجلاً وعقد زواجهما.. وسوف يتولى استخراج صور المحضرين ووعدهما أن يبذل أقصى جهده.. وختم كلامه بقوله (وما دمت في الحقيقة أهرباء فسينير الله بصيرة المحكمة)

عادا ومعهما المعسل لعم بدوى ولب أبيض طلبته منه الست بديعة لأن ضغطها قد ارتفع.. ودعياهما إلى فرشتها في السطح.. وبعد العشاء وضعت وسام علبة السجائر بينها وبين بديعة.. ووضع عم بدوى الشيشة بينه وبين فهمي.. ولكن عم بدوى غفا ونام على طرف العصيرة.. وبقي ثلاثتهم يلعبون الورق.. والترانزستور يشجيهم بالأغاني.. حتى الفجر

بعد أيام توجهوا للمسئول الكبير في المديرية وحكى له تطورات الموقف.. فعرفهما أنه قبض على خيصة ورحل إلى النيابة.. وسئل في محضرها وواقعة التعذيب فأذكر وقال أنه رجل أعمال.. اشترت منه المدعية سيارة.. ثم ترددت عليه مرات في مسكنه بحجج وأهية.. وغافلته وهو في الحمام وفتحت

خزينته وسرقت عشرين ألف جنيه.. ونزلت فسرقت السيارة وهربت.. وأنكر أنها زوجته وتحداها أن تثبت ذلك
وأمام قوة ادعائه أفرجت عنه النيابة بضمنان سكنه.. فلما ذهبت الشرطة للقبض عليه مرة أخرى
بخصوص محضر فهمي.. كان قد احتاط للأمر وأغلق الشقة وهرب
ورأى المسئول أن الأمل قد خاب في عينيها.. فضرب المكتب بقبضته وقال لها مؤكداً.. (إطمئني ح
نقبض عليه وح يعترف.. وح نسترد منه كل الشيكات وح نجبره على الطلاق هنا في مكتبى.. وإذا
استمر هارباً سنستصدر أمراً من النيابة بمهاجمة الشقة باعتبارها وكراً للقمار .. ونبحث عن
الشيكات وعقد الزواج)

زارا المحامى واستمع لهما.. وقال أنه استخرج صوراً رسمية للمحضرين.. وكرر ما قاله المسئول
الكبير بأن خيشة اتهمها بالسرقة وتهرب من الرد على محضره.. وعاد يؤكد أن هذا المحتال ذكى
وخبرة.. لم يذكر شيئاً عن الشيك الموقع منها بمائه ألف جنيه.. وأنه فضل أن يتهمها بالسرقة
ليستنشط همة البوليس للقبض عليها.. فالسرقة لها إجراءات أخرى أهم.. وسألها عن مكان
المأذون فقالت

- ما اعرفش.. ركبنا تاكسى ورحنا

- التاكسى مشى منين

- ما اعرفش أحياء القاهرة.. لكن المسافة من مكتبى في وسط البلد للمأذون حوالى عشر دقائق..
واعتقد أنه كان شارع واحد طويل لا دخلنا يمين ولا شمال
- أوصنى لى المأذون والمكان

- شاب صغير.. فى دكان صغير وسخ به مكتب صغير ودكة خشب ورف عليه ورق تحته مقشة..
والدكان قدامه كوبرى علوى تحته زبالة كثير قوى
ضحك المحامى وقال

- يعنى لو سألتك النيابة أو المحكمة تقولى شاب صغير فى دكان صغير وسخ ودكة ومقشة.. أنا
باستغرب.. واحدة زيك جامعية ومثقفة.. إزاي تتورط للدرجة دى !
- ساعة القضاء يعنى البصر

- لا مؤاخذه.. الى أعماكى مش القدر.. الى أعماكى الوعود والفلوس والهدايا.. انتم كده يا ستات
ثم نصحهما أن ينتظرا ماسوف يسفر عما وعد به المسئول الكبير.. وعادا محبطتين.. واشتريا
لوازمهما.. وأشارت إلى المحل وقالت
- أنا قرفانة.. هات قرازة.. هاتها كبيرة شوية.. الليلة ح نسهر فى العشة
عادة فوجدا الست بديعة تنتظرهما عند سور السطح.. وتمسح الميدان بعينيها.. رأتهما فلوحت
بذراعيها مهللة كالأطفال.. واستقبلتهما على رأس السلم وقالت
- أتأخرتوا ليه.. المحشى ح يبرد

فاعتذرت لها بأنها متعبة ومحتاجة للنوم.. ودخلا إلى العشة.. فلذهبت بديعة وعادت حاملة نصيبهما في طبق.. أخذته منها وشكرتها وأغلقت.. وقالت وهي تخلع ثيابها - من أجل عين تكرم ألف.. ورزق الهبل على المجانين - قاصدك إيه؟

- بديعة مجنونة بك.. بتحبك.. كانت ح ترمى نفسها من السطح علينا لما شافتك.. ولما خرجت امبارح وقفت تنتظرك عند سور السطح من ساعة ما خرجت لغاية ما رجعت.. وكان كل كلامها عنك.. وسألتني عنك ألف سؤال.. وقالت لي (كان نفسي اتجوز واحد أفندى زى أخوكى.. لكن أبوى الله يسامحه جوزنى علك بدوى.. مع إنه أكبر منى بخمسة وعشرين سنة.. صعيدي باع أرضه وجه مصر يتاجر فى السجاد.. لكن البيع الشكك فلسه.. وفى النهاية.. اشتغل بواب)

وأراد فهمى أن يمازحها ليخفف الهم الذى عادا به - أخيراً لقيت واحدة تحبني على قدى.. أنا رجل غلبان وعلى وش سجن.. على الأقل ح تزورنى بالعيش والحلاوة.. والطيور على أشكالها تقع - هى واقعة فيك وأنا واقعة فيك.. مين الطير اللى تقصده؟ - هى واقعة فى حبي.. لكن انت واقعة فى عرضى.. تفرق - عيب ياروينسون كروزو.. ما تفسدش علينا السهرة.. كفاية علينا ما أفسده الدهر والمحامى بتاعك

طرق الباب.. كان الصديق صاحب العشة.. سلم.. واستأذن أن يأخذ بعض كتبه وملابسه.. جمعها فى حقيبة وخرج.. فخرج فهمى وراءه وقال له فى السطح (لقد أثقلنا عليك وطرديناك من بيتك.. ولكن بحكم الصداقة أرجو أن يتحملنا صبرك بعض الوقت.. ولو اضطرت إلى أن تقيم فى لوكائنة وأنا متكفل بالمصاريف) ومد يده فى جيبه ليخرج له مبلغاً.. فتأثر وعاتبه.. وأقسم أنه مرتاحا لدى الصديق الذى يقيم عنده.. وسعيد بتقديم هذه الخدمة لهما.. عاد وحكى لها فقالت (موقف محرج.. دخل واحنا لابسين هدومه.. بكرة تروح تجيب لى ملابس من الشقة) .. وأكلا وشربا واستمتعا.. وغفت ونامت فى حجره.. فرفعهما إلى الكنية ونزل إلى الأرض

فى الصباح قسما المهام.. هى ملثمة كما تعودت.. تذهب إلى مكتبها لإحضار مالها من أوراق.. وهو يذهب إلى شقتها لإحضار ملابسها ولوازمها.. ونزلامعا.. وافترقا فى الطريق

مشى فى طريق الغرام.. الطريق الذى كان يمشى فيه معها أغلب الليالى فى الظلام ليوصلها إلى منزلها بعد منتصف الليل أيام غرامهما الأول.. وعادت له الذكريات.. ليلة سعيدة مبهجة بعد جلسة شاعرية جميلة وقت سعيد.. نظرات وهمسات وضحكات ولمسات.. وآمال ووعد وأحلام وردية.. وليلة حزينة بعد جلسة كئيبة خائبة.. حفر ودفن وردم.. وتكبر وتجبر ووعد كاذبة

وصل إلى البيت.. ووقف أمامه متأملاً.. (هذا هو البيت الذي تمنيت كثيراً أن أدخله .. ورجوتها كثيراً أن أزوَّجها فيه لأتعرَّف على حياتها.. وسبحان الله.. لم يشأ أن أدخله معها أو وهي فيه.. وشاء أن أدخله وحدي في غيابها.. الآن.. والآن فقط ونحن نعيش في عشة الفراخ سأرى فراشها وحمامها ومكتبها كما وصفتهم لى

تسلل إلى باب العمارة وتوجه إلى أول شقة على اليمين.. ووضع المفتاح في الباب بهدوء.. ثم دفع الباب بعذر ودخل ورد الباب.. وقف في ظلام دامس وتملكته رهبة مخيفة.. (لا أحد يعرفه هنا ولو شعر به الجيران سيظنوا أنه لص).. تحسس الحائط بحثاً عن مفتاح النور حتى أدركه.. الصالة صغيرة مربعة.. بها تلفزيون وكنبه ومنضدة.. كل أبواب الحجرات مغلقة إلا باباً واحداً في مواجهته.. فاتجه إليه

تسمر في فتحة الباب.. أو تخشب.. أو تحجر.. عندما شاهد شخصاً مغطى في الفراش.. كشف النائم عن وجهه.. ثم نهض مفزوعاً مترعباً في الفراش.. والتفت العيون فزعى.. عيون فهمى وخيشة.. وسكنت حركتهما.. والعيون تحدق في العيون.. كان كل منهما ينتظر أن يبدأ الآخر بالحركة.. وشل تفكيرهما لثوان.. ثم تحركت ذراع خيشة وهو مترعب في الفراش.. ومد يده تحت المخدة وسحب سكيناً طويلاً.. رآه فهمى فتحرَّكت أعصابه المشلولة.. قفز في الهواء واستدار.. ثم طار من فتحة الباب وسقط في الصالة.. ثم طار مرة أخرى وسقط أمام باب الشقة.. فتحة وقفز الدرجات الثلاث فسقط عند مدخل العمارة.. ثم طار ليصبح في الشارع.. ثم أطلق ساقيه للريح

عاد قبلها.. دخلت وألقت ببعض الأوراق ووجهها مكفهر وسألها فقالت.. أن خيشة ذهب وسأل عنها الفراش مرات وأخذ كل ما يخصها.. ثم سألتها فحكى لها - واقف لى في كل طريق .. الله يخرَّب بيته - ح نبغ المديرية عن مكانه .. وح اشترى لك ملابس جديدة

في الصباح نزلا معا.. توجه إلى البنك لسحب مبلغ.. وتوجهت إلى المديرية لإبلاغ المسئول الكبير بأنه يقيم في شقتها.. وعاد فوجدها - صاحبك طلع مذاكر - مش فاهم ؟

- بلفته بمكان خيشة ووعدنى بالقبض عليه.. وكتب لى رقم تلفونه الخصوصى ووصانى بلاش أعرفك.. وغازلنى فصبرت فظن أنى راضية.. قام ونادى العسكري وأمره ما يسمحش لأى شخص بالدخول.. وقفل الباب ورجع من ورا ظهرى.. ومسك السوستة وحاول يفكها وقال (طمنينى على جرحك) أخذت شنطتى وهريت.. مش راجعة له تانى - ولا أنا.. لازم نعتمد على نفسنا .. مش ح يفيدنا الاختفاء زى النعام.. ولا بد من المواجهة

حبسان.. يبحثان فى الجدار عن حجر ضعيف يهدمونه يسمح لهما بهيصيص من الضوء ليتمكننا من الرؤية.. على أمل أن يتوسعا فى الهدم لعمل ثغرة تسمح لهما بالفرار.. وقررا أن يضعا خطة بخطوات زمنية بعد أن تخلى عنهما المستول الكبير أو تخليا عنه.. فرشوا الحصيرة وجلسا متجاورين ووجههما لسور السطح كأنهما تلميذان أمام سبورة.. وبالطباشيرة تحاورا.. حتى رتبا الخطوات واتفقا على (زيارة المحامى والتشاور معه على ضوء آخر موقف.. زيارة لص مساكن زامل فهمى فى السجن للتشاور معه فى إمكانية دخول شقة خيشة فى غيابه وسرقة الشيكات وعقد الزواج وأى أوراق أخرى تفيدهما وتدبته.. استدراج خيشة إلى لقاء للتفاوض معه على الطلاق والتعرف على طلباته وشروطه.. وذهابها إلى شقتها أثناء هذا اللقاء لأخذ ملابسها وأوراقها ولوازمها.. البحث عن المأذون لاستخراج نسخة من عقد الزواج.. الاتصال بالسكان والجيران لمعرفة المزيد من المعلومات عن خيشة.. رجوع فهمى إلى بيته للاطمئنان على زوجته المريضة ومعرفة ما إذا كان قد اتصل بها أم لا)

ثم أدارا ظهرهما للسبورة.. هاشين باشين مقتنعين بما اتفقا عليه.. وفى ضوء القمر.. انتهزت فرصة أن الهواب وزوجته لم يخرجا من عشتها بعد.. والتصقت به .. ولفت ذراعها حول ذراعه.. وأمالت رأسها على كتفه وقالت

- مش ح يقهرنى الزمن ما دمت معاى

- أنا مقهور زيك.. قولى .. مش ح يقهرنا الزمن مادام رينا معانا

- دنيا عجيبه .. رفضتك لأنك ما قدرتش تدفع مهرى شقة تملكك.. والنهاردة مهرى كلمة حلوة منك.. مهرى رضاك .. وسعيدة وأنا عايشة معاك فى عشة فراح.. دنيا عجيبه .. أنت مؤدب قوى يافهمى.

- حبك علمنى الأدب .. لكن ليه بتقولى كده .. إيه المناسبة ؟

- مش ملاحظ حاجة ؟

- ملاحظ

- إيه ؟

- اللى أنت ملاحظاه

- إزاي عرفت ؟

- الحالة النفسية .. لو توحدت بين اتنين.. يفهموا بعض.. وينطقوا الكلمة الواحدة فى نفس واحد .. والرغبة الواحدة فى وقت واحد

- طيب فهمنى.. ليه رغبتك ماجتش مع رغبتى

- علشان جروحك .. ولما تتخلصى منه.. ما اتعودتش أمد إيدى فى طبق غيرى.. وأنت لسه زوجته

- زواج باطل.. مبنى على غش

- المهم حصل.. بنيتك ورضاك

- زوجتك نفسى

- الزواج عقد .. وأنت ما تملكيش التعاقد.. أنت مش ملك نفسك.. فاقدة الأهلية.. إرادتك

ناقصة.. مش من حقلك توافقى.. لأنك لسه زوجته .. وماتقدريش ترفضى لأنى أصبحت الشريان الوحيد الباقي بينك وبين الحياة.. أصبحت بالنسبة لك المصدر الوحيد لكل السلطات.. كل أبوابك وشبابيكك مقفولة .. الوظيفة والبهت والدخل والحرية والاولاد.. أيام ما كنتى بحريتك رفضتيني.. دالوقت الظروف اختلفت .. ماالدرش اقبل موافقتك وانت محبوبه وتحت ضغط احتياحك لى .

- أنا باحبك.. وهبتك نفسى

- أنت بتردى الجميل.. وده بالنسبة لى ولك.. إهانة

- إنت بتعتهرنى خاينة؟

- طبعاً

- لسه فاكرك.. إنى لستك العمة؟

- لأ .. لا سمح الله

- لستك طرطور ؟

- لأ .. لا سمح الله .. لستينى خازوق

- لسه غضبان منى ؟

- سامحتك

- لو سامحتنى كنت ح أعرف .. أنت لسه كرامتك مجروحة

- مافيش بين المحبين كرامة.. فيه عدل وانصاف ورحمة

- الست بتعرف .. الحاسة السادسة

- الحاسة السادسة قالت لك كده؟

- طبعاً.. فین نكتتك.. ومرحك.. وشقاوتك زمان

- أيام وراحت

- إسمع يا فهمى .. أقسم لك بالله العظيم.. وبأولادى .. أهم ثلاثة فى حياتى.. طليقى والمجرم ده

وأنت.. طليقى نكد وفشل.. وهو كراهية وعداوة.. وأنت كرم وحب.. أنت فتى أحلامى.. حلم بنت

طنطا البريئة قبل ما تلوثها أضواء وضوضاء القاهرة.. وزى ما أنا فضلت غافلة عن حقيقة مشاعرك

بالنسبة لى سنة.. وماعرفتتش قيمتك إلا بعد فوات الأوان.. أنت دالوقت غافل عن حقيقة مشاعرى

بالنسبة لك.. ويمكن بكرة تعرفها بعد فوات الأوان

- خلىنا فى بكرة.. خلىنا نتعاون علشان نخرج من القبر اللى دفنيتنا فيه.. إذا فشلنا يبقى حسابك

وحسابى أمام الله.. وإذا نجحنا وقتها نبقى نفتش مشاعرنا.. وإذا كان لنا نصيب فى مشوار نمشيه

فى الحياه.. ح نمشيه

عبر فهمى الحديقة إلى القصر ودخل .. وفى البهو الكبير .. اصطف الخدم لاستقباله .. وتقدم رئيسهم فى زيه الأسود الأنيق وأحنى رأسه بالتحية وأشار له على الدور العلوى فصعد فى البهو العلوى الواسع الفخم يستائره الحريرية وسجاجيده الفاخرة ونجفه المبهر وتحفه الثمينة .. وجد وسام تتصدره على كرسى كبير ككرسى العرش .. فى ثوب من الدانتيل الأبيض يكشف عن ذراعيها ونصف صدرها .. بذيل واسع يرسم نصف دائرة كبيرة أمام الكرسى .. شعرها جدائل مرسلة على ظهرها وكتفيها العاريين وظهرها .. وجهها وودى وعيونها تلمع بذكاء

واستقبلته بفرحة بها كبرياء .. مدت ذراعيها وفردت كفيها فاستقبلت كفيه .. ثم نهضت ودارت به فى اتساع المكان عدة دورات فى رشاقة كراقصة باليه .. تكاد شفتاها تهمس بلحن لا يسمعه .. وظلت تطوف به .. وفى كل دورة تقترب من باب مغلق .. حتى أصبح أمامه .. فدفعته بقدمها وجذبت فهمى إلى حجرة النوم

نادت على كبير الخدم .. وحضر ودخل .. فأشارت له فطرح فهمى أرضاً .. وخلع عنه الحذاء والجورب .. ثم جرده من كل ملابسه حتى أصبح عارياً كما ولدته أمه .. ثم خرج وعاد وفى يده (بخاخة) رش بها .. وقلبه عدة مرات على وجهه وظهره وعارده الرش بمبيد حشري زاعق الرائحة .. ثم حمل ملابسه وغادر الحجرة

عادت تدور فى الحجرة ترقص كالفراشة .. مغمضة العينين حاملة وعلى شفتيها لحن لا يسمعه .. فعقد كفيه خلف رأسه ليرفعها قليلاً ليتمكن من متابعتها .. طرحت بساقها فردة حذاءها الأبيض فطارت كحمامة وسقطت فوق التسريحة .. ثم طرحت الفردة الأخرى فى مواجهته فطارت ثم سقطت فوق وجهه .. واستقرت على صدره .. خلعت ثوبها الفضفاض .. ثم خلعت قميصها الملون فبدا له فخذاها فى ضوء الأباжورة الحمراء كأنهما من نور و نار .. ثم حررت نهديها فاتسعت دائرة عينيها وانتفضت أوداجه .. رسال لعابه .. ثم تجردت من قطعها الحمراء الوحيدة الباقية عزيزة المثال فكشفت عن كنزها الثمين .. وبدت فى عريها كالطيف

جلست أمام التسريحة .. وفتحت علبة مجوهراتها .. وتحلت بكمية ضخمة من المجوهرات .. تاج من الماس فوق رأسها .. وقلادة من الياقوت تتأرجح فوق نهديها .. وحزام من فصوص ملونة حول خصرها ومثله فى ذراعيها قرب إبطيها .. ومثله حول فخذيها .. حتى قدميها لم تخلوا من لؤلؤات ترقد فوق أصابعها

وعادت ترقص .. وتفرذ ذراعيها وتقفز برشاقة الفراشة .. وصاحبها موسيقى رائعة كأنها تأتى من السماء .. وتتسلل عبر النافذة

تمت .. فجلست على طرف الفراش .. ثم تمددت .. ومازالت بحليها والتاج فوق رأسها .. واستدعته بطرف إصبعها فنهض .. وقبل أن تطأ ركبته الفراش قرأ على صفحتي نهديها .. إسمى المطرب والأديب العجوز .. واتسعت عيناه .. ونشط عقله .. ونظر إليها مندهشاً مستفسراً .. فقالت بنشوة وغندرة وتعال

- دول اللي انت طفشتهم
ثم رفعت ذراعيها فكشفت إبطيها فقرأ اسمي المحامي والمخرج.. وقالت
- ودول اللي طفشوك
ثم باعدت بين فخذيها فقرأ حول عورتها اسمي طليقها وخيشة وقالت
- ودول اللي وصلوا !
هتف مندهشا
- كل دول فى حياتك ؟
- هى هى.. ماخفى كان أعظم
- كل دول وصلوا لك ؟
أشارت بدلال وغندرة إلى الاسمين فوق عورتها وقالت
- هى هى .. مش كلهم .. دول بس
- طيب .. مانا وصلت .. فين اسمي ؟
- دول وصلوا عن طريق المأذون.. لكن انت وصلت من طريق تانى.. طريق خلفي.. اسمك على ظهري
استدارت .. ونامت على بطنها.. فقرأ اسمه على ظهرها

وفجأة.. ودون أن يدرك أو يريد أو يقرر.. انطلق فارا من خلفها.. وفتح باب الحجرة واطلق ساقيه
للريح فى البهو الكبير.. ونزل السلم قفزاً.. وانكفاً على وجهه ثم نهض يواصل القفز.. وهى خلفه
تستغيث بالخدم أن يلحقوا به.. وتحشم أن يحاصروه على أول السلم.. ويمنعوه من الفرار..
وتتوعدهم بالأذى لو أفلت منهم .. ولكنه استطاع.. ووصل إلى الحديقة وهو يلتهث مرتاعاً
مفزوعاً.. متحيراً.. كيف يخرج إلى الشارع وهو عار.. وقبل أن يدرك الخدم وجهته لمح باب البدروم
مفتوحاً فهرع إليه ونزل درجاته القليلة ودخل وأغلق الباب وأسند ظهره إليه.. وأرهدف السمع على
الخدم وهم يسألون بعضهم.. ومرت لحظات صعبة وهو قلق على مصيره.. إلى أن انصرف الخدم
وعادوا إليها.. فلما اطمأن قليلاً تسلل إلى داخل البدروم بحذر.. يفتش عن مكان يختفى فيه حتى
يحل الظلام.. فيستر عورته بأى شئ ويتسلل هارباً

فتح باب حجرة بحذر.. فوجد الخادمة مسددة على الأرض فوق فراش قديم رث مغطاة بأسمال
بالية.. رفع عنها الغطاء فوجدها عارية تماماً تحت الأغطية.. وقبل أن يعيد الغطاء استدارت ونامت
على ظهرها وابتسمت مرحبة.. فوجدتها هى.. هى نفسها.. كانت فوق فأصبحت تحت .. فصرخ

- إنت !

- لا

- إنت البرنسس اللي فوق

- إالى عذبتك فوق .. لكن أنا هى بعد التعديل.. انا الخادمة.. خدماتك ياسيدى .. الطاهرة البريئة
اللى تطهرت من كل ماضيها وخطاياها يوم ما هريت معاك
أشارت إلى صدرها ثم رفعت ذراعيها تربه إبطيها.. وقالت باستعطاف

- شوف.. استحميمت بأخلاقك.. ونظفت جسمى من كل الماضى بكرمك وطيبة قلبك وحبك.. قرب
ماتخافش .. مش قلت لك أنا اتولدت من جديد يوم ماهريت معاك
راحت المفاجأة وهذا .. ونزل بجزعه فجلس بجوارها يتأملها
- البرنس كانت تتعالى عليك.. لكن أنا ح اعيش باقى عمرى خدامتك.. وح ارقص لك
- تانى.. ح ترقصى زينا
- أنا رقصتى لك عبادة .. رقصه العبد لسيد
قامت .. ودارت ترقص وتتحرك فى الردهة الواسعة فى كل مكان.. وكلما اقتربت منه ابتسمت فى
دلال ومالت وارعشت جسدها .. وأرجحت ثدييها فوق رأسه كأنهما ثمرتا مانجو ناضجتان

قام إليها واحتواها وأسكن صدرها فى صدره.. فظلت ترقص بنصفها الأسفل وتلامس فخذه
بفخذه.. إلى أن هدها الجهد فطافت حوله عدة مرات وهى تقبل صدره وظهره.. حتى وصلت حرارته
إلى الأربعين.. ثم استكانت فى صدره فسمع دقات قلبها ودقات قلبه.. ثم طوقت رقبته بلذراعيها
وسحبتة معها إلى الأرض.. ونظرت إليه فى دلال وعيناها تسأله.. (أى الأوضاع تبغى؟ أتريد وجهى
أم ظهري).. فأدارها.. فركعت على أربع.. وأنامت رأسها.. ولامست الفراش بخدها .. ونظرت إليه
بشوق تنتظر الرصال

أخذ مكانه خلفها.. وباعد بين فخذيها.. ولفد بفخذه تحتها فرفعها قليلا.. وجعلهما وسادتين
أرقد عليهما فخذيها.. ومد ذراعه ليطوق خصرها وهم أن يلتحم بها.. ويغمد فيها خنجره .. ويدس
نفسه وروحه وكل كيانه بين أحشائها.. وفجأة ظهرت له صورة خيشة على صفحة ظهرها .. فلطمها
- بتضربنى ليه يا حبيبى ا

- باشطب صورته

- مين؟

- خيشة جوزك

- ماكانش جوزى .. ده اغتصبنى

- المهم إنه داس المكان ده

- الماضى لازم ننساه

- بيبضحك

- متبهيا لك يا حبيبى.. ماتفسدش علينا اللحظة الحلوة .. خليك معايا

- ماهو كده كل ما اركبك ح يبضحك على

- انت كمان اضحك عليه .. ماانت دالوقت راكبنى وراكبه

احكم ذراعه حول خصرها.. واندفع إليها واقتحمها بعنف وقسوة.. فصرخت مفزوعة متألمة.. وظل

يمارس الحب معها ذهابا وإيابا.. وهى تبكى

اتسمت صورة خيشة فوق ظهرها.. وأخرج له لسانه.. فزاد هياجه وغيظه وألمه.. فاندفع بكلتا ذراعيه

يلكم وجهه.. وتوالت اللكمات فوق ظهرها وجنبها.. فصرخت.. واستطاعت أن تفلت من تحته وتجرى

على أربع وهى مفزوعة.. فطاردها وهو يصرخ كالمجنون.. وقفز إليها وسقط فوقها وعاد يلكمها ..

حتى فقدت الوعي وانطرحت على ظهرها مفرودة الساقين والذراعين والكفين كالمصلوبة.. فلوح دبلة خيشة فى اصبعها فنهض وداسها بقدمه.. ثم باعد بين ساقيه.. ووجه قضيبه نحو الدبلة وأغرقها ببوله

استيقظ من نومه.. على صوتها ومازالت راقدة خلفه تطوقه بذراعيها

- مالك يا حبيبى.. أكيد كاهوس.. لأنك كنت بتفرس وتصرخ

- حلمت بك

- حقيقى يا حبيبى.. احك لى

- حصل

- إيه هو؟

- اللى اتكلمنا فيه قبل مانتام

وحكى لها تفصيلا.. فقرصت أذنه

- إذا وجد الماء بطل التيمم.. مش عيب تستحلم وأنا فى حضنك..

- سبق قلت لى.. إالى ماتقدرش عليه احلمه.. الحلم أرخص

- مين قال إنك ماتقدرش

- مهرك غال قوى.. كلبنى كتير ولسه.. مين عارف ح يكلفنى قد إيه

- من غير تكليف ولا تكاليف.. أنا وهبت لك نفسى

- لقد أعطى من لا يملك لمن لا يستحق

- أبدا يا حبيبى.. أنا أملك وأنت تستحق

واستدار إليها.. ليرى كلامها كما يسمعه.. فخلعت الدبلة من اصبعها.. وبصقت عليها.. وقلفتها

بعيدا.. وقالت

- آسفة.. ما كنتش واخده بالى.. لك حق تبعد.. صدقنى يا حبيبى.. شعورى ذالوقت إنى بنت بكر..

مامسهاش رجل.. وانت اول رجل يصادفتى.. واول رجل يلمسنى.. انا عروسة وانت عريسى

وأنكمشت فى حضنه كطفلة صغيرة.. ورددت أنفاسها فى صدره.. وردد أنفاسه فى شعرها.. وارتفعت

حرارتها.. وتمازجت الأيدي والسيقان.. فزاد التهابها.. وحسى وطيس المعركة.. فاشتعل..

والتحمما.. ثم احترقا فى نار الحب.. ثم انطفأ.. وكأنهما قد تطهرا من كل ذنوب وعذابات

الماضى.. ونجيا.. ويسيران معا على الطريق

عاد إلى بيته.. وزوجته المريضة الراضية بقدرها.. والمكتفية بزيارة ابنتها المتزوجة لها من حين لآخر وسؤال ابنتها من الخارج بالتليفون.. ورجوع زوجها الشارد دائما.. عندما تسمع صوت المفتاح فى دلفة الباب تستقبله بابتسامة باهتة مريضة.. لاتسأله ولا تعتب ولا تفضب .. فقط قد تشكو بعض ماعانت فى مرضها أيام غيابه.. فيسمعها كالعادة بلا تعليق .. ثم يسألها عمن سألوا عنه فى غيابه

عرف منها أن (صاحبة الندوة اتصلت.. وأن شخصا يسأل عنه فى اليوم أكثر من مرة .. ويرفض أن يقول اسمه أو يترك تليفونه.. ولما أصر على عدم ذكر اسمه عنفته وأمرته بعدم الاتصال مرة أخرى .. وفى الأيام الأخيرة غير بحة صوته ولهجته.. وأخذ ينتحل أسماء وهمية مختلفة.. ويتلطف ويتأدب فى السؤال.. ولكنها كشفت من صيغة سؤاله التى يكرر فيها بعض الألفاظ.. ففهمت أنه نفس الشخص)

إتصل بصاحبة الندوة .. وبعد السؤال المتبادل عن الصحة والسلامة.. سألته عن سبب انقطاعه.. ثم دخلت فى الموضوع .. فقالت أن (وسام انقطعت فى نفس التاريخ.. وأن شخصا دأب على حضور الندوة كل أسبوع بدعوى أنه مهندس يهوى الأدب.. ولكن بتكرار حضوره وتورطه فى الحوار تبين أنه لامهندس ولا يعرف شيئا عن الأدب.. بل يكاد أن يكون جاهلاً.. يجلس كل مرة فى موقع مختلف .. ويقدم لأقرب جار سيجارة.. ويدخل معه فى حديث أيا كان شأنه.. ثم يفاجئه بالسؤال عن وسام وأصدقائها وأقاربها والأماكن التى تتردد عليها والمحتمل تواجدها فيها.. وبعد أن ينصرف يبلفها العضو بمادار بينهما.. ففاجأته وواجهته وطلبت منه أن يعلن هدفه من الزيارة بصراحة.. فقال أنه

(تزوج وسام.. وفى شهر العسل ضبطها فى البيت مع عشيقها فهمى ابو الوفا.. وحالت بينه وبين العشيق فاستطاع العشيق أن يفلت ويهرب.. وطيببت خاطره.. وركعت تحت قدميه واعترفت له بعلاقاتها المشينة بفهمى وغيره.. فسجل اعترافاتها.. واستبقاها على مضض.. وهجر فراشها.. ويات ليلته فى حجرة أخرى إلى أن يصل إلى قرار فى شأنها.. وفى الصباح اكتشف هروبها.. واختفاء عشرين ألف جنيه كانت فى حقيبته.. فأبلغ الشرطة.. وقال أنه يحضر الندوة للتحرى عنها لمساعدة الشرطة فى العثور عليها.. لأن عدة أشخاص آخرين تقدموا ببلاغات مماثلة ضدها بأنها احتالت عليهم وسرقتهم وهربت).. وقدم عقد زواجه منها وشريط تسجيل باعترافاتها

ولكنها رفضت وضع الشريط فى جهاز التسجيل.. وعنفته وقالت له أن التى يريد فضحها زميلة فى الندوة فضلا عن أنها صديقتها.. وهى مازالت زوجته فلا يصح أن يفضحها.. ووعده أن تبلغه بأى معلومات تتوافر عنها.. وأمرته أن ينقطع ويترك رقم تليفونه فتركه.. وبالاتصال اتضح أنه رقم وهمى)

بتليفون صاحبة الندوة زاد همه وانهذ جالسا.. وثقلت رأسه بالمحنة فوضعها بين كفيه ونشطت كل

حواسه تبحث عن حل .. ورن جرس التليفون

- الو..

- إنت فين يا أستاذ ؟

- نعم ؟

- نعم الله عليك .. فين مرأتى ؟

- ما اعرفش

- لا تعرف

- اللى ضاع منه حاجة يدور عليها

- ماضاعتش .. انت خطفتها

- اثبت

- تريث قليلاً .. ثم هدأ نهرته .. وقال ناصحا

- مش الأفضل .. نجيب من الآخر ؟

- مش فاهم ؟

- نتفاهم

- على إيه ؟

- كل واحد ياخذ حقه ويروح لحاله

- يعنى مستعد ترد لى حقى .. ؟

- طبعاً

- أفهم ؟

- التليفون ماينفعش .. نتقابل

- فين ؟

- قبل ما اقول لك فين .. أقول لك إزاي

- إزاي ؟

- تحط سماعة التليفون على المكتب وتسبب الخط مفتوح.. وانا ح أراقبه.. تلبس وتنزل بعد نص ساعة بالضبط من الوقت.. توصل لمحطة الأتوبيس اللى على ناصية شارعكم.. تركب للتحرير.. أتوبيس مش تاكسى.. فاهم .. قبل ما تركب وبعد ما تنزل لا تكلم حد ولا تسلم على حد .. إذا تورطت فى الطريق وقابلت صديق كفاية إشارة تحية بدون كلام .. ولا تدخل أى محل .. لا تشتري علبة سجائر ولا علبة مناديل .. باحذرك.. إذا بلغت البوليس بأى طريقة تخسر كل شئ .. ما تنساش الشيكات.. مصلحتك أهم من أى مرة .. النسوان كتير وأنا مستعد أشيلك بدلها خمسة .. تدخل قهوة التحرير وتقعده على أقرب ترابيزة جنب الباب وتنتظرنى .. وإذا دخلت عليك ماتقفش ولا تسلم .. خليك عادى كأنك ما تعرفنيش .. لغاية أنا ما اكلمك.. وخلصى بالك .. إنت من ساعة ما تخرج من بيتك لغاية ما توصل القهوة متراقب.. فى الأتوبيس متراقب وفى القهوة متراقب .. مفهوم

وضع سماعة التليفون على المكتب وجلس .. وعقد ذراعيه على صدره وأخذ يفكر (رغم أنه أبلغ الندوة .. لم يبلغ زوجتى حتى باسمه.. يجب أن أشارك الفضيحة.. وأنفاهم معه قبل أن يبلغ زوجتى.. وقد يشهر بي فى أماكن أخرى.. ويصبح تهديده علنيا لا يمكن السيطرة عليه .. وأيضاً يجب التعرف على طلباته .. لفائدة من إخفاء رأسى ولاضرب من التفاهم .. ولكن لابد من الاتصال بها لإبلاغها لمعرفة وجهة نظرها فى هذا اللقاء)

غادر الشقة وطرق باب الشقة المجاورة .. ومن تليفون الجار اتصل بها .. رد عليه عم بدوى .. وقبل أن يفتح فمه عن أسنانه المشرمة مرحباً خطفت زوجته السماعة وانهاالت عليه عتاباً .. وعددت له أصناف الطعام التى أعدتها خصيصاً من أجله .. واستمع إليها مرغماً فى صبر ووعدها بالحضور الليلة والتمتع بطعامها والكوتشينة والشيشة .. ثم توسل إليها أن تنادى وسام

أبلغها.. وتشاورا فيما يجب أن يقوله وما يجب أن يخفيه .. ثم أبلغته أن هذا هو أنسب وقت تذهب فيه إلى شقتها وتضمن عدم وجوده فيها .. لتحضر بعض لوازمها وملابسها وأوراقها الهامة.. وطلبت منه أن يستبقيه معه أطول وقت ممكن حتى تنتهى من مهمتها

عاد إلى شقته وارتدى ملابسه ونزل فى الموعد بالضبط.. وعيناه تحملق فى المارة.. يبحث عن المكلف بمراقبته .. إلى أن وصل إلى المقهى وجلس على أقرب منضدة للباب.. ورأسه مشغول كيف يلقاه ! (هل بالترحيب والمداهنة والمراوغة والسياسة.. والصبر على تهديداته أوشتائمه أو بزائمه.. أم بالتحدى وإظهار الشجاعة واللامبالاة والتسفيه لشروطه) وانتهى قراره إلى أن يتركه يبدأ وبعدها يختار أسلوبه

ومضت ساعة.. حتى أرققه التفكير والقلق والانتظار.. وانحنى أمامه الجارسون وهمس (تليفون علشانك).. انته من شروده ونهض إلى التليفون وهو مرتبك (من سيطلبنى هنا وأنا لم أدخل هذا المقهى من قبل !)

- آلو ..

- إيه ياسيدى .. ماجتش ليه ؟

- ترجع تاخذ نضارتك ومفاتحك اللى على الترايبيزة .. وتدفع حسابك وتخرج.. تدخل شارع سليمان باشا .. لاتكلم حد ولا تدخل أى محل لغاية ماتوصل بار ستلا.. تدخل وتطلب بيرة لى ولك .. وتنتظرنى

- وكمان شايبنى .. انت بتتكلم منين

- ها ها .. من بقى

نادى الجارسون وناوله الحساب وسأله
- المفروض لما التليفون يطلب زبون ماتعرفوش .. تقف فى وسط القهوة وتنادى عليه.. لكن انت
جيت لغاية عندي بالذات كأنك عارفنى !
- اللى طلبك حدد لى الترابيزة ووصف لى ملابسك وقال لى حاطط النظارة والمفاتيح على
الترابيزة.. وأقرب
- الله يكرم أصلك
خرج وهو يفتش بعينه .. أين يكون التليفون الذى كلمه منه وهو يراه .. فلم يهتد إليه .. فاتجه إلى
شارع سليمان باشا.. وفى البار.. جلس على أول منضدة يحتسى البيرة.. وعيناه على الباب .. وعاد
يفكر فى الأسلوب الأفضل للحوار معه.. وحضر الجارسون وهمس له
- الأستاذ فهمى أبو الوفا ؟
- أبوه
- تليفون علشان سيادتك
هب مفزوعا هذه المرة
- آلو
- انا مش قلت لك أطلب اتنين بيرة .. واحدة لى وواحدة لك .. ليه طلبت واحدة بس ؟
- لما تيجى ح اطلب
- لما تطلب ح آجى
(ابن الكلب بيثيرنى ويلعب بأ عصاى ليهمى الملعب لصالحه.. شغل عصاها.. وفعلا طلب.. وفعلا
حضر.. هكلنا كأفلام رعب هيتشكوك .. جلس دون أن يلقى تحية أو يتكلم .. ورفع الزجاجاة وصب فى
الكوب.. ثم رفع الكوب وصب فى فمه.. وكرد مرتين ففرغت الزجاجاة على دفعتين فى أقل من
دقيقتين.. وتجشأ بصوت مسموع قبيح.. وصفق للجارسون وطلب أخرى.. وفهمى صامت يرقبه
هذا الخيشة.. هذا المتشرذع الجربوع الجاهل.. أقنعتنى فى لحظة أنه مليونير.. الآن يظهر على حقيقته
ملابسه متسخة قديمة رثة .. وجهه شاحب مجهد كأنه غادر المستشفى منذ ساعة.. خلع بعض أسنانه
الأمامية.. فتدلت شفته العليا فغطت شفته السفلى فهذا أكبر من سنه فى آخر لقاء .. وتذكر أنها قالت
أنه مريض بالسكر ولكنه يخفى ذلك حتى لا يستهان به)
بعد أن شرب كوبا من الزجاجاة الثانية تجشأ مرة أخرى بصوت مقزز.. وتحسس بطنه فى تلذذ ..
ونظر إلى فهمى بعين شاب بياضها إحمرارا .. وهتف بارتياح
- إزيك ؟
- الله يسلمك
- وازى وسام

- -
- للذبة وسام مش كده ؟
- -
- قالت لى إن بتاعك قصير .. باترى قالت على بتاعى ايه .. ؟
- عيب نبدأ حديثنا بالكلام ده
- ومش عيب تخطف مراتى
- ماتحطش قرار وتصدق عليه .. أنا ماخطفتهاش
- أنا دخلتها لك جروى تجيب منك الفلوس .. وراحت الحمام ورجعت .. وراحت تانى .. وغفلت
- النطع اللى قاعد يراقبها وهربت .. وانت خرجت وراها من غير ماتدفع الحساب للجارسون ومعاك
- شنتتها .. حصل .. والا لا ؟
- حصل .. بس مش بالضبط .. راحت الحمام تانى وخرجت منه على الشارع .. وانتبهت انها نسيت
- شنتتها فقامت وراها بسرعة ونسيت أدفع الحساب .. مالمقيتهاش .. رجعت البيت .. واتصلت بعد ساعة
- وعرفتني إن الرجل أبوقميص أخضر كان يراقبها وأوهمته أنها راجعة الحمام .. ولكنها مادخلتش
- واخنتف ورا شجرة .. وغافلته وخرجت بسرعة
- بس الرجل اللى كان يراقبها مافهمنيش كده
- كذب عليك
- معلش .. حسابه معاى بعدين .. بس انت مارجمتش البيت .. لا بعد ساعة ولا بعد أسبوع .. إنت
- اخنتيت معاها .. واتصلت بمراتك وقلت لها إنك مسافر .. ومارجمتش بيتك إلا النهارده
- لأ رجعت .. وأنا اللى كلفت مراتى تقول إنى مسافر
- طيب .. ولما كلمتك فى التليفون قالت لك إيه
- قالت كلام كثير .. ملخصه .. إنك أوهمتتها إنك مليونير راجع من أمريكا ومريض بالقلب .. واتجوزتها
- على وعد تسفرها معاك .. ولكنها اكتشفت إنك جاهل وتكتب السين صاد .. وواجهتك فاعترفت لها
- إنك نصاب .. وحرضتها على النصب والاحتيال .. ولما رفضت عذبتها وأخذت فلوسها ومصاغها ..
- وتحت الضغط والتعذيب والتهديد بخطف أولادها اشتركت معاك فى كام عملية .. حكنتهم لى
- بالتفصيل .. ولما طالبتك توفى بوعدك وتطلقها .. حلفت لها إن عمليتى هى الأخيرة وبعدا الطلاق ..
- وشرحت لها خطتك فوافق .. واتصلت بى .. ومشيت معاك فى الخطة .. وكانت ناوية تستمر فيها إنقاذ
- لنفسها ولأولادها وأروح أنا فى داهية .. لكن لما شكت أنك بتلعب بها هى كمان .. وعاوزها تكتب
- عقد زواج عرفى بينى وبينها وتحتفظ انت به .. اكتشفت إنك عاوز تورطنا فى خطأ قانونى ..
- تهددنى به إذا رفضت دفع قيمة الشيكات وتهدها به إذا فكرت تخرج عن طاعتك .. فقررت
- الهرب
- راحت فىن .. دى لارجعت لى ولا رجعت شقتها ولا راحت لحد من قرايبها ولا راحت لأولادها
- ولا حضرت أى ندوة .. تبقى راحت فىن !
- قاعدة عند ناس قرايب والدتها فى العباسية

- فين بالضبط...؟
- ما اعرفش
- نعم ياباشا .. يعنى إيه ماتعرفش ؟
- اتصلت بعد كده كام مرة .. لكن لاعرفتنى عنوانها ولا تليفونها .. تسألنى عن الأخبار وتقول ح اتصل بك تانى..وتقفل السمكة من غير ماتحدد ميعاد
- لكن انت رحت معاها شرطة الهرم وعملت لى محضر..ورحت معاها المستشفى لعمل الكشف الطبى
- حصل..بس ماجتش وحدها..كان معاها واحدة قريبتها من اللى هى نازلة عندهم .. وبعد المستشفى تركونى فى الشارع وركبوا تاكسى
- اسمها إيه ؟
- ما اعرفش
- وخفض خيشة رأسه يفكر فى كلامه..فأدرك فهمى أنه مادام قد بدأ يفكر فهو على وشك الاقتناع..
- فصبر على صمته..إلى أن صفق للجارسون يطلب زجاجة ثالثة .. وقال
- يعنى عايز تفهمنى إنها على اتصال بك وانت مش على اتصال بها
- بالضبط كده..هى دالوقت خايفة منى زى ماهى خايفة منك.. لأنها خدعتنى معاك وخدعتك معاى..وعارفة إنك ممكن تهددنى بالشيكات فاعترف لك على عنوانها..فأخذت حذرهما
- طيب يبقى ح نتفاهم على إيه .. قبل أى اتفاق لازم مراتى ترجع
- إنت بنفسك بتقول إنى خرجت من جروبي وحدى ومادفعتش الحساب ..وده صحيح .. يبقى إزاي خطفتها !
- قلت لها انتظرينى بره نتفاهم..وبعدين خطفتها
- إيه دليلك.. إنت ابن بلد ومردوح ومفتح.. ولا مؤاخذه صايع ومقطع السمكة وديلها وبتضحك على طوب الأرض..ماتضحكش على نفسك وخليك منطقي.. وإعقلها
- ماشى باعم فهمى .. ح أمشى معاك للآخر .. إنت عاوز إيه دالوقت
- انت اللى طلبت مقابلتى .. وإنت اللى تحدد عاوز إيه
- باختصار شديد عاوز مراتى..وقيمة الشيكات.. ماهى أكيد عرفتك إن الشيكات الثلاثة معاى .. وإذا كانت ماقالتش أدى صورهم
- ومد يده فى جيبيه وأخرج صور الشيكات الثلاث..فتفحصهم فهمى بإمعان..وعاش تلك اللحظة الغابرة .. ثم أعادهم
- خليههم معاك .. يمكن تحب تعيد عليهم نظر .. دى مجرد صور عندى منها كتير
- بان الضعف فى صوت فهمى وهو يقول
- احنا رجالة ولاد بلد.. وممكن نتفق..إنت من عابدين وأنا من السيدة
- عابدين أجدع .. احنا كنا جيران الملك

- واحنا لسه جيران أم هاشم
ضحك خيشة.. وبان السكر عليه .. ومد كفه فتاوله فهمى كفه وقال له ناصحا
- إوزنها كويس .. انت عاوز مراتك وانا عاوز الشيكات
- أنا موافق .. هات مراتى وخد شيكاتك
- صحيح أنا ماعرفش عنوانها.. لكن ممكن أرجعها لك.. لما تكلمنى أخدعها وأقول لها تقابلنى
علشان نروح للمحامى مثلا وأسلمها لك فى الطريق.. أو فى أى شقة.. لكن إيه اللي يضمن لى لما
أرجع لك مراتك ح ترجع لى شيكاتى.. المنطق بيقول إنك لما تسترد مراتك ح تقوى مركزك
وتتمسك بالشيكات لأنك أخذت شريكك فى الجريمة والشاهدة الوحيدة على جريمتك.. أنا برضه
بافهم ياخيشة.. صحيح مش قد فهمك.. لكن بافهم على قدى ..وقدى بيقول لى إنك ماقدمتش
الشيكات للنيابة لغاية والوقت لأنك خايف من شهادتها مادامت تحت يدى .. إنت عاوز توصل لها
وبعدين توصل لى.. كده والا إيه ياابوالخيش كله
- وانا إيه اللي يضمن لى لما أرجع لك الشيكات ح ترجعها لى ا

وقرعا الكأسين.. فهمى يشرب فى الزجاجاة الثانية ومازال يحتفظ بتوازنه.. وخيشة فى الرابعة ويقاوم
ليحتفظ بتوازنه.. وإن بدا السكر فى إحمرار عينيه وسيولة لعابه واضطراب شفتيه وتلاشى أطراف
الكلمات على لسانه وتباسطه وهززه السخيف.. كأنهما أصدقاء
وقال فهمى يجاريه فى صداقته المزيفة ومناورات
- شوف ياأجدع خيشة فى وكالة البلع.. ح اقول لك إيه اللي يضمن لك.. أولا مايفيش بينى وبينك
لاتار ولا حساب قديم ولا عداوة.. إنت نصبت على من غير ماتعرفنى.. مجرد واحد من الناس.. ترد لى
شيكاتى أرد لك مراتك.. ثانيا أنا هجرتها بكامل رغبتى قبل انت ماتعرفها وان كنت وقفت معاها فى
موضوع الشيكات فده كان مجرد وفاء لعشرة قديمة.. ست ضعيفة استجارت بى.. لكن هى
ماتلزمينش.. ثالثا ماتنساش انك انت بذكائك اللي دبرت الخطة وجرجرتنى لحد عندك.. يعنى مش
جمالها اللي جرجرتنى.. رابعا.. أنا رجل كبير فى السن وفى المركز الاجتماعى.. رجل بتاع كتب وأدب
وثقافة.. مااحبش المشاكل.. مجرد ماترد لى شيكاتى ح اعمل المستحيل وأرجع لك مراتك علشان
أرجع لكنتى وخيالى.. واعيش مطمئن.. احسبها كده يابن البلد.. تلاقى كل اللي يهمنى إنى أنفد
بجلىدى.. رد لى شيكاتى أرد لك مراتك وكل واحد يروح لحاله.. ويناقص واحد فلت من شباكك
وماقدرتش تضحك عليه.. ياسيدى اعتبر نفسك ضحككت على وعفيت عنى.
صدقنى ياخيشة.. لو أملك المبلغ كنت دفعته لك علشان أريح أعصابى وأرتاح فى آخر
أيامى.. أنا مش قدك ياخيشة.. أنا فى سن والدك أوأخوك الكبير.. وعلشان أثبت لك حسن نيتى
عاوزك زى أنا ماحكيت لك.. تحكى لى إزاي عرفتتها واتجوزتها وعاشتتها وإزاي اختلفتهم.. لأن
القصة تهمنى.. علشان تكشف لى زيفها وغشها وخداعها فأكرهها.. وده يساعدنى كتير على إنى
أقف جنبك وأساعدك.. وأتخلص من تأنيب الضمير لو سلمتها لك وأنا فاهم إنها مظلومة.. ويمكن
يوم أستفيد منها واكتبها رواية وأطلعك بطل

أراد خيشة أن يدرس كلامه بإمعان فطلب الزجاجة الخامسة .. وأسقط جبهته فوق فوهة الزجاجة الفارغة وأخذ يفكر .. ثم قال وهو مازال منكفئاً
- شوف يا فهمى.. أنا متأكد مية المية من حاجتين.. أولاً انك بتحبها.. ثانياً إن انت اللى مخبئها..
أو على الأقل عارف هى مستخبية فىن.. بدليل إن مفتاح شقتها معاك.. وانت ماكنتش جى تسرق ..
كنت داخل تاخذ لها هدم.. آه لو كنت لحقتك كنت قلعك هدمك.. ورغم كده ح أحكى لك
غشها.. ما يصحش مرة تضحك على اتنين رجالة أولاد بلد
- برافو خيشة

- لو سلمتك الشيكات دالوقت .. مراتى تبات فى حضنى الليلة ؟
- لو وعدتك أكون كذاب و باضحك عليك وفاكرك سكران.. لازم تصدق إنى ما عرفش عنوانها ..
انت تسلمنى الشيكات .. ومسامح ياسيدى فى القلوس والساعة والخاتم والحاجات الثانية..
اعتبرهم هدية منى بنفس صافية وسماح.. ولما اتصل بى اتفق معاها تقابلنى علشان نروح لمحامى
يرفع قضية طلاق.. وأسلمها لك فى الشقة اللى تحدد لى عنوانها.. يعنى تدخل الشقة وهى فاهمة إنها
ح تقابل محامى فتقابلك.. وأنا أخرج وأقفل الباب.. لو وعدتك بغير كده أكون كذاب.. أنا يابنى عاوز
أخلص.. عاوز أنساك وانساها وأرجع لحياتى.. ما عايش فى العمر عمر.. صدقنى
- لو حكيت لك حكايتها معاى ح تردها لى.. والا ح تروح تقول لها اللى حكيتها وتكرهها فى

شعر فهمى أنه أوشك على السيطرة عليه .. وأن كلامه (خيش) فى مخ خيشة .. وأنه باقى على
الحلو (دقة) فملاً له الكأس
وحكى خيشة له ماضيها بقدر ما عرف.. وما أرغمها تحت تهديد الكبراج على الاعتراف به فى شريط
التسجيل.. تاريخها الغرامى كله.. وعدد أسماء الرجال الذين عرفتهم فقط.. والذين عاشرتهم جنسياً..
خفق قلب فهمى بشدة ولوعة وشعر بالغيرة تنهشه وهو يسمع ما يحكىه.. وعرف لحظتها أنها للأسف
ما زالت فى قلبه.. بل فى كل كيانه.. وشرح خيشة خطته معها لاصطياده.. وأنه تردد على مكتبه
مرتين قبل تنفيذ الخطة .. ودرس مداخله ومخارجه ودار حول مسكنه.. وعرف دورة حياته اليومية
والأماكن التى يتردد عليها.

وابتسم فى غرور وقال أنه غير نادم على عدم تقديم الشيكات للنيابة وعدم تحرير محضر باتهامه
بخطفها وعدم الرد على محضره.. وأن ذكاه دله على أن التفاهم أفضل.. وأنها يستطيعان أن
يصلا معاً إلى اتفاق.. ولو كان فقد صبره وأبلغ النيابة لضاعت منه الفرصة التى يساوم عليها الآن ..
وهنا نفسه على حسن تدبيره فهنا فهمى على حسن تقديره

ومضى الوقت الكافى الذى ضمن لفهمى سلامة ذهابها إلى شقتها وعودتها.. وأيضاً مل الكلام بدون
الوصول إلى حل مع هذا المخمور الداهية.. الذى يلين لحظة.. وسرعان ما يتراجع ويحذر ويتشكك
ويتشدد

- قلت إيه يا خيشة .. بقينا بعد نص الليل .. عاوزين نتفق
- أنا ما قدرش أضمن إنك بعد ما تاخذ الشيكات توفى برعدك.. ممكن تقول لى ما اتصلتش

- وأنا ماقدرش أضمن إنك بعد ما أردتها لك ترد لى الشيكات..ولكن لابد واحد فينا يبدأ..واللى لازم يبدأ هو إنت.. وأنا لما أطمئن من ناحيتك أرجع لك مراتك علشان أتقى شرك.. علشان ماعنديش رغبة أتمسك بها بعد ما خانتنى معاك مرتين..بجوازها منك وبمؤامرتها معاك..ياخيشة إنت اللى بدأت المشكلة .. وأنت اللى لازم تنهيها
- على حد قولك..ماقيش بيننا عداوة.. ومايصحش نخلى مرة تلعب بينا .. وزى ما قالت .. (تخليتنا نخيط فى بعض)
- براقو ياخيشة .. طمرت فيك الحزة والبيرة .. أصيل يابنى .. ماانتم كنتم جيران الملك..كفك
- شوف ياسنيدى .. بلغها .. إنى رديت على محضرها .. وعملت لها محضر سرقة بعشرين ألف جنيه وساعة وخاتم
- قصدك الساعة والخاتم بتوعى .. هاها.. كفك
- وبلغت المطار لمنع هروبا للخارج .. وأقدر أخطف ابنها وأجبرها ترجع وتبوس جزمى .. وقابلت طليقتها وسمعتة تسجيل اعترافاتها.. ولى رجالة ممكن يجيبوها من تحت الأرض .. وممكن يشوهها بمية نار
- وبلغ نفسك..أقدر أقدم نسخة من التسجيل لمراتك وأولادك وللندوة..وأقدر أشوهك بمية نار وأنا بعيد عن الاتهام..خناقة مع صديق أبات أنا وهو فى الحجز وثالث يشوهك.. وماقدرش تنهمنى لأنى بايت فى حضن الحكومة..وأقدر أحرق مكتبك برضه وأنا فى حضن الحكومة..وأقدر أتهمك بخطف مراتى..وأقدر أتهمك بالتآمر معاها على سرقتى..والأهم ..أقدم الشيكات للنيابة وأجسك
- ليه كل ده ياخيشة..ماكننا كويسين يابن الناس وقرينا نلها..دى راحت والا جت ست غلبانة ضعيفة
- ست طماعة..أتجوزتنى وهى فاكدة إنى رايح أعمل عملية فى القلب ويمكن ماارجعش.. إتجوزت ميت علشان تورثه
- طيب..هى كده .. لكن أنا عملت فيك إيه
- خطفتها ياأستاذ .. وضيعت على تسعين ألف جنيه
- مراتك ح ترجع لك .. ولوأحسنت معاملتها ح تسامحك وتعيش معاك .. والفلوس رينا يعرضك من غيرى .. بس المرة دى دور على واحد يكون مريش .. مش مفلس زى حالاتى
- ماشى..العبد لله ح يطلع أجده منك ومنها .. ويحل المشكلة
- يارب
- شروطى..هى تتنازل عن المحضر اللى عملته.. وتتنازل لى عن شقتها بكل ما فيها .. يادوب أرد لها الملابس..وانت تتنازل عن محضرك ضدى وتدفع لى نص حقى فى الشيكات
- بالنسبة لى..المبلغ كتير ياخيشة ..لو عندى ما يخلص عليك.. لكن والله لا أملكه..خليفه الريح
- يعنى كام
- ربع الخمسين ألف ..ح اعطيك خمستاشر
- ربع التسعين يا حرامى .. والا نسيت الشيك ابراربعين

- نخليهم عشرين ألف.. وأبلغها شروطك.. وبالمناسبة.. ح ترفع قضية طلاق.. إيه رأيك نحلها ودى وضرب خيشة كفا بكف كالمظلوم .. وقد بدا فى غاية السكر .. وقال
- والله عال.. أنا جوزها وانت بتتكلم باسمها.. يا أستاذ اللى بتتكلم عنها دى مراتى مش مراتك .. بأى حق بتتكلم بالنيابة عنها
- كلفتنى .. لو قابلتك أهلك رغبتها فى الطلاق
- بدل ماتتكلم بالنيابة عنها خليها تعمل لك توكيل.. وتتنازل لى إنت عن شقتها.. وأنا أطلقها
- عندى فكرة .. إيه رأيك لو خلينا الطلاق مقابل عقد عمل بدولة عربية عن طريقى.. وح اتكفل بمصاريف سفرك
- موافق .. على شرط هى تسافر معايا
- كل ده ح أعرضه عليها
- إمتى ؟
- لما تكلمنى .. ح أكلمك

فى الواحدة بعد منتصف الليل.. خرجا أسوأ مما دخلا.. وأصر خيشة أن يمشيا معا لشم الهواء على النيل من التحرير إلى الجيزة.. وخشى فهمى أن يخسر شبه الاتفاق الذى بينهما.. فمشى معه.. على أن يودعه فى المنيل ويستمر خيشة بمفرده إلى الجيزة.. مشيا بهذاء الكورنيش.. وتكلما فى موضوعات تافهة كثيرة.. إلى أن وصلا للكوبرى المواجه لمعهد السرطان الذى يدخل إلى المنيل فعبراه.. وإذا بخيشة يتخطى سور الكورنيش وينزل إلى ضفة النيل.. ويتوغل حتى أصبح تحت الكوبرى.. تتوقف أمام الماء.. ويباعد بين ساقيه وفتح أزرار بنطلونه.. وأدار وجهه وهو يتبول .. ورفعه إلى أعلى عند فهمى وقال بصوت عال

- شايف بتاعى .. هى قالت لى إن بتاعى أطول

-

- تعالى ورنى بتاعك

- عيب ياخيشة .. إخلص واطلع

صعد وهو يشبك أزرار بنطلونه .. وفوجئ فهمى بمسدس فى يده .. فمقب خيشة

- لما نديت لك تنزل .. قلت يمكن تفتكرنى سكران وترمينى فى المية .. الحرس واجب .. أصل أنا زى التعلب.. أنام بهين وأحرس بالتانية.. وأسكر بنص راسى وأحرس النص السكران بالنص الثانى

- داهية انت ياخيشة .. لو كنت متعلم كنت حكمت مصر.. لكن من نعمة ربنا ومن حكمته.. إنك ما تعلمتش

كانهما على موعد .. وجدها تنتظره فى السطح .. رآته فكادت تقفز من السور بالمائة كيلو لحم وشحم لتسقط فوق رأسه .. وصعد الأدوار الخمسة فوجدها تنتظره على رأس السلم .. عاتبة شاكية آلام الفراق .. وماتكبدته من الانتظار .. وماتكلفته من طعام من أجل سواد عينيه .. تنهد فى صبر فظنتها تنهيدة العاشق الولهان .. قبل كفها الملهوف وضغط كتفها وكسر لها عينه .. فتهلل وجهها بالفرحة .. وسألها عن وسام فهمست بأنها بالداخل .. وسألها عن عم بدوى فغمزت كأن بينهما سرا .. بأنه نائم .. فابتسم لها وتخطاها إلى السطح واختفى فى العشة بسرعة .. كأن شبحا يطارده

- هى: هى .. هى قفشتك ؟
- أعوذ بالله
- تستاهل .. مش انت اللي اقترحت أقول إنى اختك .. آهى طول النهار واجعة دماغ اختك ..
- مالهش كلام إلا عنك .. إنت عملت إيه فى الولية ياروميو
- أبدا والله .. هى اللي وقعت فى غرامى من أول كيس لب
- وتخون عم بدوى وانت بينك وبينه عيش ومعسل
- حد قال له يتجاوز واحدة قد بنته
- طيب ماأنا قد بنتك
- عندك حق .. وده كان سبب كل المشاكل
- خير .. مالك راجع شايلى طاجن ستك ؟
- طمنينى .. رحتى الشقة ؟
- وجهت أوراقى واللى يلزمنى .. وانت قابلته ؟
- طبعاً

جلسا متريعين متقابلين .. وحطت صينية الشاي بينهما .. وحكى لها بالتفصيل ما دار بينهما .. حتى ما يخذش الحياء .. وظلت صامئة تسمع إلى أن فاجأها بما قاله عن ماضيها وعشاقها .. فانتفضت واقفة هائجة .. تجرب الحجرة كالليرة الجريحة .. تتوعده بالقتل لو ملكت الفرصة .. وأقسمت ألف يمين أن كل ماجاء على لسانها فى التسجيل كان يمليه عليها تحت ارهاب الكرياج وأنه لم يمسه فى حياتها سوى ثلاثة .. طليقها .. وهذا الكلب .. وهو .. وأن كل الآخرين كانوا مجرد محاولات للاختبار والاختيار .. ولم تمهلها الست بدية .. ودخلت عليها بصينية الطعام .. وقد غيرت جلبابها وعصبت رأسها (بقمطة) خضراء زاهية .. وكحلت عينيها ولونت شفتيها وخديها وشمرت عن أساورها الذهبية ورفعت شعرها عن قرطها .. فهدت كمروس المولد المزركشة بكل الألوان

دخول الست بديةة أحمد ثورتها .. وبعد انصرافها عادا إلى الحديث فى هدوء .. أعطته تليفون طليقها .. وطلبت منه الاتصال به وتحذيره بشأن خطف أولادها .. وقالت وهى تنهد فى حسرة

- سد على كل المنافذ.. لأقدر أشوف أولادى.. ولأرجع لعملى.. ولأأسافر لأهلى.. حتى الطلاق مش ح يفيدنى ومش ح يرد لى حريتى.. لأنه حتى بعد الطلاق لو تم يقدر يشوهنى بمية نار.. يعنى حكم على بالإعدام وأنا حية.. الله يخرب بيته.. المشكلة مش ح تتحل إلا بموتى أو موته

كتب لها فى ورقة النقاط التى يجب أن ترد له عليها.. وجهز لها جهاز التسجيل الذى أحضره معه .. وتركها وعاد إلى السطح وتسلل إلى السلم .. ونزل إلى المقهى .. وعاد بعد ساعة وكانت قد انتهت من التسجيل .. فسألته

- إنت ليه سبتنى ونزلت ؟

- علشان تاخدنى حريتك فى الرد عليه من غير ما يحرجك وجودى .. وصدقينى .. الشريط ده ح احطه قدامك فى ظرف واقفله واسلمه له مقفول من غير ما اعرف اللى فيه

- وكل ده ليه ؟

- علشان أثبت لك إنك هنا بمحض إرادتك وبكامل حريتك مهما كانت النتيجة بالنسبة لى .. حتى لو كنت نايبة تسافرى معاه

- مش ح تبطل الرومانسية بتاعتك دى .. مش ح تبطل تعمل فدائى وتمثل دور الشهيد علشان تشعرنى بلذنى.. صدقنى.. الوقت بالذات غير زمان.. الوقت يسعدنى إنى أكون فعلا أسيرة عندك وتحت أمرك وتحت طوعك وبإشارة منك رغبتك تبقى هى رغبتى

- أنا بامثل ياوسام !

- أبوه بتمثل .. اللى يشوفك وأنا فى حضنك .. ما يصدقش إنك تعرض عليه تسفرنى معاه

- ده مجرد مناورة .. جس نبض

- إفرض إنه وافق .. تضحى بى !

- لو وافق .. يبقى لسه موافقتك

- تبقى بتجس نبضى أنا كمان .. على كل حال أنا رديت على جس النبض فى التسجيل

- إزاي ؟

- قلت له .. مش ح تشوفنى تانى.. حتى لو شفت حلمة ودنك

وزاد انفعالها.. وقالت بعصبية شديدة

- ماتعملش فدائى .. ماتعملش شهيد وتضحى بى .. لأضحى بك

- إزاي ؟

- أقتلك

وضحك فضحكت .. وفتح لها ذراعيه فألقت نفسها فى صدره .. ورفست الباب بقدمها .. خشية أن

تفاجئها الست بدبعة.. فترى شقيقتين متعانقين فى وله وعشق .. وهمست بين شفثيه

- ماتحلوش فى نظرى أكثر من كده.. ماتخلينيش احبك أكثر من كده.. علشان لو قتلتك أقدر أعيش

اتصل فهمى بطلقها.. وعرفه أنه محام موفد من طرفها.. وأبلغه تحذيرها من خطف أولادها.. فأبلغه أن خيشة اتصل به وأسمعه التسجيل.. ونهى كلامه بأن (أغلب ظنه أنها بريئة مما اتهمها به.. ولكنها على أى حال (تستاهل) لأنها مغرورة متفطرة متعالية .. وأنفها أعلى من رأسها.. وعيناها لا ترى تحت قدميها.. ولهذا لم تر الحفرة التى حفرت لها) ودعا لها بالهداية .. وشكره على تحذيره

ومرت أيام .. حتى تشككا فى احتمال اتصال خيشة مرة أخرى .. إلى أن اتصل
- حط السماعه وسيب الخط مفتوح.. وانزل بعد نص ساعة بالضبط.. وزى ماسبق.. لا تدخل محل ولا تتكلم مع أى شخص.. وتدخل جروبي سليمان.. وتقع على أول ترابيزة .. وتنتظرنى وترك فهمى السماعه ودخل شقة الجار.. وردت بذيمة.. وأخذت تثنى على سهرة الأمس.. وكيف غلبته فى الكوتشينه.. وصبر حتى أراضى مشاعرها وطلب وسام .. وحكى لها فقالت أنها سوف تذهب مرة أخرى إلى شقتها لتحضر مالم تستطع حمله فى المرة السابقة

جلس فى جروبي ينتظر.. وأقبلت عليه سيدة فى حوالى الثلاثين.. وجلست دون استئذان كأنها تعرفه.. وابتسمت فى وجهه وعبت فى مفاتيحه التى على المنضدة.. وقالت
- أستاذ فهمى انا فى انتظارك بره
وفى الشارع وعلى الرصيف وقف بجوارها فأشارت لتاكسى.. وألقت بنفسها فيه فألقى بنفسه بجوارها.. فقالت للسائق

- محطة مصر

- ح ناسافر

- اصبر

أمام أحد أبواب المحطة .. أشارت وقالت

- هو منتظر فى البوفيه

دخل البوفيه وجال ببصره يبحث عنه.. فأسقط خيشة الجريدة عن وجهه .. وابتسم

- اشمعنى يعنى محطة مصر

- علشان هنا المسافرين بيقتعدوا مع بعض على ترابيزة واحدة من غير ما يعرفوا بعض .. حتى لو

صورونا .. ماتقدرش تثبت إن بيتنا لقاء

- وده يهكم فى أيه ؟

- يمكن البوليس عامل لى كمين .. ويمكن بعد المواجهه أقتلك

- مش يمكن العكس .. أنا اللي أقتلك

- إنت عجوز وأنا شاب
- بوضع سره فى أضعف خلقه
- شلع خيشة طرف بنطلونه .. وأشار إلى المسدس المدفون فى جواره
- فأشار فهمى إلى الطينجة التى تحت إبطه وقال
- أنا كمان مسلح .. بس الفرق إن مسدسى مرخص باعتبارى صاحب سجل تجارى .. والحكومة رخصت لى علشان أدافع عن نفسى وقت اللزوم ضد أمثالك
- هاها.. تبقى بصره
- من جهاز تسجيل صغير أسمعه تسجيلها.. وتوكيلها للاتفاق بالنيابة عنها.. ولخصت أقوالها فى موافقتها على التنازل له عن شقتها بكل محتوياتها.. وعن رصيدها الذى سبق أن سحبه له من البنك والمصاغ والتنازل عن محضرها ضده.. مقابل تنازله عن محضره ضدها والطلاق .. بشرط أن يتم الطلاق أولاً
- وانتهى التسجيل فنظر خيشة إليه وقال
- وبالنسبه لك ؟
- ح ادفع عشرين ألف بشرط تناولنى الشيكات أناولك المبلغ فى مكان عام قدام شهود من طرفى ومن طرفك
- وإيه لزوم الشهود ؟
- علشان مانضطرش نرفع السلاح على بعض .. لو واحد فينا ناول والثانى ماناولش
- لأ حدق .. ماتيجى تشتغل معانا.. أنا موافق على الاتفاق.. لكن مش موافق على الطريقة
- مش فاهم .. ؟
- يعنى موافق آخذ المبلغ وأرد الشيكات .. وآخذ الشقة وأطلقها.. بشرط آخذ المبلغ وتسجل لى عقد التنازل عن الشقة فى الشهر العقارى .. وبعدين أرد الشيكات وأطلق
- مستحيل .. إحنا اللى لازم نخاف منك .. إنت اللى اعتديت علينا
- بلفتها تهديدى ؟
- طبعاً
- وانت مش خايف من الحبس لو قدمت الشيكات للنيابة .. وقتها مش ح أقدر أراجع حتى لو عرضت على المبلغ كله
- فاهم
- يبقى مافيش قدامنا يا صديقى إلا حل واحد
- إيه هو ؟
- الحرب
- ونهنض .. وقبل باطن كفه .. وقلد بالقبلة فى وجه فهمى .. وانصرف

عاد إليها مهزوما ففاجأته برسالة..قرأ خطها الركيك ..(لو فكرتى تدخل الشقة تانى ح ادفنك فيها..قدامك أربعة وعشرين ساعة بالضبط..تتصلى بي فى تليفون شقتى..وتحددى ميعاد رجوعك بعد المهلة دى ح أنفذ كل تهديداتى..وح اخطف ابنك أو بنتك وح اجبرك ترجعى..زوجك المخلص)

نظر إليها مستفسرا فقالت بمرارة (من زوجى المخلص) ونزلت بجزعها إلى الأرض .. وجلست حيث كانت واقفة.. فنزل إليها

- فهمينى أيه اللى حصل ؟

- كان متوقع إنى ح أروح الشقة .. ترك لى الرسالة دى .. وجرد الشقة من كل شئ.. معادش فيها غير الخشب فاضى

- معلش .. هدى نفسك خيلنا نشوف لنا حل.. جت لى فكرة .. إيه رأيك لو خيلنا المحامى يقدم الرسالة دى للنيابة

- يافهمى يا حبيبى يا اهل.. خيشة مش اهل.. علشان يكتب رسالة تهديد بخطه.. المهم وصلت لحل معاه ؟

- أبدا.. موافق على الطلاق مقابل شقتك وعشرين ألف مقابل الشيكات.. لكن شرطه ياخذ الفلوس وتتنازلى له فى الشهر العقارى.. وبعدين يرد الشيكات ويطلق

- أنا اللى أخطأت.. وأنا اللى لازم أتحمّل النتيجة.. الحل اللى يخلص أولادى ويخلصك منه.. إنى انتحر

- بلاش كلام فارغ

- بدبعة سألت عنك

- سألت عليها العافية

- بتقول عندها مشكلة عاوزه تاخذ رأيك فيها

- وأنا عندي مشاكل ومش فاضى لها.. قومى إلبسى ونخرج

توجهها إلى المحامى وحكى له ماتم فى اللقائين .. وغادرتها إلى دورة المياه .. فمال المحامى عليه وهمس شامتا

- ماقلت لك.. بدل ماتهرب بها اهرب منها.. ضحى بها واثقت نفسك واتركها لمصيرها.. هى اللى عملت فى نفسها كده.. عندها أهلها يتصدروا له.. ياغلبوه ياغلبهم.. هى نفسها تغلب بلد ماتخافش عليها.. صدقنى هو ماتهموش الفلوس .. إالى ماقدرش ياخده منك ح يقدر ياخده من غيرك .. هو اللى واجعه كرامته وشرفه

- ده نصاب ومعرض ماتهموش كرامته.. بعثها تنصب على.. وقال لها دلعيه وقولى له (ياقوفو)

- النوع ده من الناس..ومن المجرمين بالذات..بيعتبروا نفسهم جدعان ومقطعين السمكة وديلها..
يضحكوا على الناس وما ينضحكش عليهم..ولما ينضحك عليهم تعز عليهم كرامتهم وشرفهم..كل
اللى يهمه إنه يستردها ليسترد كرامته..ويسلطها على غيرك..ويرضه يقول لها دلعيه ويهرص
عليها.. لكن المهم ما ينضحكش عليه..وبعدها لو ساومت على الشيكات ح يقبل منك أى مبلغ..
ولو ساومت عليها ح يردها لك بأى مبلغ..المهم يشعر إنه ما تغلبش وما تنضحكش عليه..وتركها لك
بمزاجه مش بمزاجك

- يعنى بتنصحنى أردھا من غير ما استرد الشيكات

- طبعاً لا

- شوف يامتر..أولا هى مالهش أهل هنا يحموها..ثانيا أنا وهى فى مركب واحدة..يانهر سوا لهر
الأمان يانفرق سوا..أنا وهى مدفونين فى قبر واحد أحياء..ياحفرنا وخرجنا يامتنا سوا..وإن كان هو
زى ما يتقول حاصر الفريسة وقيدھا قبل ما يعصھا والموقف القانونى فى صفه..والوصول للحق
والحقيقة عن طريق القانون ميثوس منه فى نظرك..يبقى ما فيش غير الأسلوب اللى هو اقترحه ..
الحرب..ح اتعامل معاه بنفس أسلوبه

- إزاي باشاطر..هو نصاب محترف وله أعوان وعصابة .. وأنت ما تعرفش حاجة من الأساليب دى
ياحضرة الأديب .. يارجل المعانى والخيال

- بسيطة..أعرف كتير منهم..من اللسى كانوا زمائلى فى السجن ..ح استعين بهم

- يعنى باختصار..ح تتحول من كاتب إلى رئيس عصابة

- يامتر..إذا عجز المجنى عليه عن الوصول إلى حقه عن طريق القانون..فلا لوم عليه إذا لجأ
لقانون الغاب .. وأنا مش طالب منك ترفع قضية ولا تقف فى محكمة.. أنا طالب مساعدتك من
ناحية ثانية

- إيه..أشترك معاك فى العصابة

- لا..تساعدنى مساعدة قانونية بطريقة ثانية..وتاخذ أتعابك كأنها قضية .. بصرف النظر عن
صداقتنا

- زى إيه مثلاً ؟

- بداية.. عاوزك تتحرى لى عن سوابقه .. وعن اسم المأذون

- دكان فيه مكتب ودكة ومقشة.. وقدامه كوبرى تحته كوم زباله ا

وضحكا .. وعادت فتوقفا عن الضحك.. ولحظات وانصرفا

- عبر أسلاك التليفون جاء الصوت .. نسائي عذب .. يذوب رقة ودلال
- إنا شركة إنترناشيونال الأمريكية الدولية للسياحة فرع القاهرة .. من فضل حضرتك عاوزه أتكلم مع صاحب المكتب شخصيا
- بخصوص ..؟
- أخبار سارة .. أرجوك وصلني به
- أنا ياستى صاحب المكتب .. خير؟
- لو سمحت أعرف اسم حضرتك؟
- مش لما أعرف إيه الموضوع
- ماقلت لحضرتك خير
- برضه لازم أعرف
- المركز الرئيسى لشركتنا فى أمريكا .. كلفنا بعمل مسابقة بين المكاتب التجارية والشركات فى مصر .. على سبيل الدعاية .. بنأخذ أسماء المكاتب والشركات من دليل التليفون .. وندخلها الكمبيوتر ونجرى عليها قرعة .. والشركة الفائزة لها جائزة مالية كبيرة ورحلة سياحية لمدير الشركة إلى أمريكا .. وانا أخذنا اسم مكتبك من الدليل .. ولما أجرينا السحب فاز بالجائزة الأولى .. مائة ألف دولار ورحلة لصاحب المكتب لأمريكا .. مبسوط ياسيدى
- مبسوط جدا
- أعرف اسم حضرتك لو سمحت ؟
- فهمى أبو الوفا
- يافهمى بك .. بكرة .. تلبس أشيك بدلة عند حضرتك .. وتنزل من عربيتك قدام جنيئة الميرلاتد فى مصر الجديدة الساعة ثلاثة الظهر بالضبط
- بس أنا ماعتديش عربية ؟
- المهم .. تكون قدام باب الجنيئة فى الميعاد .. بالدقيقة والثانية .. تمشى على الرصيف فى اتجاه ميدان روكسى .. وتلف مع نهاية سور الجنيئة لغاية ما ينتهى .. ويهدين تلف وتمشى جنب السور الخلفى .. تمشى بخطوة شيك .. ورأس حضرتك مرفوعة لفوق .. لاتبص يمينك ولا شمالك ولا وراك
- إيه ده كله .. ليه ؟
- لما توصل للسور الخلفى .. وح تكون كاميرات التليفزيون الأمريكى مثبتة فى فوق سطح عمارة قدامك .. وح تصورك من لحظة ماتلف مع السور لغاية ماتوصل لمقر فرع الشركة فى آخر الشارع .. وح تصورك وانت داخل الشركة بتستلم الشيك وتذكر الدعوة من المدير العام .. لأن الفيلم ح يسبقك لأمريكا .. وح يلماخ فى التليفزيون الأمريكى

- أخبار حلوة فعلا يابنتى
- مبروك يافهمى بك .. أرجوك الميعاد بالدقيقة والثانية علشان التصوير

(ياكریم یارب..تسد باب وتفتح ألف باب..رحلة تخرجك من النكد الى انت فيه..ومبلغ رائع تدفع منه للكلب ده..تدفع منه لك ولها.. تشتري نفسك وتشترى بها..وتسافر وانت بالك مرتاح..ومين عالم يمكن تسافر معاك..يعنى الرحلة اللي كانت بتعلم بها مع خيشة ح تسافرها معاك..كریم یارب)

نشطت حواسه..وأرسل أفضل بدلة إلى المنكوجى..وذهب إلى الحلاق..وقضى أغلب الليل بجهز أوراق السفر وحقيبة لوازمه..وفى الصباح أخذ حمامه وأفطر ثم ارتدى ملابسه وتعطر وخرج جلس على مقهى فى ميدان روكسى..وأسلم حذاءه لمارسح الأحذية..ثم تمشى إلى أن وصل إلى باب الحديقة..كان الجو حاراً خانقاً..والشوارع فارغة..نفرهنا ونفر هناك

فى الثالثة تماماً خطى أول خطواته حتى وصل إلى نهاية السور ودار معه إلى أن وصل إلى بداية السور الخلفى..وتأكد من رباط عنقه..وراحة القميص على صدره وأزرار الجاكيت..ثم خطى أول خطواته فى السور الخلفى..خطوة واثقة .. وابتسامة على الفم..وجوه مرفوع..ينظر إلى أسطح العمارات فى حذر..يبحث عن الكاميرا الخفية

كان الشارع خلف الميريلاند خالياً تماماً..إلا من سيارة واقفة بجوار السور..اقترب منها وهو يحافظ على رشاقة خطواته..فتبين له أن بالسيارة أشخاصاً..اقترب أكثر فتبين له أن بها أربعة .. كلهم ينظرون خلفهم ويتابعون قدومه..فقال لنفسه (حتماً هم من التليفزيون الأمريكى)..وانتبه إلى أن شخصاً يخطر خلفه .. فأبطأ خطواته حتى يتخطاه هذا الشخص ويسبقه.. كى لا يظهر معه فى الصورة

وفجأة انفتحت أبواب السيارة الأربعة..وقفز منها أربعة رجال وجروا فى اتجاهه..فأدرك الحقيقة..واستدار مفزوعاً ينوى الفرار..ولكن الشخص الذى كان خلفه خطف الكرافتة من فوق صدره وقبض على رباطها بعنف ولفها بسرعة حول معصمه حتى كاد يخنقه.. والأربعة يهرعون نحوه..ولم يبق كى يصلوا إليه سوى عشرة أمتار..والآخر يعصر حلقة الكرافتة حول رقبته ويشل حركته تماماً .. فأدرك أنه هالك لا محالة

ودون تفكير..سقط بهجده..وهو مازال مخنوقاً..وطوق ساقى الرجل بذراعيه ورفع وحمله كله على كتفه..وجرى به إلى الخلف فى فزع رهيب وهو يصرخ (إلحقونى..إلحقونى)..جرى بسرعة الريح..سرعة لم يعهدها فى نفسه حتى فى شبابه..وتولدت فى ذراعيه قوة مصدرها الفزع لم ينعم بمثلها من

قبل..وانطلقت حنجرته كأنها ميكروفون..إلى أن عاد إلى بداية السور حيث يمكن للمارة فى الشارع الرئيسى رؤيته..فرأى الأربعة يعودون مفزوعين مهرولين إلى السيارة وينطلقون بها حتى قبل أن يفلتوا أبوابها
وعندما رأى الرجل زملائه يفرون..أخذ يضرب فهمى بكلتا يديه..وأصبح كل همه أن يفلت..فتخلى عنه..فسقط على الأرض ونهض مفزوعا وفر فى اتجاه السيارة وهو يسب ويلعن خيانة زملائه

عاد إلى المقهى..وارتمى على الكرسي وهو لا يصدق ماحدث..مندهشاً كيف جاء الحل بهذه السرعة وكيف أتته هذه القوة الخارقة ..وهمس لنفسه (الخوف خلق شجاعة والفرح خلق قوة زى ما قالت ..
الله يخرّب بيتها)

تحمّل على نفسه وخرج وأشار لتاكسى..وألقى بجسده بجوار السائق .. وفى البيت تخلص من ملابسه ودخل الحمام.. وفتح الدش.. يستعيد حواسه وينشط أعصابه التالفة بالماء البارد .. وخرج على جرس التليفون

- آلو ..

- معلّش .. نفذت المرة دى .. لكن الجايات أكثر..كسبت معركة.. لكن الحرب مستمرة ..
سلام يا صاحبي

أبلغه المحامى أن تحرياته أسفرت عن أن خيشة معروف فى مديرية الأمن باسمه وشكله .. لأنهم استدعوه مرارا لملاحظات كثيرة قدمت ضده بتهمه بالنصب والاحتيال والزواج الخادع من عدة سيدات بنفس الطريقة .. ولكن للأسف لم تتمكن المديرية من إثبات أى تهمة ضده .. وفى كل مرة يخلى سبيله بعد تحقيق النيابة .. حتى أن الموظفين والضباط فى المديرية يتندرون بكائه .. ويسألونه عن آخر مغامراته فى عالم النساء ..

أما تحرياته عن المأذون .. فقد سأل أغلب زملائه المحامين وبعض المأذونين فلم يستدل على مكتب مأذون بهذه الأوصاف .. ووعد بأنه سوف يتوجه إلى المحكمة التى تودع فيها دفاتر قيد حالات الزواج .. ليسأل عنه

أحبطه المحامى بنتيجة تحرياته ولكنه لم ييأس .. (الحرب معلنة وما زالت فى أولها .. وما حدث فى الميريلاند خير دليل .. والدفاع وحده لن يضمن الحماية ولا بد من خطوة إيجابية) .. فتوجه إلى حى الجيارة فى مصر القديمة .. وسأل عن قهوة كتكوت .. جلس وطلب الشاي و الشيشة .. وسأل الجارسون عن الأوسطى عصفور

- ليه بابيه .. انتشل من حضرتك حاجة ..؟
- صاحبي .. كنا زملا فى (طره بالاس)
- أهلا وسهلا .. دقائق ويكون عندك
- ذهب .. وعاد ومعه عصفور .. استقبله عصفور بترحاب بالغ .. وجلسا يتذكران معا أيام السجن .. دخل فى الموضوع وحكى بالتفصيل .. وعصفور مشدود مستفز .. يقفز من فوق الكرسي مع كل واقعة .. كأنه يود أن يذهب لتوه ليؤديه
- المطلوب بالضبط .. إنك تدخل الشقة وتبحث عن عقد الجواز والشيكات .. وأى مال فى الشقة مهما كانت قيمته حلال عليك .. علاوة على ألف جنيه منى
- يافهمى بيه أنا أخدمك بعينى .. بس ألف جنيه ماتكنيش .. لأن حضرتك عارف إننى نشال .. أفتح جيوب بس .. ما عرفش أفتح شقق .. دى شغلة لها ناس تانية .. ودول ما يعملوش شغلانة زى دى بالمبلغ ده .. على كل حال أنا أقابل حضرتك بهم وانت اتفق معاهم
- لا يا عصفور .. أنا مش عاوز عصابة .. أنا عاوز واحد بس .. بلاش فضايح
- بابيه الشغلانة دى علشان تنجح ما ينفعش فيها واحد بس .. دى يلزمها عصابة .. فيها مراقب وناضورجى وطفشجى ومناول ولقاط
- إيه ده كله .. مش فاهم؟
- المراقب يقعد كام يوم يراقب سكان الشقة
- ده ساكن واحد

- ماشى.. يراقب وقت خروجه.. والأماكن إلى متعود يترده عليها.. والوقت الذى يبقضه فى كل مكان.. إن كان عمل أو قهوة أو خمار أو غيره .. ووقت نومه.. ومين متعود يزوره.. وإمتى وبالمعلومات دى يتحدد الوقت المناسب للتنفيذ ومدته والعدد اللازم
- بس إنت كده كبرت الموضوع.. ولو إنكشف ح أروح أنا فى داهية.. والجرايد ح تصورنى رئيس عصابة.. وانت عارف مركزى.. أنا مش عاوز ارتكب جريمة.. أنا عاوز الورق ده علشان أبرأ نفسى
- ماتخافش يابيه .. الشغل مايجيش إلا كده
- والناضورى ؟
- شغلته يراقب الطريق وقت تنفيذ العملية .. فيه شغلته يكفى فيها ناضورى واحد .. وفيه شغلته يلزمها اتنين أو ثلاثة أو خمسة .. حسب المداخل والنواصى الى ممكن ييجى منها الخطر
- والطفشجى ؟
- ده مفتاح العملية.. فيه طفشجى شق .. وفيه طفشجى خزن.. وفيه عملية تحتاج الاتنين .. واحد يفتح الشقة والثانى يفتح الخزنة والدواليب والصناديق
- والمناول ؟
- ده الذى يفتش عن المطلوب .. وممكن العملية تكون كبيرة وتحتاج أكثر من مناول
- واللقاط ؟
- المناول ما يصحش ينزل بالمسروقات.. يناولها من منور أو بير سلم أو بلكونة أو سطح .. واللقاط هو الذى يقدر يتصرف ويمشى بالمسروقات فى الطريق .. وده له طريقته
- ده جيش ياعصفور.. دى كتيبة.. ولا الحرب
- آمال يابيه.. إنت فاكرو إيه.. ده غير حاجات تانية كتير.. فى عمليات تحتاج لحمالين أو شباليين أو ماسح بصمات وتحتاج عربيات وخلافه.. ويجوز العملية تحتاج بلطجية بالسنج مادام صاحب الشقة زى ما بتقول من أهل المهنة.. لأنه ممكن يرجع الشقة فجاء.. ويكون مسلح أو معاه أعوان ..
- ما حدش بياكلها بالسهل.. والله دول أفضل من الجماعة السكة التى زى حالاتى .. الواحد مننا يطلع ورا الزبون الأوتوبيس.. ويفضل يلفه يمين وشمال ويدوس على رجله أو يخبطه كرع أو يقع عليه لغاية ما يلقط المحفظة.. وينط والأوتوبيس ماشى بأعلى سرعة.. ويفتح المحفظة يلاقى فيها شوية ورق وعناوين وأرقام تليفونات.. الناس اتنصحت يابيه ما عادتتش بتحط فلوسها فى المحافظ.. الواحد من دول يادوب يخرج من بيته بفلوس مشواره.. وإن خرج بمرتبته كله تلاقيه رابطته على بطنه .. كتنا نيلة فى حظنا الهباب
- طيب يا أوسطى عصفور.. أنا مش عاوز أقابل كل دول.. ولا أشوفهم ولا هم يشوفونى.. معلش الاحتياط واجب.. أنا عاوز أقابل رئيسهم بس .. وتكون انت معانا.. أنا ما اعرفش غيرك.. وأى اتفاق يكون على ضمانتك.. وأدى رقم تليفونى.. لما تتفق معاه حدد ميعاد واتصل بى.. فى التليفون ما تقولش أى حاجة.. ولا حتى اسمك .. أنا ح اعرفك من صوتك
- رقبتي سداة يابيه

وصل بعد الغروب.. فوجدتها واقفة على ناصية السطح ولأن السور واطئ.. فهو يكشفها حتى نهاية
بطنها الكبير المنتفخ.. ملونة مزركشة.. وجهها الأحمر الأخضر الأسود المستدير تحيطه عصاة شعرها
البيضا.. كأنه طبق سلطة .. وعندما دخل باب العمارة أحس بأنفاسها على رأس السلم وهو مازال
في الدور الأول.. ويعينين دامتعتين ألتقت بالمائة كيلو لحم وشحم وعظم في صدره وطوقته بذراعيها
فوصلته رائحة الياسمين الزاغة الذي تشتريه من عطار في الغورية

- حرام عليك يا فهمي.. كل ده غياب .. طيب افكرنى حتى بتليفون.. عمك الحاج راقد عيان ..
واختك طول النهار ماسكة كتاب .. وأنا مش لاقية حد اكلمه
وقالت كلاما كثيرا.. هز رأسه له مرارا وإن لم يسمعه.. وأفلت منها بصعوبة ودخل إلى العشة ..
فوجدتها نائمة .. فوقف أمامها يتأملها

(مسكينة.. أصبحت تبيت وحدها في عشة فراخ.. لا أبا ولا أما ولا بنتا ولا ولداً ولا زوجا.. ولا حتى
صديق.. صابرة ومستسلمة للقدر.. مهما كانت مخطنة فهي في النهاية إنسانة .. وتستحق التسامح
والرحمة)

تتهبت لحضوره فتهضت جالسة ومدت ذراعيها تستقبله .. ولم يكن يتصور أن تفاجئه بهذا الخبر..
(تشك أنها حامل) وسألها عن التفاصيل وهو مذهول.. فأقسمت أنها لم تكن تعرف.. وأن الدورة
الشهرية جاءتها تقريبا في موعدها أبعد بقليل .. ولكن الآن جاءتها أمارات (الرحم) .. فطبيب
خاطرها ونصحها بالصبر.. وكأنه يطيب خاطره وينصح نفسه.. وقال لها مندهشا.. أن اتصاله بها كان
من مدة قريبة لا تسمح بذلك.. فأكدت كلامه.. وأكدت أنه لو ثبت ذلك فبالقطع من خيشة

في المساء.. اختفت في عباءة بدیعة وتنقبت.. وصحبها إلى الطيبة.. وعلمها بالخبر اليقين.. الحمل
عمره ثلاثة أشهر.. وقالت الطيبة.. أن الدم الذي جاءها في موعد الدورة لم يكن دم الدورة الشهرية ..
ولكنه كان نزيفاً وتوقف واستمر الحمل.. وأن عملية الإجهاض انتهى أوانها بعد أن زاد الحمل عن
شهرين .. وأن الإجهاض معناه وفاتها .. وليس هناك طبيب يجري على أن يفامر بذلك

قضيا الليلة في السطح.. والترازا يستور على طرف الحصيرة يصدح.. وعم بدوى بعد الشيشة غفا
وتمدد.. فعادت الحرية لعيني بدیعة.. ترمقه من فوق أوراق الكوتشينة.. وهو ووسام يلقيان بالورق
على الأرض في ملل.. وتفكيرهما منحصر في هذه المصيبة التي حلت بهما.. إلى أن أوشك الفجر..
فلحقت الست بدیعة بعم بدوى.. ولم يطاوعه قلبه ولا ضميره أن يتركها وحدها في محتنها.. فدخل
معها العشة.. ونام بجوارها فانكمشت في صدره كأنها ابتنته.. فأدخلها في حضنه.. يواسيها..
ويحميها من الدنيا والناس والمستقبل المظلم .. ومن احتمال تفكيرها مرة أخرى في الانتحار

اتصل به عصفور .. وعلى نفس المقهى التقى به ورئيس العصابة .. وبعد أن بالغا فى الترحيب به دخلوا فى التفاصيل .. إلى أن وصلوا إلى الأتاع فطلب رئيس العصابة عشرة آلاف جنيه .. فقال له فهمى أن الموضوع ليس محتاجا لمراقب .. لأن خط سير خيطة معروف من زوجته وسيحكيه لكى يحددوا وقت تنفيذ العملية .. والعمارة على ناصية مفترق طرق وطفشجى واحد يكفى لأن الشقة ليس بها خزانة .. ولاداع للقاط لأن المطلوب شيكات وقسيمة طلاق .. يضعهم المناول فى جيبه وينزل

نظر المعلم حكة إلى الأوسطى عصفور بغيظ .. وقال بلهجة ساخرة مستفزة .. يكاد يلطمه على وجهه - باعت لى ليه ياسى عصفور .. مادام العملية هابقة كده ثم التفت الى فهمى وقال بنفس الضيق والسخرية

- يابيه .. مادام انت ابن كار .. وفاهم العملية من ساسها لراسها ماتقوم بها انت .. وتوفر القرشين اللى واجمعينك .. وبلاش احنا نشتغل وكفاية ناكل طوب

واستدار فأعطاها ظهره .. وشد نفسا من الشيشة بعصبية فكركر الماء فى زجاج الشيشة بغضب كأنه يصرخ .. فاستدار فهمى وعصفور إليه يسترضيانه .. حتى استجاب لهما وأعطاها وجهه .. وقال شارحا .. وهو يسط كفيه متعجبا

- يابيه انت بتقول شيكات بتسعين ألف جنيه .. وعاوزهم يوصلوا لك بالتمام والكمال وانت قاعد فى بيتكم .. هى دى مش فلوس ينصرف عليها فلوس .. هى دى مش عاوزه رجالة .. والرجالة عايزة فلوس .. المثل بيقول (أحرس القصب بالقصب)!

- معلش يامعلم .. عشرة آلاف جنيه كتير .. لأن النصاب اللى عنده الشيكات .. مستعد يردهم لى بخمسة آلاف جنيه

- ناوى يردهم لك بخمس آلاف جنيه .. لكن ناوى يدى لك عقد الجواز بكام ا دى خدمة منك

- يابيه أنا أخدمك برقبتي .. بس أنا وراى رجالة وبيوت مفتوحة

- معلش .. خليها عليك شوية والرجالة ح ترزق من الشقة

- آخر ماعندى .. أخذ الخمسة واحنا ورزقنا فى الشقة .. ورننا معانا .. يكرمنا ويطعمنا .. وعقد الجواز (كادو) من عندى .. بس حلاوة عصفور عليك

- ماشى ياسيدى

- إدينى عربون .. وادينى ثلاثة أيام أعمل فيهم البنزس .. ولما عصفور يدى لك ألو .. تكون جاهز بباقي المبلغ قبل التنفيذ .. والباقي على الله .. يرجعنا مجبورين الخاطر .. علشان نجبر خاطرك وخاطر البنية المسكينة المظلومة .. (قول يارب)

اتصل بالمحامى فقال له أنه للآن لم يصل إلى معرفة عنوان المأذون.. وختم كلامه مهونا (قول يارب)
فرد فهمى بيأس وضيق
- انت تقول يارب .. ورئيس العصابة يقول يارب.. وخيشة يقول يارب .. وكل اللي فى الخمارة
يقولوا يارب .. أنا احترت

ذهبت إلى طيبة أخرى وحدها وعادت بنفس النتيجة.. لا مفر من استمرار العمل.. تركها تحكى
وتاه يفكر فى الأحوال والدنيا والناس.. وكيف وصل به الحال إلى ما هو فيه.. زوجة مريضة.. وامرأة
حامل معلقة فى رقبته لا يستطيع ضميره التخلّى عنها.. وثالثة مجنونة تتصدى له على رأس السلم
تطارده فى الصعود والنزول فى مناخ لا يسمح له بمجاراتها.. وعدو مترص يملك ببساطة جسده إذا
فقد الأمل فى الضغط عليه.. وطريق جديد يمشى فيه غير مأمون العواقب
(معقول ! معقول ! أنا أدير خطة لسرقة شقة.. حرامى.. رحمتك يارب.. وسترك الذى طلبه رئيس
العصابة.. أنا مش بأسرق.. أنا باسترد حقى)

ومرت الأيام الثلاثة واتصل به عصفور وحدد الموعد والمكان.. مقهى بجوار شقة خيشة.. وتحلق
رئيس العصابة ورجاله حول منضدة وشربوا الشاي.. وناولوه فهمى من تحت المنضدة باقى حساب
المعلية.. فغمز لرجاله وغادروا المقهى.. وبقي هو وعصفور.. واستمر غيابهم ساعة وهو يأكل بعضه..
وعادوا .. فأشاروا لهما من خارج المقهى فتبعهما .. وعندما وصلت العصابة إلى ناصية الشارع
الرئيسى تبعثر.. كل منهم فى اتجاه .. واتجه نحوهما رئيس العصابة وقال على الفور
- قلبنا الشقة عاليها وأطيها مالتينا ش حاجة.. لاعتقد ولا شيكات.. ولا أى شى! ياخدوه الرجالة.. زى
ماشفت كلهم خارجين إيديهم فاضية.. ده رجل معفن.. زبالة.. أمال فين الفلوس إالى بيهلها.. نصاب
خايب صحيح.. وأدى ياسيدى جواز سفره .. أمانة علشان تصدق إننا دخلنا الشقة
ثم سحب عصفور من ذراعه قائلا
- تحيتك على أنا يا عصفور.. البية ما يقدرش يدفع أكثر من كده.. لأنه ماطلعش بحاجة.. إحنا برضه
ولاد بلد ونفهم .. سلام يابيه
وأشار إلى تاكسى واستقلاه.. واختفى التاكسى واختفت معه الخمسة آلاف جنيه

وقف شاردا.. لا يسمع أبواق السيارات التى تحلوه وتكاد تطيح به.. ثم تنبه إلى أنه يقف فى نفس
المكان بالضبط.. الذى سبق أن ودعته فيه وسام بعد خروجهما معا من شقة خيشة بعد توقيع
الشيكات.. فتعجب وقال لنفسه (أول مرة شيكات بتسعين ألف والمرة الثانية خمسة آلاف
نقدا.. أيهما الأفضل والأنسب فى هذه اللحظة.. أبكى أم أضحك).. ثم هز رأسه وأخرج لسانه
للموقف كله.. فشعر بحرارة بين لسانه وشفتيه.. وأشار لتاكسى

- عندما سمع المحامى ما حدث ضحك طويلا فى التليفون .. وقال
- هات المدام معاك وتعال حالا .. عندي لك خبر يعرض لك الخمسة آلاف جنيه
- خير ؟
- عرفت لك المأذون
- فين ؟
- زى هى ماوصفته تمام.. قالت التاكسى لادخل يمين ولا شمال لغاية ماوصلوا للمأذون.. فعلا..
- دكان على ناصية شارع رمسيس وشارع احمد سعيد تحت كوبرى غمرة
- بعد ساعتين كانا فى سيارة المحامى فى طريقهما إلى هناك .. بمجرد نزولها من السيارة اندفعت
- داخل الدكان .. وهتفت
- مضبوط .. المكتب والدكة والجرول والمقشة
- ثم استدارت وأشارت إلى كوم المخلفات تحت الكوبرى وقالت كأنها تبرى نفسها من سخرتهما
- حتى الزبالة أهه
- دهشا لأن المأذون شاب بالكاد تخطى الثلاثين.. يرتدى فائنة مخططة وينطلون جينز.. تجاهلها وقال
- بهديوه مشوب بالحذر .. أنه لايتذكر أنه عقد قران لهذه السيدة.. ولما طلبوا منه أن يرجع إلى
- دفاتره.. أخذ يتصفح دفترا بعد آخر بفتور ويسألها.. (متأكد أنه أنا ؟.. كان سنة كام ؟.. كان مين
- معاكى ؟ العريس كان شكله إيه ؟ .. مااعتقدش الاسم ده مر على)
- أغلق دفاتره وبسط كفيه مؤكدا أن هذه الواقعة لم تتم فى مكتبه.. فهاجت .. وانقضت بذراعيها على
- صدره .. وهى تصرخ وتؤكد أنه كاذب .. ومتواطئ معه.. خلاصه من يديها بصعوبة .. وأعادها إلى
- السيارة .. ثم عادا إليه.. وقال المحامى له مهددا
- اسمع.. هى وصفت لنا المحل قبل ماتشوفه.. ولما شافته عرفته وعرفتك.. وانت كذاب.. أنا عارف
- تاريخ عقد الزواج.. وح أحصل على إذن من النيابة بالرجوع لنسخة الدفتر الموجودة فى الحفظ.. وإذا
- ثبت تأمرك معاه ياولك.. ح أضيق مستقبلك .. إنت مأذون لك كام سنة ؟
- ثلاث سنوات .. محل والدى المتوفى
- مؤهلك إيه ؟
- ليسانس حقوق
- كمان .. ياأخى احترم شهادتك

انهار المأذون جالسا .. وضع رأسه بين كفيه وقال
- استريح يابيه ح أشرح لك كل حاجة وأريحك .. وغلطة يابيه ومش ح تتكرر .. الأفتدى اللى
اتجوزها .. اتجوز غيرها عندى خمس مرات .. كل مرة يزورنى قبل العقد وحده ويدفع لى الرسوم وزيادة
مائة جنيه .. ويصلينى الهياتات والشروط زى ماهو عاوز .. ولما يزورنى تانى ومعه العروسة أسأله
وأسألها .. وأعمل إجراءات صورية .. ولكن المهر والمؤخر والشروط فى العقد اسجلها حسب اللى
اتفقنا عليه فى غيابها .. وسيادتك عارف إن العقد بينكتب من أربع نسخ .. نسخة للعريس ونسخة
للعروسة ونسخة للسجل المدنى ونسخة ثابتة فى الدفتر اللى بيرجع تانى المحكمة للحفظ .. ودأىما
يتفق معايا على إن النسخة الرابعة الثابتة فى الدفتر ما أسجلش فيها اسم العروسة علشان ماتقدرش
بعد كده تطلع مستخرج من عقد الزواج .. إدينى يابيه فرصة لغاية بكرة .. تيجى تلاقى مستخرج
مختوم جاهز
- ح تعمل إيه ؟
- ح أروح أكتب اسمها فى الخانة الفاضية فى الدفتر .. وبعد كده أطلع لها المستخرج .. وسماح
يابيه وأوعد سيادتك إن دى آخر مرة

وتركهما وجرى إلى السيارة .. فخرجا خلفه
- حقلك على ياهانم .. أنا آسف .. ورحمة أبوى مش ح تتكرر .. سامحينى .. وغللى البهوات
يسامحونى .. بكرة تكون عندك القسيمة

ركبا السيارة .. ولما جلس المحامى أمام عجلة القيادة دار المأذون ووقف أمامه ذليلا ورفع يده
بالتحية
ضرب فهمى كفا بكف وقال متعجبا
- يا أنطاف الله .. حتى المأذون .. حتى ممثل الحكومة والقانون والدين والشرع .. إيه .. بقينا كلنا
نصايين يا اولاد .. الواحد بدأ يشك فى نفسه
فضحك المحامى .. وقال
- وتشك فى نفسك ليه .. إنت مش كنت من يومين زعيم عصاة وسرقت شقة .. ومين عالم .. أنا
بالأخويا ح اغير كالون شقتى
وانفجروا جميعا ضاحكين مستبشرين .. وأول الغيث قطرة

شجعهم انتصارهم فى معركة المأذون على مواصلة الجهاد .. فماداموا لن يستطيعوا الحصول على معلومات من تحرياتهم فى المديرية .. فعليهم الحصول عليها من تحرياتهم مع جيران خيشة .. توجه فهمى الى العمارة التى بها شقة خيشة .. وسأل صاحب محل خردوات فعرف أن المسئول عن هذه العمارة يسكن فى آخر دوز .. فصعد إليه

تعارفا .. وخلال ثلاث ساعات .. ومرطب فشاى فقهوة .. حكى فهمى .. ثم حكى وكيل العمارة .. (الشقة استأجرتها من عشر سنوات راقصة فى كباريهات شارع الهرم اسمها عزيزة .. وتعرفت على خيشة وتزوجا وانجبا بنتا .. ثم سافرت للعمل فى كباريه فى الشام .. غابت ثلاث سنوات وعادت فوجدت زوجة أخرى فى الشقة .. وابنتها قد أصابها شلل أطفال .. وبعد مشاكل وحناقات ومحاضرات بوليس .. تنازلت له عن الشقة مقابل أن تأخذ ابنتها وتساير الى بلدها .. تعتزل الرقص وتبحث لها عن علاج

ومر على ذلك حوالى خمس سنوات .. ورد خلالها على هذه الشقة نساء أشكال وألوان .. واحدة تأتى وواحدة تذهب .. نراه مع واحدة فى (البلكونة) فى هذر وانسجام ويشربا الشاي كأى زوج وزوجة .. وبعد أيام نجدها واقفة على السلم تلعن أبوه ومعهما عسكرى أو أمين شرطة .. يختفى كم يوم حتى تياس ثم يعود .. ومعه امرأة أخرى .. وهكذا .. وضرب فى هذه الشقة مرات .. ينصب على واحدة .. يترصص له أهلها حتى يدخل (ويرقعوه) العلقه

فى النهار يختفى وفى الليل تتجمع عنده شلة السكر والحشيش والقمار .. خمس سنوات لم يدفع الإيجار .. نطلب يقول (لما المدام ترجع من السفر) .. ونحن نعرف إنها هربت منه ولن تعود صاحب العمارة دكتور فى المنصورة .. وأنا موكل بتحصيل الإيجار .. وأخيرا السكان ضغطوا على المالك ليرفع دعوى طرد .. لعدم وفاء المستأجرة الأصلية بالإيجار ولأنه كزوج للمستأجرة يسئ استعمال العين ويستغلها فى أعمال غير مشروعة .. ووعدا بالشهادة فى المحكمة بذلك .. فتشجع المالك ورفع الدعوى .. ولها سنتين أمام القضاء

تصور .. واحدة .. نصبت له هى وأهلها كمين وترصدوا له حتى عاد .. وصعد .. وضربوا الجرس فلم يفتح .. كسروا الباب ودخلوا فلم يجدوه .. جمعت حاجاتها وأثناء خروجهم شعروا بحركة .. عادوا فوجدوه مختبئ فى جوال تحت السرير .. جروه وضربوه العلقه وهو داخل الجوال .. آخر واحدة رأيناها معه فى الشقة .. هى الست المسكينة التى حكيت عنها)

- انا اخذت من وقتك كثير .. أشكرك .. جزاك الله كل خير

- ناوى تعمل ايه ؟ ..

- ح أروح لعزيزة أكمل تحرياتى .. واللى يأذن به ربنا يكون

- بلغها عن لسانى .. إن تنازلها له عن الشقة غير قانونى .. وتمسكه بالشقة غير قانونى .. صحيح اجراءات التقاضى حبالها طويلة وتستغرق سنين .. لكن فى النهاية ح يحكم لنا بالطرد .. وأنا اقنعت صاحب العمارة إن اللى ح نصرفه على القضية نعطيه لها .. وتتنازل لنا عن الشقة .. وفى نفس الوقت تنتقم لنفسها ولابنتها من الكلب ده

- ح انصحبها بكده
أخذ فهمى من وكيل العمارة عنوان المالك فى المنصورة.. واسم الكباريه الذى كانت تعمل به عزيزة
وشكره وانصرف.. وعاد الى التى تنوء بالهم فى رأسها والحمل فى بطنها.. وقد بدأت تستكين
وتستسلم لقدرها ذابلة.. دامعة.. فاقدة الشهية والرغبة فى الحياة.. وتحت ضغط حالتها اضطر إلى
ملازمتها أياما.. وطلبت زيارة الحسين.. الذى سبق أن تأففت منه ومن ناسه.. فتعجب لتصاريف
الإنسان والأيام

عاد إلى بيته فأبلغه المحامى أنه حصل فعلا على مستخرج صحيح رسمى من عقد الزواج .. وأن
المهر المذكور فى العقد خمسة وعشرون قرشا .. والمؤخر جنيها .. وضحك وقال
- يعنى اتجوزها بجنيه وربع

فصح له فهمى المعلومة
- ياريت.. دة اتجوزها بفلوسها وتحويشة عمرها ومصاغها.. وبفلوسى وساعتى وخاتمى .. ولسه
منتظر مؤخر صداقه .. شقتها وتسعين ألف جنيه

ووعده المحامى برفع دعوى الطلاق فورا .. مستعينا بمحضرها ضده والكشف الطبى عن
عملية التعذيب

فى المساء.. توجه إلى الكباريه.. قابل أحد المسئولين.. وسأله عن عنوانها فأوصله الى راقصة أخرى
صديقتها تعرف عنوانها

فى حجرة بها سرير وعدة كراسى و(تسريحة) ذات مرآة كبيرة.. وعدة شماغات على الحائط.. معلق
عليها كثير من أثواب الرقص.. جلسا على كرسيين متقابلين.. عرفها بنفسه وأخذ يحكى لها
باختصار قصته مع وسام وخيشة.. وكان بالحجرة غيرهما خمس راقصات شابات جميلات فى مقتبل
العمر.. إحداهن تكاد تكون صبية لم تصبح امرأة بعد ولكنها مصبوغة كامرأة فى الأربعين .. وأخرى
واقفة فوق رأسه تمشط شعرها.. وثالثة وقفت تتقصع وتتشدق بقطعة من لادن تحت ضروسها ومن
حين لآخر تفرقع بها كلما راعها شيء مدهش فى كلامه .. ورابعة جالسة أمام المرآة الكبيرة تلون
وجهها .. وخامسة تضع ساقا بعد ساق على طرف (السرير) وتذلك فخذها بالكريم

تألمت لكلامه.. وشجعتة على زيارة عزيزة وأكدت له أنها سوف تقف معه بكل قوتها لأنها (محروقة)
منه.. واعطته عنوانها تفصيلا.. فشكرها

وصله استدعاء مع شرطى .. بضرورة التواجد فوراً أمام السيد رئيس المباحث للسؤال.. وقع بالاستلام ثم اتصل بالمحامى.. وقال له أنه يعتقد أن الاستدعاء لأن خيشة إتهامه بدخول الشقة فى غيابه .. فهون عليه الأمر وقال .. (أنت لم تدخل الشقة فعلاً.. ولم تسرق.. والذين دخلوا خرجوا بسلام .. ونصحته بالتوجه فوراً إلى المباحث ثم إبلاغه
 قدم نفسه لرئيس المباحث .. فأخرج من الدرج ورقة صغيرة وقرأها بصوت عال
 (يقبض على المدعو فهمى ابوالوفا .. ويرحل إلينا فور القبض عليه لسؤاله فى الاتهام الموجه إليه بالنصب والاحتيال .. رئيس مباحث أسيوط)
 وسأله الضابط .. فقال أنه لا يعرف شيئاً عن هذا الاتهام .. فمط شفتيه .. وقال
 - مضطرين نحجز سيادتكم للصباح .. ياعسكرى .. نزل الأستاذ الحجز

بين غمضة عين وانتباهتها كما يقول الشعراء.. نزل من الدور الثالث إلى الأرضى.. الشرطى يمسكه من ياقة الجاكتة من الخلف بغير احترام.. وأمام صول عجوز يكاد ينالم وهو جالس.. ويدون كلام أعطى الصول للشرطى المفتاح المعلق على مسمار بالحائط خلفه.. فعاد به الشرطى.. ولكن ليس إلى فوق بل إلى تحت.. إلى البدروم.. فتح باب الحجز الحديدى .. ومشى فى طريقة طويلة .. انتهت بثلاثة أبواب.. فتح أحدهم ودفع به كما تدفع امرأة دجاجة داخل القفص .. وأغلق الباب وانصرف.. هكذا فى لحظات ككوارث القدر
 الحجز حجرة كبيرة بمصباح ضعيف ضوءه باهت هزيل.. والفراغ معبأ بدخان كثيف كأنه سحب.. ودرجة الحرارة مرتفعة تزيد عن الأربعين.. ورائحة كريهة عفنة نتنة تصدم الأنف.. وصخب شديد وضجيج مزعج.. وقف مذهولاً مدعوراً كهزيمة شاردة أبعدت عن القطيع.. ظل زفيره يعود إليه زفيراً حتى تقبلت رثاه هذا المناخ الخانق بعد ربع ساعة.. واستوضعت عيناه المكان .. أشخاص بين واقف وجالس وممدد.. أغلبهم تخلصوا من ملابسهم إلا القطعة الداخلية السفلية.. أجسادهم تنصب عرقاً.. وفى أيديهم لفائف التبغ أو المخدرات.. شعث غير كأنهم نبشوا قبورهم وعادوا من ثباتهم أحياء.. لا يجدون ثغرة فى هذا القبر يفرون منها

ومر الوقت.. وهذه الموقف وتعب من الوقوف فجلس القرفصاء.. فتجمع حوله بعض الفضوليين يسألونه عن التهمة التى أتى بها أو التى أتت به.. ومع اتصال الليل عرف تهمهم .. (تصادم بين سيارتين فأتوا بالسائقين إلى القسم.. قدم أحدهم بطاقة تثبت أنه شخصية كبيرة فأخلى سبيله وعاد إلى بيته.. والآخر مجرد مواطن عادى فأتوا به إلى هنا.. شاب ضبط معه فى الطريق سيجارة (بانجو).. اثنان جرحى فى مشاجرة.. صاحب محل ألبان يغش اللبن.. بائع كرشة ضبط فى بضاعته قطعة مذهوجة.. جزار ذبح زبونا طالبه بتقليل نسبة المعظم.. ترمى يبيع جثث الموتى لطلبة الطب.. لصوص ونشالون وقوادون وتجار مخدرات .. مختلسون ومزورون ومزيفون وممدلسون

ومحتالون..مهرجان وكرنفال شامل للجريمة..بين ظالم ومظلوم).. ولكن لم يصيبه بالذعر إلا حالة واحدة .. متهم بتحرير شيك بدون رصيد .. فأخذ يستوضحه عن التفاصيل لعله يستفيد

مع الفجر بدأت الجزوع تتساقط..فتمددوا على أسفلت الزنزانة..ونعالهم تحت رؤوسهم وعلا شخيرهم..وبنوم الأغلبية قلت كثافة الدخان في هواء الزنزانة..فوضعت له كتابات على الجدران كتبت بالطباشير بخطوط ركيكة..كتبته أجيال تلو أجيال كانوا هنا يوما ورحلوا

الداخل مفقود والخارج مولود

حكشة وبرهومة والنص .. شباب تاب بعد عذاب

ياما في الحبس مظالم

الحرام ما ينفعش وأدى آخرتها

تهمة من غير دليل .. تفة في مندبل

الذل في ضعف النفوس قدام الفلوس

الدنيا ساعة اجعلها طاعة .. والنفوس طماعة علمها القناعة

إوعى تنسى هذا المكان مهما طال بك الزمان

الحياة حلوة والزمن غدار

اللى يخاف من المسكرى يطلع له

رينا يخرجننا منها على خير

أوعى تأمن لصنف النساء

كله من النسوان

الجريمة امرأه

زفر بمرارة وهمس (منك لله ياوسام) وأسند رأسه للحائط .. وحاول أن ينام

في الصباح سمع صرير المفتاح الحديدى فى الباب فانتبه..وفتحت الزنازين الثلاثة..فانتشر السجناء فى الطرقة الكبيرة وتزاحموا على دورة المياه ..كل منهم يقضى حاجته على الأرض على مرأى من الزحام المنتظر دوره..ثم نادوا بعض الأسماء وهو منهم .. وصفوهم طابورا وأجلسوهم القرفصاء .. وآخر الطابور النسوة وكن ثلاث..إحداهن خطفت طفلا والأخرتين ضبطتا فى شبكة دعارة .. وأعادوا باقى المساجين إلى الزنازين وأغلقوا عليهم الأبواب.. قيدوا كل اثنين معا بالكباشات..وصعدوا بالطابور إلى الدور الأرضى فأعادوا قراءة الأسماء والحد وأعطوا التماس للضابط النوبتى..ثم

قادوهم إلى الشارع وحشروهم فى سيارة انطلقت بهم فى شوارع القاهرة

تعلق بقضبان نافذة زنزاة السيارة المربعة التى لا تزيد مساحتها عن مساحة ساعة حائط.. يتابع مايجرى فى الشوارع كأنه لم ير القاهرة منذ شهر .. يدس أنفه بين القضبان ليلتقط هوائا أنقى مما فى جوف السيارة .. وكأنه كلب محبوس فى صندوق كبير

توقفت السيارة وفتح الباب .. ونادى الجندى اسمه فتقدم .. ففك قيده وعفقه من قفاه وقاده إلى مبنى مكتوب على بابه (الترحيلات)

وبعد عدة إجراءات تسجيلية تركه العسكرى فى سلامة الله وحفظ المسئولين ففتحوا باب زنزانه وزجوا به.. ليعود إلى حالة لا تختلف كثيرا عما كان فيها.. وبالتقصى من الزملاء القدامى المخضرمين فى عالم الجريمة.. عرف أن هذا المكان موجود خلف قسم الخليفة بميدان القلعة.. واسمه (التخشيبية).. وهى الجهة الوحيدة فى القاهرة التى يطلق عليها هذا الاسم.. وهى المكلفة باستقبال المقبوض عليهم من كافة أقسام الشرطة لترحيلهم إلى المحافظات المختلفة المطلوب عرضهم عليها

قضى الليل فى التخشيبية كما قضاءه فى حجز قسم الشرطة.. وفى الصباح نادوا الأسماء حسب المحافظات.. وكل مجموعة ساقها مندوب المحافظة كما تساق البهائم إلى محطة السكة الحديد.. وساقه جندى عبر المواصلات العامة بدون تذاكر.. وأمام محطة سكة حديد الجيزة محل كشى .. دعى فهمى الشرطى أن يكون ضيفه .. وأثناء الطعام فك الشرطى القيد من يده .. وبعد أن دفع الحساب شكره بإعادة القيد

فى عربة قطار الدرجة الثالثة القديمة.. التى خلت شبابيكها من الزجاج والشيش.. وعلى دكة ليس بمقعدى سوى خوصتين من خمس جلسا.. قدم له الجندى سيجارة فشكره وعرفه بأنه لا يدخن.. وتنبه فاشترى له علبة.. ثم اشتبكا فى حديث ساذج قضى على ملل الطريق وإن لم يقض على حرارة الشمس الحارقة والرياح المحملة بالأتربة والرمال التى هاجمتها من النوافذ.. إلى أن وصلا إلى أسبوط

فى مبنى قديم وسط المدينة كانت النيابة فى الدور الثانى .. سلم الجندى أوراقه للجندى الواقف بالباب فدخل بها إلى وكيل النيابة .. فأمرهما بالدخول

- فكده ياعسكرى .. وانتظر بره

ثم التفت إليه

- الأستاذ فهمى أبو الوفا ؟

- أيوه يا أفندم

- بطاقتك

فناولته البطاقة

- مدير عام .. وكمان عضو اتحاد الكتاب .. هم الكتاب اليوميين دول بيشتغلوا نصابين ا

.....

- إيه ياسيدى حكاية العربية اللى بعثتها للمست جمالات ؟

- مش فاهم يا أفندم

- نعم يا أخويا .. إنت جى من مصر لغاية أسبوط علشان تقول مش فاهم

- صدقتى مش فاهم.. أنا ماعنديش عربية.. العربية الوحيدة اللى كانت عندى بعثتها من خمس سنين

أخرج ملفا من درجه وفتحته وفحص الأوراق .. وضع إصبعه على سطر .. ثم قال

- يعنى المدعوة جمالات عبد الرحيم سالم .. بتدعى عليك

- أنا ما أعرفش ست بالاسم ده
 - كمان ا .. آه .. ده انت ناوى تتعبنا
 نهض والملف فى يده وغادر الحجرة .. وبعد دقائق دخل الجندى المكلف بحراسة الحجرة وقاده إلى
 الطرقة .. ثم أدخله حجرة أخرى على بابها لافتة مكتوب عليها (رئيس النيابة) .. بها مكتب يجلس
 عليه رئيس النيابة كما يعبين من اللوحة المعدنية المتصدرة مكتبه .. وعلى كرسى بجانبه جلس وكيل
 النيابة الذى كان معه .. وقال رئيس النيابة
 - إيه يا أستاذ فهمى .. إنت رجل مسئول ومركز كبير وأديب .. خليك سهل معانا .. عاوزين ناخذ
 منك كلمتين ونقفل المحضر .. وفى المحكمة إبقى انكر زى مانت عاوز .. إحنا مانحبش نزع
 ضيوفنا اللى جايبين من مصر .. على الأقل لما ترجع تقول فى حقنا كلمة كويسة .. مانت كاتب
 - صدقنى يا أفندم فى حياتى لم أملك سيارة إلا مرتين .. الأولى فى أول شبابه .. والثانية بعثها
 من خمس سنين لصديق .. والست دى عمرى ماسمعت عن اسمها
 - إنت جيت أسير كام مرة ؟
 - مرة واحدة
 - إمتى .. ؟
 - من ثلاثين سنة
 - وضحكا .. وعلق رئيس النيابة
 - يعنى قبل احنا مانتولد
 - بالضبط يا أفندم
 - وجيت تعمل إيه .. تتفصح فى أسير
 - لأ .. كنت ضابط فى الجيش .. فى المنطقة العسكرية بمنقباد
 - يعنى ضابط ومدير عام وأديب .. طيب يا أخى مش تريحنا .. وتقدر معاملتنا الطيبة لك
 - يا أفندم .. أنا بكل سنى وأخلاقي ومركزي الأدبي وثقافتى .. أعرف إن أقصر طريق إلى قلب المحقق
 هو الصدق .. تمام زى مايقولوا بتوع الهندسة إن أقصر مسافة بين نقطتين هى الخط المستقيم
 - جميل جدا
 - بهذا المفهوم باقول لسيادتك أنا لاهت عريية ولا أعرف الست دى ولا جيت أسير من ثلاثين سنة
 - يعنى ماجتش من شهرين .. افكر يمكن تكون ناسى
 - فكرنى يابيه
 - وضحكا مرة أخرى
 - أنا أفكر .. يعنى إيه .. أحكى لك حواديت
 - آسف يا أفندم .. أقصد قل لى إيه الموضوع بالضبط .. يمكن كلام سيادتك يفتح لى سكة .. وأعرف
 الاتهام ده جه منين
 فتح الملف وأخرج محضر الشرطة .. وقلب صفحاته وقال وهو يقرأ وينقل إصبعه بين السطور

- إنت أعلنت فى الجورنال عن بيع سيارة.. وكانت السيدة جمالات عبد الرحيم سالم فى زيارة القاهرة وقرأت الإعلان.. واتصلت بك وأخذت العنوان وزارتك فى مكتبك بالقاهرة .. وعايّنت السيارة وكتب معاك عقد ابتدائي .. ودفعت لك الثمن عشرين ألف جنيه .. وانت صممت توصيلها لغاية أسبوط من باب المجاملة .. وطلعت معها شقتها وشريت الشاى وأعطيت لها المفتاح وسلمت عليها ونزلت .. ومفتاح تانى كان معاك أخذت السيارة وهربت

- ماحصلش

- العقد الابتدائي أهه .. قرب .. مش ده توقيعك وقال ناصحا ومحدرا .. وبلهجة فى غاية الهدوء

- خللى بالك .. إحنا لغاية دالوقت بنتكلم معاك شفهي.. مافتحناش محضر .. وأوعدك لو حكيت لنا الحقيقة .. أنا ح أبعت لها وأسوى الموضوع بينكم ودى .. حفاظا على مركزك

- وشرف سيادتك ماحصل

- لا مالكش دعوة بشرفى .. ماتزعلنيش منك

- وشرفى أنا

- شرفك إنت ح نعرفه دالوقت .. يا عسكرى

ودخل العسكرى المكلف بحراسة الباب

- نادى لى أمين شرطة

فخرج وعاد ومعه أمين شرطة.. كتب له رئيس النيابة العنوان فى ورقة.. وأمره أن يحضر السيدة جمالات .. فاستلمها وخرج .. ثم أمر العسكرى أن ينادى للعسكرى الذى حضر به من القاهرة فخرج وعاد به

- خد الأستاذ يقعد معاك برة لغاية ماأنادى لكم

وعلى دكة خشبية ركيكة فى الطرقة جلس مع العسكرى .. وعيناه على نهاية الطرقة حيث رأس السلم .. ينتظر بين لحظة وأخرى عودة أمين الشرطة ومعه السيدة .. ومرت نصف ساعة وعاد أمين الشرطة وحده .. ودخل لرئيس النيابة .. ثم استدعاه.. فدخل

- البلاغ طلع وهمى .. أو بمعنى أصح (للآن) يعتبر وهمى..إلا لو جاءنا بلاغ آخر أو أى توضيح .. عنوان جمالات اللى ورد فى المحضر طلع جراج سيارات تابع للمحافظة

- يبقى مكيدة من عدو بالقاهرة .. والست دى من طرفه

- لك أعداء فى القاهرة ؟

- عدو واحد.. نصاب.. بينى وبينه قضية شيك .. ضحك على وياع لى شقة وهمية .. وحاول الاسبوع اللى فات يخطفنى من مصر الجديدة

- وليه بيعمل لك محضر فى أسبوط

- احتمال علشان يستدرجنى لغاية هنا ويدبر لى أى ضرر فى القاهرة أثناء غيابى..ويمكن مدبر خطة لخطفى هنا فى أسبوط.. والست دى أكيد من طرفه وعمل لها بطاقة مزورة..ده محترف تزوير..ماشى بيسبور مزور..واتجوز تلتناشر بهبطاقات مزورة

- عموما ده موضوع ما يخص التحقيق .. أقعد يا أستاذ فهمى
وأمر العسكري أن يحضر ثلاثة أكواب عصير ليمون .. قدم لفهمى واحدا .. والثانى والثالث لنفسه
ولزميله وأخرج ورقا وقلما وحرر محضرا من نصف صفحة دون أن يسأله .. وطلب منه التوقيع
فوقع .. ثم رد له البطاقة .. واستدعى العسكري الذى صاحبه من القاهرة وأمره بالعودة وحده .. ثم
استدعى أمين الشرطة مرة أخرى وأمره أن يصحبه إلى موقف السيارات .. وأن يظل معه حتى يستقل
سيارة متجهة إلى القاهرة .. وشده عليه ألا يغادر الموقف إلا بعد انصراف السيارة .. ثم سأل فهمى

- معاك فلوس ؟

- أيوه

- ورينى ؟

فأخرج نقوده

نهض واقفا وتبعه زميله وصافحاه .. واعتذرا له .. وضغط على يده وهو يقول
- سلم لنا على القاهرة .. وقل لها تستدعينا زى احنا ما استدعيناك .. ولو مقبوضا علينا
شكره على الليمون وسعة الصدر وحسن المعاملة .. وخرج مع أمين الشرطة .. ومن موقف السيارات
استقل سيارة إلى القاهرة

عاد .. وسأل زوجته كالعادة عن صحتها .. ثم عمن سألوا عنه بالتليفون .. وحمل منشفته وتوجه إلى
الحمام .. ورن جرس التليفون
- معلش .. المرة دى الرحلة قصيرة .. جهز نفسك .. المرة الجاية ح نسفرك بعثة للسودان

لم تتحرج الست بديعة هذه المرة .. على رأس السلم خطفته بين ذراعيها وألقت به فى صدرها ..
تماما كما تخطف الحداء كتكوتا .. وصبر حوالى عشر دقائق .. ثم تخلص منها باهتسامة واحدة وهو فى
قمة القرف .. ودخل فوجدها راقدة مجهدة بمتاعب الحمل .. حكى لها ثم تمدد وأسلم رأسه لفنخلها
تمبث برأسه وصدره كما كان يفعل معها .. تسترضيه وتطيب خاطره دون كلام

نزل ليشتري عشاء .. ومن المقهى كلم المحامى فأنفعل .. وقال بعشم الصديق
- أول مرة عملت شهم استغلت شهامتك وورطتك فى الشيكات .. وأدى الثانية .. وبرضه مصمم تعمل
شهم وتقف جنبها .. وإن شاء الله ح توديك فى داهية
فضحك فهمى .. وهون عليه .. وقال مازحا
- كل العشاق كده عبر التاريخ .. حواء استغلت شهامتهم .. روميو وغنتر وقيصر .. وفهمى أبو
الوفا .. بس إنت جاهل مابتقراش تاريخ

رغم حالتها المرضية ..أصرت على أن تسافر معه إلى بلدة الراقصة .. ولما اعترض إشفاقا بحالتها الصحية أصرت .. فدهش .. وجاءه خاطر فسألها بهذر

- بتغيرى ..خائفة على من الراقصة ؟

- صحيح إنت عجوز .. لكن مازلت ثعلبا يهوى الدجاج .. ويموت الزمار وبقه بيلعب .. لكن مش ده السبب .. السبب أنها بلد صغيرة ..أرياف .. وزيارة رجل غريب من القاهرة لراقصة سابقة فيه شبهة لك ولها تشكك فى توبتها ..ربما تتضايق من زيارتك .. لكن وجود ست معاك يعفيك ويعفيها من الشك فاقتنع بمنطقها وعزما على السفر

ودعتها الست بديعة بقبلة .. طبعتها على خدها وهى تنظر إليه .. كأنها تقول له هذه القبلة على خدك أنت .. وتتمنى لو طالته ولكنه كان قد نزل بعض درجات السلم وابتعد عنها .. واكتفى بتحيةة بيده من بعيد

من عاصمة المحافظة إلى مدينة .. إلى قرية إلى كفر صغير .. حتى وصلا وقد هلكا .. واستقبلتهما الست عزيزة .. فى بيتها الأنيق الذى يبدو بوضوح أنه أفضل من كل بيوت الكفر .. وحكت وسام على مدى ساعتين قصتها مع خيشة .. ويبدو أن ماحكته أعاد لعزيرة ذكرى الأيام الخوالي .. فأخذت بالدهشة مرة وبالتأكيد مرة تؤمن على ماتسمعه .. وتقاطعها وتحكى لها نفس الموقف لأنه سبق أن حدث لها معه .. حتى صارتا وبسرعة صديقتين

بعد الغداء الذى تناوله ثلاثتهم .. أصبح الدور على فهمى فقال

- ياست عزيزة .. باختصار .. علشان عاوزين نرجع قبل الظلام .. خيشة ظلمك وظلم وسام وظلمنى .. وظلم ناس كثيرة قبلنا وبعدنا .. وهو دايما يختار ضحاياهم من الناس الطيبين .. والمفروض إن اللى ظلمهم يتعاونوا ضده ويوقفوا شره

- صح يابيه .. وأنا مستعدة لأى خدمة .. ده أنا نفسى أشوفه على جبل المشنقة .. دالوقت ح تشوفوا بنتى زمانها جاية من عند ستها .. مشلولة .. والسبب هو

- إحنا عاوزين نطلق وسام ونسترد الشيكات .. وعلشان نجبره وصلت لحل .. أنا عرفت من وسام إنه رغم عيوبه بيعحب بنته جدا .. عاوزين نعمل تمثيلية للضغط عليه .. ننزلى معانا دالوقت لغاية البندر ونعملى له تليفون تنهيمه بخطط بنتك .. وانت قلتى إنه سبق وحاول خطفها مرتين وفشل .. طبعاً ح يحلف .. تهدديه بإبلاغ البوليس وتقفلى السكة .. بعد احنا مانرجع مصر أنا أتصل به وأبلغه إنى خطفت بنته .. وأشترط عليه يرد الشيكات ويطلق وسام علشان أرجع البنتر

خابت الفرحة فى وجه عزيزة .. وقالت بامتعاض

- يابيه ده شغل سيما قديم قوى .. مايخيلش على خيشة .. ده صايح .. ح يقول لك قبل ما نفذ شروطك أسمع صوتها فى التليفون .. مش برضه فريد شوقى فى السما بيعمل كده

رد وهو محبط
 - فعلا .. ضرورى ح يعمل كده .. فاتتنى دى
 - إنت مش بتقول إن صاحب العمارة رفع على قضية طرد .. ومستعد يحل الموضوع ودى .. أتنازل
 له عن الشقة ويدفع لى قرشين
 - آه .. بس إحنا ح نستفيد إيه من الحكاية دى ؟ .. دى ممكن تنفذها بعدين
 - ح ينطرد من الشقة .. ويصيع فى الشارع
 - للأسف عنده شقة تانية .. هو دالوقت عايش فى شقة وسام
 - تتنازل هى كمان عن شقتها وتاخذ قرشين .. ماهى مش ح تقدر تدخلها تانى
 وآليا .. التفت إلى وسام والتفتت إليه .. وقرأ كل منهما فى وجه الآخر رأييه .. وعاد يسألها
 - بفرض أنه انطرد من شقتك وشقة وسام .. إيه دخل ده بالشيكات والطلاق
 - مش ح يلاقى مكان يبات فيه .. ولا شقة ينصب فيها .. ح يصيع فى الشوارع و يجوع .. وقتها هو
 الذى ح يجرى وراك يطلب رد الشيكات والطلاق مقابل أى مبلغ .. ده كلب وأنا عارفاه .. لما يكون
 شعبان يفترى
 - عندك حق .. فيه مثل إنجليزى بيقول .. سمن كلبك ياكلك
 - صح بابيه .. جوعه يلحس رجلك
 - والتفت إلى وسام وقال
 - شايقة الفرق بين ثقافة الحياة وثقافة الكتب
 قبل انصرفهما .. جاءت بنت عزيزة .. لها ملامح أبيها وجمال أمها فقبلها .. وتعانقت وسام وعزيزة ..
 على وعد باللقاء فى القاهرة

بعد رجوعهما الى القاهرة .. والى العشة .. قضى لها حوائجها واستأذنها وعاد إلى بيته ..
 استلم إعلاتا على يد محضر .. عرف منه أنه قد صدر ضده حكم من المحكمة الابتدائية بالحبس لمدة
 سنة فى قضية شيك بدون رصيد .. فارتعدت أطرافه وتقلصت معدته وطار عقله .. وبصعوبة استطاع
 أن يقبض على سماعة التليفون واتصل بالمحامى والمحضر مازال واقفا .. فهدأه وشرح له الإجراء
 الذى يجب أن يعمله .. فعاد إلى المحضر ووقع بالاستلام .. وحرر المحضر (معارضة) وانصرف
 فهرع فى التو إلى المحامى .. فهون عليه الأمر وأفهمه تفصيلا أن معنى هذا (أن خيشة رفع الدعوى
 ورشا المحضر .. فحرر إعلان (أمريكانى) واستفسر منه فقال (أمريكانى) يعنى المحضر زور توقيعك
 باستلام الإعلان بموعد الجلسة .. ولما لم تحضر صدر الحكم غيايبا) وطمأنه أن الحكم الغيابى
 لاقيمة له .. وأن المعارضة معناها إعادة الإجراءات وتحديد جلسة للقضية من جديد كأنها لم تكن ..
 ووعد بالتوجه غدا للمحكمة للاطلاع على صحيفة الدعوى والحكم واتخاذ اللازم

حضرت عزيزة إلى القاهرة واتصلت به تليفونيا.. وتوجهوا معا إلى وسام.. وبعد الغداء والراحة توجه معها إلى العمارة التي بها شقتها.. فاستقبلهما وكيل العمارة.. واتفقا على التفاصيل.. ثم افترقا لتبيت ليلتها لدى زميلة سابقة لها.. على وعد باللقاء.. وفي الصباح التقى ثلاثتهم وسافروا إلى المنصورة.. والتقوا بصاحب العمارة.. ووقعت عزيزة على التنازل.. وسلمها عشرين ألف جنيه.. ثم توجهوا إلى قسم الشرطة فحرروا محضر صلح وتنازل.. عادوا إلى القاهرة وشكرواها وودعوا

في اليوم التالي تنقبت وسام وتوجه معها إلى مالكة العمارة التي بها شقتها فاتصلت المالكة بالمحامى.. وحرروا عقدا بالتنازل عن الشقة.. وسلمتها عشرة آلاف جنيه وأيضاً توجهوا إلى قسم الشرطة وحرروا محضرا بالتنازل.. وعادوا والكآبة على وجه وسام لفقد الشقة.. فطيب خاطرها ووعدها أنه بعد الانتهاء من قضية الشيكات والحصول على حكم الطلاق سوف يجتهد ليعوضها بشقة أخرى.. تكون مهرها الذي وعد به يوما ولم يستطع الوفاء به.. ولم يكن مناسباً وهذا حالها أن يتركها.. فنزل لشراء لوازم السهرة.. العشاء والمعسل واللب الأبيض للست بديعة.. وقبل نزوله همست له (أنا قرفانة قوى.. هات قزاة)

الراديو الترانزستور على طرف الحصيرة يصدح بروائع أم كلثوم.. وهما لا ينتبهان إليه.. يحركان أوراق الكوتشينة وهما غارقان في مشاكلهما.. والست بديعة غارقة في مشكلتها.. ترفع عينيها وترمقه من حين إلى آخر من فوق أوراق الكوتشينة التي تغطي بها وجهها لتتصيد عينيها.. وبعد الشيشة نام عم بدوى واستمر اللعب.. فاستعجلا انتهاء الدور ليدخلا إلى عشتها ليمارسا لعبة أخرى

في طريقهما إلى العشة مالت برأسها على كتفه فسى دلال ورفعت عينيها إلى عينيها وسألته.. ح. نمثل إيه الليلة

- غانية ترقص وتتأوه في الفراش.. وغنى سكيرتحت قدميها ينثر الجنيهاات فوق بطنها وبين فخذيهما

- أهم مافى الليلة الجنيهاات دى.. كام كام ؟

- إنت وشطارتك.. على قد ماتدى تاخدى.. ماانا سكران

- إيه رأيك لو عملنا العكس

- إزاي ؟

- ست غنية تطارد رجلا.. يرفض ويتمنع.. فتتشر الجنيهاات تحت قدميه.. وتفضل تفريه بالمال

حتى تنثر حواليه عشرة آلاف جنيه

وفهم قصدها فخرج من الهلر إلى الجدد وقال

- حبي لك عفيف.. مايقبلش رشوة.. ماتفكرش إننى فى يوم ح اخذ منك فلوس مهما احتجت
- إنت صرفت كتير يافهمى.. خلىنى أشاركك.. انت قلت احنا اتنين فى مركب واحدة
- ولو.. حبي لك أغلى بكثير.. حبي لك مايتقدرش بمال

فى الصباح فاجأته بوجود نزيف آخر.. عللت نزوله بالخمر التى شربت منها كثيرا.. وفى المساء قالت لها الطبيبة أن (الحمل لم يثبت بعد فى بطنها.. ولابد أنها قد أجهدت نفسها فى الأيام الأخيرة فكان النزيف هو النتيجة المتوقعة).. وكتبت لها بعض الأدوية كمقويات لتثبيت الحمل خرجا من عيادة الطبيبة إلى مكتب المحامى.. فعرفهما أنه اطلع على ملف القضية.. وقال (لم اجد بالملف سوى ورقة واحدة.. شيك محرر بخطك الجميل وتوقيعك الأجمل.. لهذا لم يجد القاضى أمامه مفر من الحكم عليك بالحبس سنة.. لاسيما بعدما اطلع على توقيعك الذى زوره المحضر على الإعلان بالعلم.. كنت أتمنى ألا يصل الأمر إلى هذا الحد.. ولكن الخيرة فيما اختاره الله وليس أمامنا سوى أن نجاهد ونجتهد ونبذل أقصى ما فى وسعنا.. وعلى الله النتائج.. وجودى أو وجودك أمام القاضى لتقسم له برحمة أبوك أنك برئ لاجدوى منه.. ولن يعفبك من العقاب وسوف يؤيد الحكم.. وهذا شئ يضايقنى جدا.. لأنه فضلا عن أنك صديقى.. سوف أتكفل طوال مدة سجنك بالعيش والحلاوة.. وإذا دفعنا بأن الشيك مزور سيكون ذلك مجرد اسبرين مسكن فقط.. لأن الشيك سيرسل للطب الشرعى وفى النهاية سوف يثبت أنك كاذب.. وهذا طبعاً سوف يغيظ القاضى وربما الحكم يزيد من سنة إلى سنتين)

- ياعينى.. يعنى سنتين وأنا أحاول فيك.. زى مايتقول ليلى مراد.. والحل يانصف متر فقط
- واحتمال إعدام
- ياسيدى.. مااعدمكش.. والحل يارب متر
- مش ح أقول إلا لما تعتذر
- آسف يامترين
- الحل إننا نحول القضية فى نظر القاضى.. من قضية شيك مافيش غيره فى ملف القضية مضطر يحكم به.. إلى قضية موضوعية
- مش فاهم ؟
- أفهمك.. الشيك حجة نفسه.. يعنى مش محتاج مبرات ولا أسباب.. لكن لو ملأنا الملف بالورق.. بحيث يصبح الشيك مجرد ورقة ضمن ورق كثير.. ضمن قضية موضوعها النصب والاحتيال.. تضعف حجة الشيك.. خصوصاً انه شيك شخصى مش شيك بنكى
- آيه الفرق
- الشيك البنكى يعنى شيك من دفتر شيكاتك اللى صادر من بنك رصيدك فيه لايسمح بالصرف.. ويعتبر فى نظر المحكمة محاولة نصب منك فى لحظة احتجت فيها للتحايل والتضليل مع سبق الاصرار والترصد.. لكن الشيك الشخصى.. يعنى شيك من اللى بيتباع عند البقال.. محتمل تكون فوجئت به ووقعت تحت ضغط أو اكراه أو تضليل من الطرف المستفيد.. ومع ظروف الواقعة اللى ح نشرحها للمحكمة.. تفرق كثير
- وازاى ده يتحقق ؟

- ده اللي أنا فكرت فيه طول الليل..أولا نرفع دعوى فرعية ضد خيشة بالنصب والاحتيال .. ونودع مع عريضة الدعوى عقد بيع ابتدائي للشقة..محضر بين خيشة ووسام ماتفولش فيه إنها زوجته .. وفى المذكرة نقول إنها استدراجك له بحجة أنها عجزت عن سداد ثمن الشقة وتنازلت لك عنها مقابل قيمة الشيك اللي انت حررته لخيشة باعتبارك مشتري بدلا منها..ونؤكد كلامنا باعترافيها فى محضر الشرطة الى حررتة بعد هروبها واتهمته بالنصب والإحتيال..يعنى باختصار نحول الحيلة الى عملها خيشة فيك شفهي إلى حقيقة مسجلة بمستندات

نظرا إليها فوجدا وجهها قد أصبح فى لون الليمونة الصفراء.. فقال لها المحامى مهونا (أصبري لا تخافى..اسمعي للأخر..سوف اخلك كتحليص الشعرة من العجين.. سوف استخرج شهادة من الشهر العقارى تفيد أن الشقة المذكورة لم يسجل لها عقد تملك من قبل بين أى أطراف.. وهذه هى الورقة الثانية .. واستخرج شهادة من الضرائب العقارية تفيد أن العمارة المذكورة كل شققها إيجار وليس بينها شقة تملك..وهذه هى الورقة الثالثة..ثم نضيف صورة رسمية من محضر ومحضرها..فيكون عندنا خمس حجج..وورق يملأ ملف الدعوى الفرعية..ثم نطلب ضم الدعوى الفرعية إلى الدعوى الأصلية..فيصبح الشيك مجرد ورقة فى موضوع..ومحامى غيرى..ح يتولى الدفاع عنك..سوف يؤكد أن كل هذا قد حدث فعلا وانك زوجة خيشة ويقدم قسيمة الزواج..ويدفع بانك كنتى تحت الضغط والتعذيب ويقدم تقرير الكشف الطبى - حقيقتي .. إنت كده مش متر ولا مترين .. إنت كده كيلومتر .. قل لى ياكيلو.. هل ممكن نستفيد من جرائم القتل اللي ارتكبتها وحكى عنها لوسام - صعب جدا إثبات ذلك ..لأن الجرائم دى لاتعرف تاريخها ولا مكانها ولا أسماء ناسها .. واحتمال تكون جرائم وهمية..ويكون ماقتلش..وحكى لها الكلام ده علشان يرهبها .. ويرعبها..ويطوعها لأوامره ..يعنى كانت ضمن خطته لإعدادها

وكتب عقد بيع الشقة بين خيشة ووسام..وقامت هى فنسخته على الآلة الكاتبة..ثم وقعت عليه باعتبارها مشتريه.. ووقع فهمى باسم خيشة بيده اليسار.. ثم ذيله المحامى بديباجة تفيد تنازلها عن العقد لفهمى.. ثم وقعا بنفس تاريخ تحرير الشيكات وظلا طرفه حتى منتصف الليل..ثم عادا..وتسللا إلى العشة حتى لا تنتبه لعودتهما الست بديعة

عاد فهمى الى البيت.. وفوجئ بابه قد عاد من خارج البلاد.. تلقفه بين أحضانته.. ثم قبل ابنه وزوجته وجلس إليهم مرحبا.. وظل يتكلم وحده لمدة ساعة.. يخرج من موضوع الى موضوع وهم يكتفون بالاستماع والصمت.. وابتسامة باهته كلما التفت إلى أحدهم موجهًا إليه الكلام.. حتى انتهى إلى وجوههم.. ونظراتهم القلقة وأدرك أنهم يحبسون في صدورهم خبرا.. فسكت.. وتفحصهم واحدا بعد الآخر.. ثم همس في أرتياب

- أنا باتكلم بقى لى ساعة وانتم ساكتين.. شكلكم كده مايطمنش.. فيه إيه.. اتكلم يا محمد

واندفع محمد .. كأن الكلام كان محشورا متزاحما فى فمه منذ ساعة

- إيه يا بابا حكاية الست اللي انت خطفتها ؟

- خطفتها .. بتقول خطفتها !! .. من امتى يا محمد أبوك بيخطف ستات ؟

- بابا .. ماما قالت لى كل حاجة فى الجوابات وفى التليفونات .. وانا رجعت مخصوص علشان

الموضوع ده

التفت إلى زوجته وسألها عاتبا

- إيه يا حاجة اللي قلتيه .. وخليتي ابنك يرجع قبل ميعاد أجازته

ادارت زوجته وجهها عنه متبرمة .. وقالت من بين ضروسها

- اتكلم مع ابنك .. مالكش دعوة بى

زم فهمى شفتيه .. وعاد يلتفت إلى ابنه

- اتكلم يا محمد ..!

- يا بابا .. احنا عاوزين نسمع منك

رد ساخرا .. مروراً

- ما انتم سمعتم واتكلمتم فى الجوابات والتليفونات واجتمعتم واتشاورتم .. واصدركم حكمكم إنى

خطفت واحدة ست .. عاوزين تسمعوا إيه تانى ؟

- يا بابا .. احنا ما حكمناش .. بدليل اتنا بنسألك .. وعاوزين نعرف منك الحقيقة

هو فهمى رأسه مستسلما .. واسقط وجهه للأرض أسفا .. وقال فى نبرة متألمة

- الحقيقة يا بنى أنا وقعت فى مشكلة.. وععيش فى محنة.. وباجتهد بكل جهدى علشان أحلها وأخرج

منها.. من غير ما أزعجك فى غربتك أو أزعج اختك أو أمك.. لكن للأسف هى اللي أزعجتكم

- كان لازم ماما تبلغنا علشان نقف معاك

- من امتى يا بنى باشر كركم فى مشاكلى.. أنا عودتكم إنى أحل مشاكلى ومشاكلكم .. وانا قادر بعون

الله.. إنت عارف إن أبوك جمل.. واللى معاه الحق فى النهاية بيتنصر.. والله لا يضيع أجر من

أحسن عملا

قال محمد متفعلا قليلا .. وإن جاءت نبرة صوته حنونه مؤدبة
- يا بابا.. مش يمكن حضرتك تكون غلطان .. فبين هو العمل اللي أنت أحسنه .. أنا وصلت أول
امبارح وماما حكّت لى كل حاجة.. انتظرتك ماجتش .. خيشة اتكلم امبارح ورحت قابلته .. وحكى لى
الحكاية بالتفصيل .. وسمعتى التسجيل اللي بصوتك .. وورانى الشيكات اللي بخطك .. عرضت عليه
لغاية عشرة آلاف جنيه رفض .. ومصمم ترد له زوجته أولا قبل أى كلام فى الموضوع .. وواضح ان
مراثة فعلا تحت ايدك .. ومحروق جدا ومتغاض جدا .. وعنده حق .. ده برضه شرفه .. بدليل إنه
رفض عشر آلاف جنيه

- أنا حزين يابنى .. لأنى شايف فى عيونكم انكم صدقتوه .. ده نصاب .. محتال .. تورطت معاه بحسن
نية فى لحظة كنت فيها باسعى فى الخير .. ابوك يا محمد مايخطفش واحدة ست .. كان لازم انت
واحتك وامك تعرفوا كده من غير ماشرح .. كان لازم تكذبه حتى لو قدم لكم الف دليل .. ده أنا ابوكم
عاشرتونى وعارفين تاريخى .. أنا حزين يابنى .. صدقتم رجل غريب ماتعرفهوش .. وكذبتم ابوكم اللي
انتم عارفينه

- يا بابا.. انا آسف بالنيابة عن أمى وأختى .. احنا الثلاثة آسفين .. يمكن فعلا نكون صدقناه .. لكن
ماحدث كذبك .. حضرتك ماحككتش حاجة علشان نكذبك .. بدليل إن احنا بنسألك عن الحقيقة
- الحقيقة لازم تفهموا إن ابوكم صح .. ولكن واقع فى مشكلة .. وزى ماهو متعود يحل مشاكلكم ..
ومشاكل الناس .. سيبوه يحل مشكلته .. من غير ماتخرجوه
- احنا مش بنخرجك .. احنا بنسألك

- السؤال محرج يابنى .. صعب على احكى لكم ان ابوكم طلع مغفل .. ماتزودش همى .. سيبونى أهل
مشكلتى من غير ماتسألونى فى التفاصيل .. وأنا بعون الله قادر على حلها .. وبلاش المحكمة اللي
انتم عاقدينها لى دى .. واوعدكم .. أنكم فى النهاية ح تتأكدوا إن ابوكم نظيف شريف
- يا بابا.. احنا مصدقينك .. بس ازاي نرتاح واحنا شايفين واحد معاه شيكات بتسعين الف جنيه بخطك
وتوقيعك .. ورفض عشرة آلاف جنيه ويبصرخ ويقول .. مراتى ياناس .. شرفى .. معلش يا بابا ..
تحملنى علشان أسافر وانا مرتاح .. أنا متأكد وكلنا متأكدين فعلا إنك نظيف وشريف .. وإنه فعلا
محتال ونصاب وكذاب .. بس بداية حل المشكلة إنك ترجع له مراثة .. ترجع له شرفه أولا .. هو شايف
كده .. واحنا كمان شايفين كده

هب فهمى واقفا وصرخ بصوت مخنوق وقد ضاق صدره
- إنتم مش عارفين الحكاية كلها .. الحكاية ملخصها .. إن هذا المحتال استغل معرفة سابقة لزوجته
بى عن طريق الندوات .. واستدجرونى بحيلة قلرة ومضونى على الشيكات .. وبعدها اختلفوا فهيرت
منه وجت لى وحكّت لى الخدمة وطلبت منى حمايتها .. ووعدت تعترف باللى حصل .. وفعلا اعترفت

فى محضر رسمى بكل الحقيقة..ومستعدة تشهد بها فى المحكمة..هى فعلا فى حمايتى وتحت تصرفى .. هو عاوز يستردها علشان يبعدها عن الشهادة وأنا عاوز احتفظ بها برضه علشان الشهادة ..يعنى الموقف بالضبط ..ياقاتل يامقتول..ترضوا إن ابوكم يكون المقتول

- ياابا ولا قاتل ولا مقتول..احنا نردها له وفى نفس الوقت نقطع الشيكات ونرمى له قرشين
- مش ح يحصل يابنى..ده نصاب وقدر يآثر عليكم ..ويصرخ ويقول العار والشرف .. وإذا عرضت عليه فلوس ح يرفض بدليل انه رفض منك عشرة آلاف جنيه ورفض منى عشرين ألف ..ده مصمم إنه يضحك على مرة ثانية ..يستردها ويبعدها عن الموضوع وبعدين يساومنى براحتة
- يساوم ياابا .. أنا مستعد اعطيه لغاية عشرين الف جنيه
- مش ح يقبل يابنى..ده نصاب طماع وقع فى يده تسعين الف جنيه .. ماتحلش يامحمد مشكلة بمشكلة ..انت كده بتفترض فيه حسن النية..المسألة بالنسبة له مش عار ولا شرف زى ما بيدعى .. المسألة فريسة وقعت فى يده مصمم يأكلها كلها .. وأنا ما اقدرش احمل نفسى ولا أحملك مسئولية الحل المثالى اللى انت بتقترحه..وإذا كانت امك غيرانه ومصدقة كلامه وإن مراته كل ليلة نايمة فى حضنى .. أنا مستعد اجيبها تعيش تحت اشرافكم هنا .. المهم تفضل تحت يدى لغاية ماتشهد فى المحكمة زى ما وعدت

سكتوا .. وطأطأوا رؤوسهم .. فقال
- هيه..أجيبها تعيش هنا لغاية ماتتحل المشكلة ..والا اخليها مكانها وتتحملوا..لغاية مانوصل لحل..سواء ودى أو بالمحكمة..ماهو انا لو اجبرتونى ورميت الورقة الراجعة اللى فى يدى وخسرت واتحبست..ح احملك المسئولية ومش ح اسامحكم .. قلتم إيه ؟
التفت محمد الى والدته .. وسألها
- قلتى إيه يا حاجة
- قلت لإله الا الله..خليها مخفية مكان ما هي متعلقة .. لغاية ما يشوف له حل.. الله يخرّب بيتها

رد فهمى ناصحا
- يبقى نفضها سيره..سيبوني فى حالى ..وكل واحد يروح لحاله..انت تسافر لرزقك..وانت ترجعى بيتك .. وانت يا حاجة ترجعى لعلاجك وصبرك وصلاتك.. وتدعى لى حتى لو كان فى الحكاية خطأ منى..لما تسامحنى رينا يسامحنى ويقرب الفرج
- مسامحك .. ورينا معاك

كسب المعركة مع اولاده .. فتفرغ لباقي المعارك .. توجه مع وسام إلى الشهر العقاري .. واستخرجت توكيلا عنها لمحام آخر صديق لمحامى فهمى .. لم يلتقيا به بعد .. واجتهد المحامى خلال الأيام التالية .. فنفل كل ما وعد .. حصل على المستخرجات من الضرائب العقارية والشهر العقارى فضلا عن المحضرين وعقد البيع .. ورفع الدعوى

وفى الجلسة .. حضر خيشة ومحاميه .. وطالبا بتأييد حكم الحبس .. والعق المدني للرجوع على فهمى بقيمة الشيك .. وطلب محامى فهمى ضم الدعوى الفرعية للقضية الأصلية .. وحكى ملخصا صغيرا عن الموضوع .. مؤكدا فى نهاية كلامه أن الواقعة ليست مجرد شيك بدون رصيد .. ولكنها قضية نصب واحتيال

واعترف محامى وسام بالواقعة كما وردت فى أقوال محامى فهمى .. ودلل على حسن نية موكلته بأنها كانت تحت الضغط والإكراه لأن المدعى زوجها .. وقدم للمحكمة مستخرج من عقد الزواج .. واستشهد بمحضرها ضده والكشف الطبى الذى أثبت التعذيب

وأمام كل هذا .. قضت المحكمة بضم الدعوى الفرعية للدعوى الأصلية .. وباستدعاء كل من فهمى ووسام للمثول أمام المحكمة .. وتأجلت القضية لجلسة أخرى بعد أسبوع

نصحه المحامى وهما يفاداران المحكمة ألا يخبر وسام بأن المحكمة قررت استدعاءها خشية أن تخاف وتهرب .. وفضل تأجيل إبلاغها إلى آخر وقت ممكن حتى يضعها أمام الأمر الواقع فلا يكون أمامها وقت للتفكير والتردد

قضى الأيام التالية بين البيتين والثلاث نساء .. محاولا الابتعاد عن موضوع القضية حتى لا يكتف على نفسه الإحساس بالهم .. فى البيت الأول انشغل بعمله ما أمكن .. محاولا اللحاق بما تخلف عنه من أعمال .. والاهتمام بصحة زوجته

وفى البيت الثانى حاول التخفيف عنها بالخروج معها إلى الأماكن العامة .. وإن غاظ ذلك الست بدية وشكت من كثرة خروجها وتركها وحدها .. فطيبا خاطرها وصحبها مرة إلى الحسين .. حرصت طوال الوقت أن تقتسمه مع وسام .. فكلما وجدت نفسها بجوار وسام حسب ما يمليه عليهما زحام الطريق .. عادت إلى جواره ليكون هو القاسم المشترك بينهما .. وإذا هما بالجلوس .. تنظّل واقفة حتى يجلسا ويتبين لها المكان المناسب بجواره فتسارع إليه .. وإذا تناول حوارا مع وسام تدخلت فيه رغم جهلها بالموضوع .. فبيتسم ويتهاسط معها

وفى نهاية الأسبوع توجهنا إلى المحامى.. فحاول بكل ماله من وسائل.. إقناعها بالمشول أمام المحكمة.. لكنها ثارت.. ودارت فى الحجرة كالمجنونة.. تضرب بقبضتها سطح المكتب ودلقة الدولاب والكرسى وكل ما يصادفها من أثاث.. وظلت تكرر (مستحيل.. مستحيل.. أكرم لى أن أنتحر.. أقتل نفسى بنفسى وبالطريقة التى تريحنى من أن أذهب بنفسى إلى الوحش الذى علقتى فى النجفة وضربنى بالكرباج.. ليشوهنى بماء النار كما هددنى كثيرا.. ولن يحمينى من تهديده بوليس أمن المحكمة ولا القاضى.. سوف يكون بعيدا.. وواحد من أعوانه يشوهنى على باب المحكمة أو على السلم.. قبل أو بعد الجلسة.. انتظن يا أستاذ لو أبلغت أمن المحكمة سوف يفتش الجمهور ويدخله بالبطاقات علشان سواد عيونى.. على الأكثر سيحرسنى عسكري.. ولو رأى ماء النار ورأى أصرخ سيهرب وينفذ بجلده)

خاب أملهما وخسرا الورقة الأخيرة.. ولكن المحامى لم ييأس.. هداها.. وكتب عدة جمل تحت بعضها.. ودعاها إلى منضدة جانبية فى نفس الحجرة.. وقدم إليها ورقا وقلمًا وطلب منها أن تكتب القصة بالكامل.. منذ تعرفت على خيشة حتى لحظة هروبها منه.. وأوصاها أن تركز على النقاط التى سجلها لها فى الورقة.. ولما رفعت رأسها إليه مذعورة مستفسرة.. قال لها

(ستكتبى.. ثم أصحح.. ثم تكتبها على الآلة الكاتبة.. وغدا تتوجهى إلى الشهر العقارى وتسجلها والمحامى يقدمها فى الجلسة ويعتذر عن عدم حضورك لأن خيشة هددك بماء النار لو حضرت الجلسة اعترفك لن يخرج عما قلتى فى محضر الهمم.. والمحضر موجود فى القضية.. وهذا الاعتراف مجرد تدعيم لموقفك وموقف فهمى)

قبل انصرافهما طلب المحامى منهما التحرى عما تم فى موضوع الشقتين.. ومن تليفونه اتصلت بمالكة العقار الذى به شقتها فقالت لها إنها غيرت كالمون الشقة.. وحضر خيشة وحاول فتح الباب فتنبه الجيران وعرفوه بما تم ففضب وثار.. ولأن الشقة بالدور الأرضى عالج الشيش بمطواه وفتحه.. ثم كسر الزجاج وقفز إلى الداخل ليبيت ليلته.. ولكن الجيران أبلغوا المالكة فأبلغت الشرطة.. فقبضوا عليه وحرروا محضرا بالواقعة.. وأخذوا عليه تعهدا بعدم الاقتراب من الشقة مرة أخرى

واتصل فهمى بوكيل عمارة شقة عزيزة.. فضحك كثيرا قبل أن يقول أن السكان توقعوا محاولة منه فأتوا (بشبكة) حديد مما توضع فوق سطح السيارة لحمل الأمتعة.. وحفروا لأطرافها فى الجدار وسدوا بها باب الشقة وثبثوها بالجبس والأسمنت.. فلما حضر.. هاج وسب كل سكان العمارة.. وخلع ملابسه ووقف على السلم بالملابس الداخلية متحديا أى ساكن يخرج إليه.. فأغلقوا أبوابهم وأخذوا يتسمعون شتائمهم من خلف الأبواب.. ثم اتصل بعضهم ببعض من خلال التليفونات.. وأبلغوا شرطة النجدة فحضرت وقبضت عليه.. وأصر الضابط أن ينزل معهم دون أن يرتدى ملابسه.. وأن يحرر له المحضر وهو على هذا الحال

شد خبر الشقتين من أزورها .. ورفع فهمى إصبعه بعلامة النصر لوسام .. ثم همس لنفسه متأملاً (نصبا على بموضوع الشقة .. فضاعت منه شقته وضاعت منها شقتها .. سبحان الله .. يمهل ولا يمهل)

فى الصباح توجه معها إلى الشهر العقارى .. قرأ الموظف المختص الموضوع ورفع رأسه مندهشاً - لكن إنت كده يامدام بتودى نفسك فى داهية .. ده انت مستبعية .. حد يبيع نفسه بالشكل ده - معلش .. بابيع نفسى علشان أشتري ناس فى يوم باعوا أنفسهم واشترونى

ونظر فهمى إليها .. ولكنها لم تبادله النظر وظلت مطأطئة الرأس .. وإن عاشا اللحظة بمشاعر متوحدة جميلة

وفى المساء توجه إلى المحامى .. وسلمه الاعتراف المسجل لكى يسلمه لمحاميتها قبل الجلسة .. وعاد بالعشاء والمعسل واللب الأبيض وحجارة للرايوترايستور

بعد السهرة .. رفعت رأسها للسماء وطلبت من الله التوفيق فى جلسة باكر .. وقبل أن يدخل العشة قالت

- ألف يامألفاتى

ففكر قليلاً .. ثم قال

- صديقة لصاحب العشة جاءت لزيارته فاستقبلتها .. ورحبت بها وسامرتها وحاورتها .. ثم غاالتها فاستجابت .. واقتربت منها فرفضت حرصاً على مشاعر صاحب العشة .. فأغريتها ووعدتها بأنه لن يعرف .. فاستجابت

سبقها ودخل .. طرقت الباب فاستقبلها .. وبعد الترحيب غاؤها .. ثم حاورها .. ثم ساومها .. ثم قبلها .. ثم حضنها .. ثم ..

خرج من منزله بمبدأ (ياقاتل..يا مقتول) لابد من الاستبسال وبذل أقصى جهد فى المحكمة.. ولكن النتيجة بعد ذلك هى قضاء الله..جلس مع المحامى فى غرفة استراحة المحامين..وجاءهما الجارسون بالقهوة..وأخذ المحامون يتبادلون التحايا والكلام فى القضايا..وتطرق الحوار بينهم إلى قاضى اليوم

- لا يضحك عليه أى محام بمعسول الكلام
- يظل يطلب مزيدا من المستندات أو الشهود حتى يقتنع
- الورق والمستندات فى نظره ليست كل شئ .. لابد أن يصل إلى اليقين
- ليس له معدل ثابت..قضية يحكم فيها من أول جلسة .. وقضية مثلها يظل يؤجلها سنة وأكثر ..
- نظيف اليد والضمير.. رأى فى يدكاتب الجلسة كتابا..قرا عنوانه وتصفح فاعجبه..فعرض عليه الكاتب أن يتركه له ليقرأه فرفض وأعطاه نقودا ليشتري له نسخة..حتى لا يكون مدينا للكاتب ولو بقراءة كتاب

ظل يلتقط مايقال عن القاضى عله يكون فكرة عن شخصيته..وتاه فى دوامة من القلق .. فمال عليه المحامى وهمس
- مالك ؟

- خائف يفهم إن الأوراق ملفقة.. ويؤيد الحكم
- مانت سامع..ده مايبحكش بالورق..بيحكم باقتناع عقله وراحة ضميره..والبركة فيك..القضية ماقتش عاوزه محام ولا مستندات..لوكان اقتنع بالمحامى والمستندات أوبالشيك ماكانش طلبك .. القضية دالوقت مصيرها فى يدك .. وشطارتك تشرح وتوصله للحقيقة
- رنا يستر

فى القاعة..جلس فى أول صف يتابع أسلوب القاضى فى التعامل مع المتقاضين..لعله يهتدى إلى أفضل أسلوب فى التعامل معه..وعندما رأى خيشة دهش..وتذكر ماقالته له وسام يوما (ببغير جلده حسب الأحوال..مرة يخرج آخر شيكة ومتعطر وابن ناس.. ومرة يخرج بملابس ممزقة معفر مغبر وناكش شعره..حسب الخطة وهدفه من الفريسة)والمفروض حسب كلامها أن يأتى فى شكل الشرى الذى باع شقة تملك واحتيال عليه أحد الرعا .. ولكنه جاء بملابس قديمة رثة مهلهلة..أشعت أغبر..يحمل جهاز تسجيل كبير مغطى بمنشفة قديمة ممزقة

فتحت الجلسة فى التاسعة..تناولت المحكمة أكثر من مائة قضية..لأنها قضايا لم تكن تحتاج لمرافعات..مجزة إجراءات تقديم مستندات ومذكرات..أما القضايا التى تحتاج إلى مرافعات والتى استكملت أوراقها ومؤهل له لصدور أحكام فيها..فقد أجلها القاضى لآخر الجلسة..ونادى الحاجب

على القضية.. وقبل أن يصل الأطراف إلى المنصة أمر القاضي بتأجيلها لآخر الجلسة .. واستمر في نظر القضايا التالية .. ولما سأل فهمي المحامي عن معنى هذا .. أفاده بأن ذلك لأهمية القضية وأن هذا لصالحه .. لأن القاضي آخر الجلسة سوف يفتح صدره لسماع كل الأطراف

ورفعت الجلسة في الثانية عشر.. ودخل القاضي وزميله إلى غرفة المداولة الملحقة بالقاعة خلف المنصة .. وحمل الكاتب كل الملفات ولحق بهما وأغلق الباب .. ووقف عليه جندي الحراسة .. ثم دخل إليهما الحاجب بالقهوة .. ثم بدأ الحاجب يناهى على القضايا... حتى لم يبق في القاعة سوى قضيتهم.. وخرج الكاتب وتوجه إلى دورة المياه فلحقا به.. وسأله المحامي فقال - اصبروا.. الوقت ده كله بيقرأ ملف قضيتكم كلمة كلمة.. خصوصا اعتراف المتهم المسجل في الشهر العقاري.. ده تلتاشر صفحة فولسكاب.. وده لصالحكم فوعده (بالحلاوة) وجلسا مستبشرين.. وارتفعت روح فهمي المعنوية وتحمس للكلام.. وعاد الكاتب واختفى في حجرة المداولة وظل الباب مغلقة لمدة ساعة.. ثم نادى عليهم الحاجب

القاضي جالسا على مكتبه وعلى يمينه وكيل النيابة.. وعلى طرف المكتب عن يساره الكاتب .. وأذن القاضي لمحامي خيشة بالكلام فتكلم.. وقال كثيرا عن وكيله الضحية المفترى عليه.. ثم أذن القاضي لخيشة .. فقال أن الشيك نتيجة دين على المدعى عليه.. ثمنا لبضاعة باعها له.. وقدم للقاضي الورقة التي كتبها فهمي في مكتبه التي بها أسماء الأجهزة وأسعارها دهش فهمي عندما فوجئ بالورقة وكان قد نسيها.. وتعجب.. كيف احتفظ بها خيشة واستطاع أن يستفيد منها في الوقت المناسب.. وهم أن يندفع ويشرح للمحكمة.. ولكنه تذكر أن المحامي قد حذره.. أنه مهما تكلم الخصم واتهم وكذب ليس من حقه التعقيب إلا لو طلب منه القاضي ذلك.. فظل يستمع إلى أكاذيبه صامتا متوترا

ثم التفت القاضي إلى المحامي الموكل عن فهمي.. فتكلم.. وأشار إلى عدة نقاط بعينها.. عقد البيع المحرر بين خيشة ووسام ثم تنازل وسام لفهمي.. ومستخرج مصلحة الضرائب العقارية ومستخرج الشهر العقاري.. وتوقف لحظة.. ثم أردف بصوت آخر ولهجة أخرى.. كأنه يضيف إلى صفحة أقواله ملحوظة في الهامش

(وكيلي.. مدير عام بوزارة المالية.. وكاتب معروف.. وعضو اتحاد الكتاب.. ربي أولاده في الحلال.. وتخرج منهم الطبيب والضابط والمهندس.. وعاش كل عمره شريفا.. وصحيفة سوابقه تشهد على ذلك والخصم مجرد سائق عاطل بلا بيت ولا أسرة .. حتى الشقة محل البيع مؤجرة لإحدى مطلقاته وهي أيضا إحدى ضحاياه).. وتحده أن يقدم ما يشبه ملكيته للشقة المذكورة .. وطالب ببراءة موكله.. ومن باب الاحتياط التمس من المحكمة أن تأمر باستخراج صحيفة الحالة الجنائية للخصمين

والتفت القاضي إلى محامي وسام.. فأكد كل ماجاء على لسان محامي فهمي.. ثم دافع بأن المتهمته زوجة للمتهم وكانت تحت سيطرته وأوامره.. وقدم للمحكمة محضرها ضده والكشف الطبي واعترافها المسجل.. واعتذر عن عدم حضورها لأن المتهم هدها بالقتل لو حضرت.. وطلب لها البراءة

وانتهى المحامى من كلامه.. فالتفت القاضى إلى فهمى.. وكان بطول الوقت قد وصل إلى قمة الاضطراب والتوتر.. ولكنه فتح فمه وفتح الله عليه.. وحكى بأسلوب الأديب الواصل المتأنى كل التفاصيل.. بداية من استدراجها له ولقائه بخيصة ليحل المشكلة بينهما (ملفتا نظر المحكمة إلى أن الجزء الذى سبق هذه الأحداث والخاص بعلاقته بها قبل واقعة النصب.. لا يخص القضية فى شئ)

حكى.. وهو على يقين أن هذا الحكى هو الذى سيضع فى النهاية النقاط فوق الحروف.. وهو الذى سوف يحدد مصيره.. وخرج بالمناخ من محاكمة إلى محاكمة أدبية.. ومن متهم إلى أديب راو.. وسمعه القاضى ووكيل النيابة والكاتب بانتباه شديد.. فاطمأن عندما شعر أن الجميع بما فيهم القاضى.. قد استمعلوا هذا التحول كشئ جديد أو شئ خارج على المألوف أو شئ للترفيه.. فضلا عن أنه فى صلب موضوع القضية

تمهل واسترسل بصوت هادئ منغم وبالتصوير البطئ وهو يحكى اللحظات الدرامية لواقعة تحرير الشيكات الثلاثة.. وكيف حسن خطه وحرر الشيكات بعناية بتوقيع واضح صريح.. ممثنا لهذا الفارس الذى جاد به الزمان فى غير أوانه.. وهو فى غفلة قذرية عن الشباك التى نصبها خيصة لاصطياده لحظة استبداله الشيكات من الفلاجة

ودمعت عيناه من قدره التعس وتهدج صوته.. فاستمعوا وكان على رؤوسهم الطير.. حتى أن محامى خيصة التفت منزعجا.. وكأنه لسع من قسوة اللحظة.. وقال مندهشا وبصوت عال - ده بيبكى !

فرد خيصة باستهتار وهو يبتسم.. ليهون الموقف فى نظر المحكمة

- ما هو بقى له شهور بيبكى

فاصطكت كلماته بأذن القاضى.. والتفت إليه.. وأدرك أنها فلتة لسان تحسب عليه ولصالح خصمه.. ثم عاد يتابع فهمى.. الذى جف حلقه وأخذ يحرك لسانه يستحلب لعابه.. وذلك حنجرته بأصابعه يحثها على الكلام.. فرفع القاضى كوب الماء الذى على مكتبه وتناول له.. فشكره

أعطاه القاضى الفرصة كاملة للشرح.. مما شجعه على التجلى.. حتى لم يبق عنده ما يقوله.. فعاد إلى لفت نظر القاضى.. إلى أنه (لم يذكر قصته الخاصة مع هذه المرأة لأنها سبقت واقعة القضية ولاتهم المحكمة فى شئ) فقال له القاضى وبكل الرضا فى عينيه.. (إن كان فيها شئ يخدمك فى القضية قوله) فشكره واكتفى.. والتفت القاضى بعد هذه الاسترخاء الجميلة إلى خيصة

- يا خيصة.. عندك أوراق تثبت ملكيتك للشقة ؟

كاد المحامى أن يرد بدلا منه.. فأشار له القاضى محلرا

- أنا باوجه كلامى له.. هو الذى رفع القضية لكن المدعى عليه رفع قضية أيضا.. يعنى كل منهم مدعى ومدعى عليه.. فاهم يا خيصة

- فاهم يا بيه

- عندك ما يثبت ملكيتك للشقة ؟

- كان عندي.. بس الأوراق ضاعت مني
- إنت اكتشفت بعد أسبوع إن المدعى عليه ماعتدوش رصيد يغطى الشيك.. بدليل إخطار البنك اللى قدامي.. إيه اللى منعه من رفع القضية كل الشهر دي ؟
- كنت صابر عليه يابيه .. يمكن يسدد
- خصمك قال فى أقواله.. والمتهمه فى اعترافها المسجل فى الشهر العقارى إنك ماقدمتش الشيك فى ميعاده علشان تهتزه.. وأخذت منه على دفعات حوالى خمسة آلاف جنيه.. وخاتم وساعة.. واستغليتها واسطة بينك وبينه علشان تبقى إنت بعيد عن الشبهة .. حصل ؟
- كذابين يابيه .. ده كل اللى وصلنى منه ألف جنيه
- والخاتم والساعة ؟
- والخاتم والساعة
- وإيه تانى
- وكاميرا .. وعدة تليفون
- وإيه تانى ..
- هو حاسب الحاجات دي بخمسة آلاف جنيه.. قال لى إن الخاتم بلاتين والفص ألماظ وطلع ذهب أبيض والفص قزاز.. وأنا بعته بمائتين جنيه بس.. والساعة طلعت فالصو
- يعنى غشك تانى .. وكل اللى وصلك ألف ومائتين جنيه بس ؟
- بس يابيه
- طيب ياخيشة .. الثلاجة .. كانت كام قدم ؟
- ثلاجة إيه يابيه
- الثلاجة اللى جبت له منها الحاجة الساقعة .. وبعد كده العنب
- ثمانية قدم يابيه
- وكنت حاطط الشيك الأبيض فين ؟
- ماوصلش يابيه
- إنت مش استبدلت الشيك مرتين ياخيشة .. ومعاك ثلاث شيكات
- أبدا يابيه مااستبدلتش حاجة
- يعنى كل اللى معاك شيك واحد
- نظر خيشة إلى محاميه قبل أن يرد .. فرد المحامى
- أيوه باريس شيك واحد
- أنا باستجوب المتهم .. رد ياخيشة
- أيوه يابيه
- المدعى عليه بيقول إن معاك ثلاث شيكات.. والمدعى عليها قالت فى أقوالها كده
- أبدا يابيه
- ح أسجل أقوالك فى محضر الجلسة.. ومش ح احسب لك غير شيك واحد.. وإذا ادعيت بعد كده عليه بشيكات تانية يبقى ادعاء باطل
- اللى تحكم بيه يابيه

- سكت القاضي لحظة .. ثم سحب ورقة من الملف ورفعها فى وجه خيشة .. وقال له
- وعقد الزواج ده .. ليه ماجبتش سيرته ؟
 - المحامى قال لى مالوش لزوم
 - يعنى المتهمه زوجتك ؟
 - أيوه يابيه
 - وبعد أسبوع لما اكتشفت إن الشيك بدون رصيد .. كانت زوجتك وبنات فى بيتك ؟
 - أيوه يابيه
 - ولما كنت بتبعمتها .. تجيب لك فلوس كانت زوجتك وفى بيتك
 - ابدأ يابيه .. من يوم ما اتجوزتها ماخرجتهاش من البيت
 - ليه ؟
 - لأنى اكتشفت إنها عشيقته .. ومنعتها من الخروج
 - يعنى هى كانت بتنفذ أوامرك تحت ضغط .. ومش راضية عن اللى بتعمله فى المدعى عليه
 - باعتبارها زى ما بتقول عشيقته .. ولما وجدت فرصة هربت وعملت لك محضر وتوقع عليها الكشف
 - الطبى اللى أثبت إنها فى بيتك كانت مكروهه وتحت التعذيب
 - ماحصلش يابيه .. أنا معاى التسجيل ومستعد أسمع سعادتك اعترافها واعترافه
 - إزاي اكتشفت إن فهمى عشيقها .. ضبطتهم ؟
 - لقيت شيك مخبياه فى ملاسها محرر منه لها باربعين ألف جنيه
 - وإزاي سجلت اعترافهم ؟
 - ضربتها فاعترفت .. وهددته بتقديم الشيكات للنياية فاعترف .. فسجلت اعترافهم
 - الشيك معاك ؟
 - أيوه يابيه
 - أخرج الشيك من جيبه .. وقدمه للقاضى فرحا وهو يعتقد أن الكفة اصبحت لصالحه .. قرأه القاضى .. ثم قلب صفحات الملف إلى أن وصل إلى الشيك محل القضية .. ووضع الشيكين بجوار بعضهما
 - وتفحصهما طويلا .. ثم سأل خيشة
 - الشيك ده ضبطته امتى ؟
 - قبل ما تهرب يابيه .. وضربتها واعترفت انها كانت على علاقة به .. وهددته واعترف وسجلت لهم
 - كانت على علاقة قبل ما تتجوزك والا بعد الجواز ؟
 - قبل الجواز
 - لما شكيت انها عشيقته .. ليه كلفتها تطلب منه فلوس ؟
 - ماحصلش يابيه .. بعد ما اتجوزتها .. ماخرجتش إلا معاى .. لأنى كنت باخاف لو خرجت وحدها
 - تقابل
 - معنى كده ياخيشة إنه حرر لها الشيك قبل ما تتجوزها ؟
 - طبعاً يابيه
 - بس ياخيشة .. الشيكين نفس التصميم والطباعة واللون .. يعنى واضح إن الشيكين من دفتر واحد ..
 - وحتى الحبر واحد .. والرقم المسلسل المطبوع فى الشيك بتاعها ماشى مع المسلسل المطبوع فى

الشيك بتاعك ويعد برقمين.. يعنى حسب كلام فهمى.. الرقمين الللى بين الشيكين هما رقمين الشيكين الللى استبدلتهم من التلاجة.. يعنى واضح إن الشيكين اتحرروا فى وقت واحد أو بينهم أيام.. إيه ردك
- أبدا يابيه

-- وواضح إن الشيك بتاعها اتحرر بعد شيكاتك لأن رقمه بعدهم.. وهى زوجتك وفى بيتك وتحت الضغط والتعذيب.. واعترا فهم كان تحت الضغط والإكراه.. وتوقع فهمى على شيكك وشيكها كان فى بيتك.. وتحت نفس الظروف

.....

- رد ياخيشة

.....

وضع القاضى الشيكين فى الملف.. وأغلقة وقال.. (الحكم آخر الجلسة)

وخرجوا.. لكن ليس كما دخلوا.. خرج خيشة يتصبب عرقا وعيناه زائفتان ويبدو الإحباط على قسما وجهه.. وخرج محاميه يائسا وكلمه كلمات قليلة وانصرف.. وخرج فهمى مستبشرا والمحامى فرحا مهللا .. وقال له

- برافو.. أحسنت يا أستاذ.. أنقذت رأسك من جبل المشقة

- رينا يستر

- أكثر من كده .. أراهن على البراءة

- إيه الللى مخليك متأكد كده ؟

- أسئلة القاضى.. إنت ناسى إنه قبل ما يصبح قاضى كان وكيل نيابة.. كان بيستدرجه بأسئلة غير مباشرة.. كان عاوز يتأكد من واقعة التلاجة فسأله التلاجة كانت كام قدم.. ويتأكد من موضوع الابتزاز.. فاستدرجه لغاية ما اعترف إنه أخذ ألف جنيه وساعة وخاتم وكاميرا وعدة تليفون.. أسئلة كانت للتأكد من نقاط معينة يصل بها إلى الحقيقة.. والآخر وقعه فى تطابق الشيكين.. هو الللى غرق نفسه لما أظهر الشيك بتاعها.. وشفت لما غلط وقال (ما هو بقى له شهور بيبكى) القاضى بص له ازاي

باشجاويش عجوز.. جر فهمى وخيشة إلى القفص.. تشبث فهمى بالأرض محتجا.. فهون عليه المحامى الأمر.. وقال

- مادام القاضى قال الحكم آخر الجلسة.. لاهد من دخول المتهمين القفص

دخلا القفص .. وأسند الباشجاويش ظهره على حديد القفص من الخارج.. وسقط برأسه على صدره وأغلق عينيه وغفا وهو واقف

- ماقلت لك ادفع واتقى شرى.. إنت مش قد المحاكم.. إن شاء الله القاضى ح يحكم عليك بثلاث سنوات.. وح يحكم لى بخمستاشر ألف جنيه.. وهى أنا ح أجيبها من تحت الأرض.. ح أخطف بنتها.. وقبل ما تترحل إنت على السجن ح تكون هى اترحلت على بيتى
- حرام عليك يابنى.. ماقلت لك مستعد أدفع عشرين بس ترد الشيكات

- كده ح آخذ قيمة الشيك وعليه وسام.. صحيح الشيكات الثانية ضاعوا على لكن ما بهمش ..
ح أخليها تعوضهم لى
- إزاي .. ح تسرحها
- فشر.. أنا مش معرص.. ح أخليها تضحك على بقف تانى زيك .. وتالت ورابع .. دى كنز
يا أستاذ.. شكل ومنظرو قيمة وسيما .. وكلامنجية.. زى ماجابتك بكرة تجيب غيرك

صحا الباشجاويش المعجوز من غفوته وغادرهما .. وطرق باب غرفة المداولة ودخل إلى القاضى ..
وجاءه المحامى سريعا .. ودس فمه بين القضبان فدى فهمى أذنه وتهامسا
- إنت بتتكلم معاه فى إيه .. إنت مش عارف إن الباشجاويش اللى عامل نايم ده .. مكلف من
القاضى بتصنت عليك
- مش معقول ؟
- ودخل دالوقت يبلغه اللى قلتوه
- أشكرك يارب .. الكلام اللى قلناه كله لصالحى

ومضت ساعة أخرى.. وقد خلت القاعة.. إلا من بعض المحامين المنتظرين صدور الأحكام.. وخلا
القفس إلا من فهمى وخيشة.. ثم خرج الكاتب بالأحكام.. نظر إلى المحامى وابتسم .. وجعلت عينا
فهمى.. وهو يسمع الحكم بالبراءة للثلاثة.. فنسى نفسه.. وهتف بأعلى صوته كما يهتف المتهمون
فى الأفلام المصرية (يحيا العدل) وكرر متعمدا أن يصل صوته إلى القاضى داخل غرفة المداولة..
وكرر ولم يمنعه أحد.. وخرج من القفس يكرر الجنيهات ويدسها فى يد الكاتب والحاجب
والباشجاويش والعساكر .. كل حسب حجمه.. واحتضن المحامى وقبله.. وتمنى أن يدخل إلى القاضى
ويحتضنه وقبله .. وأعلن رغبته للمحامى فحذره .. واتجها إلى باب الخروج .. والمحامى يقول
- يلا باعم .. رينا كرمك وخلصك من كل الشيكات فى قضية واحدة .

- لكن الحكم برأ الثلاثة
- برأك لأتلك اتخدعت.. وبرأها لأنها زوجته وكانت تحت ضغط وتهديد وإرهاب .. وبرأه لأن دعوانا
ضده بالنصب والاحتيال ماكانتش دعوى أصلية.. يعنى احنا مارفعناش فى البداية دعوى نتهمه
بالنصب والاحتيال.. دعوانا كانت فرعية.. كانت مجرد دفاع ضد اتهامه ومش إتهام أصلى
مباشر.. وبرأه فى حد ذاتها تكذيب لإدعائه وإدانة له وعقاب.. وكفاية إن الحكم شمل الشيكات
الأربعة وخلصك منهم.. ورفع عنك الحكم السابق بسنة .. ده غير عقاب رينا .. ضيع عليه عشرين
الف جنيه وشقة كانوا بين أيديه ومن طمعه رفضهم

وفتشا عن خيشة ليريا النتيجة على وجهه ويتشفيا فيه.. ولكنه كان قد أصبح (فص ملح وذاب)

استقبلته.. وفتحت ذراعيها وضمته إلى صدرها حتى قبل أن تعرف الحكم.. إن كان الإدانة فهو حزن المشاركة في الحزن و المواساة.. وإن كان البراءة فهو حزن المشاركة في الفرحه والتهنئة.. ولم يتحمل أن يضيف لحظات أخرى إلى ما باتت تعانيه من وساوس القلق والتوتر والخوف.. فهتف مباشرة (براءة) فزادت حزنه ورفعت كفيها واحتضنت رأسه وانهاالت عليه تقبيلًا.. فقال لها - الله مع الحق .. الانتصارات تتوالى.. فشلت خطته في الميرلاتد.. وفشلت في أسبوط .. وخسر شقته وشقتك .. وأخيرا خسر أمه في الشيكات.. وإن شاء الله ح يخسر قضية الطلاق .. ويخسر ك.. وج نبدأ من جديد.. ونحقق كل أحلامنا

في المساء... مع الشيشة والمعسل واللب الأبيض والفاكهة والترايزستور عاشوا بقلب واحد.. وانتظروا غفوة عم بدوى.. فصحبته زوجته إلى الداخل وعادت.. لينقلب السطح إلى صالة رقص.. رقصت وسام .. وصالت وجالت بفرحة غامرة .. ودارت في السطح كالفراشة

وغارت الست بديعة وقررت أن تظهر مواهبها.. فاخفت لحظات وعادت ترتدى ثوبا أخضر لامع يكشف عن كامل ذراعيها وكثيرا من صدرها.. ويمتدبل رأس تحزمت و(هات يارقص) في مباراة حرصت فيها على أن تتفوق وتحظى باهتمام وإعجاب الجمهور المكون من شخص واحد.. وظلت الغيرة والمنافسة بينهن لإظهار المواهب أكثر من ساعة.. وهو يدير مؤشر الترايزستور بين المحطات على الأغنيات ذات الموسيقى الراقصة

واقتربوا من الفجر.. وقد هدهما هذا المجهود الشاق.. فلملمت الست بديعة أشياءها ودخلت عشتها.. ولملمت وسام أشياءها.. وقبل أن يدلفا إلى العشة.. مالت برأسها على صدره في دلال وقالت (الف يامألفاتي) فقال لها.. (متهمه في الزنانة يتحرش بها الحارس) فاستبقت في السطح.. ودخلت لتنهى العشة كزنزانة وهي كسجينة.. ثم دخل بهرم طرفى شاربه الوهمى.. ويصرخ في السجينة (قوى يات فزى)

ولعبت الخمر برأسيهما.. فتحولت الزنانة الى جنة وهي إلى حورية وهو إلى رضوان

في الضحى .. أوقفته لتهمس له

- الظاهر من مجهود الرقص والخمرة.. رجع لى النزيف تانى.. دم اسود متجمد زى فتافيت الكبدية .. وظلا يعالجان الأمر طوال اليوم بمشروبات مبردة .. واستبدال قطعة قطن بأخرى .. ولكن الأمر استفحل فانزعجا.. ومع الغروب إرتديا ثيابهما وهما فى غاية القلق وتوجها إلى الطيبة.. وبعد الكشف صرخت فيهما

- إيه اللى مسكتكم كل ده.. الجنين ميت فى بطنك من ثلاث أيام.. كان ممكن يتسمم جسمك وتموتى.. لابد من إجراء عملية فورا.. اسبقونى على المستشفى.. ح أخلص العيادة وأحصلكم

وحررت لهما توصية للمستشفى لاستقبالهما وتجهيز غرفة العمليات.. فركبا تاكسى.. وتوالت الشوارع والحوانيت والناس أمام ناظريهما وهما تائهان مستسلمان للمصير المجهول.. وفى دقائق وصلا إلى المستشفى

جهزوا لها حجرة.. واستبدلوا ملابسها بجلباب آخر أبيض فضفاض.. وأرقدوها فى الفراش .. وذهبوا لتجهيز غرفة العمليات.. وبقيا فى الحجرة وحدهما.. فعلق ثيابها على المشجب.. ودفع بحدائنها تحت السرير.. وبقيت حقيبة يدها على (الكومدينو) بجوارها.. وجلس على طرف الفراش واحتوى كفها بين كفيه مهدئا مطمئنا.. وقد احتراهما الشعور بمنأخ المستشفى الرهيب.. وتملكتهما حالة إحباط وخوف من المجهول لم يحاول أيا منهما أن يخفيه عن الآخر

مدت يدها.. وسحبت الحقيبة وأخرجت بطاقتها وقدمتها له .. فأخذها مستفسرا

- خللى البطاقة معاك وخبيها.. لأننى سجلت نفسى فى دفتر المستشفى باسم مختلف
- مش فاهم ؟

- أنا لسه على ذمتة.. ومش عاوزه أسبب لك مشاكل.. ولا أربط اسمى باسمك وأورطك فى موقف محرج.. ماحدش ضامن الحياة من الموت.. إذا مت سيب المستشفى تدفنتى .. وكلها ارض الله وقبل أن يسألها المزيد انفجرت باكية

- وحشونى أولادى .. نفسى أشوفهم .. وأشوف أمى

- بعد العملية نحاول إن شاء الله

- أنا خايفة قوى يافهمى.. وحاسة إن دى النهاية.. وأنا قلقانة على حزنهم من بعدى.. وصيتى لك .. لو مت ماتلفهمش .. سيبهم على أمل إنى غايبة ويوم من الأيام ح أرجع لهم .. أمى فى يوم ح تموت وأولادى ح يكبروا وينسونى

والتمعت عينها وتأملته مليا ورفقت على شفتيها ابتسامة باهتة حزينة.. وهمست تنأجيه

- سبحانه الله.. أول مرة اتقابلنا وحدنا فى المكتب دبحت لك القطعة.. سقيتك مية سخنة علشان اختبر صبرك وطاعتك.. طلعت رجل عظيم.. كريم وحنين.. عقلك كبير وقلبك كبير

كنت أتمنى آجى المستشفى وأرقد الرقدة دى وأنا مراتك ..واللى فى بطنى ابنك.. نيجى اتنين ونخرج ثلاثة.. لكن حكمة ربنا انه مات لأنه ابن عدوى وعدوك وغريب عنى وعنك.. وجينا اتنين وح نخرج اتنين .. ومين يعلم.. يمكن تخرج وحدك

- قولى يارب

- يارب ترجع لى أولادى.. وتعلم ونعيش معاك ولو فى عشة فراح.. يارب يدى لك طولة العمر لغاية ما يصبغ عمرى ستين سنة.. علشان ما احتجش رجل تانى بعدك .. قلت لك فى يوم.. انا عرفت رجالة عدد شعر راسى.. لكن صدقتنى مش مهم العدد.. المهم إن انت بهم كلهم.. وانا مقتنعة إنى ما عرفتش فى كل عمرى رجل غيرك.. إذا مت فده قدرك أيها الرجل الجميل.. إحزن وفرغ حزنك فى رواية تحكى فيها قصتنا الجميلة.. قول فيها إنى حبيتك.. وزاد حبى لك بعد عشتتنا.. شهاملك وكرمك وتسامحك

زرعوا حبك فى قلبى.. انت عارف انى ما كنتش بارتاح لما تقول لى باعبدك.. لكن اسمعها منى
يا فهمى.. انا باعبدك أنا عارفة إنك بتحب الصدق.. ووح تقول إنى كنت ظالمة.. لكن قول كمان إنى
كنت مظلومة.. يمكن يقرأها أولادى لما يكبروا.. ويفتكرونى وينصفونى ويسامحونى.. وياريت إنت
كمان تسامحنى

عن يمينها سجانة وعن يسارها سجانة فى ثيابهما الزرقاء وغطاء الرأس الأبيض.. ساقتاها إلى غرفة
العمليات.. فنظرت إليه مستجدة كأنها مسافة إلى غرفة الإعدام

ولم يحتمل الموقف.. فغادر المستشفى إلى المقهى.. وجلس مع نفسه فى حسابات وذكريات
لا تنتهى.. وعاد بعد ساعة فاستقبلته إحدى الحكيمات بابتسامة وهتفت (الحمد لله على سلامة
المدام.. العملية نجحت) وأشارت إلى الحجرة التى كانت بها.. فاندفع إليها
وجدها فى غيبوبة مابعد البنج وجبينها يتفصد عرقا.. أرشدته الحكيمة أن يدلك لها أطرافها لتفريق
وغادرتهما وأغلقت الباب.. فأخذ يدلك ذراعيها وساقها.. ثم سقط بصدرة فوق صدرها
واحتضنها.. وقبل نهديها ووجهها ورأسها.. ثم قبل بطنها وفخذها وساقها.. وبكى تحت
قدميها.. ولم يكن يدرى أنه يكن لها كل هذا الحب

أفاقت على دموعه وقبلاته.. فتحسست رأسه.. ثم التفتت كفه وقبلته واحتفظت به بين كفيها
وبابتسامة مريضة همست بصوت واهن

- بتحبينى يا فهمى ؟

- باموت فيكى

- لأ.. بلاش سيرة الموت.. قول باعيش فيكى.. أنا عاوزه أعيش علشان أسعدك.. وأعوضك عن كل
اللى فات.. ح تسافر يا فهمى.. ح تسافر بعيد عن كل المشاكل.. ووح نعيش عمرنا من جديد.. وأركب
أنا وانت قطار واحد.. لغاية واحدة.. وهدف واحد.. قطار عجلاته من أحلامنا.. كمل يا فهمى.. عاوزه
أسمع كلامك الحلو.. فاكرو

- أركب معك قطار الحياة لنقضى معا مابقى من العمر.. من خلال حلم يعلو ويرتفع ويسمو فوق
الواقع المر الذى نعيشه.. نتجاوز كل تجربتى وتجربتك.. نتجاوز كل مافاتنى وفاتك.. نركب معا
قطارا للحياة.. نصنع عجلاته ونتحكم فى اتجاهاته وسفرياته حسب أحلامنا

وتخلت كفاها عن كفه.. وغفت مرة أخرى

كلمها فلم ترد.. وهزها فلم تنتبه.. وتحسس صدرها فلم يرتفع.. وسقط بأذنه إلى قلبها فلم يذب..
وأمسك بنبضها مدعورا فلم ينبض.. ثم عاد يحاول فتأكد.. وفكر سريعا سريعا.. وتذكر وصيتها
وتردد.. وتردد.. ثم قرر.. وتسلل خارجا

انتهى من شارع المستشفى يجر قدميه أو تجره قدماه إلى شارع الكورنيش.. عبره في غير حذر كما كانت تفعل.. كانت ترفع ذراعها تأمر السيارات أن تتوقف وتعبر بسرعة .. أما هو فقد تجاوز ذراعه وتحركت قدماه في بطة .. كأنه يعرض السيارات على قتله

جلس على دكة خشبية على الكورنيش.. ظهره للشارع والسيارات والمارة ووجهه للنيل .. واستسلم لقلبه .. بردت أطرافه .. وتهدأت حواسه فلم يعد يسمع زئير السيارات خلفه .. ولا يرى أضواء الكازينوهات أمامه على الهر الثاني .. وانفلتت أعصابه وأرادته فبال في مكانه .. واطبقت السماء والأرض على أنفاسه كشقى الرجا ودارت كل شقة في اتجاه فطحته وسحقته .. ففرت روحه مذعورة وتعلقت في الهواء.. تتحسر على ما أصبح عليه حاله .. وغاب عن الوعي

ومضت ساعات.. ومع لسعة برد الفجر بدأت أطرافه تتحرك .. وحواسه تعى.. وروحه تعود.. فأدرك الأرض تحت قدميه والسماء فوق رأسه.. وأن القمر قد رحل.. وأضواء الكازينوهات قد أطفئت.. والرياح تصرخ فوق سطح النيل وتتحرش بالمياه فترعشها بهريق فضى كلون الفجر

مذهولا .. عادت له الذاكرة .. فانهمرت دموعه كالمنطر
(مت ياوسام.. مت غريبة عن أرضك وبيتك واسمك واسم جدك العمدة وجدك الهاشا اللذان عشت
عمرك تشدقين بهما.. مت كجندى مجهول في أرض مجهولة وباسم مجهول.. ترى ماهو الاسم الذي
اخترته لنفسك وسجلته في المستشفى.. سألتك يوما عن أفضل سيدة كنت تتمنين أن تكونيها..
وخبرتك بين.. كليوباترا ونفرتيتي وشجرة الدر وجان دارك وماري كوري.. ولكنك اخترت مريم
العلرا.. مت ياوسام.. ترى هل مت مفترية أم مفترى عليك.. مت جانية أم مجنى عليك .. ظالمة
أم مظلومة

للأسف لم تتحقق أمنيتك.. ولم نخرج اثنين.. وخرجت وحدي.. سأتركك للمستشفى تدفنك حيث لا
أدرى.. وسأنفذ وصيتك.. سأخفي بطاقتك.. وأخفي خبر وفاتك عن أولادك وأهلك وكل اصداقائك
واحباثك وعشاقك.. ليعيشوا على أمل أن تعودى لهم يوما

انا وحدي اعرف انك لن تعودى .. انا وحدي دون العالمين .. سأتحمل خبر وفاتك واحزن عليك..
وانت حية قلت لك (باحبك) لم تسمعنيها.. ليتك تسمعنيها وانت ميتة (باحبك).. قلت لك وانت حية
(باموت فيكى) قلت (لا.. قل باعيش فيكى) ليتك تسمعنيها وانت ميتة.. سوف أعيش فيكى ..
ذكرى حية .. أبدا لا تموت.. وسأكتب قصتك.. وعزائى.. كل عزائى.. أنى كما وعدتك .. سوف أحكى
الحقيقة

» تهت «

صدر للمؤلف

١٩٧٤	رواية عاطفية طويلة	الندم
١٩٩٣	رواية تسجيلية من أدب السجن	الزنزانة
٢٠٠٠	رواية واقعية من سجلات المحاكم	المغرورة
تحت الطبع	الجزء الثانى من رواية الزنزانة	القضية

نتاج منحة تفريغ فى الرواية من المجلس الأعلى للغة والأدب بوزارة الثقافة لمدة سبع سنوات متصلة

١٩٨٥	رواية	أحلام المرحوم
١٩٨٦	رواية	البادئ أظلم
١٩٨٧	رواية	الحب الأسود
١٩٨٨	رواية	العشاء الأخير
١٩٨٩	رواية	الغاية والوسيلة
١٩٩٠	رواية	الماضى
١٩٩١	رواية	الحرم

الناشر
مكتب النيل للطبع والنشر
١٢ شارع عبده بدران
ميدان الباشا - المنيل
ت : ٣٦٢٢٥٧٨

رقم الإيداع بدار الكتيب
٢٠٠٠/٤٤٦٨
التروقم الدولى
٩٧٧-٥٤١٤-١٩-٩
فس : ٢٠٠٠/٢/٢٠

تحذير

تم تسجيل هذه الرواية بالشهر العقارى ويحتفظ المؤلف بحق النشر والطبع .. وغير مسموح بانتاج أي مصنف فنى عن موضوعها وأحداثها إلا باتفاق مسبق وتعاقدا مكتوب مع المؤلف .

تليفون المؤلف

٣٦٢٢٥٧٨